

Re' Lok' laj Huj Wilic Wi' Ribiral

Quibanoj Take Nahsil Raj Tahkanel i Jesus

Re' take k'oric xiban i ma' Cax chi p'utbal reh huj wili

1 ¹Ajabes ma' Teyopilo: Chipam i pet nihuj xnitak'a' je aweh, ar xnik'or je aweh ribiral i Jesus chirij haj wilic take xiban pa ric'acharic je' wo' chirij haj wilic take c'uhtunic xiban. Re' ribiral re're' cu pa ri'sil xnip'ut je rik'ormojic aweh ²cu rehtal xponic ruc' i k'ij naxc'amaric wo' chic johtok pan taxaj.

Re' ructic i Jesus ch'il wo' i rojic johtok pan taxaj

Nok cu ma' ja' nc'amaric ta johtok pan taxaj, re' Jesus chi c'ahchi' riye'eric rik'orbal ru'um Lok' laj Uxlabal xik'or queh nahsil raj tahkanel nic' wach naquinimej i tak'anic xiban cahnok queh. ³Chi je' aj re' k'uru', re' Jesus chirij nok uctunak chic cho chi quixilac take camnak naxcansjic je, xic'uhbalej cahnok take nahsil raj tahkanel nok ja' noj ta johtok pan taxaj eh je' wo' xic'uh taj rib queh take nahsil raj tahkanel chi manlic rok rik'ab eh ma' hab ta wach enk'oric chi ma' ta coric chi xuctic wo' chic i Jesus maj ma' xa jenaj ta pech xic'uh taj rib je' la' re' xiban chiwach ca'winak k'ij. Chiwach take k'ij re're' xic'uhbalej wo' take nahsil raj tahkanel chirij rajawric i Dios chi k'atal k'oric.

⁴Chirij aj chic ru' naxponic i k'ij chi re' Jesus nari'amaric chic johtok pan taxaj, junpech re' take junlaj chi nahsil raj tahkanel naxquimol quib rich'il chipam pat wilqueb wi', je' wili xk'ormojic queh ru'um i Jesus:

«Ma' telic tak je ayu' pan tinamit Jerusalen. Chawuy'ej pe tak naponok wach i k'oroj ru'um kAjaw Dios chi nariyeb cho aweh tak maj re' hat-tak abiram tak chic wuc' chi re're' xik'or chi naritak'ab cho i Lok' laj Uxlabal chana tak. Je' re' nok ti'uyunok tak ayu' ⁵maj je' ricab chi til coric chi re' Waj xikahsaj aha' tak, til coric wo' chi re' Dios nariyeb cho aweh tak i Lok' laj rUxlabal chipam quib xib ok k'ij, nqui queh.

⁶Chirij chic wili re' take quimolom quib ruc' i Jesus je' wili xquik'or reh:

«K-Ajaw Jesus, re' Dios, naripahbꝰ na i kaK'atal K'oric hoj ra' ri'sil cho ma' Israhel? Wi je' re', chipam na take k'ij wili nꝰcojoric chi kaK'atal K'oric? nqui take reh.

⁷Re' Jesus je' wili quic'u'ljic xiban:

«Re' k'ij, ch'íl i ora rik'atam rij i wAjaw Dios chi naribanam re're', xa pan k'ab wo' wilic. Je' aj re' ru' ma' ye'oj ta aweh hat-tak chi nꝰweht'alim tak re're'.⁸Haj cok wilic riyeb aweh tak i Dios chi nꝰweht'alim tak, re' chi nachitak'a' cho Lok' laj rUxlabal chana tak, re' hat-tak nꝰc'ulum ricowil ak'orbak tak reh chi nꝰk'orom tak ribiral niC'uhbal. Je' re' ajic re' hat-tak nꝰyeb achi' tak chiwij i hin, re' cok ru' ayu' pan tinamit Jerusalem nꝰp'utum tak je cu rehtal nasutej tak pꝰm chi'nchel tinamit pa riyuk'ul Jureya, je' wo' pan quiyuk'ul take aj Samarya cu rehtal nꝰwojic tak lok chi junsut wach ac'al, nqui queh.

⁹Chirij chic ru' nok ricohlam chic k'oric i Jesus, xc'amaric johtok pan taxaj chi c'ahchi' rilmijic johtok cu'um take quimolom quib ar. Re' take wilqueb ar quilow nic' wach oquic xiban i Jesus pan jenaj sutz' xsahchic wi' chi quiwach eh ma' cu ta chic xquilow wach.

Re' take nahsil c'amol bꝰh raj tahkanel i Jesus xisoljic wo' chic je Jerusalem

¹⁰Ar aj ru' nok xa cu c'ahchi' wo' quilom johtok i ojic xiban i Jesus pan taxaj, cu re' chic queh take nahsil re're' quib take winak xa sak chic quiso' xi'oj pah'ok chi quichel take iloj nca'n johtok pan taxaj. ¹¹Re' take quib winak re're' je' wili xquik'or:

«Hat-tak aj Calileya chabiraj tak i wili: Re' Jesus re' xawilow tak nic' wach naxc'amaric johtok pan taxaj, re' wo' chic re' narisoljic cho rica'pech xa re' la' nic' pa' wach chi pan jenaj sutz' ojic xiban johtok, je' wo' chic re' c'ulic naribanam lok. Je' re' k'uru' ma' ntz'iric chic awach tak chi iloj johtok pan taxaj, nqui banol queh.

¹²Chi je' aj re', re' take nahsil raj tahkanel i Jesus xi'elic cho chipam i ye'ab re' ribihnej “Ye'ab queh take tic Olijwo ribihnal” re' je' na q'uisin ma' mera ora chi behic wilic je ru'c' tinamit Jerusalem eh xisoljic wo' chic cho chipam i tinamit Jerusalem. ¹³Naxiponic chipam i tinamit re're', xi'ouic cok chipam jenaj pat eh xijohtic johtok chi rimoloric quib pa rica'tik pat. Chi quixilac take xquimol quib ar wilqueb take je' wili quibihnal: Re' ma' Luch, re' ma' Jacowo, re' ma' Wan, re' ma' Tirix, re' ma' Peh, re' ma' Max, re' ma' Wartolo, re' ma' Tiyoh. Je' wo' ar wilic i Jacowo ch'íl ma' Juras re' rac'un take ma' Alpeyo. Wilic wo' ar ma' Simon re' wih'inak chipam quicomonil take quixowonic wach aj Roma Selote quibihnal.

¹⁴Re' take aj nimiral re're' xiban xa jenaj chic wach quic'ux quich'il take ixok quitahkanic wo' reh Jesus, je' wo' quich'il take richak' i Jesus, ch'íl wo' i quitut re' Mariya ribihnal eh chi je' re' xquiyew quic'ux chi tij chi ripahkaljic johtok chi naritak'abjic cho Lok' laj rUxlabal i Dios chi quina.

Re' richihiric wach rijelow-bal i Juras

¹⁵Chiwach take cho k'ij nok quip'utum chic rimoloric quib take aj niminel, junpech naxquimol quib je' na wack'ahl (120) chi aj niminel chi richihiric rijelow-bal i Juras, re' ma' Luch xpa'lajic johtok chi quixilac eh je' wili xik'or queh:

¹⁶«Was tak nichak', xa najtir wo' cho k'ij nok ja' ricansaj ta rib i Juras re' xc'ambic quibeh take xicansanic reh i Jesus, re' Lok' laj rUxlabal i Dios xk'oric chic cho chirij re're' naxquimeljic cho richi' i ma' Tawiy. Ru'um aj re', re' k'oric k'oroj cho chirij i Juras chi tocom chic narichopbic reh ricamaj, til curman chi xponic wach. ¹⁷Re' Juras re're', re' kich'il nak cho hoj eh chihoj wo' nak wach ru'um Jesus reh camanic wili, ¹⁸xijihc'aj rib chipam junseht ye'ab xlok'oric ruc' i tojbal xye'eric reh ru'um i ma' holohic ta laj mahc xiban ruc' rik'ahsjic i Jesus. Re're' naxijihc'aj rib, xk'ehbic wo' jok wach ac'al chi pachlic eh naxq'uer i pam xi'elic take lok rak'sa'. Re' quimic xiban i Juras ar xc'uluric ¹⁹chipam i ye'ab re' xibihnej cu'um take aj Jerusalem chi “Haseltama” chirij chi camnak chic je i Juras eh je' re' ribihnal xquicoj maj je' wili raj rik'orom pan kak'orbak: “Re' Ye'ab xlok'oric ruc' ritz'akil ribanoj i jenaj winak re' xicansaj rib”.

²⁰«Re' xc'uluric cho ruc' Juras, nwilow i hin chi ar wilic ribiral chipam i huj re' tz'ihmbimaj wj' take moloj wach bich maj ar je' wili rik'or:

“Cahnok ta nak riye'ab chi cahnel ye'ab chic eh ma' ta nak chic hab wach nc'acharic chipam, nqui rik'or.

Je' wo' chic wili rik'or chipam i Lok' laj Huj re're':

“Re' ricamaj chi c'amol beh, tocom ok chic chopbok reh, nqui wo' rik'or.

²¹«Chi je' re' k'uru', chihirok wach jeno' rijelow-bal i Juras chi quixilac take kich aj tahkanel oconak take cho chi kaxilac chiwach take cho k'ij nok re' Lok' laj Ajabes Jesus nkajic njohtic chi behic chi kaxilac. ²²Je' re' ajic re' kich aj tahkanel re' rip'utum cho behic chirij i Jesus cu ruc' cho rikahsjic rihā' ru'um i Wan cu rehtal naxc'amaric johtok pan taxaj nok iloj nka'n johtok reh, re' aj re' cojorok chi rijelow-bal i Juras chi kaman i hoj chi rik'ormojic ribiral chi re' Jesus xuctic wo' chic chi quixilac take camnak, nqui ma' Luch.

²³Chirij aj re', re' take mololqueb ar p'uht quic'sam pan k'oric take quib chi winak je' wili quibihnal: Re' ma' Matiyas rich'il i ma' Chep re' ribihnej wo' chi Warsawas on Justo. ²⁴Je' re' nok xi'oquic chi tij chiwach i Dios eh je' wili xquik'or johtok reh:

«Hat kAjaw Dios re' teht'alanic reh pam i camna take c'acharel wili, chac'uhaj keh haj wilic queh i quib wili achihoj i hat, ²⁵reh chi naroquic chi kaman chipam i camanic wili i hoj pahbamaj chi aj k'oroq. Je' re' nkapahkaj aweh ru'um nok re' camanic wili xicana' cahnok i Juras ru'um reh rimemil laj no'jbal re' xichihbej je wj' riye'ab chi naric'ulum i ti'c'axic, nqui take pan quitij naxquisic' rij hab wach narichopbic reh camanic re're'.

²⁶Je' re' nok naxquisic' rij hab wach naricahnic pa rijelow-bal i Juras, tz'eht xkajic china i ma' Matiyas. Je' aj re' ru', re' ma' Matiyas xoquic chi quiman take i junlaj chi nahsil take raj tahkanel i Jesus.

Re' rikajic cho Lok' laj rUxlabal i Dios chi quina take aj niminel

2 ¹Chirij chic ru' naxponic rik'ijil i nink'ij Pentecostes ribihnal, chi'nchel take aj niminel quimolom quib chi xa jenaj chic wach quic'ux. ²Je' aj re' nok quimolom quib chi je' re', cu re' chic queh ru' nquibiraj chi xa njumic chic xkajic cho pan taxaj i xa je' chic ricab jenaj cow laj tew eh cu xoquic cok chipam i pat tz'ukulqueb wi'. ³Je' re' k'uru' re' take aj niminel re're' xquillow chi wilic chic chi quina xa je' ricab riwi' ju' cak' take c'acharel eh xc'utunic chi xa je' chic ricab xak i k'ak' take. Je' re' ajic re' take je' riwi' ju' cak' c'acharel re're', xquipuhcay quib china ju'jun chi aj niminel wilqueb ar ⁴eh chi je' re' chi'nchel take aj niminel re're' xye'eric cajawric chi naquik'oric ru'um i Lok' laj Uxlabal. Chi je' re' xquip'ut k'oric pan tocom chic k'oric re' k'orel nic' pa' wach quik'orbal xye'eric queh ru'um i Lok' laj Uxlabal ⁵maj chipam rik'ijil i nink'ij re're', k'e' q'uihal take ra' ri'sil cho ma' Israhel je' ruc' til aj nimem take reh C'uhbal Ye'oj reh Moyses, xquimol quib ar Jerusalem naxic'ulic lok chi junsut tinamit wilqueb chi ri'sil rok k'ab i k'atal k'oric aj Roma.

⁶Re' take tinamit tubulqueb ponok ar Jerusalem chi nink'ijinic, naxoj quimol quib re' xiban wi' i xa je' chic cow laj tew re're', k'e' naxsahchic quic'ux maj re' chic quik'orbal quik'oric wi' chi quiju'junal, xquibiraj chi c'ahchi' quik'oric wi' take raj tahkanel i Jesus. ⁷Je' aj re' ru' chi k'e' sahchanak quic'ux je' wili xquik'or:

«Ma' re' ta na nchel aj Calileya take c'acharel c'ahchi' quik'oric wili? ⁸Chaj wa'ric k'uru' nkabiraj chi c'ahchi' quik'oric pan kak'orbal re' hoj q'uihinak cho wi' ⁹chi kunchelal i hoj re' je' wili ribihnal katinamital? Re' hoj aj Partiya, aj Merya, aj Elam, aj pa riyuk'ul Mesopotamya ch'il Jureya, aj Caparosya, aj Ponto, aj Asya, ¹⁰aj Pirjiya, aj Panpilya, aj Ejipto ch'il wo' aj pa riyuk'ul Aprica re' wilic pa ric'ula't i Sirene. Nic' wach k'uru' chi re' hoj, je' chi aj Roma je' ruc' c'achalcoj pan tinamit ayu', je' chi ra' ri'sil cho ma' Israhel, je' chi ma' re' ta take ra' ri'sil cho ma' Israhel je' ruc' xa quicojom quib chipam kaniminic i hoj ra' ri'sil cho ma' Israhel ¹¹c'ahchi' kabiram pan kak'orbal i k'oric nca'n take c'acharel wili? Je' re' k'uru' nic' wach nok re' hoj, je' chi hoj aj Creta, je' chi hoj aj Arawya c'ahchi' kabiram pan kak'orbal i k'oric nca'n take wili chirij nic' nimal sachbal c'uxlis riban i Dios? nqui take.

¹²Je' aj re' ru' chi quixilac take chi'nchel i tinamit xquimol quib ar wilic take je' wili xquik'or chi quiwach chi k'e' sahchanak quic'ux:

«Chaj bih nchel raj rik'orom re' xc'uluric wili? nqui xquik'or chi quiwach.

¹³Xa re' la' wilic wo' take tocom je' wili tohk' quik'orom chi xa quise'ibal:

«Re' take wili hamoj take chi ha' je' ruc' nxohc'sonic, nqui take.

Je' re' xquik'or ru'um ma' xquirak ta chirij i k'oric xca'n take aj niminel re're'.

14 Chi quic'u'ljic aj take tinamit re're', re' ma' Luch xpa'lajic johtok ch'il take junlaj chi rich nahsil raj tahkanel i Jesus eh je' wili xik'or queh ruc' cow laj k'oric:

«Hat-tak wich ra' ri'sil cho ma' Israhel re' xatc'ulic tak lok ayu' Jerusalen ch'il wo' hat-tak re' tic'acharic tak pan tinamit ayu', chacoj tak rehtal i nanik'orom, reh chi nana'bem tak chaj bih raj rik'orom re' xc'uluric. Chabiraj tak i wili k'uru': 15 Re' nacapaj hat-tak chi hoj hamoj chi ha' je' ruc' nxohc'sonic, ma' coric ta maj wi ta nak xkuq'uej i ha' re're' ma' re' ta nak chipam i ora wili xka'n ru'um nok re' belejeb ora wili wilic chi cuybal wic' chi banoj tij. 16 Re' xc'uluric wili re' la' je' ricab rik'orom cho raj k'orol C'uhbal i Dios ma' Johel ribihnal:

17 «Re' Dios je' wili xik'or:

‘Re' hin Dios, chic ok q'uisin ma' nponic i rik'ijil chi nawoquic chi k'atal k'oric chi quina i tinamit nanitak'ab jok i Lok' laj wUxlabal chi quina take c'acharel eh naniban chi je' re' je' wili naric'uluric:

Re' take re're' naquik'orom i niC'uhbal;

re' take q'uijolak wilic take naric'uhtjic queh pan nak' quiwach.

Re' chic take rijeb tak winak naquilom take la'wach pan quiwirc.

18 Til aj coric chiwach take k'ij re're' nanitak'ab jok i Lok' laj wUxlabal chi quina take waj tz'e' wach chi winak chi ixok reh chi naquik'orom i niC'uhbal.

19 Je' wo', nanibanam chi ayu' pan taxaj enc'utunic take rehtalil chi sachbal c'uxlis

eh ar jok wach ac'al enc'utunic wo' take rehtalil je' ricab ruc' take k'ak'anic re' nchihcjic w'i quic'

eh re' nelic wo' cho w'i risibil i k'ak' koplic, nqui Dios.

20 Je' aj re' ru' nok xa q'uisin ok chic ma' nponic i k'ij re're', re' naquilom w'i i tinamit chi re' Lok' laj Ajabes naric'uhtam rib ruc' riminal rajawric,

re' risakomal i k'ij narik'ekombic wach

eh re' risakomil i poh naricakbic wach,

xa je' chic ricab nca'yic i quic' naribanam.

21 Chipam aj i k'ij nac'ulurok take wili, re' xa hab pa' wach queh aj niminel reh Lok' laj Ajabes eripahkaj reh pan tij chi enco'ljic, xa re' wo' re' narirakam rico'lbil, nqui Dios, nqui rik'orom cho ma' Johel.

22 «Je' aj re' ru' wich ra' ri'sil cho ma' Israhel chabiraj tak i nanik'orom wili: Re' Dios xiyew chi eht'aljic chaxilac tak chi re' Jesus re' ribihnej chi aj Nasaret xa re' wo' re' ye'oj rajawric. Re' hat-tak aweht'alim tak chic re're' maj chaxilac hat-tak yohbal wach take rehtalil ch'il take lok' laj nawal sachbal c'uxlis xiban i Dios ruc' rok k'ab i Jesus. 23 Xa re' la' chic ru', ru'um nok tik'imaj chic cho wach ru'um i Dios eh eht'alamaj wo' chic cho ru'um, re' Jesus naxk'ahsjic pan ak'ab tak, re' hat-tak

xacansaj tak je naxayew tak pan quik'ab take sol aj Roma. ²⁴Tob ta jenaj riminal ti'c'axic xic'ul i Jesus naxquimic je, re' Dios xucsaj wo' chic cho chi quixilac take camnak maj ma' jaruj ta xiban chi xahnic chi camnak chi junpech. ²⁵Je' re' nik'or maj je' re' xitz'ihmbaj cho i ma' Tawiy chirij i Jesus naxik'or chi je' wili:

“Re' hin xa nwilow wo' chi re' hat lok' laj wAjaw xa wilcat wo' wuc' chi nitobjic.

Ru'um aj re' ma'xta bih equinyo'jic so' wi' chiwach i quimic.

²⁶K'e' chic risukquil i wamna nchalic chi quinbichinic chi suk ruc' nich'i.

Je' wo', ru'um chi re' hat lok' laj wAjaw xa wilcat wo' wuc' chi nitobjic naric'uluric chi chiwach i junc'am reh nic'acharic chi quixilac take camnak,

re' hin naniwih'ic chi ch'iclic nic'ux chawij i hat

²⁷maj ma'xta quinacanab chipam quiye'ab take camnak, re' “Hares” ribihnal

eh xa ta wo' nak nacanab chi narit'u'lujic niti'jolal i hin Lok' laj awAc'un re' k'e' quinac'ax.

²⁸Je' re' k'uru' xa je' ta nak ricab chi re' hat c'ahchi' ac'uhtunic win haj wilic i beh nanichopom je,

re' hin xa awu'um wo' i hat weht'alim chaj bih raj banaric chi nanic'acharic wo' chic.

Je' re' ajic ru'um chi xa quinawihch'ilej wo', re' hin k'e' nsukbic nic'ux ru'um re're', nqui xitz'ihmbaj cho ma' Tawiy.

²⁹«Je' re' ru' was tak nichak', til riorquil nik'or aweh tak chi re' kaj najtir k'ij ma' Tawiy ma' re' ta chirij ric'acharic xk'oric cho maj re're' camnak chic cho eh ru'um aj re' cu yu'na chi k'ij cu nkilow wo' wach rimuk'unbal re' xmuk'unjic cho wi' najtir k'ij. ³⁰Raj ma' Tawiy naxk'oric cho chirij la' i Jesus xk'oric. Je' re' nok naxk'oric cho ma' Tawiy, xk'oric cho chi je' ricab jenaj raj k'orol C'uhbal i Dios eh ru'um re' xeht'alij chi re' Dios xiyew rik'orbal naxik'or reh chi je' wili:

«Re' hin niyew nik'orbal aweh, chi quixilac take awa' awi'sil nawucsam i k'atal k'oric re' nanipahbab chi re're' narik'atbic k'oric, nqui Dios reh.

³¹«Chi je' re', re' ma' Tawiy xa je' na nchel c'ahchi' ta nak chic rilom chi na'lic reh ructic i Jesus re' Pahbamaj chi K'atal K'oric, xik'or cho chi re're' ma'xta ricahnic chipam i ye'ab “Hares” ribihnal eh je' wo' chi re' riti'jolal ma'xta rit'u'lujic. Je' aj re' xik'or ma' Tawiy maj xc'uhtjic cho reh najtir k'ij chi re' Jesus naructic wo' chic chi quixilac camnak. ³²Je' re' k'uru' nic' pa' wach rik'orom cho ribiral ma' Tawiy, re' Dios xucsaj wo' cho Jesus chi quixilac take camnak eh yu'na chi'nchel hoj raj tahkanel i Jesus c'ahchi' kayeb kachi' chi til coric chi xuctic wo' chic cho.

³³«Je' wo' chic, re' hat-tak yu'na nawilow tak eh nabiraj wo' tak chi c'ahchi' kak'oric pan ak'orbal chi'nchel hat-tak eh re' wili xa ru'um reh rajawric i Jesus xc'ulmujic chi je' re', maj naxye'eric wo' chic rilok'il chi xwih'ic wo' chic cok chi richel i Dios, xitak'a' cho keh i Lok' laj Uxlabal re' k'orog cho ribiral ru'um

kAjaw Dios chi nariyeb cho keh. Je' re' ajic re' Jesus xitak'a' cho keh Lok' laj Uxlabal reh chi nakak'orom i riC'uhal. ³⁴Til nik'or ajic chi re' xjohtic johtok pan taxaj chi na'lic reh ma' re' ta ma' Tawiy, re' la' i kAjaw Jesus maj re' aj wo' ma' Tawiy xtz'ihminic reh take k'oric xik'or chi je' wili:

«Re' Lok' laj Ajabes Dios je' wili xik'or reh Ajabes chi nina re' Pahbamaj chi K'atal K'oric:

Je' ricab naric'ul rilok'il jeno' winak ntz'ukunjic cok chi richel jeno' k'atal k'oric,

je' aj wo' re' nachac'ul i hat alok'il wili: Chi nawih'ic chinichel
³⁵ cu rehtal nawilom take awaj ixowonel nachayak'abej take pan awok, nqui xk'ormojic reh, nqui take k'oric xitz'ihmbaj cho ma' Tawiy.

³⁶«Je' re' k'uru', re' hat-tak wich ra' ri'sil cho ma' Israhel chaweht'alij tak chi manlic i coric wili chi re' Jesus re' xayew tak chi cansjic wach curus xye'eric rilok'il ru'um i Dios chi Ajabes eh je' wo' xpahbabjic chi K'atal K'oric chi quina chi'nchel tinamit, nqui ma' Luch.

³⁷Naxquibiraj chi je' re' nic' q'uihal take wilqueb ar, xchalic riti'quill quic'ux ru'um xquirak chirij chi mahc xca'n. Je' re' nok je' wili xquik'or reh ma' Luch ch'il take rich nahsil raj tahkanel i Jesus:

«Hat-tak kas kachak', chaj bih raj banaric reh chi encuyuric i kamahc? nqui take.

³⁸Re' ma' Luch je' wo' chic wili xik'or queh:

«Was tak nichak', reh chi encuyuric amahc tak chajal wach ano'jbal tak eh re' hoj enkakahsaj aha' chi aju'junal tak reh chi etoquic tak chi hat-tak raj tahkanel i Jesus re' Pahbamaj chi K'atal K'oric. Chi je' re' enye'eric wo' aweh tak i Lok' laj rUxlabal i Dios je' ricab chi c'ahchi' ta nak riye'eric jeno' asi tak ³⁹maj re' Lok' laj rUxlabal i Dios k'oroj chi nariye'eric queh take nic' nimal nariyuk'em i kAjaw Dios chi rac'un rixk'un take. Je' re' ajic re' Lok' laj Uxlabal nariye'eric aweh hat-tak ch'il take awa' awi'sil tak, je' wo' nariye'eric queh take ma' re' ta ra' ri'sil cho ma' Israhel, nqui ma' Luch.

⁴⁰Ruc' take k'oric xik'or re're' ch'il wo' take tocom chic k'oric xiban, re' ma' Luch xik'or ribiral i Jesus eh xik'il wo' take tinamit chi je' wili:

«Re' quino'jbal take kich ti'ljolal ma' holohic ta. Ru'um aj re', re' hat-tak chajal wach ano'jbal tak reh chi etico'ljic tak chiwach i ti'c'axic narichalic chi quina kich ti'ljolal, nqui k'iloj xiban queh.

⁴¹Je' aj re' chipam i k'ij re're', je' na wuk-ik'o'b lajc'ahl (3,000) chi c'acharel xquinimej rik'orbal i Dios xik'or ma' Luch eh chi je' re' xkajsic wo' quiha' chi'nchel re're'. Chi je' aj re', re' take c'acharel re're' xi'oquic jenaj chi quixilac take aj nimal reh Jesus ⁴²eh chi xa jenaj chic wach quic'ux, xa elic wo' xquimol quib chi ribirmijic i c'uhbalanic nca'n take aj nahsil raj tahkanel i Jesus, je' wo' xa elic wo' xquimol quib chi ric'uxuric i caxlan wi'c rehtalil riquimic i Jesus je' wo' chi ribanaric quitij chiwach i Dios. ⁴³Xa chiwach aj wo' k'ij re're', re' take aj nahsil raj tahkanel i Jesus ma' q'uisin ta take lok' laj nawal xca'n ribanaric eh ruc' re're' q'uihal queh aj Jerusalen xoquic cho quiyo'jic.

⁴⁴Nic' pa' q'uihal take xinimic reh riC'uhbal i Dios, xa xic'acharic wo' chi xa jenaj wach quic'ux eh xquicoj wo' pan quicapew-bal chi re' pa' bih wilic queh chi quiju'junal, queh wo' chi quiwach pan comonil. ⁴⁵Je' aj re', re' ritz'akil quiy'e'ab on xa pa' chic bih queh nquic'ayej, re' take aj niminel re're' nquipuhcaj chi quina take quich aj niminel nok nwh'ic jeno' quic'axquial. ⁴⁶Ma' xa re' ta re' nca'n je' la' wo' re' take aj niminel re're', chi cunchelal chi xa jenaj chic wach quic'ux xa elic wo' nquimol quib chipam i Lok' laj Pat re' nlok'onjic wi' wach i Dios. Je' wo', nquiyuk'ej quib pan tak quipat chi ribanaric quiwa' quih'a' eh chi je' re' chi pan jenaj sukquil c'uxlis je' wo' chi pan ch'ublic laj c'uxlis wilqueb, nquic'ux wo' i caxlan wi'c rehtalil riquimic i Jesus. ⁴⁷Je' aj re' ru', re' quino'jbal take aj niminel re're' ruc' ritioxjic i Dios nca'n johtok k'e' nponic chi quiwach take tinamit eh chi je' re', re' kAjaw Jesus p'uht riq'uihsam cho wach quicomonil take moloj wach aj niminel ruc' coquic pan nimic take ye'oj chiquij chi naquico'ljic chiwach i ti'e'axic chalic reh.

Re' ma' Luch ch'il i Wan xquicowsaj jenaj winak sic rok

3 ¹Junpech, re' ma' Luch rich'il Wan xi'oj johtok chipam i Lok' laj Pat re' nlok'onjic wi' wach i Dios, pa ri'orahil i tij nbanaric xib ora reh rikajic i k'ij. ²Ar ajic pan ocbal reh pat re're', re' "Holohic" ribihnal nponic canabjok cho jenaj winak sic rok, cu pa rasbal wo' cho chi je' re'. Re' winak re're' kalakal nponic cahnok cho chi ch'i i ocbal reh pat re're' reh chi naripahkam rilimoxna queh take qu'loquic cok ar. ³Je' re' ajic naxilow chi re' ma' Luch ch'il i Wan oquic nca'n cok ar, xa nch'uk chic ric'ux p'uht ripahkam rilimoxna queh. ⁴Re' ma' Luch ch'il i Wan naxquibiraj chi je' re' je' wili xquik'or reh nok xa cow chic nquitz'ehtaj: «Koj-atz'ehtaj cho chi coric, nqui take reh.

⁵Naxibiraj chi je' re' i sic re're', xa cow chic xitz'ehtaj take maj pa ric'ux ru' naric'ulum la' nak so' ritz'ak cuc', ⁶xa re' la' ma' Luch je' wo' chic wili xik'or reh:

«Re' hoj ma'xta katz'ak chi enkayew aweh, haj cok wili eriban chi enkak'or aweh re' chi re' Jesus re' ribihnej chi aj Nasaret eh re' Pahbamaj wo' chi K'atal K'oric, re' wo' re' xye'bic rajawric kak'orbal chi quicowsajic take yowab ib. Ru'um aj re' nik'or aweh yu'na: Tipah'ok johtok eh tibehok chi coric, nqui ma' Luch.

⁷Chi je' re' ajic, re' ma' Luch xichop johtok chi risec'aj k'ab i sic re're' eh xucsaj johtok. Xa chiwach wo' junc'am re're' xk'ochlojic ti wach chi coric take rok i sic re're' ⁸eh chi je' re' xip'ut behic naxpa'lajic johtok pan pur. Je' re' ajic xa naripur chic chi behic naxoquic cok rich'il ma' Luch ch'il i Wan ar chipam i Lok' laj Pat re' nlok'onjic wi' wach i Dios eh je' wo' xa c'ahchi' chic ritioxem johtok Dios ruc' ju'jun xak' riban je.

⁹Naxquilow take tinamit chi re' sic re're' behic chic riban eh chi c'ahchi' ritioxem johtok i Dios, ¹⁰k'e' naxsahchic quic'ux ruc' xc'ulmujic ar maj re' take tinamit xquina'bej wach chi re' winak re're', re' nak i sic nwh'ic chi pahkanic limoxna chi ch'i i Lok' laj Pat re' nlok'onjic wi' wach i Dios ar pan ocbal re' "Holohic" ribihnal. ¹¹Je' aj re' ru', re' take tinamit

xa sahchanak chic quic'ux xichalic chi ch'i Lok' laj Paṭ re' nlok'onjic wi' wach i Dios, ar chi ch'i i mujbal "Salomon" ribihnal. Ar xquirak i winak re' xcorsjic wach take roḱ. Re're' pan quiyejal chic i ma' Luch ch'iḷ i Wān wilic chi ma' ricanā' ta chic quik'ahchjic ru'um risukquil ric'ux.

¹²Naxilow ma' Luch chi xquimol quib ar take tinamit je' wili xik'or queh:

«Hat-tak wich rā' ri'sil cho ma' Israhel, ma' holohic ta chi re' hat-tak xacow chic koj-awil tak chi sahchanak ac'ux tak ruḱ' xka'n wili, xa je' nchel kajawric on xa kachak'lamil i hoj xbanic chi re' sḱc wili xcowjic take roḱ chi xbehic. ¹³Til pa ricorquil re' winak wili xbehic reh chi re' Dios re' xilok'ej cho wach i kaj najtir k'ij ma' Awraham, ma' Isahac ch'iḷ wo' i ma' Jacow, eric'uhṭaj nic' wach nimal rajawric ye'oj reh Jesus re' rAc'un i kaDios. Re' Jesus re're', re' wo' i xak'ahsaj hat-tak pan quik'ab take nimak wach cajawric. Nok re' Ponsyo Pilāto xaj nak rok'tam je ru'um ma' xirak ta rimahc, re' hat-tak ma' xawaj ta tak chi xok'taj je, ¹⁴re' la' chic xapahkaj hat-tak chi re' winak aj cansanel xok'tjic je chi rijelow-bal i Jesus re' jenaj winak coric wach rino'jbal eh loḱ' riwa'ric. ¹⁵Je' re' ajic re' hat-tak xacansaj tak i Jesus re' aj ye'ol reh kac'acharic, xa re' la' xucsjic wo' chic ru'um i Dios chi quixilac take camnak eh ru'um aj re', re' hoj yu'na c'ahchi' kayeb kachi' chi re' Jesus c'achlic wo' chic.

¹⁶«Je' aj re' ru' was tak nichak', ma' re' ta ru'um kajawric i hoj xcowjic i winak wili re' aweht'alim tak wach chi sḱc nak cho eh yu'na nawilow tak cho chi corjonak chic wach take roḱ. Re' winak wili xcowjic ru'um chi re' hoj xkach'ica' kac'ux chirij xiban i Dios ruḱ' i Jesus. Ma' xa re' xcowsjic, xye'eric la' wo' reh chi nareht'alim chi re' Jesus til coric chi xye'eric rajawric ru'um i Dios eh je' wo' chi nareht'alim chi re' wo' re' xcorsonic wach take roḱ.

¹⁷«Coric was tak nichak', re' hat-tak xak'ahsaj tak pan quimic i Jesus, xa re' la' hin nirak chirij chi je' re' xa'n tak ru'um nok re' hat-tak ch'iḷ take nahsil china katinamit ma' xarak ta tak wo' chirij chi re' Jesus, re' i Pahbamaj chi K'atal K'oric chi kana. ¹⁸Chi je' aj re' ruḱ' ricansjic i Jesus xa'n tak, re' Dios xiban chi xponic wach re' rik'orom cho najtir k'ij ruḱ' quichi' take raj k'orol c'uhbal naxquik'or cho chi re' i Pahbamaj chi K'atal K'oric til naric'ulum i ti'c'axic.

¹⁹«Yu'na aj ru' nik'or aweh tak chi chajal wach ano'jbal tak eh chachop ac'ux tak chirij i Jesus reh chi re' Dios ericuy amahc tak eh chi je' re' ewo' nponic rik'ijil chiwach ru' chi eriyew cho risukquil ac'ux tak ²⁰nachitak'a' wo' chic cho Jesus re' k'oroj cho ribiral aweh tak najtir k'ij chi re're' xpahbabjic chi K'atal K'oric. ²¹Nik'or aweh tak chi re' Jesus naritak'abjic wo' chic cho ayu' wach ac'al maj re' Dios xilow chi yu'na til curman chi cu nariwih'ic cho pan taxaj, cu rehtal nponic rik'ijil chi nari'ac'sam wach chi'nchel i wilic china ac'al je' ricab rik'orom cho najtir k'ij ruḱ' quichi' take lok' laj raj k'orol c'uhbal. Je' re' ajic chi cu wilic pe cho pan taxaj i Jesus, chanimej tak i k'oric riban ²²maj re' Moyses je' wili xik'or cho queh take cho kamam kati't najtir k'ij:

«Re' kaDios re' kojbirinic chiwach chi Ajabes chi kana, naribanam chi re' jenaj i t'uch ac'un narasjic chi quixilac take kich rā' ri'sil cho ma' Israhel,

nariq'uihic johtok chi raj k'orol c'uhbal je' ricab nok wilquin i hin yu'na.
Je' re' ajic nic' pa' nimal k'oric narik'orom aweh tak i aj k'orol
c'uhbal re're', chanimej tak

²³ maj naric'ulmujic chi re' c'acharel re' ma'xta rinimanic chiwach aj
k'orol c'uhbal re're',

ma'xta rehtric cok chi quixilac take moloj wach chi ritinamit i Dios,
na la' risacharic wach chi junpech, nqui rik'orom cho Moyses.

²⁴ «Je' aj re' ru' chanimej tak i k'oric riban i Jesus reh chi enponic
wach i k'oroj cho cu'um take raj k'orol C'uhbal i Dios re' xp'uhitic cho
rik'ormojic cu ruc' i Samwel, chi re' take k'ij re' narisuksjic wì' kac'ux
chalic chic reh ²⁵chi kana i hoj ca' qui'sil take cho aj k'orol c'uhbal re're',
maj re' hoj, hoj wo' cho ca' qui'sil take cho kaj najtir k'ij re' xi'ehtric cho
reh tik'inic xiban i Dios ruc' ma' Awraham naxik'or reh chi je' wili:

“Re' hin pet nanicuse'sam take awa' awi'sil i hat

eh chi je' re' na wo' qui'ehtric nicuse'sbal take tocom chic tinamit,
nqui xik'or reh ma' Awraham.

²⁶ «Chi ric'ulmujic aj cuse'sbal re're', re' Dios xiban chi re' rac'un
xq'uihic cho chi raj k'orol ric'uhbal eh chi je' re' xitak'a' cho awuc' tak
chi pet chi rik'ormojic aweh tak chi nacanab tak amahc, nqui ma' Luch.

Re' ma' Luch ch'il i Wan xinakmajic cu'um take quinahsil take tinamit

4 ¹Chirij chic ru' nok cu'uhbalanic pe wo' riban ma' Luch ch'il i Wan cuc'
take tinamit, re' take aj k'ahsem si quich'il i c'amol quibeh take cha'janel
reh Lok' laj Pat re' nlok'onjic wì' wach i Dios, ch'il wo' take junch'uk chic chi
aj k'ahsem si je' ruc' ca' qui'sil cho aj k'ahsem si Saroc ribihnal, xi'oj cakrok
chi quina ma' Luch ch'il i ma' Wan. ²Je' re' ajic yohbal wach naxicakric take
winak re're' ru'um chi re' take quib re're' c'ahchi' quik'orom reh tinamit ruc' i
c'uhunic nca'n, chi re' Jesus xuctic wo' chic chi quixilac take camnak. ³Ru'um
aj re' xichoporic je ma' Luch ch'il i ma' Wan ch'il wo' i winak re' sic nak eh
xic'amaric je chi narich'ukuric k'oric chi quina xa re' la' ru'um chi ojonak chic
i k'ij ma' xbanaric ta wo' chic re're', xi'oj la' cojorok pan che' reh chi cu je' chic
ikal narich'ukuric k'oric chi quina. ⁴Ma' ru'um ta ru' chi je' re' xc'ulmujic, xa cu
q'uih wo' take tinamit chi quixilac take xibirinic reh c'uhbal xquik'or ma' Luch
ch'il i Wan xquinimej i k'oric xquibiraj. Chi je' re' ruc' take xi'oquic chi niminic
re're', xponic cablaj ik'ob lajc'ahl (5,000) take aj niminel chipam i k'ij re're'.

**Re' ma' Luch ch'il i Wan ma' xiyojic ta so' chi
k'oric chi quiwach take nimak cajawric**

⁵Chirij chic ru' naxsak'ic je' ikal, re' take c'amol quibeh take aj k'ahsem si
quich'il take nahsil chipam tinamit xquimol quib ar Jerusalem quich'il take aj
tijem rij C'uhbal Ye'oj reh Moyses. ⁶Je' wo' quich'il take chihoj chi naquiwih'ic
pan quicomonil take nahsil c'amol quibeh take aj k'ahsem si je' ricab i Wan

ch'ił i Lej, wilqueb wo' ar chi quihch'iljic take nahsil c'amol quibeh take aj k'ahsem si re' ma' Anas ch'ił ma' Caypas. ⁷Chi je' re' xic'amaric cho ma' Luch ch'ił i Wan eh naxipahbabjic cok chi quiwach, je' wili pahkanic xbanaric queh:

«Chaj bih ribihnal xye'bic awajawric tak chi ricowsjic i winak wili chi xbehic? nqui take.

⁸Re' ma' Luch, sakomomaj pam rino'jbal ru'um Lok' laj Uxlabal, je' wili xik'or queh:

«Hat-tak chi'nchel aj c'amol quibeh take aj k'ahsem si ch'ił wo' hat-tak nahsil chipam katinamit, ⁹ru'um nok yu'na re' hat-tak c'ahchi' apahkanic tak chirij ato'bil xka'n reh winak re' sic nak wili eh je' wo' ru'um chi c'ahchi' apahkam tak nic' wach naxpa'lajic, ¹⁰re' hin nanisakomem wach pan junwachil, je' chi aweh hat-tak je' wo' chi queh take katinamit chirij chaj bih xc'uluric lok wili. Je' aj wili riwi!: Re' winak re' nawilow tak cho wach wili chi suk chic ric'ux, xbehic xa ru'um reh rajawric i Jesus re' Pahbamaj chi K'atal K'oric. Coric ru', re' Jesus wili re' ribihnej chi aj Nasaret, xcansjic wach curus ru'um reh kamahc xa re' la' re' Dios xucsaj wo' chic cho chi quixilac take camnak. ¹¹Re' aj i Jesus re're', re' hat-tak xa'n tak reh je' ricab rik'or i C'uhalbi chi je' wili:

“Re' cajtz'u'c ma' laj abaj ma' cojoj ta pa riman cu'um take tocom chic aj tz'akol,

re' chic re' xoquic chi pet ma' laj abaj ch'iquinbal cho reh ricajtz'u'c i pat wili, nqui rik'or.

«Je' aj re' xa'n tak reh Jesus maj xak'e'b lok chirij ac'ux tak xa re' la' tob ta wo' je' re' xa'n tak reh, re' Dios xiyew reh jenaj camanic xiq'uc wo' chic na rilok'il chi co'lonic ¹²eh ru'um aj re' xa re' wo' i Jesus ekojrjico'lej chiwach i ti'c'axic maj ma' hab ta chic wach jeno' enco'lonic keh ru'um nok ma' jeno' chic c'acharel ayu' wach ac'al ye'oj ta nak rajawric chi aj co'lonel, nqui ma' Luch.

¹³Naxquibiraj chi je' re', chi'nchel take c'amol beh quimolom quib ar xsahchic quic'ux ru'um i cu'htunic nca'n maj queht'alim chi re' ma' Luch ch'ił i Wan ma' xa nimak ta chic quiwach eh ma' xa yohbal ta wo' chic wach tijinic ca'nam cho, re' cok ru' xquicoj rehtal chi re' take re' xquitijej po' nic' wach i cu'htunic riban i Jesus naxiwih'ic cho cu'c'.

Je' re' ajic re' take c'amol beh re're' naxquillow chi re' ma' Luch ch'ił i Wan xik'oric chi ma'xta nech' ok quiyo'jic, ¹⁴ma'xta chic bih k'oric xquik'or chirij xbanaric ruc' winak re're' maj xquillow chi re' winak re' sic nak re're', suk chic ric'ux pallic chi quiyejal ma' Luch rich'ił i Wan. ¹⁵Chi je' re', re' take c'amol beh re're' xquitak'al quesmejic lok junc'am take quib re're' chipam i moloj ib wilqueb wi' eh pu'ht quik'orom chi quiwach ¹⁶chi je' wili:

«Re' cok xca'n ribanaric take quib winak wili ma'xta chic bih k'oric raj chirij. Xa ta wo' nak eriban chi enkak'or chi ma' coric ta ru'um nok re' rimal wach lok' laj nawal xca'n ruc' i winak wili til xeht'aljic chic cu'um tinamit ayu' Jerusalem. ¹⁷Re' cok ru' reh chi ma' eta chic nquitik ju' rik'ormojic ribiral i Jesus queh tinamit, kak'or tak queh chi je' wili:

«Yu'na johtok chi kawach chacana' tak c'uhbalanic chirij i Jesus chi re're' xye'bic awajawric tak chi banaric take lok' laj nawal maj ma' xabiraj tak k'oric chi kawach cu re' aj ru' nakach'ukum k'oric chana' tak, kojquirok queh, nqui take chi quiwach.

¹⁸Nok quitik'ab chic wach quino'jbal take c'amol beh re're', xik'o'rjic wo' chic cok take ma' Luch ch'il i ma' Wan eh je' wili xk'ormojic queh:

«Til maban tak chic k'oric ma' wo' c'uhbalanic chirij i Jesus, nqui xk'ormojic queh.

¹⁹Re' ma' Luch ch'il i Wan je' wili xquik'or:

«Cha'n tak rij i wili: Haj wilic i k'e' wo' chic taret chiwach i Dios chi enka'n i hoj, re' animjic hat-tak on re' rinimjic Dios? ²⁰Ru'um nok curman chi re' Dios nakanimem i hoj chiwach chi etikanimej hat-tak, re' hoj ma' jaruj enkacana' rik'ormojic ribiral chaj bih kilom cho ch'il chaj bih kabiram cho ruc' Jesus, nqui take.

²¹Je' re' k'uru' re' take c'amol beh re're' ma' xquirak ta jeno' mahc chiquij ma' Luch ch'il i Wan chi naquiye'eric pan ti'c'axic. Ru'um aj re' xi'ok'tjic je chi je' wili xk'ormojic je queh chi yo'sbal queh:

«Hiy tak, xa re' la' mak'or tak chic ribiral i Jesus queh tinamit maj wi xatik tak ju' i c'uhtunic na'n tak, nac'ulum tak ti'c'axic, nqui take je queh.

Je' aj re' xca'n je ru'um chi re' take tinamit xa c'ahchi' chic quitioxem johtok reh Dios ru'um chi jenaj riminal wach lok' laj nawal xca'n ma' Luch ch'il i Wan ²²chi ricowsjic take rok i jenaj winak re' iq'uinak chic chi ca'winak hab rihabil.

Re' take aj niminal xquipahkaj quitobjic reh Dios

²³Chirij naxi'elic je ma' Luch ch'il i Wan, xi'oj cuc' take quich aj tahkanel eh xponic quic'u'tjaj queh nic' nimal xk'ormojic je queh cu'um take c'amol quibeh take aj k'ahsem si ch'il take nahsil chipam katinamit. ²⁴Naxquibiraj chi je' re', chi cunchelal take aj niminal tohk' ca'nam johtok quitij chi je' wili chi xa jenaj wach quic'ux:

«K-Ajaw Dios aj tik'inel reh taxaj, tik'inel reh wach ac'al, tik'inel queh ha', aj tik'inel wo' queh nic' nimal quic'acharic chipam take ye'ab re're', pan ak'ab i hat wilic chi'nchel nic' nimal nc'uluric. ²⁵Ru'um aj re' xponic wach i xak'or cho ruc' chi' awaj tz'e' wach re' kaj najtir k'ij ma' Tawiy naxik'or cho chi je' wili:

“Chaj bih riwi' chi re' take ma' re' ta ra' ri'sil cho ma' Israhel k'e' johtonak quic'ux?

Chaj wo' bih riwi' chi re' take wich ra' ri'sil cho ma' Israhel xa c'ahchi' wo' quicapam c'ahbil laj no'jbal tob ta xa narojic wo' pa rij quino'jbal?

²⁶Re' wili riwi': Re' take re' wolic nca'n ruc' i kAjaw Dios eh je' wo' re' ruc' i xipahba' chi kaK'atal K'oric.

Ru'um re're', re' take quik'atal k'oric take tinamit ch'il take caj to'ol chi k'atal k'oric xquimol quib chi wolic chi xa jenaj chic wach quic'ux, nqui cho ma' Tawiy.

27 «Coric aj ru' chi xmanlajic wach re're' maj ayu' pan katinamit Jerusalen re' take raj to'ol i k'atal k'oric aj Roma, re' Herores ch'il i Ponsyo Pilato ch'il take kich katinamit ch'il wo' take ma' re' ta take cho kich katinamit, xquimol quib chi ritik'injic wach riquimic Lok' laj awAc'un Jesus re' xapahba' chi kaK'atal K'oric. 28 Re' cok ru' re' hat xa nok wo' atik'ab cho wach riquimic awAc'un nok cu ja' ribiral ta wo' cho chi kaxilac eh ac'ux wo' xch'ukbic wach chi xmanlajic wach re're' maj ru'um wo' reh rinimal awajawric wilic, re' hat xayew k'ab chi je' re' xc'ulmujic. 29 Chi je' aj re' ru'um chi pan ak'ab aj i hat Haw wilic chi'nchel nic' nimal nc'uluric eh ru'um chi c'ahchi' wo' awilom cho take c'ahchi' quik'oric keh chi ma'xta chic ka'nam c'uhbalanic, re' hoj awaj tz'e' wach nkapahkaj aweh yu'na chi nakoj-ato'bem reh chi enkak'or ribiral i Lok' laj aC'uhbal chi ma'xta nech' ok kayo'jic. 30 Chi je' re' nakak'or wo' ribiral i lok' laj awAc'un Jesus, enac'uh taj i rinimal wach awajawric. Ruc' aj re', re' hoj ma' xa ta re' take yowab enkawojaj take je' la' wo' enka'n take yohbal wach lok' laj nawal rehtalil chi til coric i c'ahchi' kak'orom i hoj, nqui take johtok pan quitij.

31 Chipam aj i junc'am re're' naxquicohlaj quitij, re' Lok' laj rUxlabal i Dios xkajic cho, xic'uyu'saj pam i pat quimolom wi' quib eh naxoquic pan camna xiyew ransil quik'orbal take nic' pa' q'uihal quimolom quib ar. Chi je' aj re' xquitik ju' rik'ormojic riC'uhbal i Dios chi ma'xta nech' ok quiyo'jic. 32 Nic' pa' q'uihal take quinimic reh riC'uhbal i Dios xiban xa jenaj chic wach quic'ux, xa jenaj chic wach camna quicapew-bal. Je' wo', ma' hab ta wo' wach chi quixilac xik'or ta nak chi re' pa' bih wilic reh, xa reh ta nak chi rutquel, xiban la' chi queh chi quiwach pan comonil.

33 Je' aj re' ru', re' take cablaj chi nahsil raj tahkanel i Jesus yohbal wach quitobjic nbanaric ru'um Lok' laj rUxlabal i Dios nanquik'or ribiral i kAjaw Jesus chi xuctic wo' chic chi quixilac camnak, je' wo' xitobjic take chi ribanaric take lok' laj nawal. 34 Je' wo' chic, ruc' ribanaric chi xa jenaj wach quic'ux take aj nimir, ma' hab ta wach jeno' chi quixilac c'axic ta nak riban maj nanquic'ayeje cho quipat on quie'ab, pan comonil nquic'ux i ritz'akil i pa' bih nquic'ayeje cho. 35 Je' wo', re' ritz'akil i pa' bih nquic'ayeje, nquic'am je chi quiwach take aj nahsil raj tahkanel i Jesus reh chi re' take re' quipuhcunic reh chi quina take quich aj nimir re' c'axic ti nca'n.

Re' ribiral i jenaj aj nimir xichuc k'oric chiwach i Dios

36 Junpech aj cho naxchalic jenaj c'axquil chi quina take aj nimir, wilic take aj nimir xquic'ayeje je pa' bih queh je' ricab xiban aj nimir aj Chipire je' ruc' ra' ri'sil cho ma' Lewih re' Chep ribihnal eh Wernaweh wo' ribihnej cu'um take cablaj chi nahsil. Re' Wernaweh wili re' “aj ye'ol sukquil c'uxlis” nelic wi' ribihnal, 37 naxic'ayeje cho junseht rac'al, xic'am cho ritz'akil eh xik'ahsaj chi manlic wach pan quik'ab take cablaj chi nahsil raj tahkanel i Jesus.

5 1 Raj nchel i jenaj chic winak re' Ananias ribihnal rich'il i rehqu'en re' Sapira ribihnal, naxquic'ayeje cho junseht quie'ab 2 xquitik'a'

wach chi quiwach chi naquesam lok so' ruc' ritz'akil i quiye'ab re're'. Je' re' ajic xa re' ti nic' pa' nimal i tumin xcaj chi naquik'ahsam, xa chic ti re're' xic'am cho Ananiyas chi quiwach take cablaj chi nahsil eh xik'ahsaj cok pan quik'ab chi xa je' wo' ti chic manlic wach i tumin re're'. ³Je' re' k'uru' naxik'ahsaj cok i tumin re're' je' wili xk'ormojic reh ru'um ma' Luch:

«Ananiyas, k'e' c'ahbil ano'jbal. Re' hat xayew riye'ab aj Yahm pan awamna ruc' chi xachuc k'oric chiwach i Lok' laj Uxlabal eh je' wo' chi c'ahchi' achucum k'oric yu'na ruc' ricanabjic cho awuc' i nic' pa' q'uihal i tumin xawesaj lok ruc' ritz'akil aye'ab xac'ayeje. Re' xa'n re're' ma' holohic ta ⁴maj re' awac'al ma' ta xac'ayeje, xa cu pan ak'ab wo' nak wilic eh yu'na chi xac'ayeje chic je, xa pan ak'ab wo' wilic riye'eric i nic' pa' nak q'uihal ritz'akil nawaj ayeb pan ac'ux. Je' re' on ma' je' ta re' chaweh? Je' aj re' ma' holohic ta so' xa'n chi xatik'a' wach pan ac'ux ribanaric i chucuj k'oric wili maj ma' xa ta chi kawach i hoj xachuc k'oric til la' wo' chiwach i Dios xa'n i chucuj k'oric, nqui xk'ormojic reh ru'um ma' Luch.

⁵Xa chic wo' re' xicohlaj ribirmijic take k'oric re're' i Ananiyas, xk'ehbic ti je wach ac'al chi camnak chic ru'um i Lok' laj Uxlabal. Chi je' re' chi'nchel take xibirinic reh chaj bih xiban i Lok' laj Uxlabal ruc' Ananiyas, k'e' naxoquic cho quiyo'jic. ⁶Nok camnak aj chic i Ananiyas, wilic take q'uijolak xi'oquic chi ribotoric pan jenaj tz'ih eh naxquesaj lok xi'oj chi rimuk'unjic. ⁷Chirij chic ru' je' na chic xib ora c'uluuj cho re're', re' rehqu'en Ananiyas Sapira ribihnal, xoj c'olok cuc' take aj c'amol beh chi ma'xta so' pa ric'ux chaj bih xc'ulmujic lok. ⁸Ar je' wili xk'ormojic reh ru'um ma' Luch:

«Ti' Sapira, coric na xik'or abahil chi re' aye'ab xac'ayeje tak, je' na wili ritz'akil xayew tak w'i'? nqui ma' Luch.

—Ho', coric. Je' re' tz'akil xkac'ayeje w'i', nqui ti' Sapira.

⁹Nok je' re' xik'or je' wo' chic wili xk'ormojic reh ru'um ma' Luch:

«Ma' nech' holohic xa'n tak chi xa'n tak xa jenaj wach no'jbal ruc' rik'ormojic chi je' wili:

«Cuhtbal lok chi re' Lok' laj rUxlabal i Dios ma' re' ta ye'ol ti'c'axic kachuc k'oric chiwach, tiqui tak.

«Rehtalil aj chi re' cok i Lok' laj rUxlabal i Lok' laj Ajabes Dios til ye'ol ti'c'axic, yu'na re' chic i hat nawesmejeic lok cu'um take q'uijolak xic'ulic lok pan ocbal reh pat wili, re' xiponic muk'unok cho reh abahil, nqui xk'ormojic reh.

¹⁰Xa chiwach wo' ti junc'am re're' rihpimaj je wach ac'al eh xquimic ar chiwach ma' Luch. Je' re' nok naxi'oquic cok take q'uijolak re're', xquirak i Sapira chi camnak chic eh naxquesaj lok xi'oj wo' chic chi rimuk'unjic chi richel re' xquimuk'a' w'i' ribahil.

¹¹Naxelic aj ribiral riquimic i Ananiyas ch'il i Sapira, yohbal wach yo'jic xoquic cho cuc' comonil moloj wach aj niminal, ch'il take nic' nimal xibirinic reh xc'ulmujic re're'. ¹²Chi je' aj re' ru', re' take cablaj chi nahsil aj c'amol beh yohbal wach lok' laj nawaj c'ahchi' ca'nam rehtalil chi til coric wach i quik'orbal. Je' wo', re' take re' xquitik ju' rimoloric quib chi chi' i Lok' laj Pat re' nlok'onjic w'i' wach

i Dios, ar chi *chì'* mujbal “Salomon” ribihnal, chi rik'ormojic ribiral Jesus queh tinamit chi xa jenaj wach quic'ux. ¹³Chi quixilac take tinamit re're' wilic take k'e' quiyojic chi rimoloric quìb cùc' take cablaj chi nahsil aj c'amol bēh, tōb ta nak wilic wo' take xa nsahchic chic quic'ux ruc' nca'n take aj c'amol bēh re're'.

¹⁴Cu'um aj take cablaj chi nahsil c'amol bēh re're' xq'uihic wach quicomonil take quinimanic reh rik'orbāl kAjaw Jesus maj q'uihal take chi winak chi ixok quì'oquic chi nimanic ¹⁵eh je' wo' yohbal wach take lok' laj nawal xbanaric cu'um take c'amol bēh re're'. Ru'um aj re', re' take tinamit aj Jerusalen xquiyew je wach tak ch'aht i quiyowab eh xquic'am je chi *chì'* tak bēh reh chi na ic'ok ponok ma' Luch tōb ta xa re' rinach encutbic chi quina, ¹⁶equicowjic nic' nimal take yowa'ib. Je' aj re' k'uru' q'uihal take yowab ib aj Jerusalen xicowjic je' ricab wo' xquic'ul take nic' q'uihal take yowa'ib *ch'ìl* take wilic ma' tob laj uxlabal cùc' re' xic'amaric cho pan tak tinamit wilqueb lok chi' ric'ula't i Jerusalen.

**Re' ribiral nok jenaj raj tz'e' wach i Dios xesaj pan
che' take cablaj chi nahsil c'amol bēh**

¹⁷Nok re' ribiral xca'n take cablaj chi c'amol bēh xponic ruc' nahsil c'amol quibēh take aj k'ahsem sī chiwach i Dios, xjohitic ric'a *ch'ìl* take rich ricomonil je' ruc' ca' qui'sil cho aj k'ahsem sī Saroc eh xquitok' quibēh chi ribanaric ti'c'axic queh cablaj re're'. ¹⁸Je' re' nok xtak'abjic quichoporoc take cablaj chi nahsil aj c'amol bēh eh xic'amaric je pan *che'* reh chi naquimayam nak c'uhbalanic. ¹⁹Xa re' la' chiwach wo' chak'ab re're' jenaj aj tz'e' wach i kAjaw Dios nchalic pan taxaj xiteh take tz'ahp tz'apalqueb wì' take cablaj chi nahsil aj c'amol bēh eh je' wili xik'or queh naxesaj take lok:

²⁰«Hiy tak chi *chì'* i Lok' laj Pat re' nlok'onjic wì' wach i Dios eh natiwih'ok tak ar chak'or tak queh tinamit ribiral i c'acharic riyew kAjaw Jesus, nqui xik'or queh.

²¹Je' aj re', re' xa cu wakh'ek wo' ti xi'oquic cok take cablaj re're' chi *chì'* i Lok' laj Pat re' nlok'onjic wì' wach i Dios eh xquip'ut rik'ormojic i k'oric xc'ulic k'ormojok queh ru'um raj tz'e' wach i Dios. Nok je' aj re' c'ahchi'queb take cablaj re're', re' nahsil c'amol quibēh take aj k'ahsem sī *ch'ìl* ricomonil xiyuk'ej take pan jenaj moloj ib quich'ìl take nimak quiwach chi quixilac take ra' ri'sil cho ma' Israhel, *ch'ìl* wo' chi'nchel take raj cojol no'jbal eh nok mololqueb chic take chi'nchel, xitak'a' je take risol ar pan *che'* chi ric'amaric cho take cablaj chi c'amol bēh chi narich'ukuric nak k'oric chi quina, ²²xa re' la' naxiponic ar ma' xirakmajic ta chic pan *che'* take cablaj re're'. Chi je' re' xisoljic wo' chic cho take cha'jem tz'ahpel cùc' take xitak'anic je queh eh je' wili xc'ulic quik'or:

²³«Re' hoj naxojponic pan *che'* xkarak take tz'ahp chi til wo' lutz'ulqueb chi coric, je' wo' take cha'janel til wo' c'achach quiwach chi cha'janic chi *chì'* tak tz'ahp xa re' la' naxkateh cok i tz'ahp re' tz'apalqueb nak wì' take cablaj chi c'amol bēh ma' hab ta chic wach queh xkarak ar, nqui xquik'or.

24Re' nahsil re're' quich'il take c'amol quibeh take aj k'ahsem si, quich'il wo' c'amol quibeh take aj cha'jem i Lok' laj Pat re' nlok'onjic wi' wach i Dios, naxquibiraj chi je' re' je' wili xquik'or chi quiwach:

«Chaj bih xc'uluric cuc' take cablaj re're' k'uru'? nqui xquik'or.

25Xa cu k'oric pe wo' nca'n xoj c'olok jenaj winak chi rik'ormojic queh chi je' wili:

«Re' take winak xacoj tak pan che' ar pe' wo' chic wilqueb chi chi' i Lok' laj Pat re' nlok'onjic wi' wach i Dios. Ar c'ahchi' quic'uhbalem take tinamit, nqui queh.

26Nok k'oroj chic queh re're', re' c'amol quibeh take aj cha'jem reh Lok' laj Pat re' nlok'onjic wi' wach i Dios xic'am je take risol chi quichoporic take cablaj chi c'amol beh eh naxi'oj rakmajok, pa ricorquilal xic'amaric cho ru'um chi re' take sol quiyo'jic chi quiwach take tinamit chi equik'ojoric chi abaj. 27Nok pa'alqueb chic take cablaj re're' chi quiwach take nimak quiwach re're', re' nahsil c'amol quibeh take aj k'ahsem si je' wili xik'or queh:

28«Re' hat-tak ma' xanimej ta tak kak'orbal naxkak'or aweh tak chi ma'xta chic ak'orom tak c'uhbal chirij i Jesus. Chi je' re' k'uru' re' C'uhbal nak'or tak chirij ru', xa haj reh katinamit Jerusalem c'ahchi' ribirmijic. Ma' xa re' ta re', c'ahchi' la' wo' ak'orom tak lok chi quiwach i tinamit chi re' hoj xojcansanic reh rik'ebil laj winak re're', nqui nahsil aj k'ahsem si.

29Chalic ma' Luch je' wili xik'or pan quibihnal take rich nahsil chi c'amol beh:

«Chi keh hoj til curman chi re' Dios nakanimem chiwach chi nacat kanimem hat-tak kich winak. 30Je' aj re' ma' riban ta chi keh hoj chi enkacana' rik'ormojic ribiral i Jesus. Coric, re' Jesus re're' xtak'abjic cho chi naricansjic ar wach curus awu'um hat-tak, xa re' la' ru' xucsjic wo' chic chi quixilac take camnak ru'um kaDios lok'omaj wo' cho cu'um take kamam kati't. 31Chirij chi xiban chi je' re', re' Dios re' k'e' rimal rajawric, xiyew wo' rilok'il chi K'atal K'oric je' wo' chi Aj Co'lonel reh chi re' hoj ra' ri'sil cho ma' Israhel enkajal wach kano'jbal je' wo', reh chi encuyuric kamahc. 32Chirij aj nic' nimal xiban i Dios wili ru'c' Jesus, re' hoj c'ahchi' kayeb kachi' chi kich'il i Lok' laj Uxlabal re' ye'oj wo' cho ru'um i Dios queh take quinimic reh, nqui ma' Luch.

33Naxquibiraj chi je' re' xk'ormojic queh take nic' pa' q'uihal take quimolom quib ar, k'e' naxchalic quic'a eh xcaj nak quicansam take cablaj chi c'amol beh re're'. 34Ar aj ru' chalic jenaj aj tijem rij C'uhbal Ye'oj reh Moyses je' ru'c' wilic pan quicomonil take cow laj aj nimal reh c'uhbal re're', Camalyel ribihnal xpa'lajic johtok chi quixilac take mololqueb ar. Re' winak wili re' wilic riwa'ric chi quiwach take tinamit xipahkaj chi xi'esmejic lok junc'am take cablaj re're' 35eh chirij chic ru' je' wili xik'or queh ricomonil:

«Hat-tak wich ra' ri'sil cho ma' Israhel, chayohbalej awib tak ru'c' nabanam tak queh winak wili. 36C'olok pan ac'ux tak chi ja' naht ta wo' re' Tewras re' xik'or chi wilic rajawric chi naritahkaljic, junik'ob (400) chi tinamit xi'oquic chi ritahkaljic xa re' la' naxcansjic je ru', xquipuhclom quib take nic' nimal quitahkanic reh eh chi je' re' xoj wach ac'al ricomonil ximol wach. 37Je' wo' chic re' xic'ul i Juras

re' chalanak ar Calileya, q'uihal wo' take tinamit xitahknic reh pa rik'tijil cho ajlanic ib tak'amaj rik'ormojic ru'um i k'atal k'oric aj Roma xa re' la' naxquimic wo' je ru', xquiphucaj wo' quib take xitahknic reh. ³⁸Je' aj re' ru' nik'or aweh tak chi chacana' tak take winak re're', re' quic'uhbalanic chirij i Jesus eh mamin awib tak cuc'. Je' re' nik'or maj re' camanic nca'n ruc' quic'uhbalanic, wi xa pan quic'ux nchalic xa narojic wo' wach ac'al. ³⁹Tz'ab aj ru' wi re' Dios xtak'anic queh ribanaric, ma'eta riban chi enkapit queh ribanaric re're'. Chayohbalej awib tak k'uru' maj chaj bih nana'bem tak chi ru'um re're', c'ahchi' ok nchel acojom awib tak chi raj ixowonel i Dios? nqui xik'or queh rich'il.

⁴⁰Nok quibiram aj chic i xik'or i ma' Camalyel, re' take rich'il re're' xquic'u'lej na xik'or eh chi je' re' ma' xquicapaj ta chic pan camna quicansjic take cablaj chi nahsil re're'. Re' cok ru', re' take re' xquik'o'rej wo' chic cok take cablaj chi nahsil eh nok wilqueb chic cok chi quiwach, xquiyew i tak'anic queh take sol chi xiyeric chi tz'uhum. Cu chirij aj chic re', xi'ok'tjic je eh xk'ormojic je queh chi ma'xta chic ca'nam c'uhbalanic chirij i Jesus maj wi xca'n wo' chic naquiyeric wo' chic chi tz'uhum. ⁴¹Re' take cablaj chi nahsil re're' xi'elic cho chi quiwach take re're' chi xa suk chic pan quic'ux ruc' i Dios. Je' re' xca'n maj pa ricapew-bal cho Dios ric'ul chi queh i lok'il chi ric'uluric ti'c'axic chirij, ⁴²ma' xquicana' ta c'uhbalanic chirij i Jesus xquitik la' ju' quic'uhtunic chi re're' i Pahbamaj chi K'atal K'oric. Je' re' xca'n nok kalakal nquimol quib chi chi' i Lok' laj Pat re' nlok'onjic wj' wach i Dios on pan quipat take quich aj niminel.

Wilic take aj niminel xchihiric quiwach chi naquicahnic chi aj camanom take chiwach i Dios

6 ¹Chipam aj wo' take cho k'ij nok c'ahchi' rijohtic wach riq'uihal aj niminel, re' take aj niminel quik'oric pan criyeco xoj quik'or cuc' cablaj chi nahsil c'amol beh chaj bih c'ahchi'queb take aj niminel quik'oric pan hewreyo. Je' aj wili xoj quik'or:

«Re' take cahnel ixok quik'oric pan kak'orbal ma' c'ahchi' ta quic'ulum i to'bal npuhcjic kalakal cu'um take niminel quik'oric pan hewreyo. Ru'um aj re', re' ok chic hat-tak tipuhcunok tak reh to'bal nye'eric, nqui take cok.

²Naxquibiraj chi je' re' c'ahchi' ric'uluric, re' take cablaj chi nahsil aj c'amol beh xquimol wach chi'nchel take aj niminel eh je' wili xquik'or:

«Re' hoj c'amol beh ma' riw' ta chi keh chi enkacana' lok wulu' i kacamaj chi rik'ormojic riC'uhbal i Dios reh chi re' chic i to'bonic nye'eric queh take cahnel ixok enkilow. ³Ru'um aj re', re' hat-tak kas kachak' chasic' chaxilac tak wukub ok chi aj niminel je' ruc' til wilic quino'jbal chi manlic ru'um chi wilic i Lok' laj rUxlabal i Dios cuc'. Je' wo' holohic ok wo' ribiral quic'acharic chi quiwach i tinamit reh chi re' take re' equichopbic reh i camanic reh ripuhcjc i to'bal chi quina take cahnel ixok. ⁴Je' re' nipahkaj aweh chi nabanam tak reh chi re' hoj enkachop kac'ux chirij i kacamaj chi rik'ormojic riC'uhbal i Dios, je' wo' chi ribanaric johtok katij chiwach, nqui take cablaj chi c'amol beh.

⁵Je' re' ajic re' take aj niminel xic'ul quic'ux re' xquik'or take cablaj re're' eh xquichih lok take winak je' wili quibihnal: Re' Tewan, jenaj winak cow ric'ux chi niminic ru'um i Lok' laj Uxlabal, re' Peh, re' Porcoro, re' Nicanor, re' Timon, re' Parmenas ch'il i Colax nchalic ar Antiyoquiya re' najtir rip'utum cho ric'amaric na quic'uhbal take ra' ri'sil cho ma' Israhel. ⁶Chirij re're' nok chihoj chic lok quiwach take wukub chi aj niminel re're' xic'amaric cho chi quiwach take cablaj chi nahsil aj c'amol beh, reh chi xquicoj quik'ab chi quina eh je' wo' chi ribanaric i tij chi quina. ⁷Chi je' aj re' xquihbic wach take c'acharel quibirinic reh riC'uhbal i Dios xquitik ju' rik'ormojic take cablaj chi c'amol beh re're' quich'il take quich aj niminel eh ruc' re're', k'e' wo' naxquihbic wach i quicomonil take aj niminel ar Jerusalem. Ma' xa re' ta wo' re're' xc'uluric, q'uih la' wo' take aj k'ahsem si xquinimej i c'uhbal nk'oric chirij i kAjaw Jesus.

Re' Tewan xchopor ic ru'um rik'ormojic i c'uhbal chirij Jesus

⁸Chipam take k'ij re're' xc'uluric wo' chi re' Tewan re' jenaj queh wukub chi aj niminel chihoj quiwach, k'e' take lok' laj nawal riban chi quixilac take tinamit c'uhbal queh chi til coric i c'uhbalanic riban. Ma' xa re' ta re', je' la' wo' k'e' wo' rajawric i rik'orbal wilic chi c'uhbalanic ru'um chi re' rato'bil i Dios wilic china. ⁹Ru'um aj take lok' laj nawal riban i Tewan re're', wilic take winak je' ruc' nquimol quib chipam i pat ntijilic w'i rij i C'uhbal Ye'oj reh Moyses "Molbal quib take esemaj cho pan ti' laj camanic" ribihnal, xi'oquic chi risole'jic pa rij rik'orbal. Chi quixilac take winak wili wilqueb take ra' ri'sil cho ma' Israhel chalanak take ar Sirene, ar Alejantriya, ch'il chalanak take pa riyuk'ul Silisya, ch'il wo' pa riyuk'ul i Asya. ¹⁰Re' take winak re're' k'uru', ru'um chi ma' xca'n ta canar risole'jic pa rij rik'orbal i Tewan ruc' rino'jbal nye'eric reh ru'um i Lok' laj Uxlabal, ¹¹chi tz'akbal rimahc, xquitoj juntuhm chi c'acharel chi je' wili chucuj k'oric naca'nam chirij:

«Re' hoj kabiram i Tewan wili chi c'ahchi' rik'orom ma' holohic ta laj k'oric chirij rik'orbal i Dios k'oroj cho ru'um Moyses, nqui take chi chucuj k'oric.

¹²Je' re' nok re' xquik'or re're' xiban chi re' take tinamit xibirinic reh, ch'il take nimak quiwach chi quina i tinamit, ch'il wo' take aj tijem rij C'uhbal Ye'oj reh Moyses, yohbal wach naxjohtic quic'a eh ru'um re' xoj quichop i Tewan pan ehtil eh xquic'am cho chiwach quicomonil take nahsil chipam katinamit re' chopoj na ru'um i nahsil c'amol quibeh take aj k'ahsem si. ¹³Ar aj ru' re' take xitojmojic chi naquiyeb quichi' chi chucuj k'oric je' wili xquik'or cok:

«Re' winak wili ma' ricanā' ta so' ribanaric ma' holohic ta laj k'oric rik'or lok chirij Lok' laj Pat re' nlok'onjic w'i wach i Dios je' wo' chirij i C'uhbal ye'oj reh Moyses. ¹⁴Je' wo', til kabiram wo' chi c'ahchi' rik'orom chi re' pat wili naribokoric ru'um i Jesus re' ribihnej chi aj Nasaret. Ma' xa re' ta re', xkabiraj la' wo' ruc' chi re' Jesus naribanam wo' chi re' no'jbal hat-tak tijimaj w'i pa ric'uhbal i Moyses narijalaric wach, nqui take cok.

¹⁵Naxquibiraj chi je' re', re' take nahsil quimolom quib xa cow chic xquitz'ehtaj i Tewan eh ar aj ru' xquillow wo' chi xiban xa nrepretic chic i rilbal xa je' chic ricab rilbal jeno' raj tz'e' wach i Dios nchalic pan taxaj.

Re' rico'ljic rib xiban i Tewan chi quiwach take quinahsil tinamit

7 ¹Chirij chic re', re' nahsil c'amol quibeh take aj k'ahsem si je' wili xik'or reh Tewan:

«Coric na take k'oric c'ahchi' quik'orom chawij? nqui reh.

²Re' Tewan chi rico'ljic rib chiwach take k'oric nquitz'ak chirij ruc' i C'uhbal Ye'oj reh Moyses, je' wili k'oric xiban queh:

«Hat-tak wich ra' ri'sil cho ma' Israhel, ch'il hat-tak nahsil china katinamit, chabiraj tak i nanik'orom wili: Nok re' kamam ma' Awraham cu c'acharic pe riban cho pa riyuk'ul i Mesopotamya nok ja' noj ta c'acharok ar Haran, re' lok' laj kaDios xic'uhtaj rib reh pan jenaj riminal wach risakomal ³eh je' wili xik'or reh:

«Awraham, chacana' cahnok i ye'ab wili ch'il take pa' aweh ayu' eh ar chic hiy chipam jenaj tocom chic ye'ab re' nanik'orom aweh, nqui xik'or reh.

⁴Je' aj re' xelic cho chipam i yuk'ul re' Calteya ribihnal eh ar chic xi'oj c'acharok chipam i tinamit Haran ribihnal. Ar aj chipam i tinamit re're', nok camnak chic je rajaw i Awraham, re' Dios xik'or reh chi narichalic chipam i yuk'ul wili re' c'achalcoj w'i' yu'na i hoj ra' ri'sil cho ma' Israhel. ⁵Tob ta wo' re' Dios je' re' xik'or reh ma' Awraham, xa ta nak xye'eric junseht ok riye'ab ru'um i Dios naxc'ulic lok chi c'acharic ayu'. Re' cok ru' re' Dios xiyew rik'orbal reh chi je' wili:

«Til niyew nik'orbal aweh chi re' take awa' awi'sil naquehcham i ye'ab wili. Je' re' naric'uluric reh chi naquilok'em niwach ayu', nqui cho reh.

«Yu'na chacoj tak rehtal i wili: Tob ta wo' re' ma' Awraham ja'xta nak cho riha'lac'un chipam take cho k'ij re're', re' Dios til wo' xik'or cho reh chi je' re' naribanam ruc' ra' ri'sil. ⁶Je' wo', re' Dios xik'or wo' reh chi je' wili:

«Chiwach junik'ob (400) hab re' take awa' awi'sil nacojic c'acharok cho chipam jenaj tocom chic tinamit. Ar naquicojoric pan cow laj camanic chi ma'xta quitojbal eh ma'xta wo' riqueteljic quiwach. ⁷Nok iq'uinak chic lok rik'ijil quiwih'ic chipam i tinamit re' naquicojoric w'i' chi cow laj camanic, re' hin Dios naniyeb ti'l'axic china i tinamit re're'. Cu chirij aj re' naquelic wo' chic cho take awa' awi'sil chipam i tinamit re're' eh ayu' chic chipam i yuk'ul wili naquinquilok'em, nqui xik'or cho reh.

⁸«Nok re' Dios xiyew rik'orbal reh ma' Awraham, xipahkaj wo' reh chi narik'atam lok ritz'uhmal na ric'achanbal. Chi je' re', re' ma' Awraham ch'il take ra' ri'sil eh ch'il wo' take cac'un ra' ri'sil cho ru', je' re' naca'nam chi rehtalil chi xic'u'lej rib quik'orbal ch'il i Dios chi naquilok'em wach ch'il take ra' ri'sil cho ru'. Ru'um aj re', re' ma' Awraham naxasjic i rac'un re' Isahac ribihnal, xik'at wo' lok ritz'uhmal na ric'achanbal i rac'un pa riwahxak k'ij rasjic. Re' chic Isahac je'

wo' re' xiban ruc' rac'un, re' Jacow ribihnal. Re' Jacow je' wo' re' xiban cuc' take cablaj chi rac'un re' xtz'uhcric cho wj' take cablaj ch'uk chi ra' ri'sil.

9«Chi quixilac take pet lajeb rac'un i Jacow xoquic cho ch'i'c pan camna chirij i quichak' Chep. Ru'um aj re' xquic'ayej je quichak' queh take ju'jun aj yacol re' xic'ayanic wo' chic reh chi aj tz'e' wach ar pan tinamit Ejipto. Re' cok ru', re' Dios ma' xicana' ta chi rutquel i Chep ar Ejipto, 10xito'bej la' chipam take ti'c'axic xiq'uic wj'. Ma' xa re' ta re' xiban, xiyew la' wo' rino'jbal chi xirak rilok'il chiwach i k'atal k'oric aj Ejipto. Til wo' chic k'e' nim rilok'il xwih'ic chiwach chi xipahba' chi raj to'ol chi k'atoj k'oric china' ritinamit eh je' wo' chi aj ilol china' take pa' bih wilic reh. 11Chi je' aj re' ricamaj, pan jenaj k'ij xc'uluric cho chi re' take tinamit pa riyuk'ul i Ejipto ch'il wo' take tinamit ayu' Canahan re' yuk'ul wilcoj wj' yu'na, k'e' ti' xquillow wach ru'um reh jenaj rimal wj'alel re' xbanic chi re' take kamam kati't xa ta nak chic chi lok' xquirak quiwa' chipam i quiyuk'ul. 12Ru'um aj re', re' Jacow naxeht'alij chi ar Ejipto wilic cho wi'c, xitak'a' je take lajeb chi rac'un chi rilok'oric quiwa' ar.

«Re' take re' naxiponic chipam i tinamit re're' ma' xquina'bej ta wach i quichak' Chep naxquillow wach pan pet, 13cu re' la' chic pa rica'pech nok re' Chep xik'or rij queh take ras, cu re' chic ar xquirak chirij chi re' po' nchel quichak' wilic ar chi raj to'ol i k'atal k'oric. Je' wo', xiyew wo' chi eht'alij reh k'atal k'oric hab wach i rajaw, hab wach take ras je' wo' hab wach i richak'. 14Naxeht'alij re're' i k'atal k'oric, xiyew k'ab reh Chep chi xitak'a' je ric'amaric rajaw re' Jacow ch'il take ruc' take cho. Je' aj re' riwi' k'uru' chi re' take ho'lajuj ricajwinak (75) chi c'acharel xquimol je quib re're' 15xi'oj c'acharak ar Ejipto.

«Chipam i tinamit re're' xc'uluric chi re' kaj najtir k'ij ma' Jacow ch'il take rac'un, xponic rik'ijil chi xiquimic je chi quiju'junal. 16Xa re' la' ma' Jacow ch'il i Chep re' rac'un, ma' re' ta wo' ar ximuk'unjic. Re' ma' Jacow xc'amaric je chi xoj muk'unjok ar chipam i ye'ab re' lok'oj ru'um i rimam re' ma' Awraham eh re' Chep xc'amaric je chi xoj muk'unjok chipam i junseht ye'ab ar Siquem re' lok'oj cho ru'um i ma' Jacow cuc' take rac'un i jenaj winak Hamor ribihnal.

17«Chirij wili nok camnak chic ma' Jacow ch'il take chi'nchel rac'un, p'uht aj roquic cho rik'ijil chi nariponic wach i xik'or cho i Dios reh ma' Awraham chi je' wili:

«Re' hin til niyew nik'orbal aweh chi re' take awa' awi'sil naquehcham quiyuk'ul take aj Canahan, nqui xik'or cho reh.

«Je' re' nok xc'uluric chi re' take cho kamam kati't nok c'ahchi' quimoljic ar Ejipto, xa xquitic wo' quib chi ma'xta bih npitbic queh. 18Je' aj re' riwi' c'acharic xca'n cu rehtal xoquic cho jenaj k'atal k'oric aj Ejipto re' ma' xeht'alij ta ribiral chirij ric'acharic i Chep. 19Re' k'atal k'oric re're' xoquic chi quijot'oric take kaj najtir k'ij ruc' riye'eric cow laj camanic chi quina' reh chi ma'xta chic quitiquim quib. Ma' xa ta re're' xquic'ul pan k'ab, k'e' la' wo' ti'quilal xquillow wach maj naxk'ormojic queh chi ma'xta chic quic'a'chsam take cuc' cac'un, tok'lic npon quicana' cho quihal'ac'un pan jeno' ye'ab reh chi ar naquiquimic chi cutquel.

20 «Je' aj re' chipam cho ric'axquilal take k'ij re're' xasjic jenaj t'uch ac'un k'e' c'axbal wach chiwach i Dios, Moyses ribihnal. Re're' nok q'uihsimaj chic xib poh ru'um rituṭ rajaw ar pan paṭ, 21 xponic wo' cahnok cho pan jenaj ye'ab re' nariquimic nak wi' chi rutquel xa re' la' tz'eht xponic rakmajok ru'um rixk'un i k'atal k'oric aj Ejipto, re' xc'ambic je reh chi nariq'uihsam chi je' riwi' jenaj rac'un chiwach. 22 Re' Moyses wili k'uru' naxq'uihic chic so', xtijiljic ruṭ' nic' nimal quino'jbal take aj Ejipto eh ru'um re're' k'e' ye'oj rilok'il ruṭ' take k'oric rik'or je' wo' re' ruṭ' take camanic riban.

23 «Pan jenaj k'ij re' Moyses nok wilic chic reh ca'winak (40) haḃ, xc'ulic pa ric'ux rilmijic nic' wach wilqueḃ take ras richak' ra' ri'sil cho ma' Israhel. 24 Nok wilic chic ponok i Moyses chi rilmijic take rich tinamit, xilow chi jenaj aj Ejipto c'ahchi' rik'ojom jenaj rich ra' ri'sil cho ma' Israhel eh ru'um re' xoquic chi rico'ljic i ras richak' re're', xa re' la' chic ru' naxiban nak ti rijelow-bal reh, xa quimic xiban aj Ejipto pan k'ab. 25 Naxilow chi je' re' i Moyses, je' wili xik'or pa ric'ux:

«Ruṭ' xniban wili, naquirakam chirij take was nichak' chi ruṭ' wok nik'ab i hin re' Dios naresam take pan ti c'axic, nqui xik'or pa ric'ux.

«Re' take ras richak' ma' xquirak ta chirij chi je' re'. 26 Je' re' nik'or maj je' chic ikal je' wili xc'uluric: Re' Moyses xoj rirak take quib kich katinamit chi k'abisinic nca'n eh je' wili xik'or nak ti queh chi ch'akbal quiwach pan sukquil c'uxlis:

«Hat-tak was nichak', xa atinamital awiḃ tak. Ma' riban ta chi c'ahchi' aseq'uem awiḃ tak, nqui queh.

27 «Naxich'ak nak ti quiwach je' pe' chic wili xk'ormojic reh ru'um i jenaj re' c'ahchi' rισε'bic reh rich'il chi ma' xaj ta ribiram k'oric chiwach i Moyses:

«Hab ti wach pahbanic aweh i hat chi aj nahsil eh chi aj ch'ukul wach mahc chi kana' i hoj? 28 Ma' re' ta na nchel nicansjic wo' chic nawaj je' ricab xa'n reh aj Ejipto ew? nqui xik'or reh.

29 «Naxibiraj chi je' re', re' Moyses xoquic cho riyo'jic ru'um chi xirak chirij chi ma' xpohyic ta na ribanoj. Ru'um re', xirupej je elic chipam i tinamit Ejipto eh xoj c'acharok pa riyuk'ul i Maryan chi quixilac take ma' re' ta ritinamit. Ar aj ru' xirak rehqu'en eh xi'asjic quib quiha'lac'un.

30 «Nok ca'winak chic haḃ riwih'ic chi c'acharic ar Maryan, pan jenaj k'ij nok re' Moyses wilic ar chipam jenaj ye'ab chik yuk' re' ma'xta wi' patanel ar pa ric'ula't i ye'ab Yuk' Sinayih ribihnal, re' Dios xic'uhtaj riḃ reh chi je' ricab riwi' jeno' raj tz'e' wach wilqueḃ ar pan taxaj. Re're' xic'uhtaj riḃ reh pan yejal jenaj cak q'uix koplic rik'ak'il. 31 Naxilow i Moyses i cak q'uix che' re' xkop rik'ak'il, k'e' naxsahchic ric'ux ru'um. Chi je' re' nok c'ahchi' rijilim cok riḃ ruṭ', xibiraj chi xk'oric cho i Lok' laj Ajabeḃ Dios chi je' wili:

32 «Re' hin, hin i Dios re' ric'u'lem cho riḃ kak'orbal ch'il i ma' Awraham, ch'il i ma' Isahac ch'il wo' i ma' Jacow, nqui xibiraj.

«Ruṭ' re're', re' Moyses xoquic cho ribarbatic ma' xaj ta chic ritz'ehtam je k'ak' ru'um riyo'jic. 33 Ar ajic xk'o'rjic wo' chic cho ru'um i Lok' laj Ajabeḃ Dios chi je' wili:

«Moyses, re' ye'ab pa'alcat wì' ayu', re're' jenaj ye'ab lok' reh lok'onbal wìn. Chawesaj lok aper-xijab k'uru' rehtalil chi c'ahchi' ayeb nilok'il, nqui xik'or cho reh.

³⁴«Chirij re', je' wo' chic wili xik'or i Dios reh Moyses:

«Ru'um chi xwilow take cho ra' ri'sil cho ma' Israhel chi k'e' ti'quìl c'ahchi' quilom wach cu'um take aj Ejipto eh je' wo' ru'um chi xnibiraj jok chi k'e' q'ueric cho quichi' wuc' reh chi nanito'bem take chipam i ti' wilqueb wì', re' hin xinc'ulic lok chi quitobjic. Ru'um aj re' chajil cho awìb maj re' hat nacat nitak'ab je ar Ejipto chi aj esenel queh nitinamìt pan ti'c'axic, nqui reh.

³⁵«Tob ta chi quixilac take rich ra' ri'sil cho ma' Israhel wilic take ma' xcaj ta quibiram k'oric chiwach i Moyses je' ricab xca'n take quìb xik'oric reh chi hab wach xpahbanic reh chi aj nahsil eh chi aj ch'ukul wach mahc chi quina, ruc' xik'or i Dios re're' nc'utunic chi re' Moyses re' aj re' i pahbamaj ru'um Dios chi nahsil aj esem queh rich ritinamìt pan ti'c'axic nok ar chipam jenaj cak q'uix kopic cho rik'ak'il xic'uhtaj rib reh chi je' riwì' jeno' raj tz'e' wach. ³⁶Je' re' k'uru' re' Moyses xesenic cho queh take kich katinamìt ar Ejipto najtir k'ij. Je' wo' chi c'uhtbal reh chi tak'amaj je ru'um i Dios, re're' yohbal wach take lok' laj nawal xiban je' ricab xiban ruc' i ma' laj ha' «Cak Ha'» ribihnal on je' ricab take xiban chiwach ca'winak hab re' xbehic wì' pan ye'ab chik yuk' re' ma'xta wì' patanel ch'il take q'uihal rich ra' ri'sil cho ma' Israhel. ³⁷Re' Moyses re're', je' wo' wili xik'or cho queh kamam kati't:

«Re' kaDios re' kojbirinic chiwach chi ajabes chi kana nariyeb chi asjic chi quixilac take kich ra' ri'sil cho ma' Israhel i jenaj c'acharel re' naribanam chi aj k'orol reh ric'uhbal je' ricab c'ahchi' nibanam i hin yu'na. Chanimej tak k'uru' chaj bih narik'orom aweh tak aj k'orol c'uhbal re're', nqui cho queh.

«Tob ta wo' nak xk'ormojic cho queh ru'um i Moyses chi re're' jenaj aj k'orol riC'uhbal i Dios, ³⁸re' take kamam kati't xa ma'xta wo' nquibiraj k'oric chiwach. Chi je' re' k'uru' re' Moyses xwih'ic cho cuc' take kamam kati't naxquimol cho quìb chiwach i rik'ijil cho quiwih'ic chipam i ye'ab chik yuk' re' ma'xta wì' patanel eh re' wo' re' xk'oric cho i ma' sahchel ta laj riK'orbal i Dios re' xic'ul cho chi keh i hoj ra' ri'sil cho ma' Israhel ar china ye'ab «Yuk' Sinayih» ribihnal naxk'o'rjic ru'um i raj tz'e' wach i Dios xchalic ar pan taxaj.

³⁹«Je' re' ajic tob ta re' Moyses jenaj wo' aj k'orol riC'uhbal i Dios, re' take kamam kati't ma' xcaj ta quinimem rik'orbal, xquik'eb la' lok chirij quic'ux chaj bih take xik'or ch'il chaj bih take xiban. Je' re' xca'n maj pan quicapew-bal ru' xiban chi xa je' na wa'ric xisoljic wo' chic je ar Ejipto chi rilok'onjic wo' chic wach take tiyox, ⁴⁰je' ricab xcaj ribanaric nok je' wili xquik'or reh ma' Aron:

«Ma' Aron, re' rik'ebil laj Moyses re' c'amol kabeh xesenic cho keh ar Ejipto ma' keht'alim ta chaj bih xic'ul cho ar china i yuk' xoj johtok wī'. Je' re' k'uru' koj-ato'bej chi ritik'injic take katiyoq reh chi re' chic take re' equic'ambic je kabeh chi soljic ar Ejipto chi tehlemaj je ku'um, nqui take reh.

⁴¹«Chi je' aj re' k'uru' ruc' i to'bonic xiban ma' Aron, xtik'injic jenaj qutiyoq je' nca'yic rac'un wacax xca'n reh. Chiwach aj chic i tiyoq re're' xquitok quib chi riye'eric quisī chiwach naxi'oquic chi rinimjic wach ru'um risukquil quic'ux chi xtihkic. ⁴²Re' cok ru' ru'um reh lok'onc tiyoq xca'n, re' Dios xicana' take eh ma' ximin ta chic rib cuc' nok wilqueb chic chipam ye'ab wili. Ru'um reh no'jbal re're' xc'uluric wo' chi re' take aj najtir cho ra' ri'sil cho ma' Israhel, xik'eb take chipam i no'jbal chi riye'eric rilok'il i k'ij ch'il i poh ch'il wo' take ch'imil wilqueb pan taxaj. Ru'um aj reh no'jbal re're', xik'ahsaj wo' take pan quik'ab caj ixowonel chi naquic'amjic je chi naht, je' ricab wo' rik'orom cho i Dios chi je' wili re' xitz'ihmbaj cho jenaj queh aj k'orol riC'uhabal najtir k'ij:

“Re' hat-tak ra' ri'sil cho ma' Israhel naxatbehic tak cho ca'winak hab chipam ye'ab chik yuk' re' ma'xta wī' patanel, ma' re' ta hin xinalok'ej tak naxacansaj tak cho achicop chi asī tak.

⁴³Je' aj wo' re' yu'na chi c'acharic chic na'n tak chipam i ye'ab wili, ma' re' ta hin quinalok'ej tak, re' la' chic take xacoj tak chi atiyox nayew tak quilok'il je' ricab nanatehlaj tak rijalwachil rich'imilal atiyox tak “Renpan” ribihnal,

on nanatehlaj tak i ripatil atiyox tak “Moloc” ribihnal.

Ru'um chi je' re' na'n tak, re' hin Dios nacat wesam tak je chipam ye'ab wili

eh cu ma' wili chic ponok chirij quiyuk'ul aj Wawilonya nawojic awic'ram awib tak, nqui rik'or Huj re're', nqui Tewan.

Je' re' xik'or i Tewan chi ricoljic rib chirij i k'oric nquitz'ak chirij ruc' C'uhabal ye'oj reh Moyses.

⁴⁴Chirij chic ru' je' wo' chic wili ricoljic rib xiban i Tewan chiwach i tz'akoj wach c'utaj nca'n chirij ru', chirij i Lok' laj Pat re' nlok'onjic wī' wach i Dios:

«Je' ricab riwī' i pat xc'uhtjic reh Moyses china i yuk' Sinayih, je' wo' re' riwī' i Lok' laj Pat re' lok'onbal wī' wach i Dios xitik'a' i Moyses naxk'ormojic reh ru'um i Dios chi naritik'ab. Re' lok' laj pat re're', re' xtik'injic ar chipam chik yuk' ruc' pīm laj tz'ih xwih'ic cho chi quiwach take kamam katit' chi jenaj ye'ab re' nc'utunic wī' chi re' Dios wilic cuc'. ⁴⁵Chi k'e' wo' rilok'il i lok' laj pat re're' chi quiwach take ca' qui'sil cho kamam katit' naxquic'ul cho, re' lok' laj pat re're' xc'amaric cho cu'um chipam i ye'ab wili re' xic'ulic c'acharok wī' nok re' Dios xit'erej lok take patanel aj ayu' nak take eh ximak' i quiy'e'ab ruc' ricowil rok k'ab i Joswe re' c'amol quibeh take ca' qui'sil cho kamam katit'.

«Chirij ric'amaric cho ayu', re' lok' laj pat re're' ma' xcahnic ta xa pan jenaj riye'ab xa jaljal la' nak cho riye'ab cu'um take katinamit eh je' re'

xca'n cho cu rehtal xoquic cho chi k'atal k'oric i ma' Tawiy. ⁴⁶Re' ma' Tawiy re're' naxiyew pan ac'al take raj ixowonel ruc' ritobjic xbanaric ru'um i Dios, xipahkaj johtok reh chi nariye'eric cho k'ab reh chi naritik'ab jenaj lok' laj pat re' encamanic chi jenaj ye'ab re' enc'utunic wi' chi re' Dios xa wilic wo' chi kaxilac i hoj ra' ri'sil cho ma' Jacow. ⁴⁷Tob ta wo' je' re' pahkanic xiban i ma' Tawiy chi naritik'ab i lok' laj pat re're', ma' xye'eric ta wo' k'ab reh ru'um i Dios chi re're' naritik'anic reh, re' la' chic i Salomon re' rac'un i ma' Tawiy xtik'anic reh jenaj Lok' laj Pat re' narilok'onjic wi' wach i Dios. ⁴⁸Je' aj re' xiban i Salomon chi reht'alim wo' nak chi re' Dios re' k'e' nimal rilok'il ma' npatanic ta chipam jeno' pat tik'imaj xa ru'um winak, je' ricab wo' rik'orom cho ruc' chi' jenaj raj k'orol C'uhbal chi je' wili:

⁴⁹ "Re' jeno' k'atal k'oric wi k'e' nimal wach rajawric, raj rik'orom chi k'e' wo' chic nimal wach i ripat ntik'injic, maje'?"

Je' wo' re' wuc' i hin, xa re' la' wi je' ta nak re' nbanaric wuc' i hin, nic' aj wo' nak chic nahtil na i pat naritik'injic win'?

Je' re' nik'or maj re' hin k'e' rimal wach wajawric wilic chi k'atal k'oric,

re're' nc'utunic chi je' re' ayu' pan taxaj je' wo' chi ar wach ac'al
⁵⁰ maj chi'nchel nic' nimal wilic ayu' pan taxaj ch'il wo' i wach ac'al nitik'anic i hin, nqui rik'orom cho i Dios, nqui Tewan.

⁵¹ Chirij aj chic re', je' wili xik'or i Tewan queh:

«Was tak nichak', re' hat-tak je' wo' acab tak take cho kamam kati't chi rik'ehtjic awijb tak chiwach rik'orbal i Lok' laj rUxlabal i Dios maj re' take re', chi je' na nchel ma' ja' k'atoj ta lok ritz'uhmal na quic'achanbal rehtalil chi naquilok'em wach i Dios, je' re' xca'n cho naxquicowsaj quic'ux eh ma' xquik'ochsaj ta quib chiwach i Dios. Je' wo' chic, xquic'saj wo' lok rij quixiquin chaj bih xquik'or cho take aj k'orol riC'uhbal i Dios. ⁵²Ru'um chi je' re' xca'n, ma' hab ta chic wach queh take aj k'orol riC'uhbal i Dios xquicol na chi ma' ta nak xca'n ti'c'axic reh, xquicansaj la' take je jarub queh xik'oric cho ribiral najtir k'ij chi nari'ulic lok i lok' laj Pahbamaj chi K'atal K'oric. Je' aj re' ru', re' hat-tak je' wo' acab tak take cho kamam kati't je' ruc' xquicansaj take cho aj k'orol c'uhbal re're' maj chipam take k'ij wili re' hat-tak xacansaj tak i lok' laj Pahbamaj chi K'atal K'oric. Je' re' xa'n tak naxak'ahsaj tak pan quik'ab take sol aj Roma eh xapahkaj tak ricansjic reh Ponsyo Pilato. ⁵³Ma' xa re' ta wo' re' xa'n tak, je' la' wo' take k'iloj c'uluuj cho chaweh tak ru'um Moyses china i yuk' Sinayih naxk'o'rjic cu'um take raj tz'e' wach xichalic pan taxaj, ma' c'ahchi' ta ac'amam tak na, nqui xik'or Tewan.

⁵⁴ Naxquibiraj haj wilic xk'ormojic queh, re' take nahsil quimolom quib ar xquic'uhhaj lok ruc' quibal chi xa nwuk'ic chic cho quic'a pan camna, ⁵⁵xa re' la' Tewan chi behsemaj ru'um Lok' laj rUxlabal i Dios tz'ehtenic johtok pan taxaj ru'um chi c'ahchi' rilom johtok wach risakomal rilok'il i Dios, je' wo' chi c'ahchi' rilom johtok wach i Jesus chi pa'llic pa risec'aj i Dios ⁵⁶eh je' wili xik'or queh:

«Chabiraj tak i wili: Re' hin nwilow johtok chi tehlic cok p̄am i taxaj eh ar nwilow johtok wach i Jesus re' Ac'unbes re' wilic rajawric chi quina c'acharel chi ar pa'lic pan risec'aj i Dios, nqui xik'or queh.

⁵⁷Re' take nahsil re're' ru'um chi ma' ncaj ta chic quibiram chaj bih rik'or i Tewan, p'uht quitz'apam quixiquin eh chi xa chi'k'or chic nca'n, xa junojic chic take china Tewan chi ricansjic chirij lok i tinamit. ⁵⁸Ar ajic nok wilqueb chic chirij lok i tinamit, re' take winak cojoj take chi ritz'akaric wach rimahc i Tewan, xipahbabjic cu'um nahsil reh chi naquicansam i Tewan eh chi je' re' xquesaj lok i quijuc rok tz'ih roxlóc' lok quiso', reh chi suk cutuj abaj enca'n chi ricansjic i Tewan. Je' re' k'uru' naxquituba' take su't re're' chiwach i jenaj q'uijoc Sawlo ribihnal re' naricha'janic reh, p'uht quicansam i Tewan chi abaj. ⁵⁹Nok je' re' c'ahchi' ca'nam, re' Tewan je' wili p'uht rik'orom johtok reh Jesus pa ritij:

«Hat Jesus, hat Lok' laj Ajabes china chi'nchel, c'uluj ta nak cho wuxlabal awuc', nqui johtok reh.

⁶⁰Nok rik'orom chic re're', re' Tewan chi xuclíc jok wach ac'al, cow xik'or johtok pa ritij chi je' wili:

«K-Ajajw Jesus, chacuy cho quimahc take winak wili ruc' i c'ahchi' ca'nam win, nqui xik'or johtok.

Nok rik'orom aj chic re're', xquimic i Tewan.

8

¹Re' Sawlo re're' xa suk chic rilmijic riban je nok c'ahchi' ricansjic i Tewan.

Re' take aj niminel xquipuhcay quib ru'um ti'c'axic

Xa chiwach aj wo' cho k'ij re're' naxquimic i Tewan, xp'uhtic cho ti'c'axic chiquij take moloj wach aj niminel wilqueb ar Jerusalem. Ru'um aj re' chi'nchel take aj niminel c'ul p'uht quipuhcam quib pan tak tocom chic tinamit wilqueb pa riyuk'ul Jureya je' wo' pa riyuk'ul Samarya. Xa chic ti re' take cablaj chi nahsil c'amol beh ma' xquic'uyu'saj ta quib chi elic je ar Jerusalem. ²Je' re' ajic xa chiwach wo' cho k'ij re're' naxmuk'unjic je Tewan cu'um ju'jun winak je' ruc' nquiyohlej wach i Dios eh xok'jic wo' wach riquimic, ³re' Sawlo p'uht ribanam ti'c'axic queh take aj niminel chi winak chi ixok re' take xicahnic ar Jerusalem. Nanoquic pan tak pat, nponic rijuquej take cho xa hab wach rirak take ar reh chi naquic'amaric je pan che'. Je' aj re' riban i Sawlo reh chi ma'xta nak chic rik'ororic i c'uhbal chirij i Jesus, ⁴xa re' la' c'uhbal re're' xa haj ye'ab xquipuhcay wí' quib take aj niminel xi'elic je Jerusalem ma' xmahyic ta rik'ormojic cu'um. ⁵Je' ricab i ma' Peh, naxponic ar pan tinamit Samarya ma' ximay ta k'oroj c'uhbal.

Ar ajic pan tinamit Samarya nok re' ma' Peh xik'or chi re' Jesus xpahbabjic chi K'atal K'oric, ⁶q'uih take tinamit xquicoj quixiquin chi ribirmijic i c'uhbal riban ma' i Peh. Je' wo' xquilow take lok' laj nawal xiban rehtalil chi til coric i c'uhbalanic riban ⁷maj je' wo' re' xiban i ma' Peh

eh ru'um re' yohbal wach take ma' tob laj uxlabal xi'esmejic lok cūc' take tinamit chi xa q'ueric chic quichi' eh yohbal wo' wach take sīc ch'il mec cōk xicowsjic. ⁸Je' aj re' k'e' riminal sukquil c'uxlis xwih'ic cūc' take c'acharel ar pan tinamit Samārya ⁹re' wilic wo' wi' jenaj winak Simon ribihnal re' najtir chic rip'utum cho ribanaric take ma' coric ta wach nawāl. Re' winak re're' xa riban chic rīb chi je' jenaj ajabes nim wach riwa'ric ru'um take ma' coric ta wach nawāl riban eh chi je' re' q'uuih take c'acharel chipam i tinamit re're' xijot' take ¹⁰cu rehtal chi cunchelal take tinamit re're' chi nimak chi cuc'tak quiwach je' wili nquik'or chirij nanquicoj quixiquin chi ribirmijic:

«Re' cok i winak wili re' i dios re' k'e' nimal rajawric, nqui take.

Je' re' nquik'or chirij ¹¹maj k'e' nsahchic quic'ux ru'um take ma' coric ta wach nawāl riban.

Je' re' nok re' Simon re're' tōb ta wo' najtir chic rip'utum cho quijot'oric take aj Samārya, ¹²naxilow chi wilic take winak ch'il take ixok xquikahsaj quihā' naxquinimej i k'oric rik'or i ma' Peh chirij i ma' birimaj ta laj k'oric chirij i Jesus re' Pahbamaj chi K'atal K'oric eh je' wo' chirij i rajawric wilic i Dios chi K'atal K'oric, ¹³re're' xinimej wo' i c'uhbal k'oroj re're' eh xikahsaj wo' riha'. Chirij re're' xoquic chi ritahkaljic i ma' Peh chi k'e' xcahtzic wach chi riliric take lok' laj nawāl riban i ma' Peh rehtalil chi til coric i c'uhbalanic riban.

¹⁴Chi je' aj re' c'ahchi' ric'uluric ar Samārya, xponic i k'oric cūc' take cablaj chi nahsil chi c'amol beh wilqueb ar Jerusalem chi re' take aj Samārya xquicoj wach riC'uhbal i Dios eh ru'um re're' xquitak'a' je ma' Luch ch'il i Wān chi nacojic ar. ¹⁵Naxiponic ar re' ma' Luch ch'il i Wān xca'n quitij chi ripahkaljic i Lok' laj Uxlabal chi naroquic pan cāmna take nic' pa' q'uihal xicojbic wach riC'uhbal i Dios. ¹⁶Re' riwi' chi je' re' xca'n ru'um chi ma' hab ta wach queh ric'ulum chic i Lok' laj Uxlabal xa re' la' ti kahsanic ha' ca'nam chi c'ahchi' quik'orom chi re' Jesus re're' Ajabes chi quina. ¹⁷Ru'um aj re', re' ma' Luch ch'il i Wān nok c'ahchi'queb chi tij, xquicoj quik'ab chi quina take aj niminel re're' eh ruc' re're' xchalic i Lok' laj Uxlabal chi naroquic pan cāmna. ¹⁸Naxilow i Simon chi re' ma' Luch ch'il i Wān, chi xa ruc' ricojoric quik'ab chi quina take aj niminel noquic i Lok' laj Uxlabal pan cāmna, xixutej tumin queh ¹⁹naxik'or queh chi je' wili:

«Chacuy tak ajabes, chayew wo' tak win awajawric nacoj tak reh chi re' hin nanicoj wo' nik'ab china jeno' c'acharel ewo' ric'ul i Lok' laj Uxlabal. Chayew wo' tak so' win awajawric tak re're' eh re' hin eniyew aweh tak i tumin wili, nqui xik'or queh.

²⁰Chalic i ma' Luch naxibiraj chi je' re' xik'or i Simon queh, je' wili xik'or reh:

«Hat ok sihtimaj ch'il atz'ak ru'um nok xacapaj chi ruc' atz'ak nalok'om nak awajawric reh chi re' hat enayew wo' chic i Lok' laj Uxlabal ruc' tumin, tōb ta nchel xa ye'oj cho ru'um i Dios chi je' ricab jenaj sj. ²¹Re' hat Simon, ru'um chi ma' coric ta wach acapew-bal chiwach i Dios ma'eta riban chi enawehchaj i ajawric ye'oj keh hoj. ²²Haj cok wilic nipahkaj reh Dios chi

eriyew aweh: Re' chi ericuy amahc re' npok' cho pan awamna wi la' re' hat enatok awib chiwach chi ripahkaljic cuybal reh amahc re're'. Chacana' k'uru' ayi'bel laj capew-bal re're', ²³maj re' hin nwilow chi ru'um ayi'bel laj capew-bal re're', ma' na'n ta canar ricanabjic awaranic re' til k'e' ch'iclic ac'ux chirij. Ru'um aj reh re', re' hat xa je' na acab jeno' tz'ahpel pan che' ma' riban ta canar elic ru'um chi ma' ja' nesmejic ta je re' tz'aplic wī', nqui ma' Luch.

²⁴Chalic Simon je' wo' chic wili xik'or:

«Chacuy tak haw, tipahkanok tak chiwij pan tij chiwach i kAjaw Dios reh chi ma' eta quinsihjic je' ricab xak'or tak chi narichalic chi nina, nqui queh.

Re' ma' Peh xik'or i c'uhbal reh jenaj aj Etiyopiya

²⁵Chiwach take k'ij re're' nok re' ma' Luch ch'il wo' i Wan xoj quik'o'rej i ma' Peh, xa xquitik wo' ju' rik'ormojic riC'uhbal i Dios chirij i Jesus chipam take rehreh wach tinamit quic'acharic wī' take aj Samarya. Chirij chic ru' nok quicohlam chic cho rik'ormojic re're', xisoljic wo' chic je ar Jerusalen.

²⁶Nok soljonak chic je ma' Peh ar Jerusalen, pan jenaj queh take k'ij re're' jenaj pe' raj tz'e' wach i Dios xchalic ar pan taxaj je' wili xik'or reh ma' Peh:

«Ma' Peh, chatik'lom awib. Hiy chipam najtir beh nkajic jok pa ritz'et i Jerusalen re' nponic cu pan tinamit C'asa ribihnal, nqui xik'or reh.

²⁷Naxibiraj chi je' re' i ma' Peh, xitik'lom wo' ti rib eh xoj chipam i beh xk'ormojic reh. Ar aj ru' chipam i beh re're', jenaj winak aj Etiyopiya nim wach ricamaj xponic cho aj lok'em reh Dios ar Jerusalen chipam i Lok' laj Pat re' nlok'onjic wī' wach i Dios. Chi je' re' yu'na soljic chic riban je pan tinamit Etiyopiya re' pahbamaj wī' chi raj to'ol ixok nk'atbic k'oric ar. Re' aj Etiyopiya wili, re' wilic chi aj cha'jem reh chi'nchel i tumin ribehsaj na ixok aj k'atal k'oric re're', ²⁸chi tz'uklic je pa ribehsbal kirimaj ru'um boyex, c'ahchi' rilom wach i huj tz'ihmbimaj cho ru'um raj k'orol C'uhbal i Dios re' Isayiyas ribihnal. ²⁹Nok je' re' c'ahchi' ribanam, re' Lok' laj rUxlabal i Dios je' wili xik'or reh ma' Peh:

«Chat'oc awib. Charak je winak behic riban chipam i behsbal re're' eh tibehok je chi richel, nqui xik'or reh.

³⁰Re' ma' Peh je' re' xiban eh nok behic chic riban je chi richel, xibiraj chi re' po' i huj ritz'ihmbam cho ma' Isayiyas re' aj k'orol riC'uhbal i Dios c'ahchi' rilom wach. Je' wili xik'or cok reh:

«Haw, re' huj c'ahchi' awilom wach, c'ahchi' na arakam chirij hab wach aj chirij nk'oric? nqui cok reh.

³¹Chalic aj Etiyopiya re're' je' wili xik'or reh ma' Peh:

«Chacuy tijohten cho wuc' pa nibehsbal eh titz'uhkok so' wuc' ru'um nok wi ma' hab wach ensakomonic wach win i c'ahchi' wilom chipam huj wili, re' hin ma' nic' ta wo' wach nanirak chirij chi je' re', nqui reh ma' Peh.

³²Je' re' xik'or maj je' wili rik'or chiwach i Lok' laj huj re' c'ahchi' rilom wach:

“Je' ricab jeno' t'uch me' ma' nchalic ta rijosk'il nanc'amaric je pan cansbal,

on nank'ataric lok i rismal rij cu'um take winak, ma' riq'uer ta wo' chi',
je' re' naribanam ru', xa naribuyab wo' ti rib

33 nabanarok i ma' coric ta laj ch'ukuj k'oric china cu'um take
naquich'ukbic k'oric china.

Chi je' re' riwi' quibanøj, chaj chic bih narik'ormojic chiquij take
winak re're', re' naquic'acharic pa rik'ijil ru'?

Je' re' nik'or maj re' take re' naquich'ukum wach chi naresmejic
ric'acharic china ac'al, nqui k'oric c'ahchi' rilom wach.

34 Chi re' aj re' c'ahchi' rilom wach, re' aj Etiyopiya je' wili xik'or reh
ma' Peh:

«Chacuy, chasakomej ti wach win i k'oric wili. Hab wach aj chirij
xk'oric cho i aj k'orol ric'uhbal i Dios re' ma' Isayiyas? Xa chirij na ru'
xk'oric on chirij chic jeno' tocom? nqui reh.

35 Chalic ma' Peh puht wo' chic rik'oric je' ruc' aj Etiyopiya eh xip'ut
wo' je' risakomsjic wach reh ruc' i k'oric c'ahchi' rilom wach chirij i Jesus.

36 Chirij chic ru' nok behic nca'n je, xiponic chipam jenaj ye'ab wilic wi'
ha'. Ar aj ru' re' aj Etiyopiya je' wili xik'or reh ma' Peh:

«Chawilow wulu' wilic jenaj ha'. Chaj aj bih enk'etbic pa nibeh chi
enak nakahsaj nihā' rehtalil chi xnicoj chic wach i k'oric xak'or win chirij
c'uhbal re're'? nqui reh.

37—Wi re' hat nacoj wach ruc' chi'nchel awamna chaj bih take xnik'or
aweh, ma'xta bih enk'etbic pan abeh chi enikahsaj aha', nqui ma' Peh.

—Re' hin nicoj wach chi re' kAjaw Jesus re're' i rAc'un i Dios, nqui
xik'or aj Etiyopiya.

38 Nok rik'orom chic chi je' re', xik'or chi pahbabjok i ribehsbal. Chi je'
re' xikajic lok, xi'oj jok chi chi' i ha' eh xkahsjic riha' ru'um ma' Peh.

39 Chirij i wili nok elenak chic cho chi chi' i ha' ch'il aj Etiyopiya, re' ma'
Peh xic' molorok ru'um Lok' laj rUxlabal i Dios chiwach i aj Etiyopiya cu
rehtal xsahchic je pan nak' wach. Ar ajic re' aj Etiyopiya xitik ju' ribeh chi
xa suk chic pa ric'ux 40eh re' chic i ma' Peh cu ar aj chic pan tinamit Asoto
ribihnal xoj ric'raj rib. Chipam i tinamit re're' ch'il wo' take tinamit xiq'uic
ponok wi' cu rehtal xponic chipam i tinamit Sesareya ribihnal, re' ma' Peh
xik'or i c'uhbal nk'oric chirij i Jesus queh chi'nchel take c'acharel.

Re' Sawlo xk'o'rjic ru'um i Jesus ar pa ribeh i Tamasco

(Hch. 22.6-16; 26.12-18)

9 ¹Chipam take k'ij re're', re' Sawlo xchalic ric'a eh xiyo'slom take
quinimanic reh kAjaw Jesus ruc' rik'ororic queh chi naricansam take.
Pan jenaj queh take k'ij re're', xoj ruc' i nahsil c'amol quibeh take aj k'ahsem
sj chiwach i Dios ²eh xipahkaj reh chi naritz'ihmbam take huj re' erik'or je
wi' queh aj cha'jem tak pat ntijiljic wi' rij i C'uhbal Ye'oj reh Moyses wilqueb
ponok pan tinamit Tamasco, chi re're' ye'oj je rajawric chi quichoporoc take

quicojbic wach i Jesus chi Aj C'amol Beh je ruc' i Dios. Re' take huj re're' xye'bic wo' rajawric chi quic'amaric je pan che' ar Jerusalem i jarub pa' take rirak je ma' k'orel ta wi ixok on winak take. ³Je' aj re' ru' nok k'ahsamaj chic reh take huj re're', xichop je beh ar Tamasco. Nok q'uisin aj chic ma' nponic pan tinamit Tamasco, cu re' pe' chic reh jenaj sakom yohbal wach sakomil xelic cho cu ar pan taxaj eh xisutej rij i Sawlo. ⁴Chirij re're' nok k'ehbenak chic wach ac'al i Sawlo, xibiraj chi wilic xk'o'ronic cho reh chi je' wili:

«Chabiraj i nanik'orom aweh wili i hat Sawlo: Chacana' ribanaric i ti'c'axic na'n win ruc' ribanaric ti'c'axic queh waj tahkanel, nqui k'oric xibiraj.

⁵Re' Sawlo chi xa sahchanak chic ric'ux je' wili xik'or reh:

«Ajabes, hab wach i hat? nqui reh.

Re' nk'o'ronic cho reh je' wili xik'or cho reh:

«Re' hin, hin i Jesus, nqui cho reh.

Chirij re' xik'or wo' chic cho reh chi je' wili:

«Sawlo, je' ricab jeno' boyex chi xa rib riyew chi ti' nariyak' je i k'as ju' ch'ihch' je' wo' re' nc'uluric awuc' hat, xa awib c'ahchi' ayeb chi ti' ruc' i ti'c'axic c'ahchi' abanam win, nqui reh.

⁶Re' Sawlo, chi xa nbarbatic chic ru'um yo'jic je' wo' chic wili xik'or reh:

«Ajabes, chaj bih nawaj chi nanibanam chi rijelow-bal xniban take lok' nqui reh.

Re' Ajabes re're' je' wo' chic wili xik'or cho reh:

«Ar chipam i tinamit wulu' narik'ormojic aweh chaj bih nabanam.

Tucten johtok k'uru' hiy cok chipam i tinamit re're', nqui reh.

⁷Naxiban k'oric re're' i Jesus chi quiwach take winak qui'ihch'ilinic reh i Sawlo, xicahnic xa je' chic mem take winak re're' ru'um reh chi xiyojic eh tob ta xquibiraj i c'utaj xiban i Sawlo ch'il i Jesus, ma' xquilow ta wo' wach hab wach i xk'oric ruc' i Sawlo. ⁸Nok ricohlam chic c'utaj i Jesus, re' Sawlo xuctic johtok wach ac'al chi tehlic nak' wach nanc'utunic xa re' la' ru' ma' xiban ta chic canar rilmijic take rich'il ru'um chi xcahnic chi ma' sakom ta chic nilbic. Chi je' aj re' xa ch'ihlimaj chic chi k'ab xc'amaric cok pan tinamit Tamasco. ⁹Ar ma' xiniq'uej ta chic riwa' riha' chiwach i xib k'ij xiban chi ma' nilbic ta chic.

¹⁰Ar aj wo' Tamasco jenaj pe' aj niminal Ananias ribihnal, xilow pa rila'wach chi re' kAjaw Jesus xic'uhtaj rib reh eh chi je' wili xk'ormojic reh pa rila'wach:

«Ananias, nqui xk'ormojic reh.

Naxibiraj ribihnal i Ananias je' wili xik'or:

«Ayu' wilquin chawach Haw. Chak'or win chaj bih nawaj chi nanibanam, nqui xik'or.

¹¹Ar k'uru' je' wili xk'ormojic reh ru'um Jesus:

«Chabiraj i wili: Jenaj winak aj Tarso, Sawlo ribihnal c'ahchi' ribanam ritij chi niwach. Chalof'uej awib, hiy chipam i beh re' til ribehbal i tinamit wili eh

chasic' i winak re're' chipam ripat i Jurás ¹²ru'um nok re' winak re're' c'ahchi' rilom pa ritij chi re' hat Ananiyas c'ahchi' aponic ruc' eh c'ahchi' acojom ak'ab china reh chi narisakombic wo' chic pam i nak' wach, nqui xik'or reh.

¹³Chalic i Ananiyas je' wili xik'or reh:

«K-Ajaw Jesus, q'uih take c'acharel biram chi nquik'or chi re' winak re're' k'e' ti'c'axic riban queh take quinimanic aweh ar Jerusalem. ¹⁴Je' wo' chic, ma' xa ta re' ar Jerusalem wilic rajawric ye'oj reh cu'um take c'amol quibeh take aj k'ahsem si chiwach i Dios, je' la' wo' chipam i tinamit wili ye'oj wo' rajawric chi quichoporik je take nic' pa' q'uihal aj niminel re' nquik'or abihnal pan quitij, nqui Ananiyas.

¹⁵Re' kAjaw Jesus je' wo' chic wili xik'or reh:

«Ananiyas tob ta la' je' re' rajawric ye'oj, hiy la' maj re' winak re're' xnichih chic wach chi naribanam chi waj camanom. Je' re' xniban reh chi re' c'uhbal chiwij i hin naric'amam je rik'ormojic queh take ra' ri'sil cho ma' Israhel, queh take ma' re' ta ra' ri'sil cho ma' Israhel eh je' wo' queh take k'atal k'oric. ¹⁶Ru'um aj re' ma' tiyo'jic chic chi ojic ruc' maj re' ti'c'axic riban i winak re're' aweh hat-tak waj tahkanel ma'xta chic ribanam, re' la' chic re' naric'ulbic reh ti'c'axic. Je' re' nik'or maj til re' wo' hin nanc'uhtunic reh pa ritij chi ru'um reh rik'ormojic niC'uhbal naribanam, tanlic chirij chi naric'ulum take ti'c'axic, nqui xik'or reh.

¹⁷Nok k'oroj chic reh re're', re' Ananiyas xoj chipam i pat xk'ormojic wj' reh chi wilic cho wj' i Sawlo eh nok wilic chic cok ar, je' wili xik'or reh:

«Wasbes ma' Sawlo, re' kAjaw Jesus re' xk'o'ronic aweh pan beh naxatchalic chipam i tinamit wili, xiritak'a' cho awuc' reh chi narisakombic wo' chic pam i nak' awach je' wo' reh chi nariye'eric ransil ak'orbale ru'um i Lok' laj rUxlabal i Dios, nqui reh.

Chirij chic ru' re' Ananiyas xicoj i k'ab china i Sawlo. ¹⁸Ar ajic xa chiwach wo' ti junc'am re're' xsakombic pam nak' wach eh xik'ehbic wo' take lok pan nak' wach take xa je' take rij car. Chirij chic ru' xa re' wo' ti naxuctic johtok i Sawlo, xoj wo' ti kahsjok riha'. ¹⁹Chirij chic re' xichop wo' chic riwa' riha' eh ruc' re're' xc'ulic wo' chic ransil. Chi je' re' cu xcahnic pe chic quib xib ok k'ij cuc' take aj niminel wilqueb ar Tamasco.

Re' Sawlo xcansjic nak ru'um c'uhbalanic xiban ar Tamasco

²⁰Xa ma' q'uih ta wo' chic k'ij xiq'uc lok ru', re' Sawlo xip'ut rik'ormojic ribiral chirij i Jesus ar chipam take pat ntijiljic wj' rij i C'uhbal Ye'oj reh Moyses, chi c'ahchi' rik'orom queh take c'acharel chi re' Jesus re' i Pahbamaj chi K'atal K'oric, til re're' rAc'un i Dios. ²¹Ruc' aj c'uhbalanic riban Sawlo, re' nic' pa' q'uihal take quibirinic reh je' wili nquik'or chi quiwach chi xa nsahchic chic quic'ux:

«Re' winak wili re' nak re' nbanic ti'c'axic ar Jerusalem queh take quik'oric ribihnal i Jesus pan quitij, maje'? nqui nquik'or.

Je' wo', wilic wo' nquik'or chi je' wili chirij:

«Re' winak re're' xc'ulic lok ayu' chi quichoporíc take aj niminel chi naric'amam je take chi quiwach take c'amol quibeh take aj k'ahsem si chiwach i Dios, nqui nquik'or.

Je' re' nok nanquibiraj chi re' Sawlo c'ahchi' rik'orom ribiral i Jesus, wilic take c'acharel xquicapaj chi xa jot'ol queh take aj niminel reh Jesus noj c'olok pan tak pat ntijiljic wí' rij i C'uhalb Ye'oj reh Moyses, ²²xa re' la' re' ríman chic ricowsaj ric'ux chi quiwach chi rik'ormojic chi re' Jesus til re're' i Pahbamaj chi K'atal K'oric. Ruc' take k'oric re're' riyew wach ac'al i quicapew-bal take rich ra' ri'sil cho ma' Israhel wilqueb ar Tamasco.

²³Chi je' aj re' nok q'uih chic k'ij riwih'ic i Sawlo ar Tamasco, re' take c'amol quibeh take rich ra' ri'sil cho ma' Israhel wilqueb ar xquimol quib eh xquitik'a' wach quino'jbal chi naquicansam i Sawlo ru'um reh c'uhbalanic riban. ²⁴Je' re' ajic chi k'ij chi ak'ab xquicha'jej take elbal reh tinamit chi richoporíc nak i Sawlo na elok je, xa re' la' i cha'janic c'ahchi' ca'nam take winak re're' xponic pan xiquin i Sawlo, ²⁵je' wo' pan quixiquin take rich aj niminel quipatanic ar Tamasco. Je' re' nok pan jenaj chak'ab re' take aj niminel re're' xquicoj i Sawlo chipam jenaj ma' laj chacach eh xquikahsaj jok chiwach i ma' laj tz'ak nsutunic rij i tinamit re're'. Je' re' ritobjic i Sawlo xca'n chi elic je chipam i tinamit re're' eh xoj ar Jerusalen.

Re' Wernaweh xk'oric chirij i Sawlo chirij niminic riban

²⁶Naxponic i Sawlo ar Jerusalen, re' take aj niminel xquilow chi re' Sawlo xaj nak ricojom rib chi quiman, ma' xquic'ul ta chi quixilac yo'jic la' chic xchalic queh maj pan quic'ux ru', re' Sawlo ma' re' ta til coric laj aj niminel chirij i Jesus. ²⁷Chi quixilac take aj niminel wilqueb ar, wilic i jenaj re' Wernaweh ribihnal, cu re're' xk'oric chirij Sawlo. Je' re' nok xic'am cho i Sawlo chi quiwach take nahsil c'amol beh chi quina take aj niminel eh chi xik'or queh nic' wach rik'o'rjic i Sawlo xbanaric ru'um i kAjaw Jesus naxic'uh taj rib reh chipam i beh noj pan tinamit Tamasco. Je' wo' xik'or queh chirij riwih'ic i Sawlo pan tinamit re're', nic' wach je' i c'uhbalanic xiban chirij i Jesus chi ma'xta nech' ok riyoj'ic. ²⁸Je' aj re' riwí' k'uru' naxoquic i Sawlo chi quiman take aj niminel ar Jerusalen eh xwih'ic ar chi quihch'iljic chi ma' xquiyohbalej ta chic chi wilic chi quixilac.

²⁹Chiwach take k'ij reh riwih'ic ar pan tinamit Jerusalen, re' Sawlo ma' nyo'jic ta wo' q'uisin ok chi k'oric chirij i Jesus eh je' re' xiban cu rehtal re' take rich ra' ri'sil cho ma' Israhel je' ruc' quik'oric pan criyeco re' xquisolq'uij pa rij rik'orbal, xquiyew quic'ux chi risiq'uiric rij nic' wach ricansjic naca'nam ru'um reh c'uhbalanic riban. ³⁰Naxquibiraj take rich aj niminel chi je' re' nca'n take c'acharel re're', xquic'am je cu chipam i tinamit Sesareya ribihnal eh chirij chic re' xquitak'a' je chipam i tinamit Tarso ribihnal.

³¹Je' aj re' xc'uluric ruc' i Sawlo chipam take k'ij re're' nok re' take moloj wach aj niminel wilqueb pan tak tinamit pa riyuk'ul Jureya, pa

riyuk'ul Calileya ch'iil wo' pa riyuk'ul Samarya, xiwih'ic chic pan sukquil c'uxlis. Je' wo', re' take aj niminal re're' til xquiyohbalej wach i Dios eh til xic'acharic wo' chi cowjonak quic'ux pan quinimic. Je' wo' chic, re' take quicomonil elic xq'uihic wach ru'um til to'bomaj wo' take cho ru'um Lok' laj rUxlabal i Dios.

Re' Eneyas xesmejic lok riya'bilal

³²Junpech re' ma' Luch, nok c'ahchi' risutem pam riyuk'ul i Jureya, xoj wo' c'olok chi quik'o'rjic take rich aj niminal wilqueb ar pan tinamit Lira. ³³Ar xirak jenaj winak Eneyas ribihnal wahxakib hab riyohquic wach yocab ru'um chi sicrinak riti'jolar chi junpech. ³⁴Je' aj wili xik'or i ma' Luch reh na xoj rirak:

«Ma' Eneyas, re' hin nik'or aweh chi re' hat xatcowjic chic ru'um i Jesus re' Pabhamaj chi K'atal K'oric. Je' re' nok tucten johtok yu'na, chamol wach apohp eh chac'ol, nqui reh.

Ruc' k'oric re're', xa chiwach wo' ti junc'am re're' xuctic johtok i Eneyas chi elenak chic lok riya'bilal. ³⁵Ar ajic naxquillow chi je' re', q'uihal take c'acharel je' ricab aj Lira ch'iil take aj Saron xquicana' quimahc eh xquinimej i kAjaw Jesus.

Re' Lorcas xc'acharic wo' chic

³⁶Chiwach aj wo' take k'ij nok wilic ponok ma' Luch ar Lira, ar chipam i tinamit Jope ribihnal wilic jenaj ixok aj niminal re' rito'bej wo' take niba' ruc' yohbal wach to'bonic riban queh. Re' ixok re're' Tawita ribihnal eh nanjalmajic i bihnal pan quik'orbal aj criyeco, Lorcas nelic wi'. ³⁷Re' Lorcas re're', pan jenaj queh take k'ij nok re' ma' Luch cu wilic ponok ar Lira, xchop pe' cho reh jenaj ya'bilal cu rehtal xquimic je. Je' ricab tijimaj take wi' tinamit chi cu nquitinej je riti'jolar jeno' c'acharel nquimic je, je' wo' re' xca'n reh Tawita eh chirij chic ru', xquiyoc'a' pan jenaj ye'ab wilic ar pa rica'tik pat.

³⁸Ar ajic naxquibiraj ribiral take aj niminal ar Jope chi re' ma' Luch ar wilic cho pan tinamit Lira eh ru'um chi xa ma' naht ta wo' wilic je ar ruc' i tinamit Jope, xquitak'a' je take quib chi winak chi rik'ormojic reh chi je' wili:

«Chacuy ma' Luch, ma' haj chic niq'uaic acham cho awib pan jeno' chic tinamit. Chaloq'uej ti cho awib, tichalok kuc' chi katobjic maj jenaj kich aj niminal Lorcas ribihnal xquimic je, nqui xquitak'a' je rik'ormojic chiquij take quib re're'.

³⁹Naxibiraj i ma' Luch chaj bih xponic k'ormojok reh, xitik'lom ti rib eh xoj chiquij take c'amol re're'. Naxiponic aj cuc' take aj niminal wilqueb ar Jope, re' ma' Luch xc'amaric johtok pa rica'tik pat re' wilic wi' riti'jolar i Lorcas. Ar chic johtok, re' take cahnel ixok re' xitobjic ru'um i Lorcas chi

cu c'achlic pe nak, xquisitej rij i ma' Luch eh chi xa suk chic qui'ok'ic chirij ru', xquic'uhtaj cok reh i quiso' xtik'injic queh ru'um i Lōrcas. ⁴⁰Chipam wo' ti' junc'am re're', re' ma' Luch xitak'a' quesmejic take lok chi'nchel wilqueb ar eh nok elenak chic take lok, xixuc'a' rīb chi tij. Nok ribanam chic ritij, je' wili xik'or je reh camnak naxisolq'uij je rilbal chi rilmijic:

«Tawita, tucten johtok, nqui reh.

Xa chiwach wo' ti junc'am re're', re' Lōrcas xiteh cho nak' wach eh xitz'uka' johtok rīb chi xa cow chic rilow i ma' Luch. ⁴¹Chirij chic re', re' ma' Luch xichop johtok chi k'ab i Lōrcas, xucsaj johtok eh nok riyuk'em chic take je aj niminel ch'il take cahnel ixok wilqueb ar, xipahba' chi quiwach chi c'achlic wo' chic. ⁴²Re' ribiral chi xc'acharic wo' chic i Lōrcas, xelic lok chi junsut tinamit Jope eh ruc' re're' yohbal wach take c'acharel xquinimej i kAjaw Jesus.

⁴³Ar pan tinamit Jope cu xcahnac pe chic so' q'uih k'ij i ma' Luch chi patanic ruc' jenaj winak aj jotzol wach tz'uhum, Simon ribihnal.

Re' c'uhbalanic xiban i ma' Luch pa ripat i Cornelyo

10 ¹Junpech aj cho, ar chipam i tinamit Sesareya ribihnal c'acharic riban jenaj winak aj Roma Cornelyo ribihnal, aj c'amol quibeh take sol aj Itāya ribihnal quicomonil. ²Re' winak re're' k'e' riyohbalej wach i Dios eh nc'utunic wo' lok chi coric wach rino'jbal ch'il take raj pan pat. Je' wo' chic, xa elic wo' riban ritij eh yohbal wo' wach tumin riyew queh take ra' ri'sil cho i ma' Israhel chi quitobjic. ³Pan jenaj k'ij ajic nok c'ahchi' ribanam ritij je' na xib ora risoljic i k'ij, til xilow wach jenaj raj tz'e' wach i Dios xchalic pan taxaj, xoquic cok ruc' eh xik'o'rej cok i Cornelyo ruc' ribihnal. ⁴Naxibiraj ribihnal i Cornelyo, xa cow chic xitz'ehtaj i raj tz'e' wach i Dios eh je' wili xik'or reh chi xa yo'jic chic wilic:

«Chaj nak bih Haw? nqui reh.

Re' raj tz'e' wach i Dios je' wili xik'or reh:

«Je' ricab nok re' Dios ma' niq'uaic ta pa ric'ux i sukquil c'uxlis nwh'ic ruc' ru'um risibil jeno' si' nc'ataric johtok chiwach, je' wo' re' risukquil ric'ux nwh'ic ru'um atij ch'il wo' take to'bonic nayew queh tinamit eh re' pahkanic xa'n reh, til wilic wo' pa ric'ux ric'u'ljic cho. ⁵Ru'um chi naribanam cho i ric'u'ljic re're', chatak'a' je take quib xib ok awaj camanom ar chipam i tinamit Jope chi ric'amaric i jenaj winak Simon ribihnal re' ribihnej wo' chi Luch ⁶maj re're' narik'oric aweh nic' wach namanlajok wach animinic chiwach i Dios. Re' ma' Luch nik'or aweh re're', ar wilic ponok chi patanic pa ripat jenaj winak aj jotzol wach tz'uhum Simon wo' ribihnal re' wilic ma' naht ta chi ch'i' ma' laj ha', nqui xik'or i raj tz'e' wach i Dios.

⁷Nok ojonak chic i raj tz'e' wach Dios re' xc'ulic k'o'ronok reh, re' Cornelyo xiyuk'ej take je quib raj camanom ch'il i jenaj risol ncamanic ruc' re' rilok'ej wo' wach i Dios ⁸eh xik'or queh chaj bih xk'ormojic reh ru'um raj tz'e' wach i Dios. Chirij chic ru' xitak'a' take je pan tinamit Jope chi ric'amaric ma' Luch.

⁹Je' chic ikal je' na cablaj ora reh k'ij nok ojic chic nca'n take c'acharel re're' pa ribehil i tinamit Jope, re' ma' Luch xjohtic johtok china_ñ rica'tik pat wilic wi' eh ar xoquic chi tij. ¹⁰Nok je' re' c'ahchi' ribanam, tz'eht pe' c'ahchi' ritik'injic cho c'uxbal. Ru'um aj re' xchalic ric'ahric pan yejal ritij eh chi je' re' xc'amaric ricapewbal ru'um i Dios. ¹¹Ar ajic xilow chi re' pan taxaj xteh cok pam eh xkajic cho wach ac'al i xa je' jenaj ma' laj tz'ih pixoj cho chi ju'jun reh ricajtz'u'c, ¹²re' wilqueb wi' q'uuh ch'uk wach chicop quic'acharic wach ac'al. Ar wilic take je' ruc' wilic quejeb cok, ch'il take xa nquijuquej quib wach ac'al, ch'il wo' take quirupunic wa taxaj. ¹³Chi je' aj re' c'ahchi' rilom, re' ma' Luch xibiraj jenaj k'oric chi je' wili:

«Luch, chacansaj aweh xa pa' jaric chicopquiall queh wili eh chac'ux aweh, nqui xibiraj.

¹⁴Chalic i ma' Luch je' wili xik'or:

«Haw, re' take chicop re're' ma'eta riban chi enic'ux maj re' hin ma' janc'al ta nic'uxum take chicop k'oroj cho ru'um i C'uhbal Ye'oj reh Moyses chi ma' taret ta chi c'uxuric, nqui xik'or ma' Luch.

¹⁵Chirij re', xibiraj wo' chic rica'pech k'oric chi je' wili:

«Luch, eriban chi enac'ux take chicop re're' ru'um nok re' rik'or i Dios yu'na chi ta chic ret chi c'uxuric, ma' ric'ul ta chic chi enak'or i hat chi ma' taret ta chi c'uxuric, nqui wo' chic xibiraj.

¹⁶Nok oxpech chic ribiram i ma' Luch take k'oric re're', xkirmijic wo' chic johtok pan taxaj i xa je' ma' laj tz'ih re're'. ¹⁷Ar ajic, xicohlaj ritij i ma' Luch eh chi xa nsahchic chic ric'ux chi ricapewjic rij chaj bih raj rik'orom re' xc'uhtjic reh, re' take winak xitak'abjic je' ru'um i Cornelyo xiponic ar Jope. Re' take re' chi c'ahchi' quibiram haj wilic cok ripat i Simon re' jotzol wach tz'uhum nk'ormojic reh, xi'oj wo' c'olok ruc' pat re're' ¹⁸eh chi je' re' xquibiraj cok wi ar c'ahchi' chi patanic i Simon re' ribihnej wo' chi Luch.

¹⁹Chi cu capewenic pe wo' riban i ma' Luch chirij re' xc'uhtjic reh, je' wili xk'ormojic reh ru'um Lok' laj rUxlabal i Dios:

«Chabiraj i wili: Xib take winak c'ahchi'cat quisiq'uim. ²⁰Je' re' k'uru' tucten, tikajen jok cuc' eh naquik'or aweh chi nawojic chiquij ma' ak'ihtaj awib chi quiwach maj nik'orbal i hin chi xtak'abjic cho ac'amaric, nqui Lok' laj rUxlabal i Dios reh.

²¹Chalic i ma' Luch xkajic cho cuc' take winak tak'amaj take je' re're' eh je' wili xik'or queh:

«Re' hin i winak re' c'ahchi'qu_ñ asiq'uim tak. Pa' nak bih abeh tak wuc', nqui queh.

²²Chalic take winak re're' je' wili xquik'or reh:

«Pan katinamit wilic jenaj ajabes c'amol quibeh sol Cornelyo ribihnal re' riyohbalej wach i Dios eh nc'utunic wo' lok chi coric wach rino'jbal chi quiwach take tinamit. Re' ajabes wili, ru'um reh to'bonic riban, holohic laj k'oric nbanaric chirij cu'um chi'nchel take ra' ri'sil cho ma' Israhel wilqueb pan katinamit. Re're', xk'o'rjic ru'um jenaj raj tz'e' wach i Dios re' xk'oric reh chi je' wili:

«Chatak'a' je take quib xib ok awaj camanom ar chipam i tinamit Jope chi ric'amaric cho ayu' pan apat i jenaj winak Simon ribihnal. Nok wilic chic ayu' chabiraj i narik'orom aweh nqui xik'or, nqui take reh.

²³Naxibiraj chi je' re' ma' Luch xicoj take cok pan pat take winak re're' eh xiyew quiwarbal. Naxsak'ic lok je' ikal, re' ma' Luch ch'il take ju'jun chic aj niminel ar Jope xi'oj chiquij take winak re're' ar Sesareya. ²⁴Je' chic ikal xiponic pa ripat i Cornelyo re' chi ximol quiwach take ruc' take cho ch'il take suk quik'oric ruc', uyunic chic riban quich'il. ²⁵Ar ajic naxponic i ma' Luch chi chi' i ripat, re' Cornelyo xelic cho chi ric'uluric eh rehtalil chi c'ahchi' riyeb rilok'il i ma' Luch, xixuc'a' rib chiwach, ²⁶xa re' la' ma' Luch naxilow chi je' re', xich'ihlej johtok chi k'ab eh je' wili xik'or reh:

«Tipa' johtok. Maxuc'a' awib chiniwach ru'um nok re' hin xa jenaj niwach awuc' i hat, nqui reh.

²⁷Chirij re're', re' ma' Luch xoquic cok pan pat chi c'utaj chic riban rich'il i Cornelyo. Nok wilic chic pan pat, re' ma' Luch xilow take riq'uihal tinamit quimolom quib ar ²⁸eh je' wili xik'or queh:

«Re' hat-tak was tak nichak' aweht'alim tak chi re' hoj ra' ri'sil cho ma' Israhel ma' riwi' ta chiwach i katijbal chi ta nak etikihch'ilej tak, xa ta wo' nak chi ekoj-oquic pan apat hat-tak ma' re' ta hat-tak kich ra' ri'sil cho ma' Israhel. Tob ta nak je' re' katijbal, re' hin ma' xnibiraj ta k'oric chiwach katijbal re're' ru'um nok re' Dios xic'uhtaj win pa nitij chi je' ricab nok re' take chicop xic'uhtaj chi niwach ma'eta riban chi enik'or chi ma' taret ta chi c'uxuric, je' wo' re' hat-tak ma' riban ta chi enik'or aweh tak chi ma' taret ta awihch'iljic tak. ²⁹Ru'um aj re' naxinponic c'amarok cho, re' hin ma' xnik'ihaj ta cho wib chi chalic ayu'. Chaj aj bih riwi' chi naxinayuk'ej cho ayu'? nqui ma' Luch.

³⁰Chalic Cornelyo je' wili tohk' rik'orom reh:

«Haw, quejeb cho k'ij yu'na je' wo' na ricab i ora wili, re' hin cuyuj wi'c niban chi tij ayu' pa nipat. Nok c'ahchi'quin chi tij xib ora chic risoljic i k'ij, xwilow chi jenaj winak xa nrepretic chic risakomil i riso' xpa'lajic chi niwach ³¹eh je' wili xik'or win:

«Cornelyo, re' pahkanic na'n johtok chiwach i Dios til wilic wo' cho pa ric'ux chi nacat ric'u'lem cho ru'um reh risukquil c'uxlis riyew take to'bonic na'n queh tinamit eh ru'um aj re' c'ahchi' ric'u'lem cho na yu'na. ³²Re' aj wili cha'n k'uru': Chatak'a' je take quib xib ok awaj camanom chipam i tinamit Jope chi ric'amaric cho awuc' i jenaj winak Simon ribihnal re' ribihnej wo' chi Luch maj re're' narik'oric aweh chaj chic bih raj chi nabanam na'ocok i Lok' laj rUxlabal i Dios pan awamna. Re' ma' Luch re're', ar patanic riban ponok pa ripat i jenaj winak aj jotzol wach tz'uhum, Simon wo' ribihnal re' wilic ma' naht ta chi chi' ma' laj ha', nqui win.

³³«Ru'um aj chi je' re' xk'ormojic win, re' hin xnitak'a' je ac'amaric chi jumehk'il eh k'e' taret chi re' hat xac'u'lej cho na i chalic ayu'. Yu'na

aj ru', ayu' wilcoj chi'nchel hoj chiwach i Dios chi ribirmijic haj wilic narik'orom ruc' achì' i hat, nqui Cornelyo.

³⁴Naxibiraj i ma' Luch chi je' re', je' wili xik'or queh:

«Yu'na aj ru' re' hin til xnirak chirij chi re' Dios til ma' hab ta wach tocom riliric riban maj re' Dios ma' xa re' ta take wich ra' ri'sil cho ma' Israhel ³⁵nponic chiwach quico'ljic, je' la' wo' take ma' re' ta ra' ri'sil cho ma' Israhel je' ruc' nquiyohbalej wach eh nquic'uhaj lok i coric laj no'jbal. ³⁶Ru'um aj re' tob ta ma' re' hat-tak ra' ri'sil cho ma' Israhel, nanik'orom wo' aweh tak riC'uhbal i Dios re' c'ahchi' wo' rik'ormojic queh take ra' ri'sil cho ma' Israhel maj queh take ru' c'ahchi' nik'orom i holohic laj k'oric chirij i Jesus chi re're' i Ajabes Pahbamaj chi K'atal K'oric chi kana chi'nchel i hoj c'acharel.

³⁷«Chirij i holohic laj k'oric chirij i Jesus, re' hat-tak aweht'alim tak i ribiral wili: Nok re' Wan rip'utum chic cho rik'ormojic queh tinamit chi naquikahsam quihà', xa ar wo' pa riyuk'ul Calileya xp'uhtic cho rik'ormojic ribiral i Jesus cu rehtal xoj lok rik'ormojic chi junsut riyuk'ul Jureya. Re' ribiral re're' rik'or ³⁸chi re' Jesus re' ribihnej chi aj Nasaret re' xye'eric rajawric ru'um i Dios naxtak'abjic cho Lok' laj Uxlabal ruc', yohbal wach ato'bil xiban ruc' rito'bal i Dios je' ricab naxicowsaj take chi'nchel yowa'ib ch'il take ti' wilqueb pan k'ab aj Yahm.

³⁹«Re' hoj xkilow chi'nchel re' chaj bih xiban pan tinamit Jerusalen, je' wo' pan tocom chic tinamit reh riyuk'ul Jureya eh ru'um re' nkayew kachi' chi je' re' xiban cho. Je' wo' nkayew kachi' chi re' Jesus re're', re' xquich'ila' wach curus chi ricansjic, ⁴⁰re' Dios xucsaj cho pa rox k'ij reh riquimic eh ruc' chi je' re' xiban i Dios, re' Jesus xic'uhaj wo' chic rib chi c'achlic. ⁴¹Re' cok ru' ma' queh ta chic chi'nchel tinamit xic'uhaj rib, xa keh la' chic i hoj re' richihim cho kawach i Dios nok chi cu c'achlic pe cho Jesus reh chi re' hoj nakaye'bic kachi' chirij ructic cho chi quixilac camnak. Je' aj re' ru', re' hoj re' xka'n cho kawa' kahà' ruc' Jesus nok uctunak chic cho chi quixilac camnak, ⁴²xojritak'a' i Jesus chi rik'ormojic queh chi'nchel i tinamit chi xuctic wo' chic chi c'acharic. Je' wo', xik'or wo' keh chi nakayeb kachi' chirij i c'uhbal je' wili rik'or:

«Re' Jesus re' xcojoric ru'um i Dios chi ch'ukul wach mahc queh take c'achalqueb, je' wo' chi queh take camnak chic take, ⁴³re' aj re' xk'ormojic cahnok ribiral cu'um take aj k'orol riC'uhbal i Dios najtir cho k'ij naxquik'or cho chi re' ye'oj cho rajawric chi K'atal K'oric, re're' naricuybic wo' rimahc i xa hab wach narich'icab ric'ux chirij, nqui rik'or i c'uhbal re're', nqui ma' Luch.

⁴⁴Cu k'oric pe wo' riban i ma' Luch, xchalic i Lok' laj rUxlabal i Dios chi wih'ic pan camna take nic' nimal c'ahchi'queb chi birinic. ⁴⁵Re' take aj niminal ra' ri'sil cho take ma' Israhel quihch'ilinic ponok reh ma' Luch, naxquilow chi re' take ma' re' ta ra' ri'sil cho ma' Israhel xye'eric wo' queh i Lok' laj Uxlabal chi je' ricab jeno' quisi, k'e' xsahchic quic'ux ⁴⁶ru'um xquibiraj chi re' take c'acharel re' cu re' ti junc'am quinimem i Dios, pan tocom chic k'oric c'ahchi' quiyeb johtok rilok'il ribihnal i Dios.

47 Ar aj ru' naxilow ma' Luch chi xchalic i Lok' laj rUxlabal i Dios cūc' chi'nchel take wilqueb ar, je' wili xik'or queh take wilqueb ponok chirij:

«Re' take kas kachak' wili xquic'ul chic i Lok' laj rUxlabal i Dios je' ricab naxkac'ul i hoj aj niminal reh Jesus je' ruc' ra' ri'sil cho ma' Israhel. Yu'na k'uru' ma' eta chic riban chi enpitjic queh chi enkahsjic quiha', nqui queh.

48 Chi je' re' xpahkaljic queh chi naquikahsam quiha' chi naca'nam chi raj tahkanel chic Ajabes Jesus re' Pahbamaj chi K'atal K'oric. Je' aj re' ru' nok kajanak chic quiha', re' take ac' aj niminal re're' xquipahkaj reh ma' Luch chi naricahnic quib xib ok k'ij chi quixilac chi ula'anic ch'il take rich'il.

Re' ma' Luch xnakaric cu'um take ra' ri'sil cho ma' Israhel

11 1 Naxponic ribiral cūc' take rich nahsil chi c'amol beh i ma' Luch, je' wo' cūc' take rich aj niminal wilqueb pa riyuk'ul Jureya chi juntuhm chi c'acharel je' ruc' ma' re' ta ra' ri'sil cho ma' Israhel take, xquicoj wo' wach riC'uhbal i Dios 2 wilic take aj niminal ra' ri'sil cho ma' Israhel p'uht quinakam i ma' Luch naxponic wo' chic cho ar Jerusalem. 3 Je' aj wili xquik'or reh:

«Re' hat ma'xta nak bih aweh chi xatoquic pan quipat take ma' re' ta kich ra' ri'sil cho ma' Israhel, ma' wo' nak chi xa'n nak awa' aha' cūc'. Ma' riyew ta rib xa'n chi junpech, nqui take reh.

4 Chalic ma' Luch naxibiraj chi je' re', p'uht rik'orom queh chi chaklic ch'i' nic' wach riwi' xc'uluric cho ar. Je' aj wili p'uht rik'orom queh:

5 «Re' hin nok c'ahchi'quin tij ar ponok pan tinamit Jope, xc'amaric nicapew-bal ru'um i Dios. Chi je' aj re' xwilow chi jenaj xa je' ma' laj tz'ih pixoj cho chi ju'jun reh ricajtz'u'c cu ar pan taxaj c'ahchi' rikajic cho chi niwach. 6 Naxwilow chi je' re' xnitz'ehtaj chi coric eh xwilow chipam i xa je' ricab ma' laj tz'ih re're' wilqueb take q'uih ch'uk wach chicop quic'acharic wach ac'al je' ruc' take quejeb cok ch'il take josk' laj chicop, ch'il take chicop xa nquijuquej quib wach ac'al, ch'il wo' take quirupunic wa taxaj. 7 Ar nok c'ahchi' wilom re're' xnibiraj jenaj k'oric chi je' wili:

«Ma' Luch, chacansaj aweh xa pa' jaric chicopal queh wili eh chac'ux aweh, nqui xnibiraj.

8 «Naxnibiraj re're', re' hin je' wili xnik'or:

«Haw, re' take chicop re're' ma' eta riban chi enic'ux maj re' hin ma' janc'al ta nic'uxum chicop k'oroj ru'um i C'uhbal Ye'oj reh Moyses chi ma' tarēt ta chi c'uxuric, nqui xnik'or.

9 «Chirij re' xnibiraj wo' chic rica'pech chi je' wili k'oric xiban cho cu ar pan taxaj:

«Ma' Luch, eriban chi enac'ux take chicop re're' ru'um nok re' rik'or i Dios yu'na chi ta chic rēt chi c'uxuric, ma' ric'ul ta chic chi enak'or i hat chi ma' tarēt ta chi c'uxuric, nqui xnibiraj.

10 «Je' re' ajic nok nibiram chic oxpech i k'oric re're', re' xa je' ma' laj tz'ih re're' xkermejic wo' chic johtok pan taxaj ch'il take chicop wilqueb

chipam. ¹¹Chirij aj chic junc'am naxnicohlaj nitij, xib take winak cu ar tak'amaj take cho Sesareya chi nic'amaric, xiponic chipam i pat wilquin wi'. ¹²Ar ajic re' Lok' laj Uxlalab xik'or win chi ma'xta nik'ihtam wib chi quiwach take winak re're' naxquipahkaj win chi nawojic chiquij. Ru'um aj re', re' hin xinōj chiquij quich'il take wakib chic chi aj niminel wili eh chi je' re' xojponic pa ripat i jenaj winak Cornelyo ribihnal. ¹³Re' Cornelyo re're' xik'or keh nic' wach nok jenaj raj tz'e' wach i Dios xchalic pan taxaj xipahba' ribi chiwach ar pa ripat eh je' wili xk'ormojic reh:

Yu'na chatak'a' je take quib xib ok awaj camanom ar chipam i tinamit Jope chi ric'amaric cho jenaj winak Simon ribihnal re' ribihnej wo' chi Luch ¹⁴maj re're' naric'uhbalanic aweh. Wi xac'am na haj wilic c'uhbal narik'orom, re' Dios naricuyum amahc i hat ch'il take awaj pan pat, nqui banol reh.

¹⁵«Je' aj re' nok cu c'uhbalanic pe wo' niban chipam ripat i winak re're', xchalic i Lok' laj rUxlalab i Dios chi wih'ic pan camna take wilqueb ar je' ricab wo' naxchalic kuc' hoj nok re' Jesus xip'ut cho ritak'abjic i Lok' laj Uxlalab. ¹⁶Nok quic'ulum ok chic i Lok' laj Uxlalab, xc'ulic cho pa nic'ux i rik'orom cho i kAjaw Jesus naxik'or chi je' wili:

Je' ricab chi til coric chi re' Wan xikahsaj aha' tak, til coric wo' chi re' Dios nariyeb cho aweh tak i Lok' laj rUxlalab, nqui rik'orom cho.

¹⁷«Je' aj re' ru' ru'um nok re' wo' kAjaw Dios xye'bic cho Lok' laj rUxlalab chi jenaj si queh take ma' re' ta ra' ri'sil cho ma' Israhel je' ricab naxiyew wo' cho keh i hoj ra' ri'sil cho ma' Israhel naxkach'ica' kac'ux chirij i Jesus re' Pahbamaj chi K'atal K'oric, re' hin ma' xiban ta chi xnipit queh ric'uluric re're' maj chaj bih wajawric i hin chiwach i Dios chi je' re' eniban? nqui ma' Luch queh.

¹⁸Nok re' take rich aj niminel i ma' Luch quibiram chic re're', ma'xta chic bih xquik'or chirij i xiban cho, rilok'onjic la' chic i Dios xca'n chi je' wili c'ahchi' quik'orom:

«Ruc' xiban i Dios pa ripat i Cornelyo epo' wo' riban chi re' take ma' re' ta ra' ri'sil cho ma' Israhel enquirak i junelic c'acharic nok quijalam chic quino'jbal. Ruc' chi je' re' xiban i Dios, lok'omaj ok ribihnal, nqui take.

**Re' take ma' re' ta ra' ri'sil cho ma' Israhel
xk'ormojic queh i c'uhbal chirij Jesus**

¹⁹Tob ta chiwach take kl'ij re're', re' Lok' laj Uxlalab xchalic chi quina juntuhm chi c'acharel je' ruc' take ma' re' ta ra' ri'sil cho ma' Israhel, re' take aj niminel reh Jesus wilqueb ar Jerusalem re' xquipuhcay quib ru'um i ti'c'axic tohk'ic cho ruc' ricansjic i Tewan, ma'xta nquik'or c'uhbal chirij i Jesus queh take ma' re' ta ra' ri'sil cho ma' Israhel naxiponic chipam take tinamit Penjsya, Chipire ch'il Antiyoquiya. Xa queh la' ti take ra' ri'sil cho ma' Israhel xquik'or i c'uhbal re're'.

²⁰Tob ta je' re' c'ahchi' ribanaric chipam take tinamit re're', ar pe' pan tinamit Antiyoquiya wilic take aj Chipire ch'il take aj Sirene je' ruc' xiponic ar chi quixilac

take aj niminel quipuhcam quib xquik'or i c'uhbal k'oroj chirij kAjaw Jesus ma' xa re' ta queh take ra' ri'sil cho ma' Israhel je' la' wo' queh take ma' re' ta ra' ri'sil cho ma' Israhel je' ruc' quik'oric pan criyeco. ²¹Ru'um aj chi je' re' xca'n take aj niminel re're', re' wilic cuc' i Lok' laj rUxlabal i Dios chi quitobjic, q'uihal take c'acharel je' ruc' aj criyeco xquicoj wach i c'uhbalanic xquibiraj eh naxquicana' ribanaric i quinajtir laj no'jbal, p'uht quinimem i kAjaw Jesus. ²²Nok re' ribiral i c'ahchi' ric'ulmujic ar Antiyoquiya xponic cuc' take moloj wach aj niminel wilqueb ar Jerusalem, re' take re' xquitak'a' je' i Wernaweh chi narojic rilom chaj bih c'ahchi' ribanaric ar Antiyoquiya. ²³Re' Wernaweh naxponic ar Antiyoquiya, k'e' xsukbic ric'ux chi riliric rato'bil i Dios wilic chi quina take aj niminel quik'oric ribiral i Jesus. Je' wo' wili xik'or queh nic' q'uihal c'ahchi' quinimanic reh c'uhbal: «Mapoh'aj acapew-bal tak chi rinimjic i kAjaw Jesus, chayew la' ac'ux tak chirij chi manlic, nqui queh.

²⁴Re' Wernaweh re're' wilic riwi' chi rik'ororic chi je' re' maj til coric wach ric'ux, til behsemaj ru'um Lok' laj rUxlabal i Dios eh til ch'iclic wo' ric'ux chirij i Dios. Je' re' nok ruc' i xik'or queh, q'uihal take aj Antiyoquiya xquicoj quib chi quixilac take quinimanic reh kAjaw Jesus.

²⁵Chirij chic riwih'ic ar Antiyoquiya, re' Wernaweh nok xelic je chipam i tinamit re're' xoj chipam i tinamit Tarso ribihnal chi risiq'uiric i Sawlo. Naxirak, xic'am cho chirij ar Antiyoquiya chi ric'uhjtjic queh take aj niminel wilqueb ar. ²⁶Chipam aj i tinamit re're', xiwih'ic i Wernaweh ch'il i Sawlo chiwach jenaj hab chi quic'uhbaljic take q'uihal tinamit xquitok'a' niminic. Chipam aj wo' i tinamit Antiyoquiya re're' xp'uhtic cho rik'ormojic queh take quinimanic reh Jesus chi je' wili: “Re' take c'acharel quinimanic reh chi re' Jesus re're' i xipahba' i Dios chi k'atal k'oric”.

Re' Acawo xik'or ribiral jenaj wi'jalel narichalic chi junsut riyuk'ul Jureya

²⁷Chiwach aj take cho k'ij nok cu wilqueb ar Antiyoquiya i Wernaweh ch'il Sawlo, xi'oj c'olok ar juntuhm chi aj k'orol riC'uhbal i Dios xichalic ar Jerusalem. ²⁸Pan jenaj k'ij nok quimolom quib take aj niminel, jenaj queh aj k'orol re're' Acawo ribihnal, xpa'lajic johtok chi quiwach take wilqueb ar eh je' wili take k'oric xik'or queh chi ye'oj reh ru'um Lok' laj Uxlabal:

«Chi junsut riyuk'ul Jureya narichalic jenaj riminal wi'jalel, nqui xik'or queh.

Re' wi'jalel c'ahchi' rik'oric chirij, re' aj wo' re' xc'uluric pa rik'ijil rik'atoj k'oric ma' Calawyo.

²⁹Je' re' nok naxquibiraj chi je' re' xik'or Acawo, re' take aj niminel ar Antiyoquiya xquitak'a' wach ritak'abjic je to'bal queh take aj niminel wilqueb ar pa riyuk'ul Jureya, re' k'orel nic' pa' nimal to'bonic nca'n canar riye'eric. ³⁰Chirij aj chic ru' nok quimolom chic wach nic' pa' nimal i to'bal xquiyew, xquitak'a' je chiquij i Wernaweh ch'il i Sawlo reh chi nariye'eric queh take quinahsil aj niminel wilqueb ar Jureya.

Re' Herōres p'uht ribanam ti'c'axic queh take aj niminel ar Jerusalen

12 ¹Chiwach aj wo' cho take k'ij nok c'ahchi' rimoloric quito'bal take aj niminel wilqueb pa riyuk'ul Jureya, xchalic jenaj ti'c'axic chi quina take aj niminel ar Jerusalen nok re' raj to'ol i aj k'atal k'oric Roma re' Herōres xitak'a' riciojoric pan che' take ju'jun aj niminel. ²Chipam aj take k'ij re're', re' Herōres xitak'a' ricansjic i Jacowo re' richak' i Wan, chi c'ul k'as re machet. ³Chirij chi ribanam chic re're', re' Herōres naxilow chi re' take ra' ri'sil cho ma' Israhel xponic chi quiwach chi xicansaj i Jacowo, re' aj chic i ma' Luch xitak'a' richoporoc chiwach take k'ij re're' nok c'ahchi' i nink'ij Pascuwa ribihnal re' nc'uxuric wi' caxlan wi'c ma' cojoj ta rik'omil chi sipsbal wach. ⁴Je' re' ru' nok chopoj chic i ma' Luch xc'amaric je chiwach i Herōres. Chalic ru' xitak'a' chi xtz'aparic pan che' eh ar xcahnic chi cha'jamaj cu'um take cajch'uk chi sol cajcaj quiwi' cu rehtal xponic ri'orahil ricansjic maj re' Herōres ritik'ab chic wach pa ric'ux chi na'ic'ok i nink'ij Pascuwa naritak'ab resmejic cho ma' Luch pan che' reh chi narich'ukum rij riquimic chi quiwach i tinamit. ⁵Xa re' la' nok je' re' ricapaj i Herōres, re' quicomonil take moloj wach aj niminel, chi k'ij chi ak'ab xca'n quitij chiwach i Dios chirij i ma' Luch. ⁶Je' aj re' chipam i ak'ab nok re' Herōres naritak'ab nak resmejic cho ma' Luch na sak'ok lok je' ikal, re' ma' Luch til cha'jamaj chi coric cu'um take sol cha'janic nca'n lok chi chi' i tz'ahp eh til wo' quib chi sol xquipix quib chi k'ab ma' Luch ru'c' jenaj c'aham ch'ihch' naxiwiric cok chi richel. Chi je' aj re' riwi' wih'ic i ma' Luch ar pe' pan che', ⁷cu re' pe' chic ru' ruhmumaj cho jenaj raj tz'e' wach i Dios xchalic pan taxaj eh xisakomej pam i pat tz'apalqueb wi' aj tz'ahpel. Re' aj tz'e' wach re're' je' wili xik'or reh ma' Luch naxitz'a'j cok nah teleb chi ric'a'chsajic wach:

«Chat'ohcaj awib, tucten ti yu'na, nqui xik'or reh.

Chi je' re' xa chiwach wo' ti junc'am re're' xit'upubic wo' ti lok i c'aham ch'ihch' pixilqueb wi' take k'ab. ⁸Chirij re're' je' wo' chic wili xk'ormojic reh ru'um aj tz'e' wach re're':

«Chatik'a' awib eh chacojlojlox axijab, nqui reh.

Nok ribanam chic re're', je' wo' chic wili xk'ormojic reh:

«Chacojlojlox chawij ajuc ro'k tz'ih ro'xlo'c' lok aso', re' xayocobej eh quinatahkej je, nqui xk'ormojic reh.

⁹Chi je' aj re', re' ma' Luch xelic cho chipam i ye'ab wilic nak wi' eh xitahkej lok i raj tz'e' wach i Dios xa re' la' cu suk wiral wo' na maj chi reh ru', xa pan wiric la' c'ahchi' ric'uh'tjic reh i c'ahchi' ribanam aj tz'e' wach re're' nok c'ahchi' rilom eh ma' coric ta la' pa ric'ux. ¹⁰Chi je' aj re', re' ma' Luch naxic'saj lok i pet tz'ahp ch'il' wo' i ricab tz'ahp re' wilqueb wi' tocom chic aj cha'janel, xponic lok chiwach i ch'ihch' laj tz'ahp re' wilic lok chi chi' beh eh re' tz'ahp re're' xiteh rib chi rutquel. Chirij re', re' ma' Luch ch'il' raj tz'e' wach i Dios xi'elic lok eh naxibehic chic je junc'am ok pan jenaj chic beh, xcanabjic

cahnok i ma' Luch chi rutquel. ¹¹Cu re' aj ar xna'lajic reh i ma' Luch eh je' wili xik'or:

«Yu'na nwilow chi til coric chi re' Dios xitak'a' cho raj tz'e' wach chi nico'ljic chiwach Herōres maj naquīn nak riyeb pan ti'c'axic re' xa cuy'em chic take wich ra' ri'sil cho ma' Israhel chi enchalic chi nina, nqui xik'or.

¹²Chirij chic ru', re' ma' Luch xicora' je pa ripat i Mariya re' ritut i Wan re' ribihnej wo' chi Cus. Chipam i pat re're' q'uihal take aj niminel quimolom quib ar chi tij ¹³eh nok re' ma' Luch xponic ar, p'uht rik'oric cok chi' tz'ahp re' wilic lok pan beh. Chi je' aj re', jenaj k'ahxok Rowre ribihnal xelic cho chi riliric hab wach nk'oric cok ¹⁴eh xina'bej pam rik'orbak chi re' ma' Luch c'ahchi' rik'oric cok, xa re' la' ru'um risukquil pa ric'ux ma' xiteh'aj ta wo' ti cho tz'ahp reh, cu xsoljic wo' chic cok rajim chi rik'ororic queh take aj niminel wilqueb ar chi re' ma' Luch pa'lic cho chi' tz'ahp. ¹⁵Re' take aj niminel re're' naxquibiraj chi je' re', je' pe' wili xquik'or reh Rowre:

«Hat ixk'un, tz'a' pam ana. Chaj bih nawilow wach? nqui take reh.

Tob ta wo' re' ixk'un re're' xa nch'uk chic ric'ux chi rik'ormojic queh chi til re' ma' Luch pa'lic cho chi' tz'ahp, re' take aj niminel re're' ma' nquicoj ta wach i c'ahchi' rik'ormojic queh, re' la' chic xquik'or chi xa ranxex i ma' Luch wilic lok chi' tz'ahp.

¹⁶Nok je' re' c'ahchi' quik'orom cok pan pat, re' ma' Luch chayew k'o'ronic riban cok chi naquitehem reh i tz'ahp xa re' la' take aj niminel re're' cu k'un xi'elic lok chi riteheric i tz'ahp. Cu re' aj chic ar xquillow chi til re' po' wo' ma' Luch c'ahchi' rik'o'ronic cok queh eh ru'um re' k'e' xsahchic quic'ux. ¹⁷Ar aj ru' re' take aj niminel re're' xquitok'a' xa quichokonic chic cok ar ru'um reh risukquil quic'ux chi xquillow wach i ma' Luch, xa re' la' re' xiban k'ab queh chi ma'xta chic qui'ahnic. Chi je' re' xitok'a' rik'ormojic queh nic' wach naxesmejic cho pan che' eh xik'or wo' queh chi je' wili:

«Re' xnik'or aweh tak wili, chak'or tak reh Jacowo re' richak' cahnok i kAjaw Jesus je' wo' queh take kich niminel, nqui xik'or queh.

Chirij chic ru', re' ma' Luch xelic je pa ripat i Mariya eh xoj pan jenaj chic tocom ye'ab ¹⁸maj nok sak'anak chic lok, re' take sol aj cha'janel xiban xa nahol chic quiwach chi ribirmijic chi quiwach chaj bih xc'uluric ruc' i ma' Luch. ¹⁹Chi je' aj re' naxibiraj Herōres chaj bih xc'ulmujic, xitak'a' je take sol re're' chi risiq'uiric i ma' Luch xa re' la' nok ma' xquirak ta wo' cho, re' take sol re're' xitak'a' quicansjic ru'um chi ma' xic'u'lunic ta wo' naxbirmijic queh chaj bih xc'uluric.

Re' ribiral nic' wach naxquimic i Herōres

Chirij chic ru' re' Herōres xelic je pa riyuk'tul i Jureya eh ar chic xoj chipam i tinamit Sesareya re' xcahnuc wi' chi c'acharic xa re' la' ma' chi junpech ta. ²⁰Nok ar aj chic wilic ponok i Herōres, pa' bih riwi' naxchalic ric'a cuc' take aj Tiro chi' take aj Siron. Ru'um chi re' chi'nchel pa' bih queh nquic'ux, ar nelic je

pa riyuk'ul Herōres, re' take c'acharel chipam i quib chi tinamit re're' xquitunā' quib eh xca'n jenaj wach quic'ux chi nacojic quik'o'rem i Herōres. Xa re' cok ru' reh chi xca'n canar oquic'ruc', pet quik'unej wach chi tumin i jenaj queh ajabes qui'ilbic reh pam ripat Herōres Walasto ribihnal, reh chi re're' naric'ambic cok queh ar. Naxc'amaric cok quibeh ru'um i Walasto, re' take c'acharel reh quib chi tinamit re're' xquipahkaj reh Herōres chi naquicahnic pan sukquil c'uxlis 21 eh ruc' re're', re' Herōres xipahbā' jenaj k'ij reh chi narimolom rib cuc' take tinamit re're'. Chipam aj i k'ij re're', re' Herōres xicoj riso' je' ruc' chak'wach laj tz'ih ncojoric cu'um take k'atal k'oric eh xoquic cho chi k'oric cuc' take tinamit re're' nok tz'uklic cho pa rik'atbal k'oric. 22 Naxquibiraj i c'ahchi' rik'orom i Herōres, re' take tinamit re're' p'uht quiq'uerem quichi' chi je' wili:

«Re' cok i c'ahchi' rik'oric wili ma' re' ta winak, jenaj la' dios, nqui take.

23 Chiwach aj junc'am re're' nok je' re' c'ahchi' quik'orom take tinamit, jenaj raj tz'e' wach i Dios xchalic ar pan taxaj xc'ulic ricol jenaj ya'bilal pa riti'jolal i Herōres xa ru'um chi ma' xiyew ta rilok'il i Dios chi je' wili:

«Re' Dios wilic cho pan taxaj, xa re' wo' re' i Dios, ma' nqui ta xik'or.

Xa ruc' aj ya'bilal xcojoric pa riti'jolal, re' Herōres xa chi yu'na ti xquimic je eh chi je' re' xc'uxuric rak'sā' cu'um take sa'ha.

24 Je' aj re' ru' chiwach cho rik'ijil riquimic Herōres xq'uihbic wach take c'acharel quibirinic reh riC'uhal i Dios eh ruc' re're', k'e' wo' naxq'uihbic wach i quicomonil take aj niminel ar Jerusalem. 25 Re' aj chic i Wernaweh ch'il Sawlo naxquicana' cho Jerusalem i to'bal xquimol cho chi quina take niminel aj Antiyoquiya, xisoljic wo' chic je ar Antiyoquiya eh xquic'am je chiquij i Wan re' ribihnej wo' chi Cus.

Re' Wernaweh ch'il ma' Sawlo xipahbabjic chi nacojic chi c'uhalanic

13 1 Chiwach aj wo' take cho k'ij nok re' take aj niminel c'ahchi' riq'uihbic wach quicomonil, re' rik'orbal i Dios xa xk'ormojic wo' eh xa xc'uhjtjic wo' queh take aj niminel nquimol quib ar Antiyoquiya. Re' take quik'oric reh riC'uhal i Dios, re' take je' wili quibihnal: Re' ma' Wernaweh, re' ma' Simon re' K'ek Winak nquik'or reh ru'um k'ek rilbal, re' ma' Lusyō aj Sirene, re' ma' Sawlo ch'il i ma' Manahen re' rich q'uihich cho i k'atal k'oric Herōres.

2 Junpech cho nok re' take aj c'uhalanel re're' quimolom quib chi cuyuj wi'c chi rilok'onjic i Dios, re' Lok' laj rUxlabal i Dios je' wili xik'or ruc' chi' i jenaj queh aj c'uhalanel re're':

«Re' ma' Wernaweh ch'il i Sawlo xnichih quiwach chi nacojic chi aj c'uhalanel. Je' re' nok chapahbā' tak win chi nacojic ca'nam i camanic re're', nqui xik'or Lok' laj rUxlabal i Dios.

3 Chi je' re', re' take rich'il ma' Wernaweh ch'il i Sawlo, xquicoj quik'ab china Wernaweh ch'il i Sawlo naxi'oquic chic chi tij ruc' cuyuj wi'c chi quich'il take aj niminel ar Antiyoquiya. Chirij aj chic re' xitak'abjic je ma' Wernaweh ch'il i Sawlo reh chi nacojic chi c'uhalanic.

**Re' ma' Wernaweh ch'i'l i Sawlo xquik'or
riC'uhbal i Dios pa riyuk'ul i Chipire**

⁴Nok pahbamaj chic take je ru'um i Lok' laj rUxlabal i Dios, re' ma' Wernaweh ch'i'l i Sawlo xi'oj chipam i tinamit Selewsya ribihnal eh nok pononak chic take ar, xi'oquic je chipam jenaj ma' laj canowa reh chi nacojic pa riyuk'ul i Chipire ⁵quich'i'l i caj to'ol Wan re' ribihnej wo' chi Cus. Je' aj re' ru' naxiponic chipam i tinamit Salamina ribihnal re' wilic lok chi ch'i' riyuk'ul i Chipire, re' ma' Wernaweh ch'i'l i Sawlo ch'i'l wo' i Wan xquik'or riC'uhbal i Dios nk'oric chirij i Jesus queh take ra' ri'sil cho ma' Israhel nquimol quib pan tak pat ntijiljic wi' rij i C'uhbal Ye'oj reh Moyses. ⁶Chirij wili nok wilqueb chic take ponok chi ch'i' ric'ula't riyuk'ul i Chipire re' wilic wi' i tinamit Papos ribihnal, ar xquirak jenaj winak aj war je' ruc' ra' ri'sil cho ma' Israhel Warjesus ribihnal. Re' winak re're' xa je' chic jenaj aj k'orol riC'uhbal i Dios nariban rib ⁷pa ricamaj chiwach cok i k'atal k'oric Serjiyo Pawlo ribihnal re' jenaj winak k'e' t'ulic ruc' rino'jbal. Junpech ajic nok re' ma' Serjiyo Pawlo xiyuk'ej i ma' Wernaweh ch'i'l ma' Sawlo ru'um chi raj ribiram riC'uhbal i Dios, ⁸re' aj war re're', re' Elimas wo' nelic wi' ribihnal pan criyeco, xiyew ric'ux chi ripitiric i ma' Serjiyo Pawlo reh chi ma'xta nak ricojom wach ribiral i Jesus. Naxilow chi ma' xiban ta canar ripitiric, re' aj chic rik'orbal ma' Wernaweh ch'i'l i Sawlo xoquic risolc'jic pa rij, ⁹xa re' la' re' i Sawlo re' ribihnej wo' chi Lu', naxye'eric ricowil rik'orbal ru'um Lok' laj Uxlabal xchalic ruc' chiwach i junc'am re're', cow xitz'ehtaj ¹⁰eh je wili xik'or reh:

«Re' hat nahsil banol reh c'ahbilal, je' acab aj Yahm chi rixowjic quiwach take nca'n i coric. Re' hat k'e' jot'oj na'n queh c'acharel maj tob ta nak re' Dios rik'or chi re' ribiral i Jesus, re're' naric'ambic cho queh c'acharel ruc', re' hat ma' namay ta rik'ormojic chi ma' je' ta re' eh ruc' re're', re' hat je' acab jeno' winak riyoj wach jeno' nt'oric laj beh. ¹¹Chi je' re', re' Dios xa chi yu'na ti nariyeb chana i ti'l'axic narimoysonic pam i nak' awach eh nacahnic chi je' re' cu rehtal chic nawilbic wo' chic, nqui ma' Lu' reh.

Xa chiwach wo' ti junc'am re're' xmoytic ti pam nak' wach i winak re' chi manlic. Je' re' nok pu'ht rimajem hab wach take wilqueb cok chi richel chi risiq'uiric hab wach jeno' narich'ihlinic je reh chi k'ab. ¹²Ar ajic re' k'atal k'oric re're' xich'ica' wo' ric'ux chirij i Jesus naxilow chaj bih xc'uluric eh je' wo' ru'um chi xa xsahchic chic ric'ux chirij nic' wach rik'ormojic ribiral kAjaw Jesus xca'n take ma' Wernaweh ch'i'l ma' Lu'.

Re' ma' Lu' xik'or riC'uhbal i Dios ar Pisirya

¹³Chirij aj chic re' naxi'oquic chipam jenaj ma' laj canowa, xi'elic je chipam tinamit Papos eh chi je' re', re' ma' Lu' ch'i'l take rich'i'l xiponic pa riyuk'ul i Panpilya ar pan tinamit Perque. Ar re' Wan re' ribihnej wo' chi Cus, xich'ak take cahnok i ma' Lu' ch'i'l Wernaweh ru'um chi xsoljic wo' chic je pan tinamit Jerusalem. ¹⁴Chi je' aj re', re' ma' Lu' ch'i'l ma' Wernaweh naxi'elic je pan

tinamit Perque, xquitik ju' quibeh chi c'ahchi' quiq'uic je pa ric'ula't riyuk'tul i Pisirya cu rehtal xiponic chipam jenaj chic tinamit Antiyoquiya ribihnal. Ar ajic pan jenaj hi'lbal k'ij xi'oj chipam i pat ntijilic wi' rij C'uhbal Ye'oj reh Moyses eh xi'oj tz'uhkok ar chi ribirmijic i c'ahchi' rik'ormojic. ¹⁵Nok cux'unak aj chic riliric wach i huj tz'ihmbimaj wi' i C'uhbal Ye'oj reh Moyses ch'i'l quic'uhbal take aj k'orol riC'uhbal cho i Dios, re' take c'amol beh chipam i pat re're' xquitak'a' rik'ormojic reh ma' Lu' ch'i'l Wernaweh chi je' wili:

«Hat-tak kas kachak', wi wilic jeno' ak'orbal nak'orom tak chi kac'uhbaljic eriban chi enak'or tak, nqui xquitak'a' je rik'ormojic.

¹⁶Je' aj re', re' ma' Lu' xpa'lajic johtok eh naxiban k'ab queh wilqueb ar chi ma'xta qui'ahnic je' wili xik'or queh chi cunchelal:

«Hat-tak was tak nichak' ra' ri'sil cho ma' Israhel ch'i'l hat-tak ma' re' ta ra' ri'sil cho ma' Israhel re' tilok'onic wo' tak reh kaDios, chabiraj tak i nanik'orom wili: ¹⁷Re' Dios nkalok'ej wach i hoj ra' ri'sil cho ma' Israhel xa nok wo' richihim cho quiwach take kamam kati't chi quiwach tocom tinamit chi naquilok'em wach. Re' aj i Dios re're' k'e' nimal rajawric xic'uhhaj cho chiquij take kamam kati't naxesaj take cho chi xa yohbalamaj chic quiwach chipam ponok i tocom tinamit Ejipto ribihnal. Chipam i tinamit re're', re' take kamam kati't xic'acharic cho chi xa iq'uel take ar. ¹⁸Chirij chic ru' nok esemaj chic take cho ar, xquicora' je chipam ye'ab chik yuk' re' ma'xta wi' patanel. Ar ma' xcanabjic ta quiliric ru'um i Dios chiwach i ca'winak (40) hab xibehic chipam ye'ab re're', tob ta cow take chi ribirmijic k'oric chiwach i Dios.

¹⁹«Re' aj wo' Dios re're' xisach quiwach i wukub queh q'uuh ch'uk wach tinamit wilqueb pa riyuk'tul i Canahan eh re' take ye'ab re're' xik'ahsaj queh take kamam kati't reh chi naquehcham. ²⁰Je' re' ajic ar chipam i ye'ab Canahan re're', re' Dios xipahba' take ch'ukul k'oric chi quina take kamam kati't chiwach junik'ob lajeb roxc'ahl (450) hab cu rehtal nponic ruc' rik'ijil ric'acharic i Samwel re' aj k'orol riC'uhbal wo' i Dios. ²¹Cu ruc' aj i Samwel xponic quicojoric take ch'ukul k'oric chi quina take kamam kati't maj re' take re' p'uht quipahkam chi naroquic jeno' k'atal k'oric chi quina. Ru'um aj chi je' re' xquipahkaj, re' Dios xipahba' jenaj quik'atal k'oric, Sawul ribihnal rac'un cho ma' Sis re' ra' ri'sil cho i Wenjamin. Re' Sawul re're' ca'winak (40) hab xk'atbic k'oric chi quina take kamam kati't ²²eh naxesmejic wo' chic lok pa ricamaj chi k'atal k'oric, re' chic i ma' Tawiy xcojoric chi rijelow-bal, maj chirij i Tawiy je' wili rik'orom cho Dios: «Re' Tawiy wili re' rac'un ma' Isayah k'e' nponic chi niwach rino'jbal. Re' cok i winak wili naribanam nic' pa' nimal nwaj i hin, nqui rik'orom cho.

²³«Ru'um aj re', re' Dios xik'or wo' cho reh ma' Tawiy chi re' i c'acharel re' narico'lonic queh take rich ra' ri'sil cho ma' Israhel, ar chi quixilac take ra' ri'sil ru' narellic cho.

«Je' ricab aj rik'orom cho Dios reh ma' Tawiy, re' Jesus xpahbabjic chi kajco'lonel. ²⁴Xa re' la' ru' nok chi cu ja' nc'ulic ta ayu' wach ac'al eh chi

cu ja' richop ta wo' k'oroj c'uhbal, re' Wān je' wili xik'or queh chi'nchel tinamit rā' ri'sil cho ma' Israhel:

«Chacana' tak ribanaric i mahc eh cu re' aj ru' enikahsaj aha' tak, nqui xik'or queh.

²⁵«Je' re' xik'or queh, maj nok q'uisin chic ma' ricohlaj wach ricamaj ye'oj cho reh ru'um i Dios, re' Wān je' wo' wili xik'or cho:

«Re' hat-tak nacapaj tak chi re' hin nawoquic cho chi k'atal k'oric pan tinamit, maje'? Til pan coric ma' je' ta re'. Re' la' naroquic chi kak'atal k'oric re' i winak c'ulic lok reh chiwij hin. Re're' k'e' wo' chic xic' nā rajawric chi xa ta nak re' t'uch wach camanic je' ricab richejeric riper xijab riban raj camanom jeno' ajabes, ric'ul chi wīn chi eniban chiwach, nqui xik'or cho Wān.

²⁶«Chirij aj i Jesus re're', re' hoj c'ahchi' kak'orom i c'uhbal xojtak'abjic wi' chi nakak'orom aweh hat-tak was tak nichak' wich rā' ri'sil cho ma' Awraham je' wo' aweh hat-tak ma' re' ta rā' ri'sil cho ma' Awraham. Re' c'uhbal re're' je' wili rik'or:

«Re' Jesus, re' aj co'lonel queh chi'nchel c'acharel ²⁷eh tob ta wo' nak je' re', re' take tinamit aj Jerusalem ch'il take nahsil chi quina, xa xquich'uk wo' k'oric china' i Jesus. Ru' aj xca'n take tinamit re're', xoj manlajok wach i quik'orbal take aj k'orol riC'uhbal i Dios re' quitz'ihmbam cho chirij i Jesus chipam take huj nilmijic wach pan tak hi'lbal k'ij, xa re' la' tob ta wo' nilmijic wach take huj re're' pan tak hi'lbal k'ij, re' take tinamit xa ma' xquirak ta wo' chirij i k'oric xca'n take aj k'orol riC'uhbal i Dios eh xa ta wo' nak xquina'bej chi re' Jesus aj co'lonel queh c'acharel. ²⁸Chirij chic ru' nok xich'uk chic k'oric china' i Jesus, re' take tinamit quipahkaj reh Ponsyo Pilato chi naritak'ab ricansjic tob ta nak ma'xta nech' ok rimahc chi nariquimic. ²⁹Je' re' quimic xiban i Jesus reh chi xmanlajic wach nic' nimal tz'ihmbimaj cho chirij. Chirij wili naxkajsic cho Jesus wach curus, xoj cojorok pan jenaj muk'unbal, ³⁰xa re' la' re' Dios xucsaj wo' cho chi quixilac camnak, nqui i c'uhbal re're'.

³¹«Nok ucsumaj chic cho Jesus, q'uih k'ij xic'uhtaj rijb chi c'achlic queh take wich aj nimir re' xa re' wo' xiponic cu ar Jerusalem naxichalic ar Calileya, xa c'ahchi' wo' quiyeb quichi' queh aj Jerusalem chirij i holohic laj c'uhbal wili ³²re' c'ahchi' wo' kak'orom aweh tak yu'na chi je' wili: Re' rik'orom cho Dios queh take kamam kati't najtir k'ij, ³³xmanlajic wo' wach ru'um nok re're' xucsaj cho Jesus chi quixilac camnak. Je' re' k'uru', ma' xa ta queh take kamam kati't xmanlajic wach rik'orbal i Dios riyeb cho najtir k'ij, je' la' wo' xmanlajic wach kuc' i hoj ca' qui'sil c'achalcoj yu'na. Je' re' nik'or maj chi c'ahchi' rik'oric i Dios chirij ripahbajic i Jesus chi k'atal k'oric, je' wili xik'or pa ricab moloj wach bich ritz'ihmbam ma' Tawiy:

«Re' hat, hat wAc'un eh chiwach i k'ij wili tinipahba' yu'na chi K'atal K'oric, nqui xik'or.

³⁴«Ma' xa re' ta re' xik'or, je' la' wo' xik'or chi je' wili:

“Re' lok' laj k'oric xnik'or cho reh Tawiy chi narich'icab wī' ric'ux awuc' hat-tak narimanlajic wach, nqui xik'or.

«Ruc' xik'or i Dios chi je' re', xoj wo' manlajok wach i k'oric k'oroj cho ru'um wili chi ruc' rucsjic cho chi quixilac take camnak c'ahchi' ribanam chi re' riti'jolal i c'acharel xipahba' chi K'atal K'oric ma' jaruj ta narimikric ac'al. ³⁵Je' re' xiban, je' ricab tz'ihmbimaj wo' cho wili ru'um i ma' Tawiy ar chipam jenaj chic ribich:

“Re' hat Dios ma'xta ayeb k'ab chi re' riti'jolal i Lok' laj Ajabes narimikric ac'al, nqui xitz'ihmbaj cho ma' Tawiy.

³⁶«Yu'na k'uru' charak tak chirij i wili: Re' k'oric xik'or ma' Tawiy re're' ma' re' ta chirij chi ribil rij xk'oric cho, chirij la' Jesus xk'oric. Je' re' nok re' hin ma' re' ta chucuj k'oric niban aweh tak nanik'or i wili: Re' ma' Tawiy re' xiban ricamaj chi k'atal k'oric chi quina take rich c'acharel je' ricab rik'atam cho rij i Dios, re're' naxquimic je xmikric wo' ac'al chipam i muk'unbal xmuk'unjic wī' cuc' take rimam rati't ³⁷raj nchel Jesus re' xucsjic cho ru'um i Dios chi quixilac take camnak, ma' xmikric ta nchel ac'al.

³⁸«Je' aj re' ru' was tak nichak' chana'bej tak chi xa ru'um i Jesus re' xc'a'chsic cho ru'um i Dios chi quixilac camnak, re' hoj xkac'ul kajawric chi c'uhbalanic eh ru'um re' c'ahchi' kak'orom aweh tak yu'na chi wilic cuybal mahc pa ribihnal. ³⁹Je' wo' nkak'or aweh tak chi re' nic' pa' q'uihal take nquich'ica' quic'ux chirij ru' ewo' ncuyuric quimahc chiwach chi'nchel chaj bih ma' cuyuj ta nak chic ru'um i C'uhbal Ye'oj reh Moyses. ⁴⁰Je' re' k'uru' chana'bej tak chi coric i c'ahchi' kak'orom aweh tak eh mayak'abej pan awok tak. Chayohbalej awib tak eh ma' ok nchel chana hat-tak ncutbic i c'uhbal k'oroj cho chi je' wili cu'um take aj k'orol riC'uhbal i Dios najtir k'ij:

⁴¹“Hat-tak re' nayak'abej pan awok tak nik'orbal,
til wo' chic k'e' cowil awamna tak chi ricojoric wach re' nik'or aweh tak.
Je' re' nik'or maj tob ta nak re' hin nik'or aweh tak chi nanisacham
awach tak chiwach take k'ij c'achalcat tak wī' wili,
ma' nacoj ta wo' tak wach.
Ma' xa re' ta wo' re', ticahnic la' wo' tak chi ma'xta bih nana'bej tak.
Xa ta wo' nak riban nahol awach tak chi ripech'jic rij i wili, nqui
rik'or, nqui ma' Lu'.

Ruc' aj re' xicohlaj i c'uhbalanic ar.

⁴²Chirij re', nok re' ma' Lu' c'ahchi' relic je ch'il i Wernaweh chipam i pat re're', re' take c'amol quibeh take c'acharel nquimol quib ar, xquipahkaj reh chi naritikim ju' rik'ormojic ribiral i Jesus chipam i jenaj chic ponok hi'lbal k'ij ⁴³xa re' la' naxquich'ak cahnok quib i ma' Lu' ch'il i ma' Wernaweh cuc' take c'acharel wilqueb ar, xa xitahkaljic wo' je cu'um q'uihal take quich ra' ri'sil cho ma' Israhel ch'il wo' juntuhm chi ma' re' ta ra' ri'sil cho ma' Israhel je' ruc' quicojom quib chi rinimjic i C'uhbal Ye'oj reh Moyses eh nquic'am wo' na i c'uhbal re're'. Re' take c'acharel re're' je' wili xk'ormojic queh ru'um ma' Lu':

«K'e' nchel atob chi re' hat-tak xanimej tak i c'uhbal nk'oric chirij richak'lamil i Dios. Mapoh'aj chic ac'ux tak chirij c'uhbal re're' k'uru', nqui xk'ormojic queh.

⁴⁴Chirij chic ru' naxponic i jenaj chic hi'lbal k'ij reh xamāna, re' take c'acharel chipam i tinamit re're' naxquibiraj ribiral chi re' ma' Lu' ch'il Wernaweh wilqueb ar chipam i pat re' ntijiljic wi' rij i C'uhbal Ye'oj reh Moyses, q'uihal take xquimol quib ar chi ribirmijic riC'uhbal i Dios rik'or i ma' Lu' ch'il Wernaweh. ⁴⁵Nok juntuhm take ra' ri'sil cho ma' Israhel xquillow chi yohbal wach q'uihal tinamit xquimol quib chi ribirmijic i ma' Lu' ch'il Wernaweh, k'e' naxchalic quic'a eh ru'um re' je' wili p'uht quik'orom chi risolc'jic pa rij rik'orbal ma' Lu':

«Re' nak'or i hat rik'ebil awach ma' Lu' ma' coric ta, nqui p'uht quik'orom.

⁴⁶Raj la' ma' Lu' naxpah'ic johtok ch'il i Wernaweh je' wili xik'or queh chi ma' nyo'jic ta nech' ok:

«Re' hoj riwi' chi keh, chi aweh hat-tak kich ra' ri'sil cho ma' Israhel nakak'orom chi pet i riC'uhbal i Dios nk'oric chirij i Jesus. Xa re' la' ru'um chi c'ahchi' ak'ebem tak lok chirij ac'ux tak i c'uhbal re're', ne'utunic lok chawach tak chi ma' ric'ul ta chaweh tak chi nawucs'jic wo' tak chic chi quixilac camnak reh chi nac'acharic tak chi junelic. Yu'na k'uru' re' hoj cuc' chic take ma' re' ta ra' ri'sil cho ma' Israhel wilqueb chipam i yuk'ul wili nako'jic chi rik'ormojic i c'uhbal re're' ⁴⁷maj re' tak'anic xiban keh i kaJaw Jesus jenaj wach ch'il je' ricab k'oroj cho reh raj k'orol C'uhbal i Dios Isayiyas ribihnal naxk'ormojic reh chi je' wili:

“Je' ricab nok jenaj sakombal cojoj chi quisakom take xa hab pa' wach c'acharel,

re' hin Dios c'ahchi' wo' cat nipahbab chi waj tz'e' wach aj sakomonel pam quino'jbal take ma' re' ta ra' ri'sil cho ma' Israhel. Je' re' apahbabjic niban reh chi xa haj pa' yuk' q'uixcab wilqueb wi' take c'acharel

ewo' quico'ljic, nqui rik'or, nqui ma' Lu' queh.

⁴⁸Naxquibiraj chi je' re' take ma' re' ta ra' ri'sil cho ma' Israhel birinic nca'n cok ar, xa suk chic quic'ux p'uht quitioxem johtok reh Dios ru'um i C'uhbal chirij i Lok' laj Ajabes Jesus c'ahchi' rik'ormojic queh. Je' re' nok, chi quixilac take ma' re' ta ra' ri'sil cho ma' Israhel re're', re' ch'ukuj wo' cho quij ru'um i Dios chi naquico'ljic, yohbal wach q'uihal take xinimic reh c'uhbal chirij Jesus re' xiban i ma' Lu'.

⁴⁹Je' re' ajic re' C'uhbal chirij i Lok' laj Ajabes Jesus q'uihal take c'acharel quinimic reh eh ru'um re' c'ahchi' wo' rojic lok rik'ormojic cu'um ma' Lu' ch'il Wernaweh chipam i yuk'ul re're'. ⁵⁰Xa re' la' c'uhbal re're' ma' nponic ta chi quiwach take ra' ri'sil cho ma' Israhel, re' la' chic xca'n xi'oquic chi rihunuric quipam take nahsil chipam i tinamit re're' ch'il take juljun ixok yohbalamaj quiwach ch'il wo' c'amol take na i C'uhbal Ye'oj reh Moyses. Chi je' re' p'uht ca'nam ti'c'axic reh ma' Lu' ch'il Wernaweh cu rehtal xquesaj lok chirij quitinamit.

⁵¹Ar ajic re' ma' Lu' ch'il Wernaweh nok elic chic nca'n je chipam i tinamit re're', xquipuh lok i poklaj ch'ihlic pan cök rehtalil chi re' take c'acharel re're' xkajic mahc chi quina. Chi je' re', re' ma' Lu' ch'il i Wernaweh xi'oj chipam i tinamit Içonyo ribihnal ⁵²naxquicana' cahnok take quich aj niminel ar Antiyoquiya chi xa suk chic pan quic'ux ru'um xchoporico quina ru'um i Lok' laj rUxlabal i Dios.

Riq'uihal take aj Içonyo xquinimej riC'uhbal i Dios

14 ¹Nic' pa' wach xc'uluric ar Antiyoquiya je' wo' chic re' xc'uluric ar pan tinamit Içonyo. Q'uihal take tinamit ra' ri'sil cho ma' Israhel ch'il wo' take ma' re' ta ra' ri'sil cho ma' Israhel xquinimej ribiral i Jesus re' xik'or i ma' Lu' naxoquic cok ch'il i Wernaweh ar chipam i pat ntijiljic wi' rij C'uhbal Ye'oj reh Moyses. ²Ma' xa re' ta re' xc'uluric ar, je' la' wo' wilic take ma' re' ta ra' ri'sil cho ma' Israhel re' xjot'oric quicapew-bal cu'um take ra' ri'sil cho ma' Israhel re' ma' nquinimej ta i c'uhbal rik'or ma' Lu', xquimin quib chi aj ixowonel chic queh take aj niminel. ³Je' aj re' chiwach q'uih k'ij xiwi'hic ar i ma' Lu' ch'il i Wernaweh, ma' xiyo'jic ta nech' ok chi rik'ormojic ribiral i kaJaw Jesus maj re' wo' re' xc'uhtunic queh chi til coric i rik'orbal xiyew queh chi quitobjic naxik'or queh chi je' wili:

«Re' hin naniyeb aweh tak ribanaric yohbal wach lok' laj nawal rehtalil chi til coric ak'orbal tak, nqui rik'orom queh.

⁴Ma' xa re' ta re' xc'uluric ar, je' la' wo' take c'acharel chipam i tinamit re're', xquich'ak quib ruc' quino'jbal ru'um ma' jenaj ta chic wach quicapew-bal. Je' re' nok wilic xquichop quic'ux chiquij take ra' ri'sil cho ma' Israhel re' ma' quinimanic ta reh riC'uhbal i Dios eh wilic wo' xquichop quic'ux chiquij ma' Lu' ch'il i Wernaweh re' pahbamaj take chi quinahsil aj niminel. ⁵Chi je' aj re' wilqueb wi' take c'acharel re're', re' take ra' ri'sil cho ma' Israhel ch'il take ma' re' ta ra' ri'sil cho ma' Israhel xquitik'a' wach quino'jbal ch'il take quinahsil chi naquitz'ujum je' wo' chi naquicansam chi abaj ma' Lu' ch'il Wernaweh. ⁶Xa re' la' naxponic pan quixiquin ma' Lu' ch'il Wernaweh i chaj bih xquitik'a' wach take caj ixowonel, xi'elic je chipam tinamit re're' eh xi'oj c'olok chipam i tinamit Liſtra ribihnal re' wilic pa riyuk'ul i Licahonya rich'il rij ch'il i tinamit Terwe ribihnal. Chipam aj take tinamit re're' je' wo' pan tak cuc' tinamit wilqueb lok chirij i yuk'ul re're' ⁷xquitik ju' rik'ormojic ribiral i Jesus.

Chi quiwach take aj Liſtra re' ma' Lu' ch'il i Wernaweh xa je' chic dios take

⁸Ar chipam i tinamit Liſtra wilic jenaj winak ma' riniqu'em ta behic chi junpech ru'um chi sic cho cu pa rasbal. Junpech nok re' winak re're' chi tz'uklic jok wach ac'al ⁹c'ahchi' ribiram riC'uhbal i Dios, re' ma' Lu' xicoj rehtal chi re're' ch'iclic ric'ux chirij i Jesus chi re're' encowsonic reh. Je' re' nok re' ma' Lu' xitz'ehtaj chi coric i winak re're' ¹⁰eh je' wili xik'or reh chi cow:

«Quicowjok take awok. Tipa'lajok johtok chi coric, nqui reh.

Xa re' wo' ti xk'ormojic reh chi je' re', xpurunic johtok i winak re're' eh xoquic chi behic. ¹¹Naxquilow take tinamit aj L₁stra re' nic' wach xiban i ma' Lu' ru'c' i sic nak re're', je' wili p'uht quik'orom pan quik'orb₁ Licahonya ribihnal:

«Re' take wili, dios take je' quiw₁ winak xikajic cho ayu' kuc', nqui p'uht quik'orom take c'acharel re're' ¹²chi c'ahchi' quibihnem i Wernaweh chi Jupiter eh re' ma' Lu' c'ahchi' quibihnem chi H₁ermes ru'um chi re're' nbanic i k'oric.

¹³Chi je' aj re' c'ahchi'queb take tinamit, re' aj k'ahsem s₁ chiwach i tiyo₁x Jupiter ribihnal re' nlok'onjic wach chipam i ripatil wilic lok ma' naht ta chi' ocbal reh tinamit re're', xic'am cho quib xib chi wacax xoyomaj calak chi ihtz'ub eh xaj nak ricansam take wacax re're' ar lok chi ch₁' lok i ocbal reh tinamit, reh chi rich'il take tinamit nariyeb nak rilok'il ma' Lu' ch'il Wernaweh. ¹⁴Xa re' la' ma' Lu' ch'il Wernaweh naxquirak chirij chi naquicansjic nak take wacax chi ye'bal quilok'il, xquik'ih₁taj quib chiwach i aj k'ahsem s₁ re're' chi ma'xta ribanam chi je' re'. Chirij re' nok quiw₁ekem chic quiso' rehtalil chi ma' xic'ul ta quiwach chi je' re' naribanaric nak queh, xquiminej cok quib chi quixilac take tinamit chi xa q'ueric chic quich₁' ¹⁵chi je' wili c'ahchi' quik'orom:

«Hat-tak kas kachak', ma₁ban tak keh je' re' maj re' hoj xa hoj wo' ti winak je' ricab hat-tak. Re' hoj xa xojc'ulic wo' ti lok ayu' chi rik'ormojic aweh tak chi na₁canab tak i lok'onic wach tiyo₁x re' ma'xta bih ritik aweh tak. Re' aj re' xchalic kak'or aweh tak reh chi re' chic i c'achlic Dios re' aj tik'inel reh taxaj, aj tik'inel reh wach ac'al, aj tik'inel queh ha', aj tik'inel wo' queh nic' pa' nimal quic'acharic chipam take re', re' chic i Dios re're' enalok'ej tak wach.

¹⁶«Til coric, xa haj atinamit wilcat hat-tak ma' re' ta ra' ri'sil cho ma' Israhel, re' kaDios xicana₁' take cho amam awati't tak chi cutquel ru'um reh lok'onic wach tiyo₁x xquichih lok wach ribanaric, ¹⁷xa re' la' ru' tob ta je' re' xiban cuc', ma' xicana₁' ta wo' ric'uh₁tjic i rajawric chi re're' i Dios chi quina₁. Je' wo' ma' xicana₁' ta riy₁e'eric cho rato'bil chi kana₁ i hoj chi'nchel c'acharel. Ru'um aj cho ric'axbal wilic chi kana₁, re' Dios riyew cho jab narirak cho rik'ijil chiwach, je' wo' ricoj cho rik'ijil chi re' take tic naquiwachanic eh xa ma' nech' ta ti wach take katic nkamol, til q'uih la' wo' chic riyew cho keh chi suksbal cho kac'ux, nqui ma' Lu' ch'il Wernaweh queh.

Re' take aj L₁stra xquik'ojlom i ma' Lu' chi abaj

¹⁸Naxquicoh₁aj rik'ormojic re're', re' ma' Lu' ch'il Wernaweh p'uht quik'oric cuc' take tinamit re're' ch'uksbal quic'ux chi ma'xta quicansam take wacax re're' chi ye'bal quilok'il. Xa re' la' c'axic naxca'n canar quipitjic take tinamit chi ma'xta ca'nam re're'. ¹⁹Ar ajic nok je' re' xca'n i ma' Lu' ch'il Wernaweh, juntuhm chi ra' ri'sil cho ma' Israhel je' ru'c' xichalic ar pan tinamit Antiyoquiya ch'il wo' ar Ico₁nyo xi'oquic chi k'oric cuc' take tinamit re're' chi naquicansam i ma' Lu' eh ma' c'axic ta wo' ti naxch'uk quic'ux chi ric'amaric na xquik'or take ru'.

Nok ch'ukunak chic quic'ux take aj L_istra, xquik'ojobej i ma' Lu' chi abaj eh naxquicapaj chi camnak chic, xquijuquej lok chirij i tinamit ²⁰xa re' la' ma' Lu' cu c'achlic wo' cho. Je' re' k'uru' nok re' take aj niminel chipam i tinamit re're' xquimol quib china ma' Lu', xuctic cho eh xoquic wo' chic cok chiquij chipam i tinamit re're' xa re' la' xa ic'sbal chic reh chak'ab maj naxsak'ic lok je' ikal, xoj ch'il i Wernaweh ar pan tinamit Terwe. ²¹Ar chic xitik ju' rik'ormojic riC'uhal i Dios eh ar q'uihal take aj Terwe xquinimej i Dios ru'um i k'oric xiban i ma' Lu'. Chirij ru' re' ma' Lu' ch'il Wernaweh xisoljic wo' chic je chipam take tinamit xi'iq'uic je w_i!, je' ricab L_istra, I_{co}nyo ch'il Antiyoquiya. ²²Chipam take tinamit re're', re' take aj niminel xcowsjic quic'ux chirij i Jesus ruc' i c'uhbalanic xiban ma' Lu' chi je' wili:

«Re' ti'c'axic ma' haj ta iq'u_el keh. Re' cok ru' ma_{ca}na' tak rinimjic i kA_jaw Dios maj reh chi nakoquic chi k'atoj k'oric rich'il i Jesus curman chi nakac'ulum ti'c'axic, nqui c'uhbalanic xiban.

²³Ma' xa re' ta re' xiban i ma' Lu', je' la' wo' chi quixilac take ju'jun tuhm chi moloj wach aj niminel xipahba' take aj nahsil chi quixilac. Nok ca'nam chic re're', re' ma' Lu' ch'il Wernaweh xca'n quitij ruc' cuyuj wi'c chiquij take nahsil re're' reh chi naquitobjic ru'um i Dios. Chirij chic ru' xi'okxa'njic pa rik'ab i kA_jaw Jesus re' ch'iclic w_i! quic'ux take c'amol beh re're'. ²⁴Chirij aj chic ru', re' ma' Lu' ch'il Wernaweh xi'elic je chipam take tinamit re're', xi'iq'uic chi pet chipam i yuk'ul Pisirya ribihnal eh chirij chic ru' xi'oj c'olok pa riyuk'ul i Panpilya.

²⁵Ar pa riyuk'ul Panpilya, chipam i tinamit Perque ribihnal xquik'or ribiral i Jesus eh chirij chic ribanaric re're', re' ma' Lu' ch'il Wernaweh xi'oj chipam i tinamit Atalya ribihnal. ²⁶Ar ajic chipam i tinamit Atalya, re' ma' Lu' ch'il Wernaweh xi'oquic je pan jenaj ma' laj canowa eh xi'oj wo' chic ar Antiyoquiya, re' tinamit elenak cho take w_i! naxitak'abjic take cho cu'um take quich aj niminel re' xipahkanic reh rato'bil i Dios chi quina naxoj ca'n i camanic cu re' xquicohlaj cho ribanaric. ²⁷Nok ar chic wilqueb Antiyoquiya, re' ma' Lu' ch'il Wernaweh xquimol wach take moloj wach aj niminel eh je' wili p'uht quik'orom:

«Awilobj ta nak tak ti katobjic riban i Dios je' wo' nic' wach i rato'bil xiyew queh take ma' re' ta r_a' ri'sil cho ma' Israhel chi xquich'ica' wo' quic'ux chirij Jesus, nqui xik'or queh.

²⁸Je' re' ajic re' ma' Lu' ch'il i Wernaweh xicahnic cuc' take aj niminel ar Antiyoquiya chiwach q'uih k'ij.

Re' ma' Lu' ch'il Wernaweh xipahbabjic chi nacojic ar Jerusalen

15 ¹Chiwach aj wo' take k'ij nok re' ma' Lu' ch'il Wernaweh wilqueb ar Antiyoquiya, ju'jun take aj niminel xichalic ar pa riyuk'ul Jureya xi'oj c'olok ar eh je' wili p'uht quik'orom queh take ma' re' ta r_a' ri'sil cho ma' Israhel je' ruc' aj niminel chic take:

«Re' hat-tak re' ma' re' ta hat-tak r_a' ri'sil cho ma' Israhel, ma' eta tico'ljic tak ru'um i Dios tob ta nak ch'iclic ac'ux tak chirij i Jesus wi ma'

nak'at tak lok ritz'uhmal nā ac'achanbal tak je' ricab k'orōj cho chipam i C'uhbal Ye'oj reh Moyses, nqui p'uh̄t quik'orom.

²Ru'um reh k'orōj re're', re' ma' Lu' ch'i'l Wernaweh xca'n jenaj rinimal wolic quich'i'l take aj niminel xiponic ar. Ru'um re', re' take aj niminel ar Antiyoquiya xquipahbā' i ma' Lu' ch'i'l Wernaweh ch'i'l take ju'ljun chic quich aj niminel chi nacojic ar Jerusalem reh chi naquimolom quib̄ cūc' take pahbamaj chi nahsil c'amol quibeh̄ take aj niminel reh i Jesus quich'i'l wo' take quinahsil aj niminel wilqueb̄ chipam i tinamit re're'. Chi je' re' naquisiq'uim rij chaj bih naquicahnic wī' take ma' re' ta rā' ri'sil cho ma' Israhel ruc' quiniminic.

³Je' re' nok re' ma' Lu' ch'i'l Wernaweh chirij chic naxic'ulic canabjok nah̄ beh̄ cu'um take aj niminel wilqueb̄ ar Antiyoquiya, xi'oj ar Jerusalem xa re' la' ru' pēt xi'iq'uiic ponok chipam riyuk'ul i Peniṣya je' wo' pa riyuk'ul i Samārya, re' k'e' xsukbic wī' quic'ux take quich aj niminel naxk'ormojic queh nic' wach rijalaric wach quino'jbal c'ahchi' ca'nam take ma' re' ta rā' ri'sil cho ma' Israhel wilqueb̄ pan tak tocoṃ chic tinamit.

⁴Nok pononak chic take ar Jerusalem, re' ma' Lu' ch'i'l Wernaweh xic'uluric chi suk cu'um take aj niminel ch'i'l take quinahsil, je' wo' cu'um take pahbamaj chi nahsil raj tahkanel i Jesus. Chirij chic ru' xi'oquic chi rik'ororic nic' wach quitobjic xiban cho Dios chi quic'uhbaljic take ma' re' ta rā' ri'sil cho ma' Israhel ⁵xa re' la' ru' naxquibiraj chi je' re' take ju'ljun aj niminel je' ruc' wilqueb̄ nak cho chipam quicomonil take cow laj aj niminel reh C'uhbal Ye'oj reh Moyses, xipa'lajic johtok eh je' wili xquik'or:

«Re' take ma' re' ta rā' ri'sil cho ma' Israhel quiniminic reh ac'uhbal tak, tak'abjok je rik'ormojic queh chi naquic'amam nā i k'orōj cho chipam i C'uhbal Ye'oj reh Moyses. Je' re' ajic til k'ormojok je queh chi quik'at lok ritz'uhmal nā quic'achanbal, nqui take.

⁶Chi je' re' k'uru' re' take quinahsil aj niminel ch'i'l wo' take pahbamaj chi nahsil raj tahkanel i Jesus xquimol wach nic' nimal take aj niminel chi ritik'injic wach i c'axquilal c'ahchi' ric'ulmujic re're'. ⁷Ar aj ru' nok re' take mololqueb̄ ar p'uh̄t quichopom quib̄ chirij c'axquilal re're', re' ma' Luch xipahbā' johtok rib̄ eh je' wili xik'or queh:

«Was tak nichak', najtir chic niyeb̄ aweh tak reht'aljic chi re' Dios richihim cho niwach i hin chi rik'ormojic riC'uhbal queh take ju'ljun c'acharel ma' re' ta rā' ri'sil cho ma' Israhel. Re' take c'acharel re're' naxquibiraj i c'uhbal, xquich'icā' wo' quic'ux chirij i kAḵaw Jesus. ⁸Je' wo', xniyew wo' aweh tak chi eht'aljic chi re' Dios re' nilbic reh pām i kamna chi'nchel i hoj c'acharel, xik'or chiquij take ju'ljun c'acharel xiniminic re're' chi coric chic wach i camna eh xic'uh̄taj wo' chi til je' re', naxitak'ā' cho queh i Lok' laj rUxlabal tak'amaj chic cho keh hoj rā' ri'sil cho ma' Israhel je' ruc' kojniminic reh Jesus. ⁹Je' aj re' ru', re' Lok' laj Uxlabal ma' xilow ta camna take c'acharel re're' chi tocoṃ ta nak chiwach i kamna hoj, xisaksaj la' wach queh eh je' re' xiban ru'um chi re' take c'acharel re're' xquich'icā' quic'ux chirij i Jesus.

¹⁰Chi k'oroj chic aweh tak re're', yu'na re' hin niban aweh tak i pahkanic wili: Nic' wach nok re' take c'uhbal hoj tijimaj wī' natak'ab tak je ripahkaljic queh take kich aj niminel ma' re' ta rā' ri'sil cho ma' Israhel chi naquic'amam nā, wi xa ta nak re' hoj ch'īl kamam kati't xkac'am nā i c'uhbal re're' ru'um reh ric'ayew-bal? Ruc' re're' c'ahchi' abanam tak chi re' Dios encakric cho awuc' tak ¹¹ru'um chi cu nacoj tak wach chi xa ru'um rinimjic take c'uhbal re're' naco'ljic tak. Haj cok wilic riwī' chi keh hoj aj niminel chi nakacojom wach, re' chi re' kAjaw Jesus narico'lonic keh hoj aj niminel rā' ri'sil cho ma' Israhel ch'īl wo' take kich aj niminel ma' re' ta take rā' ri'sil cho ma' Israhel. Je' re' naribanam chikij ru'um chi k'e' ti' kojric'raj cho, nqui ma' Luch.

¹²Naxquibiraj chi je' re', re' take tinamit mololqueb ar, ma' cu ta chic xik'oric ru'um ricorquilal xk'ormojic queh, re' la' chic xca'n p'uh quibiram i ma' Lu' ch'īl Wernaweh naxi'oquic chi rik'ormojic nic' wach nok re' Dios yohbal wach lok' laj nawal xiban ruc' cok quik'ab ru' c'uhbal reh chi til coric i c'uhbal xquik'or chi quixilac take ma' re' ta rā' ri'sil cho ma' Israhel. ¹³Nok k'oroj chic re're' ru'um ma' Lu' ch'īl i Wernaweh, re' ma' Jacowo je' wili xik'or:

«Was tak nichak', chacoj tak axiquin chi ribirmijic i nanik'orom wili: ¹⁴Re' Luch re' ribihnej wo' chi Simon, rik'orom chic cho aweh tak ricorquil nic' wach nok re' Dios xc'ulic chi quitobjic take ma' re' ta rā' ri'sil cho ma' Israhel re' xicojbic cho wach ribiral i Jesus pan pet eh nic' wach wo' nok re' Dios chi quixilac take chi'nchel c'acharel re're' xichih take chi naca'nam chi ritinamit reh chi naquilok'em wach. ¹⁵Re' rik'orom cho ma' Luch, ric'u'lej rib rich'īl quik'orbal take aj k'orol riC'uhbal i Dios je' ricab xitz'ihmbaj cho jenaj queh aj k'orol riC'uhbal i Dios chi je' wili:

¹⁶“Nok bokoj chic i pat tik'imaj ru'um ma' Tawiy reh chi ar narilok'onjic niwach,

re' hin naniwih'ic wo' chic awuc' tak.

Nok wilquin ok chic chaxilac tak, re' pat re' xbokoric re're' naritik'injic wo' chic

eh narijohsjic wo' chic take tz'ak xik'ehbic lok chirij.

¹⁷Je' re' k'uru' re' hin nanijohsam wo' chic i pat re're'

reh chi naricamanic chi jenaj ye'ab re' naquinquisiquim wī' pan tij take tinamit ma' re' ta rā' ri'sil cho ma' Israhel

eh ruc' chi je' re' enca'n, re' take quich quitinamit take cho tinamit re're' ewo' quinquisic' pan quitij chi nilok'onjic.

¹⁸Re' hin Dios re' xnik'or cho re're' najtir k'ij reh chi naweht'alim tak, re' wo' hin c'ahchi' nik'oric reh take k'oric wili, nqui xik'or i Dios.

¹⁹«Ru'um aj chi je' re' xik'or cho i Dios, re' wili capewenic niban eh re' wo' re' nik'or aweh tak chi nabanam tak: Re' nic' pa' nimal c'uhbal hoj tijimaj wī', ma' nkahamej chi quina take ma' re' ta rā' ri'sil cho ma' Israhel, ²⁰re' la' ka'n tak katz'ihmbaj je' jeno' huj re' enkak'or je wī' queh chi je' wili:

«Māban tak chic aweh take xa je' na ricab jeno' mahc chi quiwach take kich ra' ri'sil cho ma' Israhel je' ricab ribanaric take wili: Re' ruc'jic riquiq'uel jeno' chicop, on re' ric'uxuric ritibquialal jeno' chicop k'ahsamaj chiwach tiyoχ, on re' ric'uxuric jeno' chicop biyoj chi ralak. Je' wo' māban tak chic ribanaric i c'oyomal, nqui katz'ihmbaj je queh pan huj.

²¹«Re' aj re' til raj tz'ihmjic je queh pan huj chi quitobjic reh chi wilqueb pan sukquil c'uxlis quich'īl kich ra' ri'sil cho ma' Israhel ar re' quic'acharic wī!. Je' re' nik'or maj c'olok pan ac'ux tak chi pan tak ju'jun tinamit wilqueb wī! take ma' re' ta ra' ri'sil cho ma' Israhel, wilqueb wo' take kich ra' ri'sil cho ma' Israhel je' ruc' elic hi'lbal k'ij nquillow wach take C'uhalb Ye'oj ru'um Moyses ar chipam take pāt ntijiljic wī! rij c'uhalb re're', nqui Jacowo.

²²Nic' pa' nimal xik'or ma' Jacowo, xponic chi quiwach take rich pahbamaj chi nahsil raj tahkanel i Jesus ch'īl take moloj wach aj niminel ch'īl wo' take quinahsil ru'. Ru'um aj re', re' take nahsil re're' xquipahbā' chi caj tz'e' wach quib chi winak nimak quiwach chi quixilac take aj niminel, re' je' wili quibihnal: Re' Juras re' ribihnej wo' chi Warsawas ch'īl i Sīlas. Je' re' xca'n reh chi re' take re' naquitak'abjic je ar Antiyoquiya chirij ma' Lu' ch'īl Wernaweh eh nok na quiponok ar, naquik'oric wo' cuc' take aj niminel je' ruc' ma' re' ta ra' ri'sil cho ma' Israhel. ²³Je' wo', xic'ul quic'ux chi naquitz'ihmbam jenaj huj re' naquitak'ab je chiquij quib aj tz'e' wach re're'. Je' wili xquik'or je chipam i huj re're':

«Re' hoj pahbamaj chi nahsil raj tahkanel i Jesus wilcoj ayu' Jerusalem ch'īl take quinahsil aj niminel, ch'īl wo' take aj niminel, nkatak'a' je risukquialal ac'ux hat-tak aj niminel ma' re' ta hat-tak ra' ri'sil cho ma' Israhel wilcāt tak ar Antiyoquiya ch'īl take awich atinamital tak wilqueb pa riyuk'ul i Sīrya ch'īl wo' hat-tak wilcāt tak ar pa riyuk'ul i Silīsyā.

²⁴«Ru'um nok xkabaraj chi xyojoric acapew-bal tak cu'um ju'jun take kich niminel ra' ri'sil take cho ma' Israhel re' xiponic awuc' tak chi c'uhalanic chi ma' re' ta katak'anic take je eh ru'um wo' chi xquiham chana tak i nic' pa' nimal i c'uhalb hoj tijimaj nak wī!, ²⁵re' hoj yu'na xkatik'a' wach kano'jbal chi kawach eh xkacapaj chirij chi taret chi xkapahbā' take quib kich'īl wili chi nacojic awuc' tak chiquij take kasbes re' til k'e' ti' nkc'raj take, re' ma' Lu' ch'īl Wernaweh. ²⁶Re' take re' ma' nquiyohlej ta nech' ok quic'acharic chiwach i quimic naquik'oric chirij rajawric Lok' laj Ajabes Jesus re' Pahbamaj chi K'atal K'oric. ²⁷Je' aj re', re' hoj c'ahchi' katak'ab je awuc' tak i Juras ch'īl i Sīlas re' naquisakomem wach aweh tak take i tik'inic xka'n i hoj ²⁸maj tob ta ma' chi'nchel ta chic take c'uhalb hoj tijimaj cho wī! enkahamej chana tak, re' hoj ch'īl Lok' laj rUxlabal i Dios xkacapaj rij chi taret chi enkapahkaj aweh i ajwal wach chi banaric wili: ²⁹Chi māwuq'uej tak chic riquiq'uel jeno' chicop on mac'ux tak chic ritibquialal jeno' chicop k'ahsamaj chi sī chiwach tiyoχ on jeno' chicop biyoj chi ralak eh māban wo'

tak chic c'oyomal. Ruc' aj chi je' re' ena'n tak, re' hat-tak nāwih'ic tak pan sukquil c'uxlis cūc' take kich aj niminel rā' ri'sil cho ma' Israhel.

«Chawic'raj tak ar k'uru', nqui xquitz'ihmbaj je pan huj xquitak'a' je take nahsil aj c'amol bēh.

³⁰Je' aj re' naxiponic Antiyoquiya take xitak'abjic je, xquik'ahsaj i huj queh take moloj wach aj niminel xquimol wach. ³¹Chi je' re' k'e' naxsukbic quic'ux take aj niminel naxquilow wach i huj re're'. Ruc' risukquil quic'ux xye'eric queh ruc' i huj re're', ³²re' take aj niminel xquicowsaj riman quic'ux chirij i Jesus naxquibiraj xquik'or i Juras ch'il i Silas. Je' re' nik'or chi xc'uluric cūc' maj re' take re' chiwach take k'ij naxiwih'ic ar ru'um chi aj k'orol wo' reh take k'oric nquic'ul ruc' i Dios, xquik'or wo' queh take aj niminel chi til quichop quic'ux chirij Jesus.

³³Nok q'uih k'ij chic quiwih'ic ar i Silas ch'il i Juras, re' take aj niminel ar Antiyoquiya xquitak'a' wo' chic je take pan sukquil c'uxlis cūc' take hab wach xitak'anic cho queh ar Jerusalem ³⁴xa re' la' chic ru', re' Silas xicapaj rij chi tareṭ chi naricahnic ar Antiyoquiya chi quihch'iljic ³⁵ma' Lu' ch'il i Wernaweh, maj re' take re' chiwach take k'ij naxicahnic ar Antiyoquiya xquitik ju' c'uhtunic chirij i Jesus chi c'ahchi' quik'orom riC'uḥbal i Dios quich'il take riq'uihal aj niminel ar.

Re' ma' Lu' ch'il Wernaweh xquicanaḡ rihch'iljic quib

³⁶Chirij chic nic' pa' nahtil wih'ic xca'n ar Antiyoquiya, re' ma' Lu' je' wili xik'or reh Wernaweh:

«Wernaweh, tak wo' chic chipam take tinamit xojponic cho wī' chi rik'ormojic i C'uḥbal chirij i Lok' laj Ajabēs Jesus. Chi je' re' enkilow take kich aj niminel nic' wach wilqueb pan quiniminic, nqui xik'or reh.

³⁷Nok re' Wernaweh xaj nak chi re' Wan re' ribihnej wo' chi Cus narojic wo' nak chic chiquij chipam take behenic nacojic ca'nam, ³⁸re' ma' Lu' je' wili xik'or:

«Re' Cus re're', ma' xojritahkej ta wo' je chipam take tinamit nakojic wo' chic wī' chi c'uḥbalanic yu'na maj nok wilic nak ponok chikij xojricana' cho ar Panpilya. Ma' riban ta chi wīn k'uru' chi enoj chikij yu'na, nqui xik'or reh Wernaweh.

³⁹Chi je' aj re' ricapew-bal i ma' Lu', re' Wernaweh xic'am chirij i Cus eh xichop je ribēh pan ma' laj canowa reh chi narojic pa riyuk'ul i Chipire. ⁴⁰Re' chic ma' Lu' nok okxa'namaj chic pan k'ab i kAjaw Dios cu'um take aj niminel ar Antiyoquiya reh chi re're' narito'bonic reh, xelic je ar eh xoj ch'il i Silas re' xichih wach chi narihch'ilem. ⁴¹Chi je' aj re', re' ma' Lu' xiq'uc ponok chi pēt chipam riyuk'ul i Sirya ch'il i Silīsyā re' xicowsaj wī' quic'ux take moloj wach aj niminel ruc' quic'uḥbaljic xiban.

16 ¹Chirij chic ru' nok iq'uinak chic ponok chipam i tinamit Terwe, re' ma' Lu' ch'il take c'ahchi' quihch'ilinic reh xiponic chipam i tinamit Līstra re' nc'acharic wī' jenaj aj niminel Timoteyo ribihnal, rac'un jenaj winak

ma' re' ta ra' ri'sil cho ma' Israhel ch'il jenaj ixok aj niminel je' ruc' ra' ri'sil cho ma' Israhel. ²Re' Timoteyo wili, holohic laj k'oric nk'ormojic chirij rino'jbal cu'um take aj niminel ar Listra ch'il wilqueb ar Iconyo ³xa re' la' ma' ja' npahkaljic ta nak reh rik'ataric lok ritz'uhmal na ric'achanbal. Ru'um aj chi re' ma' Lu' xponic chiwach chi re' Timoteyo narojic chirij chi c'uhbalanic, xipahkaj reh chi narik'atam lok ritz'uhmal na ric'achanbal xa cu'um queh take rich ra' ri'sil cho ma' Israhel wilqueb pan tak tinamit nariq'uic ponok wi' maj q'uihal take queht'alanic reh chi re' Timoteyo wili tob ta rac'un jenaj winak ma' re' ta ra' ri'sil cho ma' Israhel, wilic wo' chi ra' ri'sil cho ma' Israhel ru' ru'um i ritut.

⁴Chirij aj chic nok re' Timoteyo k'atoj chic lok ritz'uhmal na ric'achanbal, re' ma' Lu' ch'il i Silas quich'il chic Timoteyo xquitik ju' quibeh chipam take tinamit wilqueb chipam take ye'ab re're' eh chi je' re', re' ma' Lu' xiq'uic wo' rik'or ponok queh aj niminel ma' re' ta ra' ri'sil cho ma' Israhel, haj wilic take tak'anic xquiyew rik'ormojic take pahbamaj chi nahsil raj tahkanel i Jesus ch'il wo' take quinahsil aj niminel wilqueb ar Jerusalem chi naric'amaric na cu'um take aj niminel ma' re' ta take ra' ri'sil cho ma' Israhel. ⁵Je' aj re' ruc' i c'uhbal xik'or ma' Lu', re' take ju'jun tuhm chi moloj wach aj niminel xcowjic quic'ux chirij i Jesus eh chi je' re' elic i k'ij c'ahchi' riq'uibic quiwach take aj niminel.

⁶Nok elenak chic je' ma' Lu' ch'il Silas ch'il Timoteyo chipam riyuk'ul i Calasya, re' aj wili xk'ormojic queh ru'um Lok' laj rUxlabal i Dios naxi'oquic chic pa riyuk'ul i Pirjiya:

«Maban tak c'uhbalanic chipam riyuk'ul i Asya, nqui xk'ormojic queh.

Chi je' re' xca'n wo' je' ricab xk'ormojic queh ru'um i Lok' laj Uxlabal.

⁷Nok wilqueb chic pa ric'ula't i Misyas, je' wo' chic re' xk'ormojic queh ru'um i Lok' laj Uxlabal naxquicapaj nak cok oquic chipam riyuk'ul i Witinya. ⁸Je' aj re' ru' nok iq'uinak chic je' take chi richel ric'ula't i Misyas, xiponic chipam i tinamit Troyas ribihnal re' xnirak take wi' hin ma' Cax chi nanip'utum je' quihch'iljic.

⁹Pan jenaj chak'ab chipam i tinamit re're', re' ma' Lu' xilow pan jenaj je' la'wach chi jenaj winak je' ruc' aj pa riyuk'ul Maseronya je' wili c'ahchi' ripahkam reh nok pa'lic chiwach:

«Chacuy haw, tichalok kuc' i hoj aj riyuk'ul Maseronya eh koj-ato'bej, nqui pahkanic c'ahchi' ribanaric reh pa riwiric.

¹⁰Nok rilom chic re're' ma' Lu' chipam je' jenaj la'wach, je' wili xkak'or chi kawach:

«Re' aj wili kojraj wi' i Dios chi nakojojic chi c'uhbalanic ar Maseronya, nqui xkak'or chi kawach.

Xa chiwach wo' ti junc'am re're' xkasic' jenaj ma' laj canowa reh chi nakojojic ar Maseronya.

Re' resmejic lok jenaj ma' tob laj uxlabal ruc' jenaj k'ahxok aj k'ijinel

¹¹Nok kachopom chic je' ma' laj canowa ar Troyas, xchalic jenaj tew re' xojricora' je' ar Samotrasya re' xka'n wi' junwar eh chirij chic ru' xoj-oj ar

Neyapolis. ¹²Naxoj-elic je Neyapolis, xoj-øj pa riyuk'ul i Maseronya ar chipam jenaj tinamit re' k'e' nim wach tinamit chi quixilac take tinamit quic'acharic w'i' aj Roma, Pilipos ribihnal. Nok quib xib chic k'ij kawih'ic ar, ¹³xoj-elic lok chirij i tinamit pan jenaj hi'lbal k'ij chi keh hoj ra' ri'sil cho ma' Israhel eh xojponic ar chi chi' jenaj ha'. Ar wilic jenaj pat re' xkacapai i hoj chi wih'inak chi banbal tij. Ar ajic naxquimol quib take ju'jun ixok, re' hoj xkak'or ribiral i Jesus queh naxojtz'uhkic ar. ¹⁴Ruc' ribiral xkak'or re're', jenaj ixok aj Tiyatira Lirya ribihnal re' c'ahchi' wo' ribiram i c'ahchi' rik'orom ma' Lu' chirij i kAjaw Jesus, xteheric pam ricapew-bal ru'um kAjaw Dios reh chi narirakam chirij chi coric eh je' wo' chi narouic chi aj lok'em chic reh. ¹⁵Je' re' k'uru' chirij naxkajsic riha' ixok re're' ch'il take rac'un rixk'un, je' wili pahkanic riban keh: «Yu'na re' hat-tak nacoj tak rehtal chi hin chic aj niminal reh kAjaw Jesus. Chacuy tak k'uru', tak-tak chiwij pa nipat reh chi ena'n tak so' apatal kuc', nqui xik'or keh.

Je' re' rik'or keh cu rehtal xch'uk kac'ux chi xojcahnic so' chipam ripat ixok re're'.

¹⁶Naxojcahnic wo' chic ar Pilipos, pan jenaj k'ij nok ojic nka'n chipam i ye'ab wilic nak w'i' i pat banbal tij, xkarak jenaj k'ahxok ye'oj rik'orbal chi k'ijinic ru'um jenaj ma' tob laj uxlabal wilic ruc'. Re' k'ahxok wili ma' xa reh ta chi rutquel i tumin riban canar nariban i k'ijinic, riyew la' wo' queh take rehreh chi ajabes rirak w'i' ricamaj. Til wo' k'e' q'uihal i tumin nquic'ul take ajabes re're' ru'um ricamaj i k'ahxok re're'. ¹⁷Re' k'ahxok wili nok xa ritahkem chic ma' Lu' chi kich'il i hoj, je' wili rik'or chi xa q'ueric chic chi' chikij:

«Re' take winak wili, aj tz'e' wach take reh i Dios re' k'e' riminal rajawric eh re're' c'ahchi' quik'orom aweh tak chi re' Dios eriban chi etirico'lej tak, xa nqui chic rik'or chi cow.

¹⁸Nok q'uih chic k'ij ritok'ab cho k'ahxok re're' chi je' re' rik'or, pan jenaj k'ij re' ma' Lu' ru'um chi xch'i'tjic ru'um riw'i' rino'jbal i k'ahxok re're', xisolq'uij je rilbal chirij eh je' wili xik'or reh ma' tob laj uxlabal nchoponic na ric'acharic i k'ahxok re're':

«Ma' atob laj uxlabal, re' Jesus re' Pahbamaj chi K'atal K'oric, re're' nye'bic wajawric chi nacat nit'erem lok. Yu'na k'uru' telen lok ruc' i k'ahxok re're', nqui reh.

Je' aj re', re' ma' atob laj uxlabal xa chiwach wo' ti junc'am re're' xelic lok ruc' i k'ahxok re're' eh chi je' re' xcahnic chi suk chic riti'jolal, ¹⁹xa re' la' take rehreh chi ajabes rirakam w'i' ricamaj chi k'ijinic naxquillow chi xesmejic chic lok i ma' tob laj uxlabal re' ch'iclic w'i' quic'ux chi nca'n w'i' canar quitz'ak, xquichop i ma' Lu' ch'il Silas eh xquic'am je' take chipam i pat nquimol w'i' quib i tinamit chiwach take nahsil. ²⁰Ar xik'ahsjic pan quik'ab take nahsil eh je' wili xquik'or cok:

«Re' take winak wili ra' ri'sil cho ma' Israhel take c'ahchi' quijot'om kacapew-bal i hoj c'acharel chipam i katinamit wili ²¹maj re' take re' c'ahchi' quik'orom keh tocom laj no'jbal re' ocronak take cho w'i' ru'. Re'

tocom laj no'jbal c'ahchi' quic'uantam keh ma' riban ta chi keh hoj chi enkac'am na, ma' wo' chi eta nak nka'n ribanaric ru'um nok re' hoj, ma' re' ta hoj ra' ri'sil cho ma' Israhel hoj la' aj Roma, nqui take ²²chi quiwach i tinamit re' xa junchalic chic take china ma' Lu' ch'il i Silas chi quich'eyeric.

Naxquibiraj chi je' re', re' quinahsil take nimak quiwach xitak'a' chi naresmejic lok quiso' i ma' Lu' ch'il i Silas reh chi naquitz'uhumjic. ²³Chirij chic ru' nok yohbal wach quitz'uhumjic xbanaric, xicanabjic pan k'ab aj cha'janel tz'ahpel. Naxk'ormojic reh chi naricha'jem take chi coric, ²⁴re' aj cha'janel re're' cu chipam cok i cohlsbal wach tz'apbal xitz'ap take cok i ma' Lu' ch'il i Silas. Ma' xa ta re're' xiban, xilutz' la' wo' i cok ruc' jenaj che' hopoj pam reh chi naquicahnich chi tz'ukulqueb wach ac'al. ²⁵Chirij aj ru' naxponic tic'lic ak'ab, nok re' ma' Lu' ch'il i Silas bich nca'n pan quitij chi c'ahchi' quibirmijic cho cu'um tocom chic aj tz'ahpel, ²⁶cu re' pe' chic queh ru', xchalic jenaj cow laj hihc re' xic'uyu'saj pam chi'nchel i pat re're' cu rehtal xitehebic chi'nchel ritz'ahpil i tz'apbal re're' eh xit'upubic take c'aham ch'ihch' pixilqueb w'i' chi'nchel tz'ahpel. ²⁷Chi je' aj re' naxc'a'chic wach aj cha'jem tz'ahpel re're' eh naxilow chi tehlic chic take ritz'ahpil i pat re're', xesaj cho rik'as laj ch'ihch' chi naricansam nak rib maj xicapaj chi chi'nchel take tz'ahpel xi'elic je, ²⁸xa re' la' ma' Lu' xiq'uer je chi' chi je' wili:

«Macansaj awib, ayu' wilcoj chi'nchel, nqui je reh.

²⁹Naxibiraj chi je' re' i cha'janel re're', xipahkaj jenaj risakombal, xoquic cok cu re' wilqueb w'i' take tz'ahpel eh chi xa cu nbarbatic wo' reh yo'jic ru'um reh ti'c'axic narichalic nak china wi ta nak xi'elic je take tz'ahpel, xixuc'a' rib chiwach ma' Lu' ch'il i Silas eh xitioxej queh chi cu wilqueb ar chi'nchel take tz'ahpel. ³⁰Chirij ru' nok c'ahchi' resam lok ma' Lu' ch'il i Silas chipam i tz'apbal re're' reh chi ar chic pa ripat naricha'jem take ru', re' aj cha'jem tz'ahpel re're', je' wo' wili xik'or queh:

«Hat-tak ajabes, chaj bih raj chi nanibanam reh chi enirak nico'ibal? nqui xik'or.

³¹Re' ma' Lu' ch'il i Silas je' wili xquik'or reh:

«Re' hat chach'ica' ac'ux chirij kAjaw Jesus chi je' re' etico'ljic i hat ch'il take awaj pan pat wi xquich'ica' wo' quic'ux chirij kAjaw Jesus, nqui take reh.

³²Je' aj re' naxiponic pan pat, re' aj cha'jem tz'ahpel re're' ch'il take raj pan pat xquinimej wo' i C'uhbal chirij i Lok' laj Ajabes Jesus re' xk'ormojic queh. ³³Chi je' re' xa chipam wo' ti chak'ab re're', ar chipam i ye'ab re' xic'am je take w'i' ma' Lu' ch'il i Silas chi ritz'ajaric wach quiti'quial xbanaric ru'um i tz'uhum, ar xkahsjic rih'a' aj cha'janel re're' ch'il take raj pan pat. ³⁴Nok ca'nam chic cho re're', re' aj cha'jem tz'ahpel xic'am wo' chic take je ma' Lu' ch'il i Silas ar pa ripat eh xiban riwa' rih'a' quich'il. Chi je' re' xiban xa suk chic pa ric'ux ch'il take raj pan pat ru'um chi xquinimej i Dios.

³⁵Chirij ru' nok sak'anak chic, re' take nimak quiwach nahsil xquitak'a' je take ju'jun sol ruc' aj cha'jem tz'ahpel re're' chi rik'ormojic reh chi je' wili:

«Chawok'taj take je quib winak re're', nqui k'oric xquitak'a' cho take nimak quiwach aj nahsil.

³⁶Naxibiraj chi je' re' aj cha'jem tz'ahpel je' wili xoj rik'ohraj queh ma' Lu' ch'il i Silas:

«Re' nimak quiwach aj nahsil xquitak'a' cho rik'ormojic cuc' take sol wili chi nacat tak wok'tam je. Je' re' k'uru', telen tak je eh chawic'raj tak je pan abeh tak, nqui xik'or queh.

³⁷Re' ma' Lu' naxibiraj k'oric re're', je' wili xik'or queh take sol xic'ambic cho reh k'oric:

«Tob ta hoj wo' nak aj Roma i hoj, re' take aj nahsil ma' xquich'uk ta wach kamahc xquitak'a' la' katz'uhumjic chi quiwach i tinamit eh xquitak'a' wo' kacojoric pan che'. Re' aj chic yu'na naj kojquesam je pan c'olic xa re' la' hoj ma' eta koj-elic je chi je' re'. Kojc'olok pe quesaj take nahsil re're' cu re' aj ekoj-elic je, nqui ma' Lu' queh.

³⁸Je' re' nok re' take sol re're' xponic quic'u't'aj queh take nimak quiwach nahsil re' chaj bih xquik'or je ma' Lu' ch'il Silas eh ruc' re're', re' take nimak quiwach nahsil naxquibiraj chi aj Roma take, chi xa yo'jic chic wilqueb ³⁹xi'oj re' wilqueb w'i' ma' Lu' ch'il i Silas chi ripahkaljic cuybal quimahc queh. Je' aj re', re' take nahsil re're' xquesaj je ma' Lu' ch'il i Silas chipam i pat c'ahchi' quicha'jaljic w'i' ru'um aj cha'jem tz'ahpel re're' eh xquipahkaj wo' chi naquelic je chipam i tinamit re're'. ⁴⁰Je' aj re' ru' naxi'elic je chipam i pat c'ahchi' quicha'jaljic w'i', re' ma' Lu' ch'il i Silas pet xiponic wo' chic cho pa ripat i Lirya re' xquimol w'i' quib cuc' take aj nimiric chi ricowsjic quic'ux chirij Jesus eh cu re' aj ru' xi'elic je chipam i tinamit re're'.

Re' ma' Lu' rik'or riC'uhbal i Dios queh take aj Tesalónica

17 ¹Chi je' aj re', re' ma' Lu' ch'il i Silas xquitik ju' quibeh. Naxi'iq'uic ponok chipam i tinamit Anpípolis je' wo' pan jenaj chic tinamit Apolonya ribihnal, xiponic chipam tinamit Tesalónica ribihnal. Chipam i tinamit re're' wilic jenaj pat ntijiljic w'i' rij C'uhbal Ye'oj reh Moyses re' nquimol w'i' quib take kich ra' ri'sil cho ma' Israhel wilqueb ponok ar. ²Ar ajic re' ma' Lu' je' ricab rocsam w'i' rib, xoj chipam i pat molbal ib re're' eh chiwach xib chi hi'lbal k'ij reh ju'jun xamana, xiban ric'utaj cuc' take nquimol quib ar. ³Je' aj wili rik'or queh:

«Ar pan Lok' laj Huj tz'ihmbimaj w'i' riC'uhbal i Dios rik'or chi re' Pahbamaj chi K'atal K'oric curman chi xquimic, je' wo' chi xuctic wo' cho chi quixilac take camnak. Re' Pahbamaj chi K'atal K'oric re're', re' wo' i Jesus re' c'ahchi' nik'orom aweh tak chi xcansjic eh xuctic cho chi quixilac take camnak, nqui rik'or queh.

⁴Ruc' xik'or i ma' Lu', wilic take ra' ri'sil cho ma' Israhel quich'il wo' take yohbal quiwach winak ma' re' ta take ra' ri'sil cho ma' Israhel je' ruc' aj c'amol take na i C'uhbal Ye'oj reh Moyses, ch'il wo' take q'uihal ixok je' ruc' yohbalamaj quiwach,

xquinimej i c'uhbal chirij i Jesus eh xi'oquic jenaj chi quixilac ma' Lu' ch'il i Silas chi aj niminel chic take. ⁵Raj nchel take ju'jun chic ra' ri'sil cho ma' Israhel ma'xta nquicoj wach i c'uhbal xik'or ma' Lu' re're'. Re' take re', ru'um chi k'e' quic'a xchalic cu'um queh take xinimic reh c'uhbal xk'ormojic re're', xquimol wach juntuhm chi siqu'il laj winak ma' holohic ta quino'jbal eh xquituhbej cho quib pa ripat jenaj aj niminel Jason ribihnal re' patanic nca'n w'i' ma' Lu' ch'il i Silas. Naxiponic chipam i pat re're', re' take juntuhm re're' xcaj nak quic'amam je ma' Lu' ch'il i Silas chi riye'eric chi quiwach take tocom wo' tinamit johsomaj quic'a cu'um juntuhm re're' ⁶xa re' la' ru'um chi ma' xquirak ta ar ma' Lu' ch'il i Silas, re' chic i Jason ch'il ju'jun take aj niminel xquirak ar xquic'am je reh chi xi'oj pahbabjok chi quiwach take nimak quiwach chipam i tinamit re're'. Nok wilqueb chic ponok ar, je' wili xquik'or chi xa q'ueric chic quich'i':

«Quib take winak je' ruc' aj jot'ol quicapew-bal take c'acharel xa haj tinamit qui'oquic w'i', xic'ulic lok ayu' pan katinamit. ⁷Re' take re' xye'eric quipatal ru'um i Jason wili eh re' take quib re're' nok wilqueb chi quiwach take c'acharel, nquic'uhtaj i tijbal rik'or chi wilic jenaj chic k'atal k'oric Jesus ribihnal. Ru'um reh tijnic nca'n take quib winak re're', chi'nchel take c'acharel wili ma' c'ahchi' ta chic quinimem i tak'anic riban i k'atal k'oric aj Roma, nqui take.

⁸Naxquibiraj chi je' re', re' take nimak quiwach xjohtic cho quic'a ch'il take tinamit ⁹xa re' la' take nimak quiwach re're' ma' xquicoj ta wo' pan che' i Jason ch'il take rich'il, xi'ok'tjic la' je take naxquitoj cahnok rij quelbal je.

Q'uihal aj Werya xquicoj wach i c'uhbalanic xiban i ma' Lu'

¹⁰Chiwach aj wo' ak'ab re're', re' take aj niminel chipam i tinamit re're', xquitak'a' je ma' Lu' ch'il i Silas chipam i tinamit Werya. Nok wilqueb chic ponok ar xa re' wo' ti xisak'ic lok, re' ma' Lu' ch'il i Silas xi'oj pe' wo' chic chi quik'o'rjic take ra' ri'sil cho ma' Israhel chipam i pat ntijiljic w'i' rij i C'uhbal Ye'oj reh Moyses ¹¹xa re' la' take ra' ri'sil cho ma' Israhel wilqueb ar k'ochlic wach quic'ux chiwach take quich ra' ri'sil cho ma' Israhel wilqueb pan tinamit Tesalónica. Je' re' ajic re' take tinamit re're' xiban xa suk chic quic'ux naxquicoj wach i c'uhbal xik'or ma' Lu', xa re' la' ilbal reh ricorquilal ne'uhtjic queh, elic i k'ij re' riban w'i' c'uhtunic ma' Lu' xquitijej rij riC'uhbal i Dios tz'ihmbimaj chipam i Lok' laj Huj canamaj cahnok ru'um i Dios. ¹²Je' aj re' ru' ruc' i c'uhbalanic xiban ar i ma' Lu', k'e' q'uihal take ra' ri'sil cho ma' Israhel ch'il wo' q'uihal take ma' re' ta ra' ri'sil cho ma' Israhel chi winak chi ixok je' ruc' nimak quiwach, xquicoj wach i ribiral chirij i Jesus xik'or i ma' Lu'.

¹³Naxquibiraj cho take ra' ri'sil cho ma' Israhel wilqueb ar Tesalónica chi je' re' c'ahchi' ric'uluric ru'um reh rik'ormojic riC'uhbal i Dios nk'oric chirij i Jesus re' c'ahchi' ribanam ma' Lu' ar chipam i tinamit Werya, xi'oj wo' chic c'olok ar eh xquijohsaj quic'a take c'acharel wilqueb ar ¹⁴xa re' la' take

aj niminel ar Wereya naxquina'bej ti re're', xa chi yu'na ti xquitak'a' je ma' Lu' ch'il take ju'jun aj niminel ar chi chi' i ma' laj ha' reh chi narichopom je jeno' canowa. Je' aj re' ru', xa chic cutquel i Silas ch'il Timoteyo xicahnic ar Wereya chi quic'uhbaljic take aj niminel reh chi naquichopom quic'ux chirij i Jesus. ¹⁵Ar aj chic ponok chi' ha', re' ma' Lu' xichop je jenaj ma' laj canowa eh xoj pan tinamit Atenas. Je' re' xka'n naxojc'amaric je cu'um take xitak'abjic je chikij chi nakoji. Chirij chic ru' nok quicanab chic cho ma' Lu' chipam i tinamit re're', re' take aj niminel tak'amaj je take chi cananic, xisoljic wo' chic je Wereya eh xponic quik'or i k'oric xtak'abjic je chiquij ru'um ma' Lu', chi re' Silas ch'il i Timoteyo naquiloqu'em je quib chi nacoji quirakam ar Atenas.

**Re' ma' Lu' nk'oric chirij i Dios re' ma' k'oroj
ta ribiral queh c'acharel aj Atenas**

¹⁶Ar chic Atenas nok c'ahchi' ruy'em i Silas ch'il i Timoteyo chi naquiponic ar, re' ma' Lu' xoquic cho jenaj riyot'quil ric'ux ru'um xilow chi xa haj reh tinamit re're' wilic take tz'akoj tiyoq. ¹⁷Ru'um aj re' chipam i pat ntijiljic wi' rij C'uhbal Ye'oj reh Moyses, re' ma' Lu' nok wilic chic ar, xichop rib chirij riC'uhbal i Dios cuc' take rich ra' ri'sil cho ma' Israhel je' wo' cuc' take ma' re' ta take ra' ri'sil cho ma' Israhel je' ruc' aj c'amol take na i C'uhbal Ye'oj reh Moyses. Je' wo' re' xiban kalakal cuc' take nic' pa' nimal nquimol quib chipam i c'aybal re' ncamanic wo' chi molbal ib.

¹⁸Junpech aj cho nok re' ma' Lu' c'ahchi' richopom rib chirij riC'uhbal i Dios cuc' ca'ch'uk chi winak aj sic'ol rij no'jbal, Epicuryos ch'il Estoycos quibihnal, wilic queh winak re're' xquik'or chi re' ma' Lu' xa je' nchel aj k'orol ribiral tocom chic wilic quibiral chi dios je' ruc' ma' queht'alim ta wach ru'. Je' aj re' nquik'or ru'um xquibiraj i holohic laj ribiral c'ahchi' rik'orom i ma' Lu' chirij ructic i Jesus chi quixilac camnak eh wilic wo' take xquik'or chi ma' nquirak ta chirij i c'uhbalanic riban ru'. Je' re' k'oric nca'n maj chi queh ru' re' k'oric riban i ma' Lu' xa je' na ricab nk'oric jeno' aj tijinel ma' suk ta pam na. ¹⁹Je' re' nok re' take ca'ch'uk chi winak re're' xquic'am je ma' Lu' ar chipam jenaj ye'ab molbal ib "Aryopaco" ribihnal eh je' wili xquik'or reh nok pononak chic ar:

«Chacuy Haw, chasakomej wach keh i c'uhbal c'ahchi' ak'orom reh chi re' hoj nakeht'alim chi manlic ribiral i nak'or. ²⁰Je' re' nkapahkaj aweh maj re' tocom chic c'uhbal nak'or re're' ma' kabiram ta so' i hoj chi junpech. Ru'um aj re' nkaj chi enasakomej wach keh yu'na, nqui take reh.

²¹Je' re' xquik'or reh ru'um chi chi'nchel take c'acharel je' chi asjanak take ar Atenas, je' chi chalanak take chi c'acharic ar, ma' nquicham ta quib chi birinic wi ma' tocom chic no'jbal nc'uhjtjic queh on ma' tocom chic ribiral nquibiraj rik'ormojic. ²²Ar aj ru' re' ma' Lu' xipahba' johtok rib chi quiwach take quimolom quib chipam ma' laj pat re're' eh je' wili xik'or queh:

«Hat-tak c'acharel aj Atenas, ruc' take tiyoq wilom wach xa haj reh atinamit tak nirak chirij chi q'uih take dios nalok'ej tak wach. ²³Je' wo'

nirak wo' chirij chi nalok'ej wo' tak wach i jenaj Dios re' ma' ja' k'oroj ta aweh tak ribiral i rajawric. Je' re' nirak chirij maj junpech nok c'ahchi' nibeheh pan atinamit tak, re' hin xwilow take tiyox nalok'ej tak wach eh xnirak wo' jenaj ye'ab lok'onbal re' tz'ihmbimaj wi' chi je' wili:

«Re' wili ye'ab nlok'onjic wi' i Dios re' ma' ja' k'oroj ta ribiral keh i rajawric wilic, nqui tz'ihmbimaj chiwach.

«Re' aj i Dios re're', re' nalok'ej tak wach chi ma' ja' k'oroj ta aweh tak ribiral rajawric, re're' nanip'utum rik'ormojic aweh tak yu'na: ²⁴Re' Dios wili re' aj re' xtik'inic reh wach ac'al ch'il take nic' nimal wilic chiwach eh re' wo' re' nk'atbic k'oric china nic' nimal quic'acharic chiwach i taxaj rich'il ac'al.

«Ru'um chi re' aj re' nk'atbic k'oric china chi'nchel, re' riye'ab i Dios ma' ar ta wilic junpech chipam jeno' pat tik'imaj cu'um take quilok'onic wach. ²⁵Je' wo' chic, re're' ma' cu re' ta nchel pa' bih i si ny'e'eric chiwach chi je' wilic ta nak jeno' ric'axquilal, cu re' ta nak re're' c'achlic wi'. Re' la' Dios, re're' nbanic chi chi'nchel take c'acharel wilqueb pan suk laj c'acharic eh suk wo' quiwa' quihā'. ²⁶Je' wo', re're' xitik'a' wach chi re' ju'jun ch'uk chi c'acharel tz'uhrunak cho ruc' i xa jenaj chi winak, xquipuhcaj quib pan tak tinamit chi junsut wach ac'al maj re' aj wo' re' xk'atbic rij haj yuk'ul naquiwih'ic eh je' wo' nic' nahtil rok c'acharic naca'nam.

²⁷«Re' aj i Dios re're', c'ahchi' nik'orom ribiral aweh tak reh chi enasic' tak je' ricab riban jeno' sot' chi c'ahchi' rimajem i pa' bih c'ahchi' risiq'uim. Til coric nik'or, wi eta nak nasic' tak i Dios, enak narak tak maj re're' ma' cu naht ta nchel wilic awuc' tak ²⁸ru'um nok xa pa' wilcoj on xa pa' koj-oj, re're' xa wilic wo' kuc'. Je' re' riban i Dios ru'um nok re're' xtik'inic keh je' ricab xk'ormojic cho najtir k'ij ru'um jenaj awich atinamit tak re' xtz'ihminic reh i bich je' wili rik'or:

«Re' hoj, hoj ritik'inic cho kAjaw Dios, nqui rik'or.

²⁹«Je' re' k'uru' chi hoj ritik'inic i Dios ma' riban ta chi encapewjic chi re're' je' ricab take tiyox chi xa holohic chic ritik'injic banoj cu'um take c'acharel ruc' nworwotic laj ch'ihch' on sak laj ch'ihch' on ruc' take holohic laj abaj, xa ru'um ncapewjic chi je' re' riwachbal i Dios.

³⁰«Ru'um aj chi ma' je' ta ricab take tiyox, re' Dios chiwach i rik'ijil wilcoj wi' wili, xiyew keh chi nakeht'alim chi xic'saj chic lok i najtir rik'ijil re' ma' xeht'aljic ta wi' chi chalic reh ti'c'axic chi quina take quilok'onic tiyox. Ru'um aj re' xa haj pa' ye'ab re' wilqueb wi' take aj lok'onel tiyox, riyew rik'ormojic queh chi naquicanab i lok'onic tiyox nca'n ³¹maj tiklic chic wach i k'ij chi re' c'acharel re' Pahbamaj ru'um i Dios chi Ch'ukul wach K'oric chi quina chi'nchel c'acharel, til narich'ukum wach quimahc. Re' Pahbamaj re're' coric wach ch'ukuj k'oric naribanam maj til coric wach rino'jbal je' ricab xc'uhtunic chi quiwach chi'nchel c'acharel ar Jerusalem chiwach i rik'ijil ric'acharic. Ru'um chi je' re' riwi' rino'jbal, re' Dios xucsaj cho chi quixilac take camnak, nqui xik'or ma' Lu'.

³²Re' take quimolom quib ar naxquibiraj i c'ahchi' rik'orom i ma' Lu' chi re' take camnak nacuctic wo' chic cho chi c'acharic, wilic queh p'uht quise'lam i ma' Lu' eh wilic wo' queh je' wili xquik'or reh:

«Re' ribiral chirij cuctic take camnak ca chak'or chic so' keh pan jeno' chic k'ij, nqui take reh.

³³Chi je' re', re' ma' Lu' xicana' take cho, xelic cho chi quixilac. ³⁴Je' aj re' tob ta ma' chi'nchel ta xicojbic wach i c'uhtunic xiban ma' Lu' chirij i Jesus, wilic wo' take xicojbic wach je' ricab ixok Tamaris ribihnal ch'il take tocom chic c'acharel, ch'il wo' i winak ncamanic chipam i pat Aryopaco, re' Liyonisyo ribihnal. Chi'nchel take re're' ch'il tocom chic xicojbic wo' wach i c'uhtunic xiban i ma' Lu' chirij i Jesus, xquimol quib ruc' reh chi naquitikim ju' ribirmijic i c'uhbalanic riban ru'.

Re' ma' Lu' xc'uhbalanic pan tinamit Corinto

18 ¹Chirij chic riwih'ic pan tinamit Atenas, re' ma' Lu' xelic je ar eh xoj pan jenaj chic tinamit Corinto ribihnal ²re' xirak w'i jenaj rich ra' ri'sil cho ma' Israhel asjanak ar pan tinamit Ponto, Aquila ribihnal. Re' winak re're' ch'il i rehqu'en re' Pirsila ribihnal, ma' ja' naht ta c'ulunak lok reh riyuk'ul Italya ru'um chi re' Calawriyo re' k'atal k'oric aj Roma xitak'a' jenaj k'oric queh chi'nchel ra' ri'sil cho ma' Israhel chi naquelic chipam i tinamit Roma.

Junpech ajic re' ma' Lu' naxoj rik'o'rej pan quipat take quib chi aj niminel re're', ³xa cahnic xoj riban cuc' chi patanic ru'um chi re' ricamaj ru' jenaj wach ch'il ricamaj i Aquila. Re' quicamaj take re', aj p'ojol pim laj tz'ih je' ruc' nquicoj chi quipat take aj behel. Je' re' ajic pan tak xilac k'ij reh xamana, re' ma' Lu' riban ricamaj ch'il Aquila ⁴eh pan tak hi'lb'al k'ij nanwih'ic chipam i pat ntijiljic w'i rij i C'uhbal Ye'oj reh Moyses, rik'or ribiral i Jesus. Chi je' re' nank'oric, riban c'ulwach je' chi cuc' take ra' ri'sil cho ma' Israhel, je' chi cuc' take ma' re' ta ra' ri'sil cho ma' Israhel eh je' wo' rich'uksaj quic'ux take re' chirij ribiral i Jesus. ⁵Je' aj re' riw'i c'acharic xiban ma' Lu' ar Corinto, cu rehtal xiponic ar i ma' Silas ch'il i Timoteyo nok soljonak chic take cho reh Maseronya. Ar aj ru' ma' xa ta chic re' pan tak hi'lb'al k'ij xiban c'uhbalanic i ma' Lu', elic la' chic i k'ij p'uht risakomem wach riC'uhbal i Dios queh take rich ra' ri'sil cho ma' Israhel quiponic chipam i pat nquimol w'i quib chi ritijiljic rij i C'uhbal Ye'oj reh Moyses.

Chi je' aj re' pan jenaj k'ij chipam i pat re're', re' ma' Lu' p'uht rik'orom queh rich ra' ri'sil cho ma' Israhel chi re' Jesus re' i Pahbamaj chi K'atal K'oric, ⁶xa re' la' take re', p'uht quik'ih'tam quib chiwach i c'uhbalanic riban ru' eh p'uht wo' quitz'ujlom. Ru'um aj re', re' ma' Lu' xituhp'aj cahnok wach risu't rijela' chi ralak rehtalil chi ma'xta chic ric'uhbalem take chipam i pat re're' eh je' wili xik'or queh:

«Yu'na nanijalam je niye'ab re' nanik'orom w'i riC'uhbal i Dios. Queh chic take ma' re' ta ra' ri'sil cho ma' Israhel nanik'orom. Je' re' k'uru' chawihklej ano'jbal tak nakajok i ti'c'axic chana tak maj re' hin ma'xta chic bih w'in ruc' ano'jbal na'n tak, nqui ma' Lu'.

⁷Chi je' re' naxelic je ar, xoj pa ripat i jenaj winak ma' re' ta ra' ri'sil cho ma' Israhel aj lok'em reh Dios, Justo ribihnal. Re're' ar wilic ma' naht ta je chi richel i pat molbal ib re're' ⁸eh chi je' re', ar chic xiban c'uhalanic pa ripat i winak re're'. Ruc' i c'uhalanic xiban i ma' Lu' ar, re' winak c'amol beh chipam i pat ntijiljic wi' rij C'uhalbal Ye'oj reh Moyses, re' Crispo ribihnal, xinimej wo' riC'uhalbal i Dios ch'il chi'nchel take raj pan pat. Ma' xa re' ta re' xniminic reh c'uhalbal re're', q'uihal la' wo' take aj Corinto je' re' xca'n naxquibiraj wo' i c'uhalbal re're' eh chi je' re' xkahsjic wo' quiha'. ⁹Chirij aj re' pan jenaj chak'ab re' kAjaw Jesus je' wili xik'or reh ma' Lu' pa riwirc:

«Ma' timemric ma' Lu', chak'or la' niC'uhalbal chi ma'xta ayo'jic so'. ¹⁰Cu yohbal wach take tinamit je' ruc' naquinquinimem wilqueb chipam i tinamit wili. Je' re' nok, ma' tiyo'jic chi k'oric maj ma' hab ta wach eriban ti'c'axic aweh ru'um nok re' hin wilquin awuc' chi aco'ljic, nqui reh pa riwirc.

¹¹Chi je' aj re', re' ma' Lu' cu xcahnic chi c'acharic ar Corinto eh ar jenaj hab ruc' wakib poh xiban i c'uhtunic chirij riC'uhalbal i Dios chi ma' hab ta wach ahnic ruc'.

Re' ma' Lu' ixowjic wach ar pa riyuk'ul i Acaya

¹²Chiwach rik'ijil rik'atoj k'oric i Calyon re' nk'atbic k'oric pa riyuk'ul Acaya, re' take ra' ri'sil cho ma' Israhel ma' xiniminic ta reh i c'uhalbal nk'oric chirij i Jesus xquimol quib chi jenaj wach quic'ux chi rixowjic wach ma' Lu'. Ru'um aj re' xquic'am je chiwach i k'atal k'oric re're' ¹³eh je' wili xquik'or cok reh:

«Haw k'atal k'oric, re' winak wili c'ahchi' rich'uksam quic'ux take tinamit chi naquiloc'em wach i Dios ruc' jenaj chic no'jbal ma' riwi' ta chiwach i C'uhalbal Ye'oj reh Moyses, nqui take reh.

¹⁴Ar aj ru' nok re' ma' Lu' narip'utum nak chic k'oric chi rico'ljic rib, re' Calyon je' wili xik'or queh take winak re're':

«Hat-tak ra' ri'sil cho ma' Israhel, wi ta nak re' rimahc i winak wili sakom wach chi niwach, ma' k'orel ta wi nim wach on t'uch wach, riwi' nak chi win chi enicham wib chi abirmijic tak. ¹⁵Raj nchel wili, re' hat-tak xac'am tak cho chi niwach i winak wili xa ru'um chi re' hat-tak ma' ric'ul ta awach tak i c'uhalbal riban ch'il take bihnal rik'or chirij i Jesus on rik'or chirij i c'uhalbal hat-tak tijimaj wi'. Je' re' k'uru' chawilow pe tak chic hat-tak nic' pa' wach nachatik'a' tak wach a-ahnic tak maj re' hin ma' wilquin ta chi rich'ukuric wach re're', nqui queh.

¹⁶Chirij re', re' Calyon xitak'a' take risol chi naquesam lok take tinamit wilqueb chiwach rik'atbal k'oric ¹⁷xa re' la' xa ma'xta wo' bih xik'or naxilow chi re' take tinamit re' xquimol quib chiwach i ye'ab rik'atbal k'oric, xa junchalic chic take chi richoporic je' wo' chi rich'eyeric i Sostenes re' rijelow-bal i c'amol beh chipam i pat ntijiljic wi' rij i C'uhalbal Ye'oj reh Moyses.

Re' ma' Lu' xich'icā' ric'ux chi soljic je ar Jerusalen

¹⁸Chirij chic naxwih'ic quib xib chic k'ij ar Corinto, re' ma' Lu' xich'ak cahnok take aj niminel ar eh xoj pan tinamit Sencreya rich'il Aquila ch'il Pirsila. Ar Sencreya re' ma' Lu' xibuja' lok wach na rehtalil chi xinimej i rik'orbal ribanam chiwach Dios eh chirij chic ru', xichop je jenaj ma' laj canowa re' ojic riban ar pa riyuk'ul i Siria. ¹⁹Naxponic pan tinamit Epeso, re' ma' Lu' xicana' quihch'iljic Aquila ch'il Pirsila re' naquicahnic cahnok chipam i tinamit re're'. Ar aj chipam i tinamit re're', re' ma' Lu' xoj chipam i pat ntijljic wi' rij i C'uhbal Ye'oj reh Moyses eh xisakomej wach riC'uhbal i Dios queh take rich ra' ri'sil cho ma' Israhel nquimol quib ar. ²⁰Ar ajic nok re' take rich ra' ri'sil cho ma' Israhel xquipahkaj reh ma' Lu' chi cu xahnic nak chic so' q'uih k'ij chi quixilac, ma' xic'u'lej ta na cahnoc cuc'. ²¹Je' re' nok naxich'ak take cahnok take tinamit re're', je' wili xik'or cahnok queh:

«K'e' ajwal wach chi win chi ar Jerusalen nawic'sam i nink'ij oquic cho reh. Ru'um aj re' ma' eta riban chi equincahnoc awuc' tak yu'na. Re' cok ru' pa' bih nqui Dios, equinsoljic wo' chic cho awuc' tak pan jeno' chic pech, nqui cahnok queh.

Je' re' nok, re' ma' Lu' xelic je chipam i tinamit re're' eh xichop je ma' laj canowa ²²re' naric'ambic je reh pan tinamit Sesareya. Chirij wili naxponic pan tinamit re're', re' ma' Lu' xichop je behic chi rok ar Jerusalen chi quik'o'rjic take moloj wach aj niminel wilqueb ar eh chirij chic quik'o'rjic xsoljic wo' chic je ar pan tinamit Antiyoquiya. ²³Je' aj re', nok sak naht chic riwih'ic ar Antiyoquiya, re' ma' Lu' xelic je ar xoj chi ribehsjic pam ju'jun tinamit reh riyuk'ul i Calasya ch'il pa riyuk'ul i Pirjiya. Chipam i tinamit re're', re' take aj niminel k'e' naxquichop quic'ux chirij i Jesus ru'um reh c'uhbalanic xiban ma' Lu' chi quixilac.

Re' Apolos xponic ar Epeso chi c'uhbalanic

²⁴Chiwach aj wo' take k'ij nok re' ma' Lu' xelic je Antiyoquiya, xponic ar pan tinamit Epeso jenaj ra' ri'sil cho ma' Israhel asjanak ar Alejantriya Apolos ribihnal. Re're' ma' ahl ta nech' ok chi' chi rik'ormojic i k'oric wilic chipam i Lok' laj Huj tz'ihmbimaj wi' riC'uhbal i Dios re' reht'alim pam chi coric.

²⁵Re' Apolos wili, tob ta xa cu re' pe ti kahsanic ha' je' ricab rik'orom i Wan reht'alim, xa jik' chic pa ric'ux chi c'uhtunic, p'uht ric'uhbalem chi coric i nic' pa' nimal c'uhtumaj reh chirij Ajabes Jesus re' Nc'ambic je Beh ruc' i Dios. ²⁶Chi je' re' c'ahchi' ribanam, junpech ajic nok re' Apolos xoquic cok ar chipam i pat ntijljic wi' rij C'uhbal Ye'oj reh Moyses, xoquic chi c'uhbalanic chi ma' nyo'jic ta nech' ok eh ar c'ahchi' wo' ribirmijic ru'um i Pirsila ch'il i Aquila re' wilqueb wo' cok ar. Nok quibiram chic i c'uhbalanic riban i Apolos re' ma' ja' rina'bem ta chi manlic ribiral i Ajabes Jesus, re' Pirsila ch'il i Aquila xquic'am je pan quipat i Apolos eh chiwach take k'ij re're' xquik'or riman reh chi chaklic chi' i ricorquilal ribiral Ajabes Jesus re' Nc'ambic je Beh ruc' i Dios.

²⁷Chirij chic ru', nok rina'bem chic chi manlic ribiral Ajabes Jesus, re' Apolos na xicapaj ojic chi c'uhbalanic pa riyuk'ul Acaya xcowsjic je riman ric'ux cu'um take aj niminel ar Epeso chi narojic ar. Ru'um aj re', re' take re' xquitz'ihmbaj je jenaj huj queh aj niminel ar Acaya reh chi naquic'ulum Apolos pan sukquil c'uxlis. Rich'il i huj re're' k'uru', re' Apolos xoj ar Acaya eh nok wilic chic ponok ar, yohbal wach to'bonic xiban queh take rich aj niminel re' xitobjic ru'um i Lok' laj rUxlabal i Dios chi naxquinimej cho i Jesus. ²⁸Je' wo', chi quiwach take tinamit nquimol quib chi birinic, re' Apolos ruc' ransil rik'orbale nye'eric reh ru'um Lok' laj Uxlabal xisolquij pa rij quik'orbale take ra' ri'sil cho ma' Israhel re' ma' ncaj ta niminic. Ruc' i k'oric xiban queh ra' ri'sil cho ma' Israhel, xic'uh taj wo' queh chi re' Jesus re' i Pahbamaj chi K'atal K'oric.

Juntuhm chi aj niminel xquic'ul Lok' laj rUxlabal i Dios

19 ¹Nok re' Apolos wilic chic ponok ar Corinto, re' ma' Lu' xoj pan tinamit Epeso nok iq'uinak chic cho chipam take tinamit wilqueb johtok chiwach naht na yuk' wilic pa riyuk'ul Calasya ch'il Pirjiya. Ar ajic Epeso naxirak take juljun aj niminel reh c'uhbal xiban i Wan aj kahsem ha' ²je' wili xik'or queh:

«Naxanimej tak c'uhbal xik'or i Wan, xtak'abjic na cho chana tak i Lok' laj Uxlabal chi narojic pan awamna tak on ma'xta? nqui queh.

Re' take re' je' wili xquik'or:

«Ma'xta! Xa ta wo' nak kabiram chi wilic take c'acharel xtak'abjic chic cho i Lok' laj Uxlabal chi quina, nqui take.

³Re' ma' Lu' je' wo' chic wili xik'or queh:

«Haj wilic i c'uhbal xanimej tak k'uru' naxkajsic aha' tak? nqui queh.

Nok re' take aj niminel re're' xquik'or chi xa re' wo' i c'uhbal c'uh tumaj ru'um i Wan naxiban cho kahsanic ha' xquinimej, ⁴re' ma' Lu' je' wili xik'or queh:

«Naxiban cho kahsanic ha' i Wan, je' wili xik'or queh tinamit xquikahsaj quihā' naxquijal wach quino'jbal:

«Chach'ica' ac'ux tak chirij i c'uhbalanel c'ulic lok reh chiwij i hin, nqui queh.

«Re' c'uhbalanel re're', re' aj wo' i Jesus re' Pahbamaj chi K'atal K'oric. Chirij aj re' curman chi re' take c'acharel naquich'icab quic'ux, nqui ma' Lu'.

⁵Naxquibiraj i k'oric re're', re' take aj niminel re're' xquikahsaj wo' chic quihā' re' cok ru' chi c'ahchi' quik'orom chi re' Jesus Ajabes chi quina.

⁶Chi je' re' xchalic cuc' i Lok' laj Uxlabal nok re' ma' Lu' xicoj k'ab chi quina. Ruc' aj re' puht quik'orom i k'oric nk'ormojic queh ru'um Lok' laj Uxlabal eh puht wo' quik'oric pan tocom chic k'oric take aj niminel re're', ⁷re' cablaj chi winak quiwi'.

**Re' ma' Lu' ma' xiban ta chic c'uhbalanic chipam i
paṭ ntijiljic wi' rij C'uhbal Ye'oj reh Moyses**

⁸Chirij chic re', re' ma' Lu' xitik ju' c'uhbalanic ar chipam i paṭ ntijiljic wi' i C'uhbal Ye'oj reh Moyses eh je' re' xiban chiwach i xib poh chi cu wilic chipam i tinamit re're'. Chiwach aj xib poh xcahníc cūc' take nquimol quīb ar, re' ma' Lu' xk'oric chirij i Jesus chi ma'xta nech' ok riyoj'ic eh ruc' i c'uhbalanic riban chirij rajawric i Dios chi k'atal k'oric, p'uht wo' rich'uksam quic'ux take c'ahchi' quibirinic reh. ⁹Xa re' la' wilic take je' ruc' ma' xquichop ta quic'ux chirij c'uhbal rik'or ma' Lu' xquicowsaj quic'ux eh chi quiwach take riq'uihal nquimol quīb ar xi'oquic chi ritz'ujuric i Jesus re' aj C'amol Beh ruc' i Dios. Xa re' aj wo' cho ru', re' ma' Lu' ma' cu ta chic xponic chipam i paṭ re're', re' la' chic xiban, jarub pa' take c'acharel xinimic reh Jesus xic'am je' take chirij ar chipam i ma' laj paṭ re' riban wi' c'uhtunic i winak Tirano ribihnal eh ar chic xitik ju' quic'uhbaljic.

¹⁰Je' aj re' ru' chiwach i quib chic haḅ cu xcahníc i ma' Lu' ar pan tinamit Epeso re' wilic pa riyuk'ul i Asya, je' chi ra' ri'sil eh je' chi ma' re' ta ra' ri'sil cho ma' Israhel quipatanic chipam i yuk'ul re're', xquibiraj i c'uhbalanic riban ma' Lu' chirij kAjaw Jesus.

Wilic take xcaj nak quitijem queh banoj sachbal c'uxlis riban i ma' Lu'

¹¹Chiwach aj quib haḅ re' cu xcahníc wi' i ma' Lu' ar pan tinamit Epeso, re' Dios yohbal wach lok' laj nawal sachbal c'uxlis xic'uhtaj ruc' rok k'ab ru'. ¹²Til k'e' wo' chic rajawric i Dios wilic ruc' i ma' Lu' chi xa pa' jaric su'tal rícojom chi juc'bal riwach on chi juc'bal rik'ab, quicowjic take yowa'ib nanquitz'a'j i xa pa' jaric su'tal nc'amaric je' queh. Je' wo' take c'acharel wilic ma' tob laj uxlabal cūc', quicahníc wo' chi suk nanquitz'a'j i xa pa' jaric su'tal re're'. ¹³Raj nchel take ju'jun ra' ri'sil cho ma' Israhel je' ruc' aj t'erem take ma' tob laj uxlabal qui'oj xa pa' tinamit, naxquitijej nak ti queh je' ricab riban i ma' Lu' chi quit'ermejic lok take ma' tob laj uxlabal, ma' xibirinic ta k'oric. Je' re' ajic, chi quesmejic lok take ma' tob laj uxlabal cūc' take c'acharel p'uht quik'orom ribiral rajawric i Jesus chi je' wili:

«Ma' tob laj uxlabal, ruc' rajawric i Lok' laj Ajabes Jesus re' rik'or ribiral i ma' Lu', nkak'or aweh chi telen lok ruc' c'acharel wilcaṭ wi', nqui nquik'or.

¹⁴Je' re' xquitik ju' ribanaric xa re' la' junpech je' wilic xquic'ul take wukūb chi winak quipatanic ar Epeso. Re' take re' rac'ūn take i jenaj ra' ri'sil cho ma' Israhel, Esewa ribihnal re' c'amol quibeḅ take aj k'ahsem sī chiwach i Dios. Re' take c'acharel re're' k'uru' naxquik'or nak ti reh ma' tob laj uxlabal chi narelic lok ruc' i c'acharel wilic wi', ¹⁵je' pe wili xk'ormojic queh ru'um ma' tob laj uxlabal:

«Re' hin weht'alim nic' wach rajawric i Jesus, je' wo' i rajawric ma' Lu', raj nchel hat-tak ma'xta nech' ok awajawric tak chi equinawesaj tak lok, nqui xk'ormojic queh.

¹⁶Chirij re', re' winak wilic wⁱ i ma' tob laj uxlabal naxye'eric reh ransil ru'um ma' tob laj uxlabal, xicut je ri**b** chi quina take wukub re're'. Chirij ru' xichacabej take pan ac'al, xisec'lom take cu rehtal xicahnic chi xa ti' chic wilque**b**. Ar ajic xa wekwek chic xcahnic i quiso' chiquij naxi'elic je chipam ripat i winak re're'.

¹⁷Nok quibiram chic ribiral chaj bih xquic'ul take wukub chi rac'un i E**se**wa, re' take ra' ri'sil cho ma' Israhel ch'i**l** take ma' re' ta ra' ri'sil cho ma' Israhel quipatanic ar Epeso, xoquic cho jenaj rinimal yo'jic cuc' eh ru**c**' re're' p'uh't quik'orom chi re' Lok' laj Ajabes Jesus til wilic rajawric. ¹⁸Chi quixilac take xquiyew rilok'il i Jesus, wilic take quichopom nak quic'ux chirij banoj waranic i**b**. Re' take tinamit re're' naxquich'ahba' wach quimahc chiwach ma' Lu', xquipahkaj cuybal quimahc reh Dios ¹⁹je' ricab xca'n wo' take wilic nak quicamaj chi aj war take. Re' take aj war re're' xquic'am cho quihuj ncamanic queh chi banoj war eh xquic'at. Chi'nchel take huj re're' xponic wake'ahl ik'ob ho'ik'ob (50,000) riq'uihal ritz'akil naxajlanjic rij.

²⁰Ru**c**' aj rinimal rajawric i Ajabes Jesus, re' quicomonil take quinimic reh c'uhbal chirij ru', xiq'uihbic wach eh ru**c**' wo' rinimal rajawric ru', k'e' chic take tinamit quibirinic reh c'uhbal re're'.

Re' ma' Lu' xich'ica' ric'ux chi ojic ar Jerusalen

²¹Chirij aj chic ric'uluric chi'nchel re're', re' ma' Lu' xich'ica' ric'ux chi ojic ar Jerusalen chi je' wili c'ahchi' rik'orom pa ric'ux:

«Nok wilquin chic ar Jerusalen, curman chi win chi nawojic wo' ar Roma, nqui c'ahchi' rik'orom pa ric'ux.

Nok rik'orom chic re're' pa ric'ux, xoquic wo' cho pa ricapew-bal i ma' Lu' chi naquiq'ui**c** ponok chi pet pa riyuk'ul Maseronya ch'i**l** ar pa riyuk'ul A**ca**ya. ²²Je' re' nok re' ma' Lu' xitak'a' je ar Maseronya take quib chi raj to'ol, re' Timoteyo ch'i**l** Erasto quibihnal nok re're' cu xcahnic pe chic so' chi naht ar Epeso re' wilic pa riyuk'ul A**sy**a.

Re' ma' Remetriyo xucsaj jenaj wolic ar pan tinamit Epeso

²³Chiwach wo' take k'ij re're' nok cu wilic ma' Lu' ar Epeso, jenaj rinimal wolic xuctic chi quina take xquinimej i Jesus re' C'amol Be**h** ru**c**' i Dios. ²⁴Re' wolic re're' xch'ihquic cho ru'um reh winak Remetriyo ribihnal aj ch'eyol wach sak laj ch'ihch' eh re're' ncamanic reh chi tik'inbal take cuc' rijalwachil ripatil tiyox Riyana ribihnal. Re' Remetriyo wili ch'i**l** take tocom rich ehcham reh camanic re're', ru'um chi yohbal wach tumin nquic'ul ru**c**' ritik'injic take rijalwachil ripatil tiyox nca'n, ²⁵ximol quiwach take rich'i**l** ch'i**l** chi'nchel take caj camanom eh je' wili xik'or queh:

«Hat-tak was nichak', re' hat-tak aweht'alim chi ru**c**' i kacamaj wili q'uih tumin nkac'ul maj re' take tinamit nquicoj chi re' take tiyox nkatik'a' i hoj, re're' i quidios take ru'. ²⁶Raj la' yu'na nawilom tak eh nabiraj wo' tak chi yohbal wach take tinamit c'ahchi' quicanab ricojoric wach re're' ru'um c'ahchi'

rich'uksjic quic'ux ru'um ma' Lu' chi naquik'ebem lok rij quic'ux re're', maj ma' xa re' ta ayu' Epeso je' la' wo' chi junsut riyuk'ul Aſya c'ahchi' rik'orom chi re' take tiyoſ xa tik'imaj cu'um winak ma' re' ta dios take. ²⁷Ruc' c'ahchi' ribanam i winak re're', yohbal chi re' kacamaj nka'n i hoj enoj pa rij, je' wo' chi re' pat nlok'onjic wi' i lok' laj katiyoſ nim riwa'ric, Riyana ribihnal, ma' eta chic noj ilmijok cu'um take tinamit. Wi je aj re' enc'uluric, yohbal wo' chi re' rilok'onjic i lok' laj katiyoſ Riyana nbanaric cu'um i tinamit chi junsut Epeso je' wo' pa riyuk'ul i Aſya, ensahchic wach chi junpech, nqui xik'or i Remetriyo.

²⁸Ar ajic chi'nchel take xmoloric quiwach ru'um Remetriyo naxquibiraj chaj bih xk'ormojic queh, k'e' naxchalic quic'a eh p'uht quiq'uerem quichi' chi je' wili:

«Re' Riyana re' katiyoſ hoj aj Epeso k'e' rimal rajawric. Ma' re' ta nchel i Dios c'ahchi' rik'orom ribiral ma' Lu', nqui take.

²⁹Je' aj re' k'uru' re' quic'a take winak re're' xinih rib cuc' take tocom chic quich quitinamit eh ru'um re' xquichop take quib rich'il ma' Lu' aj Maseronya take, re' Cayo ch'il Aristarco quibihnal eh xquic'am je take chipam jenaj ma' laj pat nquimol wi' quib reh chi ar rich'ukuric k'oric chi quina. ³⁰Naxibiraj re're' i ma' Lu', xaj nak ojic chipam i pat re're' chi ric'uhjtjic rib chi quiwach take quimolom quib ar, xa re' la' ma' xye'eric ta k'ab reh cu'um take aj nimmel. ³¹Je' wo' re' xca'n take ju'jun c'acharel wilic cajawric chipam riyuk'ul Aſya eh ti' wo' nquic'raj i ma' Lu', maj re' take re' xquitak'a' cho rik'ormojic reh chi ma'xta rojic chipam i pat molbal ib re're' ru'um nok yohbal chi reh chi enoj ric'uhjtaj rib. ³²Chirij chic ru' naxiponic take tinamit chipam i pat quimolom wi' quib take c'acharel johtonak quic'ux re're', re' take tinamit p'uht quipahkam chi quiwach chi je' wili:

«Chaj wo' bih nk'oric wi' i moloj ib wili? nqui take.

Je' re' nquik'or ru'um chi ma' sakom ta wach chi queh chaj bih riwi' i moloj ib re're', maj chi'nchel take johtonak quic'ux, rehreh wach nquik'or chi xa q'ueric chic quichi'.

³³Je' re' nok wilic take ra' ri'sil cho ma' Israhel xquic'am cok i jenaj ma' winak Lej ribihnal eh nok cu chi quiwach chic pa'lic cho, quipahkaj reh chi narik'oric cho chi quina take tinamit re're'. Je' re' nok re' ma' Lej xiban je k'ab chi naquimayam ahnic eh chi je' re' narip'utum nak je k'oric cuc' tinamit chi rico'ljic rij quinimic take ra' ri'sil cho ma' Israhel, ³⁴xa re' la' take tinamit re're' naxquina'bej wach i ma' Lej chi ra' ri'sil wo' cho ma' Israhel, xa junk'oric chic take xquiq'uer quichi' chi je' wili:

«Re' Riyana, re' katiyoſ hoj aj Epeso, k'e' rimal rajawric, nqui take.

Chi je' re' xquitik ju' chi q'ueric quichi' chiwach quib ora ³⁵cu rehtal xipitiric ru'um aj tz'ihm chipam quitinamital. Re' aj tz'ihm re're' je' wili xik'or queh:

«Hat-tak wich nitinamit aj Epeso, re' hat-tak aweht'alim chi chi'nchel tinamit pa riyuk'ul i Aſya queht'alim chi re' hoj, hoj aj camaj chipam ripat i tiyoſ nim

rajawric Riyāna ribihnal. Je' wo' queht'alim chi hoj aj lok'onel wach rijalwachil i tiyox re're', re' xchalic ar pan taxaj. ³⁶Ru'um aj chi re' xnik'or wili ma' hab ta wach enk'oric chi ma' coric ta, chamay tak ahnic yu'na eh ma' chi bih pe aban tak chi cu ja' na'n ta pe tak rij chi coric. ³⁷Je' re' nik'or maj re' hat-tak ma' xac'am ta tak cho take winak wili chi narich'ukuric k'oric chi quina ru'um chi aj banol ta take c'ahbilal chipam ripatil i katiyox, on chi aj tz'ujul ta nak take reh lok' laj katut Riyāna re' katiyox, ³⁸re' la' hat-tak xac'am tak cho take winak wili xa ru'um reh Remetriyo ch'il take rich'il. Je' re' ajic wi re' Remetriyo ch'il rich ehcham reh camanic chi tik'inic tak tiyox wilic ta nak jeno' quiwolic, ar nak xi'oj cuc' take aj ch'ukul wach mahc maj re' take re' nanquimol quib pan quicamaj, wilqueb chi rich'ukuric wach jeno' mahc. Ru'um aj re' hiy tak cuc' take aj ch'ukul wach mahc eh ar chak'or tak cok amahc chi ajujunal tak, ³⁹on chapahkaj tak jeno' k'ij re' ench'ukuric w'i' wach amahc tak. Je' re' k'uru' re' ok take aj ch'ukul wach mahc quich'ukbok wach amahc tak nok quimolom chic quib awuc' tak je' ricab rik'or i c'uhbal nchoponic na katinamit ⁴⁰maj je' ricab c'ahchi'coj yu'na chi ma' kich'il ta take kaj ch'ukul wach mahc, wilcoj pan yohbal chi ekojquitz'ak chi ma' nkabiraj ta k'oric chi quiwach ru'. Je' re' nik'or maj xa ta nak enkarak kak'orbal chirij chaj bih riwi' i moloj ib wili ru'um nok xa ta wo' nak re' wolic xa'n tak wili, wilic jeno' riwi', nqui xik'or queh rich ritinamit.

⁴¹Naxicohlaj rik'ororic re're', xich'ak je take tinamit mololqueb chipam i pat re're'.

Juntuhm take chi ra' ri'sil cho ma' Israhel xcaj nak quicansam ma' Lu'

20 ¹Nok chuhpunak chic wach i wolic re're', re' ma' Lu' xitak'a' riyuk'unjic take aj nimenel eh naxiponic ruc' je' wili xik'or queh: «Re' hin nawelic wo' chic je chaxilac tak, re' cok ru' re' hat-tak til chachop ac'ux tak chirij i Jesus, nqui queh.

Chirij chic ru' nok rik'ahchem chic take cahnok chi rich'akaric je rijb cuc', xichop je ribeh pa riyuk'tul i Maseronya ²eh xibehej pam chi'nchel ye'ab re're'. Chirij chic ru' nok ric'uhbalem chic take aj nimenel chipam i yuk'tul re're' chi naquichopom quic'ux chirij Jesus ruc' nic' pa' nimal k'oric xik'or queh, re' ma' Lu' xelic je ar Maseronya cu rehtal xponic ar Cresya ³re' xwih'ic w'i' xib poh.

Ar aj ru' nok tiklic nak chic chi narojic richopom jenaj ma' laj canowa reh chi narojic ar Jerusalem, ma' xoj ta chic richop i canowa cu'um queh take rich ra' ri'sil cho ma' Israhel re' xquitik'a' wach chi quiwach chi naquicansam ma' Lu' na'ojok richop nak i ma' laj canowa re' iq'uc ponok reh chi pet ar pa riyuk'tul i Sirya. Ru'um aj re', re' ma' Lu' xichih wach chi narisoljic je chi rok reh chi nariquic wo' chic ponok pa riyuk'tul Maseronya ⁴chi rich'il take winak je' wili quibihnal: Re' Timoteyo, re' Sopater aj Wereya, re' Aristarco ch'il i Sewunto re' aj Tesalonica take, re' Cayo re' aj Terwe, ch'il wo' take aj pa riyuk'tul i Asya, re' Tiquico ch'il i Tropimo.

⁵Chi'nchel take re're' naxquicana' cahnok ma' Lu' chipam i tinamit Pilipos chi wich'il hin ma' Cax, xquichop je jenaj ma' laj canowa chi

nacojic uyunel keh ar pan tinamit Troyas re' ojic wì' wìn chirij ma' Lu' 6chirij chi iq'uinak chic i nink'ij Pascuwa ribihnal re' ne'uxuric wì' i caxlan wi'c ma' cojoj ta rik'omil. Je' aj re' nok iq'uinak ok chic i nink'ij re're', re' hoj xkachop je jenaj ma' laj canowa ar pan tinamit Pilipos eh cu re' chic pa ro' k'ij xojponic ar Troyas re' xkarak wì' kìb quich'ìl take rich'ìl ma' Lu' nok c'ahchi'coj cuy'em ponok ar. Chi je' aj re', xojcahnic wukub k'ij cuc' take kich aj niminal quipatanic ar.

Jenaj q'uijol xk'ehbic cho nah oxtik pat nok c'uhbalanic riban i ma' Lu'

7Chipam roquic i chak'ab reh hi'bal k'ij naxquimol quib take kich aj niminal aj Troyas chi rinimjic quiwa' quiha' je' ricab ric'uhnam i Jesus, re' ma' Lu' xoquic chi c'uhbalanic eh tob ta nak xa je' chic ikal nelic je chipam i tinamit re're', ma' xipit ta i c'uhbalanic c'ahchi' ribanam xinimsaj la' rok cu rehtal xponic tic'lic ak'ab. 8Je' re' xiban maj xa sakom chic pam i ye'ab re're' ru'um take riq'uihal sakombal kopolqueb nah oxtik pat kamolom wì' kìb.

9Chi ribirmijic aj i nim rok c'uhbal c'ahchi' ribanam i ma' Lu' wilic take xchalic quiwiric, je' ricab i jenaj q'uijol Ewtico ribihnal, tz'uklic johtok nah wentana reh oxtik pat re're'. Re' q'uijol re're' naxchalic xa suk chic riwiric, xk'ehbic jok wach ac'al eh chi je' re' xquimic ar. Ar aj re' ru' naxe'ulic ucsjok riti'jolar i ac'un re're' cu'um take wilqueb ar, 10re' ma' Lu' xkajic wo' cho nah oxtik pat. Nok wilic chic re' wilic wì' i q'uijol amna chic, re' ma' Lu' ximuc'a' jok rib china ac'un re're', xiyew johtok wach teleb eh je' wili xik'or queh aj niminal:

«Ma' yo'slom awib tak. Re' q'uijol wili ma' camnak ta, nqui queh.

Je' re' xik'or ru'um nok ribanam nak chic chi xc'acharic wo' chic cho.

11Chirij chic re', xoj-johtic wo' chic johtok nah oxtik pat eh xoj-oquic chi ribanaric kawa' kaha'. Naxkacohlaj kawa' kaha', re' ma' Lu' xichop wo' chic jenaj c'uhbalanic nim rok cu rehtal xoquic cho sak'ic. Chirij re', xicana' cahnok take aj niminal re're' 12chi ye'oj chic cahnok riman ricowil quic'ux chirij Jesus eh re' take re' xi'oj pan quipat chi quich'ìl i q'uijol re're' chi c'achlic wo' chic.

Re' ma' Lu' xoj chi rok ar pan tinamit Ason

13Chirij chic ru' nok re' ma' Lu' elenak chic je pan tinamit Troyas eh ru'um chi xaj ojic chi rok chi rutquel cu ar pan tinamit Ason, xitik'a' wach ku'c i hoj re' koj-ihch'ilinic reh, chi ar nakarakam kib rich'ìl chipam i tinamit re're'. Je' re' nok re' hoj xkachop je jenaj ma' laj canowa re' ojic riban ar Ason eh chi je' re' xoj-oj chi pet reh chi nakuy'em ponok i ma' Lu' ar. 14Naxponic i ma' Lu' ar Ason re' xkarak wì' kìb rich'ìl, xoj-oj chipam i tinamit Mitilene ribihnal. 15Je' chic ikal nok ka'nam chic lok jenaj ak'ab ar, xoj-oj wo' chic pan jenaj ma' laj canowa eh chi je' re' xoj-iq'uic ponok chiwach i t'uch tinamit Quiyo ribihnal. Jenaj chic k'ij chirij re', xoj-iq'uic ponok chiwach i tinamit Samos cu rehtal

xojponic pan tinamit Trojiljo ribihnal re' xkie'saj wī' i chak'ab. Nok xka'n cahnok junwar ar, xoj-oj wo' chic nah ha' cu rehtal xojponic pan tinamit Mileto ¹⁶chi ma' xoj-iq'uic ta pan tinamit Epeso ru'um chi re' ma' Lu' ritik'ab wach pa ric'ux chi ma'xta richamam rīb pa riyuk'ul i Aśya. Je' aj re' xka'n ru'um chi re' ma' Lu' rajamem rīb reh ojic ar Jerusalem reh chi ar narojic ric'sam i nink'ij Pentecostes ribihnal, wila' cu manlic xponic.

Re' ma' Lu' xic'uhbalej take c'amol beħ aj niminel aj Epeso

¹⁷Nok wilcoj ar Mileto, re' ma' Lu' xitak'a' je jenaj raj tz'e' wach ar Epeso chi quic'amaric take quinahsil moloj wach aj niminel ar. ¹⁸Naxic'ulic lok take c'amol beħ re're', re' ma' Lu' je' wili k'oric p'uht rik'orom queh:

«Re' hat-tak aweht'alim tak chi xa re' wo' cho chiwach i peť k'ij reh woquic chipam riyuk'ul i Aśya cu chiwach i k'ij yu'na je' wili no'jbal xawilow tak wuc': ¹⁹Naxincamanic chaxilac tak chiwach i kAjaw Jesus, xincamanic ruc' ch'ublic laj c'uxlis, toĸ ta wilic wo' pech xnik'eb riś nak' niwach eh xnic'ul wo' ti'c'axic xca'n win take kich rā' ri'sil cho ma' Israhel xcaj nak quinquicansam. ²⁰Toĸ ta wo' je' re' xnic'ul, re' hat-tak xawilow wo' tak chi ma'xta bih xpitbic win chi rik'ormojic i c'uhbal corsbal wach ac'acharic tak, xnik'or la' aweh tak i ricorquil ruc' take c'uhbalanic xniban pan aĸat tak on xa haj namol wī' awib tak. ²¹Ma' xa ta aweh tak xniban i c'uhbalanic je' la' wo' xniban wo' queh take kich rā' ri'sil cho ma' Israhel chi queh take ma' re' ta kich rā' ri'sil cho ma' Israhel. Re' hat-tak chi'nchel xnik'or wo' aweh tak chi naĸanaĸ tak ribanaric i mahc chiwach i Dios, je' wo' chi naĸopom ac'ux tak chirij i kAjaw Jesus. ²²Yu'na k'uru' chi ojic win ar Jerusalem, re' hin nwaj chi naĸeht'alim tak chi c'ahchi' wojic chi hin c'amoj je ru'um Lok' laj rUxlabal i Dios. Chi ma' weht'alim ta nak chaj bih narichalic chi ninā ar, ²³re' Lok' laj rUxlabal i Dios xa haj tinamit quiniq'uic wī' c'ahchi' riyeb rehtalil win chi ar Jerusalem nanic'ulum wo' ti'c'axic, je' wo' chi nanicojoric wo' pan che'. ²⁴Je' re' k'uru' re' hin ma' eta nipoh'aj so' nic'ux ru'um take ti'c'axic chalic reh chi ninā maj ru'um chi toĸ ta nak k'e' lok' chi win nic'acharic, k'e' wo' chic lok' chi win chi chipam ta nak nicamaj riyeb win i kAjaw Jesus chi aj k'orol reh lok' laj c'uhbal chirij richak'lamil i Dios enponic ricux'ic wach nic'acharic.

²⁵«Je' re' k'uru' ru'um chi hin raj k'orol i Dios eh je' wo' ru'um weht'alim chi re' hat-tak re' xatiq'uic nic'uhbalej tak ponok chirij rik'atoj k'oric i Dios ma' eta chic nawilow tak niwach china ac'al wili, ²⁶re' wili nik'or cahnok aweh tak chiwach i k'ij wili: Wi hab wach jeno' aweh tak encojoric rimahc, ma' rik'or chi re' hin wilic nimahc chi je' re' ric'ul. ²⁷Je' re' nik'or maj nic' pa' nimal i no'jbal xiyew win i Dios chi ac'uhbaljik tak, re' hin ma' xnipoy ta wach aweh tak, xnisakomej la' wach chi coric. ²⁸Je' aj re' ru' coric ok wach acamaj cha'n tak chi quiliric take aj lok'em reh Dios rimolom quiwach ruc' riquimic i Jesus. Je' ok re' cha'n tak maj re' take re' xi'okxa'njic pan ak'ab tak ru'um Lok' laj Uxlabal chi je' na ricab juntuhm ok chi me' reh chi nawilom

tak eh nac'axam wo' tak take chi coric. Je' wo', re' hat-tak chawil wo' awiḃ chi awibil awiḃ tak chi coric. ²⁹Je' re' nik'or maj chirij i welic je hin chaxilac tak weht'alim chi wilic take winak nacoquic cho chaxilac tak chi aj tijinel re' ma' ti' ta naquic'ram take moloj wach aj niminel chirij i Jesus, naca'nam la' je' ricab nca'n take josk' laj q'uiche' tz'i' chi ma' nquiquetelej ta wach take me'. ³⁰Je' wo' naquinelok je, wilic take chaxilac tak naquimiksam quḃ chi jot'ol aj tijinel take maj re' take re' naca'nam c'uuhbalanic xa reh chi re' chic take re' naquitahkaljic cu'um take quinimanic reh Jesus.

³¹«Chi je' aj re' ru'tum chi xacoj tak rehtal chi chiwach i xib ḥab xniban chaxilac tak, re' hin chi k'ij chi ak'ab xatnic'uuhbalej tak tob ta nchel k'e' ti'c'axic xnic'ul chirij ac'uuhbaljic tak. Chi je' re' k'uru' re' hin nik'or aweh tak chi chac'a'chmej awiḃ tak eh je' wo' chac'ax wo' acamaj tak. ³²Reh chi je' re' ena'n tak, yu'na was tak nichak' nacat nik'ahsam tak johtok pan k'ab i Dios re' xiyew rik'orbali chi katobjic. Je' re' nanibanam maj re' cok re' wilic rajawric chi ricowsjic ac'ux tak, je' wo' chi riyeric aweh tak ricuse'sbal ric'olom lok rij chi queh take quik'ahsam quḃ chi rilok'onjic. ³³Je' wo' chic, re' Dios riyew cho rito'bal chi kana eh ru'tum re', re' hin ma' xiban ta jik' i nic'ux chirij chak'wach laj riso' jeno' xa hab wach aweh tak, ma' wo' chirij riq'uihal ritz'ak, ³⁴chi jelow-bal la' re're' ru'c' ritz'awumal nicamaj, yohbal wach nitz'ak xnimol wach ma' xa ta reh pa' bih ajwal wach chi win hin je' la' wo' reh pa' bih queh take quibehic chiwij je' ricab wo' aweht'alim hat-tak. ³⁵Yu'na nipahkaj aweh tak chi ajujunal tak chi chato'bej tak take c'axic ti nca'n, je' ricab xnic'uhtaj aweh tak chi ru'c' kacamaj naka'nam nakato'bem wo' take kas kachak'. Chi'nchel re're' xnik'or aweh tak chipam take c'uuhbalanic xniban chaxilac tak re' xc'ulic wi' pa nic'ux riC'uuhbal i Jesus re' rik'or chi je' wili:

«K'e' wo' chic sukquil c'uxlis nchalic ru'c' i c'acharel riban i to'bonic, chiwach i c'acharel re' nc'ulbic reh to'bonic, nqui rik'or i riC'uuhbal i Jesus, nqui ma' Lu' queh c'amol beh re're'.

³⁶Nok ricohlam chic take k'oric re're', re' ma' Lu' xixuc'a' riḃ, xiban ritij ch'iḃ take chi'nchel rich c'amol beh re're' ³⁷eh chi je' re' k'e' naxcok'ej wach i ma' Lu'. Nok quicohlam chic i tij, chi quiju'junal take c'amol beh re're' xquik'ahchej ma' Lu' eh p'uht quitz'artz'am i rij ³⁸chi xa ti' chic pan quic'ux ru'tum i xik'or queh chi ma'xta chic quilow wach china ac'al wili. Je' aj re' ru' naxquicohlaj re're', re' take c'amol beh re're' xquihch'ilej je ma' Lu' cu re' wilic wi' ma' laj canowa re' narichopom je reh rojic ar Jerusalen.

Re' ti'c'axic naric'ulum i ma' Lu' ar Jerusalen

21 ¹Chirij aj chic rich'akaric je kib c'uc' take c'amol beh re're', re' hoj xoj-ouic je pan jenaj ma' laj canowa re' xojric'am je pan tinamit Cos ribihnal. Je' chic ikal re' ma' laj canowa re're' xojric'am je pan jenaj chic tinamit Rowras ribihnal eh chirij chic ru' xojric'am je ar Patara. ²Nok wilcoj chic ar, xkarak jenaj ma' laj canowa ojic reh chipam riyuk'ul i Penisya eh xoj-johtic je chipam. ³Chirij re' naxoj-iq'uiic ponok chiwach riyuk'ul Chipire re' til xkilow je

wach naxoj-iq'uiic je chi richel, re' ma' laj canowa xojric'am je pan tinamit Tiro ar pa riyuk'ul Sirya ru'um nok ar xkajsic lok take rihk. ⁴Ru'um aj re' wukub k'ij xojcahnic cuc' take aj niminel xkarak take ar. Re' take re' p'uht quipitim i ma' Lu' chi ma'xta nak rojic ar Jerusalem ru'um chi c'ahchi' rik'ormojic queh ru'um i Lok' laj Uxlabal chi ar Jerusalem re' ma' Lu' narojic ric'ulum ti'c'axic.

⁵Naxponic i riwuk k'ij reh kawih'ic ar Tiro, re' hoj xoj-elic je pan tinamit re're' chi xojquihch'ilej je take aj niminel ch'il quehq'u'en ch'il wo' take cac'un quixk'un. Nok wilcoj chic lok chirij i tinamit, chi kunchelal xkaxuc'a' kib chi chi' i ma' laj ha' eh xoj-oquic chi tij. ⁶Chirij chic ru' nok kak'ahchem chic kib chi kaju'junal chi rich'akaric kib, re' hoj xoj-oquic cok chipam ma' laj canowa eh re' take aj niminel xitahkanic cho keh xisoljic wo' chic je pan quipat.

⁷Nok hoj chic elenak cho ar Tiro, xkachop wo' chic je kabeh nah ha' cu rehtal pan tinamit Tolemaya ponok kawach. Ar xojcahnic jenaj k'ij eh chiwach i jenaj k'ij re're' xponic kayew cho risukquil quic'ux take aj niminel wilqueb ar. ⁸Naxsak'ic lok je' ikal, re' hoj ch'il i ma' Lu' xoj-elic je ar eh xoj-oj chipam jenaj ma' laj canowa cu rehtal xojponic pan jenaj tinamit Sesareya ribihnal re' xojcahnic wi' pa ripat ma' Peh re' aj k'orol ribiral i Jesus eh re' wo' jenaj chi quixilac take wukub chi winak chihoj lok take reh puhcunic to'bal chi quina take cahnel ixok. ⁹Re' ma' Peh re're' wilic quejeb rixk'un cu k'ahxok take eh aj k'orol wo' take reh k'oric nye'eric queh ru'um Lok' laj rUxlabal i Dios. ¹⁰Chiwach aj take quib xib k'ij xojcahnic ar, xponic pan tinamit Sesareya jenaj winak xchalic pa riyuk'ul Jureya, Acawo ribihnal re' aj k'orol wo' reh k'oric nye'eric reh ru'um Lok' laj rUxlabal i Dios. Re' winak re're' naxponic chipam i tinamit re're', ¹¹xoj-oj rik'o'rej ar pa ripat i ma' Peh. Ar ajic naxiquimlej i pas bac'bal ripam ma' Lu' p'uht ripixim take rok ch'il take k'ab chi ribil rib eh je' wili xik'or keh:

«Je' ricab naxnibac' take wok ch'il take nik'ab, je' re' nabac'arok take rok ch'il take k'ab i winak re' nehchenic reh pas wili maj re' Lok' laj Uxlabal xik'or win chi re' aj ehcham reh pas wili naribac'aric cu'um take ra' ri'sil cho ma' Israhel wilqueb ar Jerusalem eh naquik'ahsam wo' pan quik'ab take tinamit ma' re' ta ra' ri'sil cho ma' Israhel, nqui keh.

¹²Naxkabiraj aj re're', re' hoj koj-ihch'ilinic reh ma' Lu' ch'il wo' take ju'jun chic aj niminel kihch'ilem take, chi xa nch'uk chic kac'ux xkak'or reh chi ma'xta nak rojic ar Jerusalem, ¹³xa re' la' re' ma' Lu' je' wili xik'or keh:

«Re' hin ma' ru'um ta so' chi equinquibac' on equinquicansaj ru'um rik'ormojic ribiral i Lok' laj Ajabes Jesus enipoh'aj nic'ux chi ojic ar Jerusalem. Macapaj tak k'uru' chi ruc' ok'ic na'n tak eh je' wo' chi ruc' riyot'quil i wamna c'ahchi' acojom tak enipit i wojic ar Jerusalem, nqui xik'or keh.

¹⁴Chi je' aj re' naxkilow i hoj chi ma' pitiric ta raj chi ojic ar Jerusalem, re' wili xkak'or reh:

«Wi re' aj wo' ojic ar Jerusalem, re're' raj i Dios chi nabanam, re' aj wo' re' chanimej, kojqui reh.

Ruc' re're' xkacana' rik'ormojic reh chi ma'xta rojic ar.

**Re' richoporic i ma' Lu' chipam i Lok' laj
Paṭ re' nlok'onjic wī' wach i Dios**

¹⁵Chirij chic take k'ij reh kawih'ic ruṅ' ma' Peh, re' hoj xkatik'a' kīb chi nakelic je ar eh chi je' re' xkachop je kabeh chi kōk chi ojic ar Jerusalen ¹⁶chi xojquihch'ilej je take ju'jun aj niminel aj Sesareya. Re' take aj niminel re're' xic'ambic je kabeh chi nakojic chipam ripaṭ jenaj najtir aj niminel aj Chipire Manason ribihnal re' nakiq'uic ponok wī' chi ula'anic. ¹⁷Naxojponic ar Jerusalen re' take aj niminel xojquic'ul chi xa suk chic quic'ux. ¹⁸Je' chic ikal re' ma' Lu' chi kich'il wo' i hoj re' koj-ihch'ilinic reh, xoj rik'o'rej i ma' Jacowo ar pa ripaṭ re' quimolom wī' quīb take quinahsil aj niminel. ¹⁹Ar aj ru' re' ma' Lu' xic'alenej take eh p'uht rik'orom queh chi chaklic chi' i nic' pa' nimal xiban i Dios chi quixilac take ma' re' ta ra' ri'sil cho ma' Israhel ruṅ' i c'uhbalanic xiban chi quixilac. ²⁰Nok quibiram chic i xik'or ma' Lu', re' take c'amol quibeh aj niminel quimolom quīb re're' je' wili xquik'or:

«Kasbes ma' Lu', re' hoj k'e' nkatioxej reh Dios ruṅ' i c'uhbalanic xa'n chi quixilac take ma' re' ta ra' ri'sil cho ma' Israhel, xa re' la' chic re' hat aweht'alim chi re're' ricoj c'axic chi quixilac take q'uihal queh kich ra' ri'sil cho ma' Israhel quinimanic chic reh Jesus maj re' take re' xa cu re' wo' i C'uhbal Ye'oj reh Moyses cow c'ahchi' quik'orom chi narinimjic. ²¹Queh take kich ra' ri'sil cho ma' Israhel, re're' xk'ormojic chic chi re' hat c'ahchi' ak'orom queh kich ra' ri'sil cho ma' Israhel quic'acharic pan quitinamit take ma' re' ta ra' ri'sil cho ma' Israhel chi naquimayam ric'amaric na i C'uhbal Ye'oj reh Moyses, je' wo' chi ma'xta chic quik'atam lok ritz'uhmal na ric'achanbal quihalac'un, on chi ma'xta chic quinimem take c'uhbal cocsam wī' quīb. ²²Chaj bih naka'nam k'uru' ruṅ' re're'? Je' re' nkabiraj maj re' take kich ra' ri'sil cho ma' Israhel re're' naquimolom quīb kuṅ' ru'um xquibiraj chic chi re' hat xatc'ulic lok ayu' Jerusalen. ²³Ru'um aj re', re' hat sakbih chi ena'n i nakak'orom aweh yu'na: Chi kaxilac i hoj wilqueb quejeb chi kich aj niminel tanlic chiquij chi naquinimem i quik'orbāl quiyew chiwach i Dios. ²⁴Re' take re' chac'am take je chawij ar cuṅ' aj k'ahsem si chiwach i Dios eh chawitinej awīb tak chi saksbal awach tak. Chi je' re' nok re' take aj k'ahsem si enquik'or aweh tak chi ta chic reṭ chi enak'ahsaj asi tak, re' hat titojbok reh ritz'akil i johybal lok wach quina take quejeb chi aj niminel re're'. Nacha'n chi je' re', re' take kich ra' ri'sil cho ma' Israhel enquicoj wach chi ma' coric ta i k'oroj queh chawij eh je' wo' chi re' hat ma' c'ahchi' ta ayak'abem pan awok i C'uhbal Ye'oj reh Moyses, nqui take reh ma' Lu'.

²⁵Chirij ru' je' wo' chic wili xquik'or reh ma' Lu':

«Re' hat ma' ticapewenic chiquij take ma' re' ta ra' ri'sil cho ma' Israhel xinimanic reh Jesus maj re' hoj xkatz'ihmbaj chic je queh re' tik'inic wach no'jbal xka'n wili:

«Tob ta ma'xta animem tak chi'nchel i C'uhbal Ye'oj reh Moyses, re' hoj nkaj chi xa re' ti take wili chanimej tak: Mawuq'uej tak chic riquiq'uēl jeno' chicop, on maç'ux chic tak ritibquialal jeno' chicop k'ahsamaj chi sī chiwach tiyox, on jeno' chicop xa biyoj chi ralak. Je' wo', maḃan tak chic c'oyomal, nqui xkatz'ihmbaj je, nqui take reh ma' Lu'.

²⁶Je' re' nok je' chic ikal re' ma' Lu' xoj ar chi chi' i Lok' laj Pat re' nlok'onjic wī' wach i Dios eh xic'am je take chirij i quejeb chi aj niminel xk'ormojic reh chi naric'amam je take. Chirij chic ru' nok re' ma' Lu' ritinem chic rīb quich'īl take quejeb chi aj niminel re're' reh chi narik'ormojic queh cu'um take aj k'ahsem sī chi ta chic reṭ chi enquik'ahsaj quisi, re' ma' Lu' xoquic cok chi rik'ormojic chi xinimej chic i ritinjic rīb reh chi ta chic reṭ chi erik'ahsaj risī eh je' wo' xik'or chi pa riwuk k'ij narik'ahsam wo' i sī chiquij take quejeb aj niminel xic'am je take chirij.

²⁷Chirij re' nok q'uisin chic ma' nponic i riwuk k'ij chi narik'ahsam i sī chiquij take quejeb aj niminel ric'amam je take chirij, wilic take ju'jun rich rā' ri'sil cho ma' Israhel je' ruç' aj pa riyuk'ul Asya take xquimol quib chi rijohsjic quic'ux take riq'uihal tinamit. Ar ajic naxquillow wach ma' Lu' chi chi' i Lok' laj Pat re' nlok'onjic wī' wach i Dios. Re' take re' xa nquiminlom chic quib, xi'oquic cok chi richoporoc ma' Lu' ²⁸eh je' wili xquik'or chi xa q'ueric chic quichī':

«Hat-tak kas kachak' rā' ri'sil cho ma' Israhel, re' winak wili xa pa' tinamit niq'uiç ponok wī' ma' holohic ta c'uhtunic riban chirij katinamit je' wo' chirij i C'uhbal Ye'oj reh Moyses eh je' wo' chirij i lok' laj pat ye'ab wili. Ma' xa re' ta re', je' la' wo' yu'na ruç' ricojoric take winak ma' re' ta kich rā' ri'sil cho ma' Israhel c'ahchi' riyak'abem pa rok rilok'il i lok' laj ye'ab wili re' xa keh hoj rā' ri'sil cho ma' Israhel ye'oj chi kojwih'ic ayu', xa nqui chic take.

²⁹Re' riwī' chi je' re' xquik'or maj nok ja' noquic ta cok i ma' Lu' chi chi' i pat re're' xquillow cho wach i winak aj Epeso re' Tropimo ribihnal chi rich'īl eh pan quic'ux ru', re' ma' Lu' xic'am la' cok i winak re're' chirij.

³⁰Naxquibiraj take k'oric xca'n take aj Asya re're', q'uihal take tinamit xa johtonak chic quic'a xquimol quib chi richoporoc ma' Lu'. Chirij re're' xquijuquej lok chirij i pat re're' eh re' take aj chal'janel reh pat xquitz'ap cho ritz'ahpil xa re' wo' ti xi'elic lok take tinamit.

Re' ma' Lu' xco'ljic cu'um take sol

³¹Nok xa pan quimic nak chic wilic ma' Lu' cu'um take tinamit xichopbic reh, xponic k'ormojok reh nahsil c'amol quibeh take sol chi juntuhm chi tinamit aj Jerusalem wolic nca'n ru'um chi xjohsjic quic'a. ³²Re' nahsil i sol re're' naxibiraj chi je' re', ximol cho quiwach take risol ch'īl take c'amol quibeh eh xichalic re' wilqueb wī' tinamit re're', re' xa cu c'ahchi' wo' quik'ojobem i ma' Lu'. Naxquillow take tinamit chi xoj c'olok i quinahsil take sol chi rich'īl take risol, xa nok wo' xquimay rik'ojoric ma' Lu'. ³³Chirij ru',

re' nahsil c'amol quibeh take sol xitak'a' take risol chi naquichopom ma' Lu' je' wo' chi naquibac'am ruc' quib chi c'aham ch'ihch' maj pa ric'ux ru', re' la' ma' Lu' xjohsonic quic'a take tinamit re're'. Xa re' la', nok re' nahsil sol xibiraj hab wach i winak re're' eh je' wo' xibiraj chaj bih mahc xiban chi xijohsaj quic'a take tinamit ³⁴ma' hab ta wach queh xk'oric ricorquil ru'um nok chi quixilac take tinamit re're' rehref wach k'oric xquik'or chi ricojoric rimahc ma' Lu'. Je' re' nok ru'um chi ma' rirak ta chirij hab ta wo' wach queh tinamit re're' coric i c'ahchi' rik'orom, re' nahsil re're' xik'or queh take risol chi naquic'amam je ma' Lu' ar chipam i pat wılqueb wı' take tocom chic quich sol. ³⁵Chirij ru' naxiponic chi chi' i nim wach ka'ab tz'ak re' noj johtok chipam pat quiwih'ic wı' take sol, re' take sol quichoponic reh ma' Lu' xquijehlej johtok chi teleb eh xquic'am johtok chipam i pat re're' chi quisutem rij ru'um xiyoj'ic chi re' take tinamit enquicansaj ³⁶maj re' take tinamit re're' xa xam chic je take chiquij take sol, xa je' chic wili nquik'or je:

«Sahchok wach i winak re're', nqui take.

³⁷Chirij wili nok c'ahchi' nak chic ricojoric cok chipam i pat re're', re' ma' Lu' je' wili xik'or reh nahsil c'amol quibeh take sol:

«Ajabes chacuy, chayew k'ab win chi enipahkaj jeno' ato'bil aweh, nqui xik'or reh.

Naxibiraj chi je' re' i nahsil c'amol quibeh sol, je' wili xik'or reh ma' Lu':

«Ha', tichol po' nchel k'oric pan quik'orbal take aj criyeco. ³⁸Re' po' nchel hat k'uru' re' aj Ejipto cu ja' naht ta rijohsam quic'a take tinamit chirij i kak'atal k'oric hoj aj Roma, naxic'am je take chirij i lajeb ik'ob (4,000) chi k'ak'anel ar chipam ye'ab chik yuk' re' ma'xta wı' patanel reh chi nacoquic nak cho chi k'ak'anic, nqui reh ma' Lu'.

³⁹Ar aj ru' re' ma' Lu' je' wili xik'or reh nahsil re're':

«Ajabes, re' hin, hin ra' ri'sil cho ma' Israhel eh ar hin asjanak chipam ma' laj tinamit Tarso ribihnal re' wilic ar pa riyuk'ul i Silisya. Je' re' nok nipahkaj aweh chi enayew k'ab win chi equink'oric junc'am ok chi quina take tinamit wili, nqui reh.

⁴⁰Je' re' nok naxyeric k'ab reh chi narik'oric chi quina take tinamit, re' ma' Lu' xpa'lajic cho chi chi' nim wach ka'ab re're' eh naxiban cho k'ab queh tinamit chi naquimayam ahnic, je' wili xik'or cho queh pan k'oric hewreyo, re' quik'orbal take rich ra' ri'sil cho ma' Israhel:

22 ¹«Was tak nichak', chacuy chabiraj tak re' haj wilic nanik'orom chi co'lbal wıb chawach tak, nqui queh tinamit re're'.

²Naxquibiraj chi c'ahchi' quik'o'rjic pan hewreyo re' quik'orbal ru', re' take tinamit re're' rıman chic xquicoj rehtal i c'ahchi' rik'orom. Je' re' nok je' wili xitik ju' rik'ormojic ma' Lu':

³«Re' hin tob ta coric chi ar pan tinamit Tarso re' wilic chipam i riyuk'ul i Silisya xinasjic cho, til hin wo' ra' ri'sil cho ma' Israhel eh chipam aj wo'

tinamit wili xinq'uihic. Je' wo' ayu' xnic'ul nitijbal ruc' i ma' Camalyel re' xc'uhtunic wɪn ric'amaric nɑ chi coric i C'uhbal Ye'oj reh Moyses re' Dios c'amoj wo' cho nɑ cu'um take kamaɱ kati't. Je' ricab na'n hat-tak yu'na, re' hin xnik'or wo' cho wɪn chi curman chi narinimjic chi coric i C'uhbal re're' ⁴eh ru'um aj re', chi quiy'e'ric pan quimic take quicojbic wach ric'uhbal i winak rik'orom cahnok chi re're' aj C'amol Beh je ruc' i Dios, xinoj chi quisiq'uiric xa haj pa' tinamit. Je' aj re' nanichop take cho chi winak chi ixok, re' hin nik'ahsaj take pan quik'ab take nimak quiwach reh katinamit chi naquicojoric pan che'. ⁵Je' re' junpech, nok re' take aj k'ahsem si ch'il take c'amol beh chipam tinamit wili xquiyew je take nihuj wocbal ponok cuc' take wich ra' ri'sil cho ma' Israhel wilqueb ponok pan tinamit Tamasco, xnichop je nibeh chi ojic ar chi quic'amaric cho ayu' Jerusalem take tocom chic aj niminal reh Jesus wilqueb ponok, reh chi ayu' enbanaric ti'c'axic queh. Re' nik'or wili ma' chucuj k'oric ta maj re' nahsil c'amol quibeh take aj k'ahsem si ch'il take c'amol beh chipam tinamit wili xquillow eh queht'alim wo' chi je' re' xinbanic i hin.

⁶«Chi je' aj re' quinbanic cho, re' hin xinoj ar Tamasco eh nok xa chic q'uisin ma' quinponic ar, cu re' chic wɪn ru' je' na cablaj ora reh k'ij xisutej wij jenaj rinimal sakom xelic cho cu pan taxaj. ⁷Chi je' re', re' hin xink'ehbic wach ac'al ru'um ransil i sakom re're' eh xnibiraj chi je' wili xik'or cho wɪn i jenaj xk'oric cho cu pan taxaj:

«Chabiraj i nanik'orom aweh wili hat Sawlo: Chacana' ribanaric i ti'c'axic na'n wɪn ruc' ribanaric ti'c'axic queh waj tahkanel, nqui xik'or cho wɪn.

⁸«Chalic i hin je' wili xnibiraj reh:

«Ajabes, hab wach i hat? quinqui reh.

«Re' nk'o'ronic cho wɪn re're' je' wili k'oric xiban cho:

«Re' hin, hin i Jesus re' ribihnej chi aj Nasaret re' c'ahchi' abanam ti'c'axic wɪn ruc' ribanaric ti'c'axic queh take waj tahkanel, nqui cho wɪn.

⁹«Re're' take k'oric re're' xquibiraj wo' take winak qui'ihch'ilinic wɪn, xa re' la' ma' xquirak ta chirij i k'oric xquibiraj maj k'e' na xoquic cho quiyo'jic ru'um rinimal wach rich'ab i sakom xquillow wach re're'. ¹⁰Chi je' re' ajic re' hin xnik'or chi je' wili:

«Ajabes, chaj bih nawaj chi nanibanam chi rijelow-bal take xniban? quinqui reh.

«Re' Ajabes re're' je' wo' chic wili xik'or cho wɪn:

«Ar chipam i tinamit Tamasco narik'ormojic aweh chaj bih k'oroj chi nabanam i hat. Je' re' nok tucten je, hiy cok chipam tinamit re're', nqui wɪn.

¹¹«Re' hin k'uru' xinuctic je, xinoquic cok ar Tamasco chi hin chic ch'ihlimaj je cu'um take wich'il ru'um chi ma' quinilbic ta chic. ¹²Chipam i tinamit re're', ar c'acharic riban jenaj winak Ananias ribihnal holohic ribiral k'oroj cu'um take ra' ri'sil cho ma' Israhel wilqueb ar. Re' winak aj lok'onel reh Dios re're', ¹³xc'ulic lok wuc' eh je' wili xik'or wɪn:

«Wasbes ma' Sawlo, sakombok wo' chic pam take nak' awach, nqui wɪn.

«Nok rik'orom chic re're', xa chiwach wo' ti junc'am re're' xisakombic wo' chic pām take nak' niwach eh ar xwilow chic wach i ma' Ananiyas. 14 Chirij chic ru' je' wo' chic wili xik'or wīn:

«Ma' Sawlo, re' Dios lok'omaj cho wach cu'um take kamam kati't xichih awach chi xawilow wach i Lok' laj kAjaw Jesus reh chi xabiraj rik'orbal. Je' wo', re're' xichih wo' awach chi naweht'alim riwī' i camanic tiraj ricojom wī'. 15 Ru'um aj chi re' Dios xatripahbā' chi raj k'orol, yu'na hat ma' Sawlo chayew achi' chirij i Jesus queh i tinamit eh chak'or wo' queh chaj bih xawilow ch'il chaj bih xabiraj ruc' kAjaw Jesus. 16 Je' re' nok ma' chi bih chic awuy'ej, chatik'a' la' awīb chi rikahsjic aha' reh chi re' Jesus ericuy amahc nachak'or reh chi re're' i Lok' laj Ajabes china' ac'acharic, nqui wīn ma' Ananiyas.

17 «Chirij chic re' nok hin chic soljonak cho ayu' Jerusalen, junpech nok c'ahchi'quin chi tij chi chi' i Lok' laj Pat re' nlok'onjic wī' wach i Dios, xc'amaric nicapew-bal ru'um i Dios 18 eh ar xic'uh taj wo' chic rib wīn i Jesus chi je' wili c'ahchi' rik'orom wīn:

«Chaloq'uej awīb chi elic chipam i tinamit wili ru'um re' c'uhbal nak'orom chiwij wilic take tinamit ma'xta quicojbic wach, nqui wīn.

19 «Re' hin je' wili xnik'or reh:

«Haw, re' take tinamit equinquibiraj nanik'or queh i c'uhbal chawij maj queht'alim chi nok ja' tininimej ta, re' hin quinoj nak pan tak pat ntijiljic wī' rij i C'uhbal Ye'oj reh Moyses chi quisiq'uiric take jarub pa' quinimic aweh eh nanirak take cho, nik'ahsaj take pan che' reh chi naquitz'uhumjic. 20 Je' wo' queht'alim chi nok c'ahchi' ricansjic i Tewan re' xik'or i c'uhbal chawij, xnicapaj chi taret chi nariquimic nok hin wo' jenaj ponok chiquij take cansanel reh. Naxnicapaj chi je' re', re' hin xnik'or cok wīb chi nanicha'jem i quijuc rok tz'ih roxlo' lok quiso' take xicansanic reh Tewan, quinqu reh Jesus.

21 «Raj la' Jesus je' wo' chic wili xik'or cho wīn:

«Ma'eta riban chi eticahnic ayu' Sawlo, maj cu naht la' ponok yuk' q'uixcāb pan quitinamit take ma' re' ta rā' ri'sil cho ma' Israhel nacat nitak'āb je chi aj k'orol reh niC'uhbal. Je' re' nok telen je ayu' eh hiy, nqui wīn, nqui ma' Lu' queh take tinamit re're'.

22 Naxquibiraj i xik'or ma' Lu' chi xtak'abjic je cuc' take ma' re' ta rā' ri'sil cho ma' Israhel, re' take tinamit p'uht quiq'uerem quichi' chi je' wili:

«Chasach tak wach i winak re're' ru'um nok ma' riwī' ta chi c'achlic, nqui take.

23 Ar aj ru' nok re' take tinamit xa q'ueric chic quichi' p'uht quitup'lom wach i quiso' eh p'uht quipokem johtok poklaj pan tew rehtalil chi k'e' quic'a' xchalic, 24 re' nahsil c'amol quibeh take sol xitak'a' ricojoric cok ma' Lu' chipam i pat re're'. Chirij ru' xik'or wo' reh jenaj queh c'amol quibeh take sol chi naritak'āb ritz'uhumjic i ma' Lu' cu rehtal narik'orom chaj bih riwī' c'ahchi' quiwolem wī' quib tinamit chirij 25 xa re' la' nok pixlic chic ma' Lu' cu'um take sol re' naquie'bic nak chic reh chi tz'uhum, re' ma' Lu' je' wili xik'or reh c'amol quibeh sol:

«Re' c'uħbal nchoponic nā i tinamit Rōma ma' riyew ta k'ab aweh tak chi naquīnatz'uhumem tak i hin maj re' hin, hin wo' ritinamīt i Rōma eh xa nā ru' cu ma' ja' nach'uk ta tak k'oric chi ninā, nqui ma' Lu'.

²⁶Naxibiraj xik'or ma' Lu', re' c'amol quibēh sol re're' xōj rik'ohraj reh rinahsil chi je' wili:

«Ajabēs, chacapaj rij wi taret i xatak'a' keh chi naka'nam maj re' winak xkachop re' po' wo' ruc' ritinamīt i Rōma, nqui xik'or reh.

²⁷Je' re' ajic re' nahsil c'amol quibēh sol re're' xchalic ruc' ma' Lu' eh je' wili xik'or reh:

«Chak'or win, coric na chi hat ritinamīt i Rōma? nqui xik'or reh.

Nok re' ma' Lu' rik'orom ricorquihal chirij re're', ²⁸re' nahsil je' wo' chic wili xik'or reh ma' Lu':

«Re' hin naxinoquic chi hin ritinamīt i Rōma yohbal wach tumin xnitojbej wī rij. Raj ti hat k'uru', nic' ti wach na xa'n canar ritojoric rij re're'? nqui reh.

Chalic i ma' Lu' je' wili xic'u'lej wī':

«Re' hat cu ruc' na nchel atumin ru' xatoquic chi ritinamīt i Rōma, raj hin xa wasbal wo' cho maj re' take nitut wajaw najtir k'ij quicojom quib chi ritinamīt i Rōma, nqui reh nahsil re're'.

²⁹Naxibiraj i xik'or ma' Lu', re' nahsil sol re're' xoquic cho riyojic ru'um chi xitak'a' ripixiric i ma' Lu'. Je' re' nok, re' take sol re' nacoquic nak chi ritz'uhumjic i ma' Lu', ma' cu ta chic xca'n ritz'uhumjic.

Re' ma' Lu' xpahbabjic chi quiwach take nimak quiwach pan tinamit Jerusalem

³⁰Je' chic ikal re' nahsil c'amol quibēh take sol, ru'um chi raj reht'alim chaj bih riwī' quiwolic take ra' ri'sil cho ma' Israhel chirij ma' Lu', xitak'a' quic'amaric take c'amol quibēh take aj k'ahsem sī ch'il nic' nimal take nimak quiwach pan tinamit reh chi naquimolom quib ruc'. Nok wilqueb chic ruc', re' quinahsil take sol xitak'a' je' take risol chi naquichejem cho c'aham ch'ihch' bac'lic wī' ma' Lu' eh chirij chic ru', xc'ulic pahbabjok chi quiwach take c'amol beh xiyuk'unjic re're'.

23 ¹Nok pahbamaj aj chic i ma' Lu' chi quiwach take c'amol beh re're', je' wili xik'or queh chi xa cow chic c'ahchi' ritz'ehtam take:

«Was tak nichak', cu ayu' chi k'ij reh nic'acharic re' hin xa coric wo' wach nicapew-bal chiwach i Dios, nqui xik'or queh.

²Naxquibiraj re're', re' nahsil c'amol quibēh take aj k'ahsem sī Ananiyas ribihnal xik'or queh take sol wilqueb cok ruc' ma' Lu' chi xquiper je ware. ³Re' ma' Lu' je' wo' chic wili xik'or:

«Re' hat ajabēs re' cojoj chi rich'ukuric k'oric chi ninā ruc' i C'uħbal Ye'oj reh Moyses, re' hat je' acab tz'ak reh jeno' pat xa chun chic npoytic wach chi xa q'uisin ma' nk'ehbic je. Je' re' awī' chi niwach maj ruc' chi xatak'a' cho ripereric wach wē c'ahchi' apoyom wach chi re' hat ma' nanimej ta i C'uħbal Ye'oj reh

Moyses. Je' ricab nantuhyjic cok i tz'ak reh jeno' pat nesmejic lok wach sakom chi xa q'uisin po' nak chic ma' nk'ehbic je, re' ok wo' i Dios esenok lok wach sakom chi re' hat ma' c'ahchi' ta animem i c'u'hal re're', nqui reh nahsil aj k'ahsem si.

⁴Naxquibiraj re're' take mololqueb ar, je' wili xquik'or:

«Re' hat ma' c'ahchi' ta ayohbalem wach nahsil c'amol quibeh take aj k'ahsem si chiwach i Dios, nqui take reh ma' Lu'.

⁵Chalic ma' Lu' je' wo' chic wili xic'u'lej take wi'.

«Chacuy tak nimahc was tak nichak'. Pan coric, re' hin ma' weht'alim ta chi re' po' nchel i winak re're' i nahsil c'amol quibeh take aj k'ahsem si chiwach i Dios. Wi ta nak xk'ormojic win chi je' re', re' hin ma' xnik'or ta nak i k'oric re're' maj re' C'u'hal Ye'oj reh Moyses je' wili rik'or:

“Ma' ayak'abej pan awok rilok'il i nahsil chipam atinamit, nqui rik'or, nqui xic'u'lej take wi'.

⁶Chirij chic ru' re' ma' Lu' xicoj rehtal chi quixilac take wilqueb ar, yejal queh re' je' ru' aj k'ahsem si je' ru' ca' qui'sil cho aj k'ahsem si Saroc eh yejal je' ru' take cow laj aj niminel reh C'u'hal Ye'oj reh Moyses. Chi je' aj re', je' wo' chic wili xik'or queh chi cow:

«Was tak nichak', re' hin ch'iclic nic'ux chi re' take camnak nacuctic wo' chic cho. Ru'um aj chi nicoj wach i tijbal re're', re' hat-tak xamol awib tak chi rich'ukuric i k'oric chi nina eh re' hin, je' wo' hin ru' cow laj aj niminel reh C'u'hal Ye'oj reh Moyses je' ricab xca'n take cho nitut wajaw, nqui xik'or.

⁷Nok rik'orom chic re're' i ma' Lu', re' take cow laj aj niminel reh C'u'hal Ye'oj reh Moyses xquesaj lok quib chi quixilac take aj k'ahsem si je' ru' ca' qui'sil cho aj k'ahsem si Saroc eh p'uht quichopom quib chirij re're' ⁸maj re' take cow laj aj niminel reh c'u'hal re're' nquicoj wach cuctic take camnak eh je' wo' nquicoj wo' wach chi re' Dios wilic take raj tz'e' wach on chi wilic kanxelex i hoj. Tz'ab ru' take junch'uk, ma' nquicoj ta wach chi'nchel re're'.

⁹Nok yohbal chic wach ahnic ca'nam lok chi quibil quib, re' take aj tijem rij C'u'hal Ye'oj reh Moyses je' ru' quicomon take cow laj aj niminel reh c'u'hal re're', xa cakranak chic take xquipahba' johtok quib eh je' wili xquik'or:

«Ruc' take chaj bih riban i Dios, re' hoj ma'xta bih enkak'htaj wi' kib. Wi nchel jeno' raj tz'e' wach xitak'a' cho chi rik'o'rjic i ma' Lu', re' hoj ma'xta ta bih enkak'or chirij. Je' re' nok re' hoj xkach'uk chic wach chi re' winak wili ma'xta bih c'ahbilal ribanam, nqui take.

¹⁰Je' re' xquik'or chi quiwach chi'nchel take aj k'ahsem si mololqueb ar, re' xquisutej rij ma' Lu' eh riman chic wolic p'uht ca'nam chi quiwach. Ar aj ru' re' nahsil c'amol quibeh take sol, ru'um riyol'jic xoquic cho chi enquicansaj i ma' Lu', xik'or queh risol quicha'janic reh ma' Lu' chi naquesam je chi quixilac take tinamit quimolom quib re're'. Nok je' re' xca'n, re' take aj cha'janel re're' xquic'am wo' chic je chipam i pat quiwih'ic wi' take sol. ¹¹Ar aj chipam i pat re're', re' kAjaw Jesus xic'uhtaj rij reh ma' Lu' pa riwirc eh je' wili xik'or reh chiwach ak'ab re're':

«Ma' tiyo'jic ma' Lu' chacowej la' ac'ux. Nic' pa' wach naxak'or nik'orb'al ayu' Jerusalen curman wo' chi je' re' nāwojic ak'orom ar pan tinamit Rōma, nqui xik'or reh.

Jenaj chic pech niq'uinjic wo' nak chic ricansjic i ma' Lu'

¹²Chirij chic ru' nok sak'anak chic lok, juntuhm take winak je' ruc' rā' ri'sil cho ma' Israhel xquitik'a' wach quino'jbal chi naquicansam i ma' Lu' eh chi riye'eric quik'orb'al chi ricansjic ru', je' wili xquik'or:

«Re' hoj wi xka'n kawa' kaha' chi ja' nkacansaj ta ma' Lu', kojsihtjok ru'um i Dios, nqui take.

¹³Re' take winak re're' ma' xa ta wilqueb ca'winak ok chi winak naxquiyew quik'orb'al chi cansanic.

¹⁴Chirij aj chic riye'eric quik'orb'al, re' take winak re're' xichalic cuc' take c'amol quibeh take aj k'ahsem si, je' wo' cuc' take nahsil chipam tinamit eh je' wili xquik'or:

«Re' hoj je' wili kak'orb'al xkayew chikawach chi ricansjic i ma' Lu':

«Re' hoj wi xka'n kawa' kaha' chi ja' nkacansaj ta ma' Lu', kojsihtjok ru'um i Dios, nqui xkak'or.

¹⁵«Yu'na k'uru' re' hat-tak ch'il take acomon re' namol awib tak quich'il, cha'n awib tak chiwach i nahsil c'amol quibeh take sol chi je' nawaj asakomem tak wach rimahc ma' Lu' eh chapahkaj tak reh chi ikal chic'am wo' chic cho chawach tak reh chi re' hoj nok katik'ab chic kib, enkacansaj i ma' Lu' nok ja' ta n'ulic lok chipam i pat wili, nqui take.

¹⁶Chi je' aj nak re' naca'nam take winak re're', re' ribiral chi ncay nak quicansam ma' Lu', xponic pe' pan xiquin i jenaj rac'un ranab i ma' Lu'. Re' ac'un re're' naxibiraj ribiral re're' xoj chipam i pat wilqueb wi' take sol eh xponic rik'or reh ma' Lu' nic' wach i no'jbal xquitik'a' wach take winak re're'. ¹⁷Naxibiraj re're' ma' Lu', xiyuk'ej je' jenaj queh take c'amol quibeh sol chi rik'ormojic reh chi je' wili:

«Ajabes, re' ac'un wili wilic k'oric xibiraj cho chiwij eh yu'na raj rik'orom reh nahsil chana tak. Chacuy, chac'am je' win chiwach anahsil tak, nqui reh.

¹⁸Chalic i c'amol quibeh sol re're' xic'am je' ac'un chiwach rinahsil eh je' wili xponic rik'or reh:

«Ajabes, re' kaj tz'ahpel ma' Lu' xiriyuk'ej je' ruc' eh xipahkaj ato'bil win chi xnic'am cho ac'un wili chawach ru'um nok raj rik'orom aweh jenaj k'oric xibiraj cho chirij kaj tz'ahpel re're', nqui reh rinahsil.

¹⁹Je' re' ajic re' nahsil re're' xichop chi k'ab ac'un re're', xic'am lok pa reh eh je' wili xibiraj reh:

«Chaj bih nak'orom win? nqui reh.

²⁰Chalic ac'un je' wili xik'or reh:

«Ajabes, re' nahsil aj k'ahsem si ch'il take quinahsil i tinamit xquitik'a' wach quino'jbal chi naquik'orom aweh, chi ikal naquimolom wo' chic quib chi risakomsjic wach aweh rimahc ma' Lu'. Ru'um aj re' naquipahkam aweh

chi n̄ac'amam wo' chic je ma' Lu' chi quiwach, ²¹xa re' la' hat maç'u'lej n̄a queh maj ma' xa ta wilqueb ca'winak (40) chi ra' ri'sil cho ma' Israhel naquic'olom quib chi ruyu'njic ma' Lu' reh chi naquicansam. Yu'na, xa chic re' ak'orbal hat c'ahchi' cuy'em chi naca'nam re' xquitik'a' wach, ru'um nok xquiyew chic quik'orbal chi naquisihtjic ru'um i Dios wi xca'n quiwa' quih̄a' chi cu ja' nquicansaj ta pe i ma' Lu', nqui xik'or reh nahsil re're'.

²²Chi je' re', re' nahsil sol naxitak'a' je i q'uijol laj ac'un re're', xik'or reh chi ma' hab ta wach eh narik'orom chi xc'ulic riyew rehtalil i chaj bih xquitik'a' wach take juntuhm chi ra' ri'sil cho ma' Israhel. ²³Chirij chic ru' xik'o'rej je take quib chi c'amol quibeh sol eh je' wili xik'or queh:

«Chatak'a' tak k'oric chi belejeb ora reh chak'ab nacojic ar Sesareya lajc'ahl (200) chi sol je' ruc' ch'il quimachet, lajc'ahl (200) je' ruc' ch'il quik'as ju' ch'ihch' tz'ob-bal eh lajeb ricajwinak (70) je' ruc' rij caway wilqueb. Chak'or tak queh sol re're' k'uru' chi quitik'a' quib reh ojic. ²⁴Reh aj chi ma' eta ncansjic i ma' Lu', c'amarok je ruc' ajabes ma' Pelix re' raj to'ol k'atal k'oric aj Roma ar Sesareya eh chatik'a' tak jeno' ricaway i ma' Lu' c'ambal je reh, nqui nahsil c'amol quibeh sol re're'.

²⁵Chirij chic ru' xitz'ihmbaj je jenaj huj reh ma' Pelix re' rik'or chi je' wili:

²⁶«Ajabes k'atal k'oric ma' Pelix: Re' hin Calawriyo Lisiyas nibihnal c'ahchi' nitak'ab je risukquil ac'ux. Je' wo' c'ahchi' nik'orom je aweh take k'oric wili chirij ²⁷i winak wili re' ritinamit wo' i Roma je' ricab xnibiraj chi xik'or. Re' aj wili k'oric nik'or je aweh: Re' hin xnichop cho winak wili naxinponic ch'il take nisol ar chipam i ye'ab naricansjic nak w' cu'um take juntuhm chi ra' ri'sil cho ma' Israhel xichopbic je reh. Chi je' aj re' c'ahchi' ca'nam reh, xnimak' cho pan quik'ab take juntuhm re're' ²⁸eh ru'um chi xwaj nibiram chaj bih riw' chi c'ahchi' quitz'akam i mahc chirij, re' hin xnipahba' chi quiwach take nahsil nquimol quib chi ch'ukuj wach mahc ²⁹xa re' la' hin ma' xnirak ta jeno' mahc chirij i winak wili chi eta nak nahnich pan che' chi junpech on chi eta nak ncansjic je' ricab rik'or i tak'anic nchoponic kana hoj aj Roma. Xa re' cok xwilow chi re' winak wili c'ahchi' rich'ukuric wach rimahc chirij i c'uhbal tijimaj take w' ra' ri'sil cho ma' Israhel.

³⁰«Je' re' k'uru' tob ta chiwach kac'uhbal hoj ma'xta jeno' rimahc, re' hin xa chiwach wo' ti junc'am naxc'ulic k'ormojok win chi juntuhm take ra' ri'sil cho ma' Israhel naj quicansam pan c'olic i winak wili, c'ahchi' nitak'ab je awuc' reh chi ar chic chawach ch'ukurok wach rimahc. Yu'na ti tikilquin chic chi nanitak'ab je k'oric cuc' take aj tz'akol wach rimahc chi chawach ok chic i hat ojok quich'uk wach rimahc. Re' aj wili k'oric xnitz'ihmbaj je aweh ajabes ma' Pelix. Chawic'raj awib ar k'uru', nqui rik'or huj xitz'ihmbaj je ma' Calawriyo Lisiyas.

³¹Je' aj re' k'uru' naxponic belejeb ora reh chak'ab, je' ricab nic' pa' wach xitak'a' rik'ormojic i nahsil c'amol quibeh take sol re're', re' ma' Lu'

xesmejic wo' je cu'um take sol je' ruc' qui'oj chi cok eh cu ar pan tinamit Antipatris xponic quicana' cho chiwach chak'ab re're'. ³²Naxsak'ic, re' take sol re're' xisoljic wo' chic cho chipam i pat wilqueb wi', nok quicanab chic cho ma' Lu' pan quik'ab take sol quibehic rij caway chi naquic'amam je ar Sesareya. Re' take sol re're' xquic'am je ma' Lu' ³³ar Sesareya eh naxiponic ar xquipahba' cok chiwach i rijelow-bal k'atal k'oric pahbamaj ar.

Naxquik'ahsaj i huj xitz'ihmbaj je ma' Calawriyo Lisiyas, ³⁴re' pahbamaj chi rijelow-bal i k'atal k'oric ar Sesareya, p'uht rilom wach i huj re're' eh chirij chic ru' xibiraj reh ma' Lu' haj wilic i yuk'ul asjanak wi'. Nok ribiram chic chi re' ma' Lu' ar pa riyuk'ul Silisyas asjanak, ³⁵je' wili xik'or reh:

«Re' hin nanibiram i k'oric nabanam chi rico'ljic awib, xa re' la' nwyuej pe naquic'olok lok take aj tz'akol wach mahc chawij, nqui reh.

Chirij ru', je' aj wili xik'or queh take risol:

«Re' winak wili ar chacha'je' tak chipam i pat xitik'a' cahnok i k'atal k'oric Herores, nqui queh.

Re' rico'ljic rij xiban i ma' Lu' chiwach k'atal k'oric ma' Pelix

24 ¹Ho'ob chic k'ij riponic ma' Lu' ar Sesareya, xoj c'olok i nahsil c'amol quibeh take aj k'ahsem si re' Ananias ribihnal ch'il take ju'jun chic nahsil chipam tinamit eh ch'il wo' jenaj winak ma' ahl ta chi' chi k'oric Tertulo ribihnal. Re' take re' xiponic chi ritz'akaric wach rimahc ma' Lu' chiwach ma' Pelix. ²Nok c'amoj chic cho ma' Lu' chi quiwach chi'nchel re're', re' Tertulo tohk' rik'oric cok chi ritz'akaric wach rimahc ma' Lu' xa re' la' pet xic'alenej ma' Pelix chi je' wili:

«Ajabeş ma' Pelix, re' hat k'e' wilic ano'jbal eh ru'um re're' pan katinamit holohic chic k'atoj k'oric c'ahchi' ribanaric. Je' wo', re' hoj ra' ri'sil cho ma' Israhel k'e' chic sukquilal wilcoj awu'um. ³Ru'um aj re' lok' laj ajabeş ma' Pelix, pan quibihnal take chi'nchel i wich nitinamit wilqueb xa haj yuk' re' queht'alim wi' ac'axbal nayew keh, til k'e' nitioxej ac'axbal chi kana.

⁴«Ajabeş ma' Pelix, tob ta nchel nanicojom riman rilahtzil awach yu'na, chacuy nipahkaj aweh chi ma' tich'i'tjic ku'um. Koj-abiraj ti junc'am ok ruc' i nakak'orom aweh chirij i winak wili. ⁵Re' winak wili re' nc'ambic quibeh junch'uk chi aj niminal reh Jesus re' ribihnej chi aj Nasaret, re're' jenaj aj vojol c'uxlis chi keh hoj, xa je' na nchel ricab jeno' ya'bilal nok wilic maj xa haj pa' yuk' c'ahchi' rijohsam quic'a take kich ra' ri'sil cho ma' Israhel. ⁶Ru'um aj chi je' re' riban, re' hoj xkachop cho maj junpech cu xiniq'uej wo' riye'eric pa rok rilok'il i Lok' laj Pat re' nlok'onjic wi' wach i Dios naxicoj take tinamit chipam je' ruc' ma' re' ta ra' ri'sil cho ma' Israhel take. Ru'um chi je' re' xiban, re' hoj xkap'ut nak rich'ukuric k'oric china je' ricab rik'or i kac'uhal hoj tijimaj wi' ⁷xa re' la' chic ru' re' nahsil c'amol quibeh take sol Lisiyas ribihnal xojripi chi nakacohlam wach rich'ukuric k'oric china nok xitak'a' take risol chi naquimak'am chikawach eh xa na ru', xojquich'eylom take risol. ⁸Ru'um aj re' yu'na awuc' chic i hat

xojritak'a' cho chi rich'ukuric wach rimahc i winak wili. Yu'na chi wilcoj chic chawach i hat k'uru', nkapahkaj aweh chi ruc' i birinic nabanam reh winak wili, re' ok hat ticojbok rehtal chi coric wach mahc nkak'or aweh chirij, nqui reh.

9Ru'um chi re' take k'oric re're' c'ahchi' wo' ribirmijic cu'um take rich'il wilqueb cok ar, je' wo' wili xquik'or cok:

«Re' k'oric c'ahchi' rik'orom ma' Tertulo til coric, xa nqui chic take cok.

10Nok ribiram chic re're', re' k'atal k'oric ma' Pelix xiban je rehtalil reh ma' Lu' chi narik'oric. Je' aj wili p'uht rik'orom ma' Lu':

«Ajabes ma' Pelix, re' wili co'lbal wib nanik'orom chawach chi til ch'iclic nic'ux ru'um nok weht'alim chi re' hat, ru'um q'uih chic hab ap'utum ch'ukuj k'oric chi kana i hoj ra' ri'sil cho ma' Israhel, aweht'alim chic chaj bih ne'uluric chi kaxilac. 11Re' hat eta nak nabiraj queh tocom chic c'acharel, enak narak chirij chi til coric i nanik'orom wili: Naxinponic Jerusalen chi riye'eric nisi chi lok'onbal wach i Dios ar chipam i Lok' laj Pat re' nlok'onjic wi' wach i Dios cablaj cho k'ij yu'na, 12re' hin xa ta nak chipam lok' laj pat re're' on chipam i pat ntijiljic wi' rij i C'uhbal Ye'oj reh Moyses, on pan tak ribehil tinamit xinqirak ta take quitz'akbic wach nimahc wili chi c'ahchi' niwolem jeno' c'acharel, on chi c'ahchi' nimolom quiwach take tinamit chi rucsjic jeno' wolic.

13«Chi je' re' i ricorquilal, re' mahc nquitz'ak chiwij ma'xta bih jeno' rehtalil enquic'uhtaj wi' aweh chi til coric, maj ma'xta bih c'ahchi' nibanam. 14Haj ti cok wilic enquik'or aweh chi til coric, re' chi re' hin nilok'ej wach i kAjaw Dios re' xquilok'ej wo' cho wach take kamam kati't, xa re' la' ru' re' lok'onic niban yu'na re' chic je' ricab ric'uhtaj win i c'uhbal chirij i Jesus re' aj C'amol Beh je ruc' i Dios, tob ta nchel nquik'or take winak wili chi ma' coric ta wach i c'uhbal re're'. Je' re' niban maj re' hin xnich'ica' nic'ux chirij take C'uhbal k'oroj cho chipam take huj xitz'ihmbaj i Moyses ch'il wo' take huj xquitz'ihmbaj take cho aj k'orol riC'uhbal i Dios. 15Je' wo', re' hin xnich'ica' nic'ux chirij nquichop wo' wi' quic'ux take winak wili chi re' Dios xik'or chi re' take coric wach quic'ux ch'il take ma' coric ta wach quic'ux nacuctic cho rica'pech.

16«Chi je' aj re' nicamaj chiwach i Dios, re' hin xa nicowej wo' wib reh chi ma' jaruj ta encojoric rimahquilal wok nik'ab chiwach i Dios, on chi quiwach take wich c'acharel, 17je' ricab wo' xniban naxinponic cho c'acharok pan tocom chic tinamit. Nok hin chic wih'inak cho quib xib ok hab ar, re' hin xinsoljic wo' chic je pan tinamit Jerusalen re' quitinamital take wich ra' ri'sil cho ma' Israhel eh ar re' tumin moloj cho wach wu'um chi quito'bal take wich aj niminel quic'acharic pan tinamit re're', xoj nik'ahsaj chipam i Lok' laj Pat re' nlok'onjic wi' wach i Dios eh ar, je' wo' nanik'ahsam jeno' nisi chiwach i Dios chipam i lok' laj pat re're'.

18«Chi je' re' ajic nok witinem chic wib chi chi' i lok' laj pat re're' eh nok manlic oquic nak chic cok win ar chi rik'ahsjic nisi, xinponic rakmajok cu'um

take wich rā' ri'sil cho ma' Israhel xichalic pa riyuk'tul i Asya. Re' take re' ma' xinqirak ta chi nituhbem ta nak take tinamit chi rijohsjic quic'a 19maj wi ta nak chi quiwach take re' wilic jeno' nimahc je' ricab nquitz'ak chiwij yu'na, ayu' nak wilqueb take cho chi rik'ormojic chawach. 20Je' wo', re' take winak wilqueb chawach wili xa ta nak enquik'or wo' aweh chi xquirak jeno' mahc chiwij naxinpahbabjic chi quiwach naxquimol quib wich'il ch'il wo' take tocom chic quich nahsil china katinamit. 21Haj cok wilic enquik'or nak aweh take winak wili, re' hin naxinpahbabjic chi quiwach ru' xnik'or i k'oric wili ruc' cow laj k'oric: Re' hat-tak was tak nichak' c'ahchi' ach'ukum tak k'oric chi nina xa ru'um chi nicoj wach cuctic take cho camnak, quinqi queh, nqui ma' Lu' reh ma' Pelix.

22Nok ribiram chic quik'orbal take winak re're' ch'il rik'orbal i ma' Lu', re' ma' Pelix chi reht'alim chic chi manlic nic' wach riwi' ribiral chirij i Jesus re' C'amol je Beh ruc' i Dios, xich'ak je take tinamit re're' chi je' wili c'ahchi' rik'orom je queh:

«Cu c'olok pe chic lok i Lisijas ayu' cu re' aj chic nanicohlam wach rich'ukuric i wili, nqui queh.

23Chi je' re', xik'or wo' reh c'amol quibeh take sol chi naricha'jaljic wo' chic i ma' Lu' chipam i pat xesmejic cho wi', xa re' la' je' wili wo' xk'ormojic je reh c'amol quibeh sol re're':

«Re' ma' Lu' chayew tak k'ab reh chi naric'ulic k'o'rjok cu'um take ti' quic'rinic reh. Je' wo', naquic'olok lok take rula' re're' chayew wo' tak k'ab queh chi naquic'amam cok pa' bih reh, reh chi enwih'ic chi suk, nqui xik'or.

Re' ma' Pelix xipahkaj reh ma' Lu' chi narik'orom ribiral i Jesus reh

24Nok ribanam chic lok quib xib ok k'ij i ma' Lu' chipam i pat canamaj wi', junpech re' ma' Pelix xoj c'olok chipam i pat re're' chi ihch'ilimaj ru'um rehqu'en Trusila ribihnal re' je' ruc' rā' ri'sil wo' cho ma' Israhel. Ar xitak'a' je ric'amaric ma' Lu' eh naxc'ulic lok ruc', re' ma' Pelix xipahkaj reh chi narik'orom reh nic' wach riwi' ch'iquinic c'uxlis chirij i Jesus re' Pahbamaj chi K'atal K'oric. Naxoquic chi k'oric i ma' Lu', re' ma' Pelix xoquic chi ribirmijic chaj bih c'ahchi' rik'orom. 25Je' re' nok re' ma' Lu' pu'ht rik'orom i c'uhbal re' rik'or chi re' take c'acharel tanlic chiquij chi naca'nam i coric on chi nauk'ebem lok rij quic'ux i c'ahbilal. Je' wo', pu'ht rik'orom i c'uhbal re' nk'oric chirij chi chalic reh k'ij nok re' Dios narich'ukum k'oric chi quina take c'acharel. Naxibiraj chi je' re', re' ma' Pelix xich'ak je ma' Lu' ru'um chi k'e' naxyo'jic ru'um take k'oric re're'. Je' aj wili xk'ormojic reh i ma' Lu' naxelic je:

«Re' hin nacat wo' chic niyuk'em je natehok chic junc'am ok niwach ruc' take nilahtz'il wilic. Yu'na k'uru' hiy wo' chic pan aye'ab, nqui reh.

26Chirij i moloj ib re're', re' ma' Lu' q'uih pech wo' xtak'abjic je ric'amaric ru'um i ma' Pelix reh chi naribanam ric'utaj ruc' eh chi je' re' ruc' jarub pa' pech xc'ulic chiwach, xa ruy'ej nak chic chi re' ma' Lu' eribehsaj tumin reh, chi tojbal rij i relic je pan che' 27xa re' la' ma'xta wo' bih xbehsjic reh. Je'

re' nok re' ma' Pelix ma' xesaj ta je ma' Lu' pan che', xa reh chi re' take ra' ri'sil cho ma' Israhel ensukbic nak quic'ux ruc'. Re' la' chic xiban, xicana' pan k'ab i Porsyo Pelesto re' xijelow-bej chi k'atal k'oric.

Re' ma' Lu' nk'oric chi rico'ljic rij chiwach ma' Pelesto

25 ¹Naxponic ma' Pelesto chipam i yuk'ul naroquic wi' chi k'atoj k'oric, pet xoj chipam i tinamit Sesareya re' naric'acharic wi' eh xib chic k'ij riponic ar, xoj ar Jerusalem. ²Ar ajic Jerusalem re' take c'amol quibeh take aj k'ahsem si chiwach i Dios ch'il nic' pa' nimal take c'amol quibeh ra' ri'sil cho ma' Israhel xi'oj c'olok chiwach eh naxquitz'ak cok rimahc ma' Lu' chiwach i ma' Pelesto, je' wili xquipahkaj reh:

«Ajabes ma' Pelesto, chacuy, ³koj-aban ato'bil. Chatak'a' je ric'amaric keh ma' Lu' reh chi enach'uk k'oric china' ayu' Jerusalem, nqui take reh.

Je' re' xquik'or reh maj tik'imaj nak chic wach cu'um chi naquicansam nak i ma' Lu' nah beh nac'amarok cho, ⁴xa re' la' ma' Pelesto je' wili xik'or queh:

«Re' ma' Lu' ma' eta riban chi enchalic ayu' maj re' hin ojic wo' chic win chipam quib xib ok k'ij ar Sesareya. Ru'um aj chi re' ma' Lu' cu ar tz'aplic ponok pan che' ⁵sakbih chi re' hat-tak etoj tak chiwij naquinelok je chipam i tinamit wili eh ar ojok ak'or tak rimahc i winak re're' wila' chawach hat-tak wilic jeno' rimahc, nqui queh.

⁶Chirij re' nok ribanam chic wahxakib k'ij on lajeb k'ij ar Jerusalem, re' ma' Pelesto soljic wo' chic cho ar Sesareya chi tahkamaj je cu'um take raj tz'akol wach rimahc ma' Lu'. Nok jenaj chic k'ij riponic ar, re're' xitz'uka' rij pa rich'ukbal k'oric eh xitak'a' je ric'amaric i ma' Lu' chiwach. ⁷Naxpahbajic i ma' Lu' chiwach, re' take rich ra' ri'sil cho ma' Israhel xichalic ar Jerusalem p'uht quisutem rij eh p'uht quitz'akam nimak tak wach mahc chirij, xa re' la' re' mahc nquitz'ak cok chirij, ma' hab ta wo' wach xiyew richi' chi til coric. ⁸Chi je' re', re' ma' Lu' je' wili rico'ljic rij xiban:

«Re' hin ma' janc'al ta niyak'abem pan wok i c'uhbal hoj tijimaj wi' i hoj ra' ri'sil cho ma' Israhel, ma' wo' re' rilok'il i Lok' laj Pat re' nlok'onjic wi' wach i Dios. Ma' niyak'abem ta wo' pan wok take ric'uhbal i k'atal k'oric aj Roma, nqui xik'or.

⁹Chirij chic ru' tob ta ma' xirak ta jeno' mahc chirij ma' Lu', re' ma' Pelesto ru'um chi xaj cahnic pan sukquil c'uxlis cuc' take ra' ri'sil cho ma' Israhel, je' pe' nchel wili xik'or reh:

«Ma' Lu', re' hin naniyeb k'ab chi re' take quinahsil aj Jerusalem naquisakomem wach chi niwach haj wilic amahc nquitz'ak wach chawij. Chaj aj bih nak'or chirij nicapew-bal chi etinic'am je ar Jerusalem? nqui reh.

¹⁰Re' ma' Lu' je' wili xik'or reh:

«Re' ye'ab wili canamaj cahnok ru'um k'atal k'oric aj Roma chi ch'ukbal k'oric. Ru'um aj re' curman chi ayu' chach'uk k'oric chi nina. Re' hin ma'xta jeno' nimahc chi quiwach take wich ra' ri'sil cho ma' Israhel eh re' hat

aweht'alim wo' chi je' re'. ¹¹Ru'um aj re', re' hin nipahkaj aweh chi ma' quinak'ahsaj pan quik'ab take nahsil re're' maj re' hin ma'xta jeno' mahc nibanam queh je' ricab nquik'or chawach chi xniban. Haj cok wilic ma' xta bih enik'or chirij chi enbanaric wuc', re' chi re' k'atal k'oric aj Roma eritak'a' nicansjic wi la' erirak chi wilic jeno' mahc chiwij je' ruc' quimic rij. Je' re' k'uru' nipahkaj aweh chi quinac'am je chiwach i k'atal k'oric aj Roma, nqui ma' Lu'.

¹²Je' aj re' ru', re' ma' Pelesto nok ribanam chic ric'utaj cuc' take raj cojol no'jbal chirij chaj bih pahkanic xiban ma' Lu', je' wili xik'or reh:

«Chiwach k'atal k'oric aj Roma xapahkaj ojic, ar aj wo' nawojic pa'lajok, nqui reh.

Re' ma' Lu' naxpahbabjic chiwach i ma' Acripa

¹³Nok wilic chic so' k'ij ribanam cho pahkanic re're' i ma' Lu', re' Acripa, re' pahbamaj wo' chi raj to'bonel i k'atal k'oric aj Roma, xoj c'olok ar pan tinamit Sesareya ch'il i ranab re' Werenise ribihnal chi rik'o'rjic i ma' Pelesto. ¹⁴Nok q'uih chic k'ij ricahnic ar i ma' Acripa, re' ma' Pelesto xik'or reh nic' wach riwi' nok cahnanak cho ma' Lu' pan che'. Je' aj wili p'uh't rik'orom reh chirij:

«Jenaj winak Lu' ribihnal xcanabjic cahnok pan che' ru'um ma' Pelix naxelic chi k'atal k'oric. ¹⁵Re' winak re're' cow npahkaljic cu'um take ra' ri'sil cho ma' Israhel chi narich'ukuric rij riquimic. Chi je' aj re' junpech naxinponic ar Jerusalem, re' take c'amol quibeh take aj k'ahsem si ch'il take quinahsil ra' ri'sil cho ma' Israhel xquimol quib wuc' chi ripahkaljic win chi nanich'ukum rij riquimic. ¹⁶Naxquipahkaj win chi je' re', re' hin xnik'or queh take c'amol beh re're' chi xichalic chiwij ayu' Sesareya maj ru'um reh tak'anic nchopbic kana i hoj aj Roma, re' hoj ma' nkayew ta k'ab chi enk'ahsjic pan quimic jeno' c'acharel wi ma' ribanam c'ulwach ch'il take aj tz'akol wach rimahc, on wi ja' riye'w rik'orbal chi ricol'jic rib chiwach i mahc nquitz'ak chirij.

¹⁷«Je' aj re' ru' nok re' take nahsil re're' xichalic chiwij cu ayu' Sesareya, re' hin ma' xnicham ta wib chi ch'ukuj wach k'oric je' la' i kal xnitak'la' ti wib pa nich'ukbal k'oric eh xnitak'la' je ric'amaric i winak re're' ¹⁸reh chi naripahbabjic chi quiwach take aj tz'akol wach rimahc. Nok wilic chic i ma' Lu' chi quiwach take nahsil re're', ma' xquik'or ta wo' jeno' mahc chirij je' ruc' quimic ta nak rij chi win. ¹⁹Re' take nahsil re're', xa chirij la' i niminic chirij jenaj winak camnak chic Jesus ribihnal c'ahchi' quitz'akam wach rimahc maj re' ma' Lu' re're' til ch'iclic ric'ux eh cow rik'or chi re' Jesus til c'achlic wo' chic. ²⁰Je' aj re' ru'um chi ma' nirak ta chic chirij chaj bih nanibanam chi risakomsjic wach rimahc, re' hin xnibiraj reh ma' Lu' wi taret chi reh chi enic'am je ar Jerusalem reh chi ar entik'iric ju' rich'ukuric wach rimahc. ²¹Raj nchel ma' Lu' xipahkaj win chi naricahnic ayu' pan che' eh je' wo' xipahkaj win chi narich'ukuric wach rimahc ar ponok chiwach kajabes k'atal k'oric aj Roma. Ru'um aj re', re' hin xnik'or queh take nisol chi naquitikim ju' richal'jaljic pan che' cu rehtal nitak'la' je ruc' ajabes re're', nqui ma' Pelesto.

²²Naxibiraj chi je' re' i ma' Acripa je' wili xik'or reh ma' Pelesto:

«Re' hin k'e' nak nwaj nibiram rik'orbal i winak re're', nqui reh.

Re' ma' Pelesto je' wili c'u'lunic xiban reh ma' Acripa:

«Ikal nipahba' chawach i winak re're'. Ar nabiram rik'orbal, nqui reh.

²³Je' chic ikal, re' ma' Acripa ch'il Werenise xi'oquic cok chipam ye'ab rik'atbal k'oric ma' Pelesto chi behsemaj cu'um take q'uihal nahsil c'amol quibeh take sol je' wo' cu'um take quinahsil i tinamit. Chi je' re' ajic re' ma' Pelesto xitak'a' je ric'amaric i ma' Lu' ²⁴eh nok xc'amaric chic cho chiwach, je' wili xik'or reh ma' Acripa:

«Ajabes raj to'ol k'atal k'oric aj Roma ch'il hat-tak nahsil wilcat tak ayu' chi kaxilac, chawach hat-tak c'ahchi' nipahbab i winak wili re' ma' xa re' ta ar Jerusalem je' la' wo' ayu' Sesareya xa c'ahchi' chic quipahkam win take juntuhm chi ra' ri'sil cho ma' Israhel chi nanich'ukum rij riquimic. ²⁵Re' winak wili xnich'uk chic wach ribanoj xa re' la' hin xnirak chirij chi ma'xta jeno' mahc ribanam je' ta nak ruc' quimic rij. Ru'um aj re' xnitik'a' chic wach chi nanitak'ab je ruc' i kajabes k'atal k'oric aj Roma, je' ricab xipahkaj win i winak wili, ²⁶xa re' la' ru' ru'um chi ma' nirak ta jeno' rimahc re' nanitz'ihmbam je reh kajabes k'atal k'oric aj Roma, yu'na c'ahchi' nipahbab chawach hat ajabes ma' Acripa, je' wo' chawach hat-tak wilcat tak ayu' chi je' ta nak nchel enarak tak jeno' rimahc nacha'n tak i pahkanic reh eh chi je' re', re' nak i mahc re're' enitz'ihmbaj je reh wajabes aj Roma. ²⁷Wi ma' xarak ta tak jeno' rimahc ma' eta wo' nak niban chi enoj ar Roma maj chi win hin ma' riwi' ta chi jeno' tz'ahpel entak'abjic je ruc' kajabes aj Roma chi ma' sakomomaj ta je wach reh chaj bih i mahc narich'ukum wach, nqui xik'or ma' Pelesto.

Re' ma' Lu' nk'oric chi rico'ljic rijb chiwach i ma' Acripa

26 ¹Chi je' aj re' k'uru', re' ma' Acripa je' wili xik'or reh ma' Lu':
«Yu'na echic riban chi etik'oric chawij chi co'lbal awib, nqui reh.
Naxibiraj chi je' re' i ma' Lu', xiban je k'ab chi ric'alenjic i ma' ajabes re're' eh je' wili puht rik'orom chi rico'ljic rijb:

²«Ajabes k'atal k'oric ma' Acripa, k'e' lok' chi win chi chawach i hat nanik'oric yu'na chi rico'ljic wib chirij chi'nchel i mahc nquitz'ak wach chiwij take wich ra' ri'sil cho ma' Israhel. ³Je' re' nik'or maj re' cok hat ma' xa ta re' narak chirij chi coric nic' wach riwi' kac'acharic hoj ra' ri'sil cho ma' Israhel, je' la' wo' aweht'alim take rehreh wach tijbal nkachop wi' kib. Ru'um aj re' nipahkaj aweh chi chacuy ti so' ac'axquilal chi ribirmijic i nanik'orom wili:

⁴«Re' riwi' nic'acharic cu pa niq'uihbal cho til queht'alim take wich ra' ri'sil cho ma' Israhel re' queht'alanic wo' reh chi ar Jerusalem xnicohlaj wach niq'uijolal nip'utum cho chipam i tinamit hin q'uihinak cho wi'. ⁵Wi ta nak enpahkaljic queh wi ricorquilal i c'ahchi' nik'orom wili, re' take re' k'ij wo' nak enquiyew quik'orbal chi coric c'ahchi' nik'orom eh je' re' nik'or maj queht'alim wo' chic chi coric chi cu pa niq'uihbal cho xp'uturic cho nitijiljic chi ric'amaric na i C'uhbal Ye'oj reh Moyses eh chi ru'um chi xniyew wib chi ric'amaric na

chi manlic i c'uħbal re're' xniban wo' je' ricab nca'n take cow laj aj niminal reh C'uħbal Ye'oj reh Moyses chi til cow nquik'or chi re' take qui'oquic chi rinimjic kaDios hoj ra' ri'sil cho ma' Israhel curman chi naquic'amam na i c'uħbal re're'.

6«Je' aj re' riwi' ru' nic'acharic ajabes ma' Acripa, raj yu'na re' take wich ra' ri'sil cho ma' Israhel re're' xquipahkaj reh ajabes ma' Pelesto chi narich'ukum k'oric chi nina xa ru'um chi re' hin til ch'iclic nic'ux chirij i Dios c'ahchi' wuy'em chi narimansam wach i rucsjic take cho camnak xik'or cho queh kamam kati't chi naribanam. 7Chi re' aj i Dios xk'oric cho chi re' take camnak nacucsjic wo' chic cho, re' take kamam kati't xquich'ica' wo' cho quic'ux chi narimanlajic wach i k'oric re're' eh ru'um aj re' xa elic wo' c'ahchi' quilok'em wach i kaDios. Je' re' k'uru' ajabes ma' Acripa, re' take wich ra' ri'sil cho ma' Israhel xa ru'um pe' chi re' hin ch'iclic wo' nic'ux chirij take k'oric re're' c'ahchi' quitz'akam wach nimahc! nqui ma' Lu'.

8Chirij chic ru' re' ma' Lu' je' wili xik'or queh rich ra' ri'sil cho ma' Israhel: «Re' chic hat-tak wich ra' ri'sil cho ma' Israhel wilcat tak ayu', chaj bih riwi' chaweh tak k'uru' chi ma' nacoj ta tak wach chi re' Dios narucsam take cho camnak? nqui queh.

9Chirij chic rik'ormojic lok re're', re' ma' Lu' je' wili xik'or reh Acripa: «Yu'na nanik'oric so' awuc' tak chirij chic chaj bih take nibanam cho: Pan nic'ux i hin, riwi' la' nchel take xniban cho najtir chi ribanaric take nic' nimal ti'c'axic xniban cho queh take quinimanic reh Jesus re' ribihnej chi aj Nasaret. 10Je' ricab ar Jerusalem je' wo' re' xniban. Nok ye'oj chic wajawric cu'um take c'amol quibeh take aj k'ahsem si ar reh chi nanichopom take nic' nimal quinimanic reh Jesus, re' hin xniban chi xicojoric take pan che' ar. Ma' xa re' ta la' wo' re' xniban, xniban la' wo' jenaj wach nic'ux cuc' take xich'ukbic rij quiquimic take aj niminal. 11Je' wo', q'uih pech xniban chi xbanjic ti'c'axic queh aj niminal quirakmajic take pan tak pat ntijiljic wi' rij i C'uħbal Ye'oj reh Moyses eh je' re' xniban maj re' nak nwaj chiquij chi xquicana' ta nak rinimjic i Jesus.

«Chi je' re' ajic nok xnip'ut chic ojic pan tak tocom chic tinamit chi quichoporice take aj niminal ru'um reh rimal nic'a xjohtic cho chiquij, 12junpech nok re' take c'amol quibeh take aj k'ahsem si chiwach i Dios xinquitaq'a' je ar Tamasco ch'il jenaj nihuj ye'oj wi' wajawric chi quichoporice take aj niminal reh Jesus, xinoj chipam i tinamit re're' 13xa re' la' ru' wach beh, je' pe' nchel wili xc'uluric je' na cablaj ora reh k'ij, ajabes ma' Acripa: Re' hin xwilow jenaj sakom yohbal wach sakomil cu pan taxaj xelic cho. Chirij ru', nok re' hin ch'il take wich'il chi sutumaj chic kij ru'um i sakom re' xiq'uiic wo' chic na risakomal chiwach risakomil i k'ij, 14xojk'ehbic wach ac'al eh ar xnibiraj chi jenaj xk'oric cho chi je' wili pan k'oric hewreyo re' kak'orbal hoj ra' ri'sil cho ma' Israhel:

«Chabiraj i nanik'orom aweh wili hat Sawlo: Chacana' ribanaric i ti'c'axic na'n win ruc' ribanaric ti'c'axic queh waj tahkanel maj xa awib c'ahchi' ayebe chi ti' ruc' i c'ahchi' abanam re're', xa je' na nchel nac'ul aweh je' ricab ric'ul jeno' boyex chi xa rib riyew chi ti' nariyak' je i k'as ju' ch'ihch' tok'bal reh, nqui xnibiraj.

15 «Chalic i hin je' wili xnik'or reh:

«Ajabes, hab wach i hat k'uru'? quinqu reh.

«Re' nk'oric cho re're' je' wo' chic wili xik'or cho win:

«Re' hin, hin i Jesus re' c'ahchi'quin ayeb chi ti' ruc' i ti'c'axic na'n queh take waj tahkanel. 16Tipa' johtok k'uru' chabiraj chaj bih i camanic nabanam chi niwach: Re' riwi' chi yu'na xnic'uhaj wib aweh ru'um chi c'ahchi'cat nipahbab chi waj tz'e' wach aj ye'ol ak'orbal chirij i c'ahchi' awilom chiwach junc'am wili ruc' rilmijic niwach eh je' wo' chirij take ric'uhajic wib aweh nanibanam johtok chi kawach.

17 «Chi je' aj re' i camanic nabanam k'uru', re' hin nacat nico'lem chi quiwach take c'acharel nacat nitak'ab je wi'. Je' re' nanibanam nok wilcat chic cuc' take awich ra' ri'sil cho ma' Israhel on cuc' take ma' re' ta ra' ri'sil cho ma' Israhel 18maj cuc' take chi'nchel re're' nacat nitak'ab je chi riteheric pam quicapew-bal, je' ricab chi c'ahchi' ta nak ritehic i nak' quiwach chi iloj, je' wo' chi equi'elic ri'sil rok k'ab aj Yahm je' ricab chi c'ahchi' ta nak quelic cho pan jeno' k'ekom eh chi je' re' chi ri'sil chic i rok k'ab i Dios equiwih'ic je' ricab chi pan sakom ta nak chic c'ahchi' quik'ahxic je.

«Je' wo' chic, re' riwi' chi nacat nitak'ab je cuc' take c'acharel re're' chi re' nic' pa' nimal take naquichopom quic'ux chiwij naricuyaric quimach eh nariye'eric wo' queh nicuse'sbal c'oloj lok wu'um chi xa queh take quik'ahsam quib chi nilok'onjic, nqui win.

19 «Je' aj re' ru' ajabes ma' Acripa, ruc' i k'oric xiban win i winak xic'uhaj rib win naxkajic cho pan taxaj, re' hin ma' xnik'ihaj ta wib chiwach 20re' la' i k'oric xik'or win re're' puht nik'orom queh take wich ra' ri'sil cho ma' Israhel wilqueb ar Tamasco je' wo' queh take wilqueb Jerusalem ch'il wo' take wilqueb pan tak tocom chic tinamit pa riyuk'ul Jureya. Chi je' aj re', re' hin xnik'or wo' queh chi naquicanab ribanaric i mahc eh chi naquic'acharic chi jaloj chic wach quino'jbal c'uhthal reh chi xquinimej chic i Dios. 21Ru'um aj take k'oric niban re're', re' take wich ra' ri'sil cho ma' Israhel wili xinquichop nok wilquin ar chipam i Lok' laj Pat re' nlok'onjic wi' wach i Dios eh xcaj nak quinquicansam 22xa re' la' re' Dios xirico'lej pan quik'ab. Ru'um aj re' xa cu c'ahchi' wo' nitikim ju' rik'ormojic queh take nimak quiwach chi cuc'tak quiwach je' ricab riwi' rik'ormojic xiban aweh tak yu'na chi re' Jesus xic'uhaj rib win.

«Til nik'or aweh, ajabes ma' Acripa chi re' rik'ormojic niban re're' ar wilic wo' ribiral chipam take huj tz'ihmbimaj ru'um i Moyses eh je' wo' cu'um take aj najtir raj k'orol c'uhbal i Dios. Re' take re' naxquik'or chaj bih naric'uluric ruc' i Pahbamaj chi K'atal K'oric xquik'or wo' 23chi tanlic chi reh chi xquimic eh chi re're', i pet uctel chi quixilac take camnak reh chi enk'ormojic queh take wich ra' ri'sil cho ma' Israhel ch'il take ma' re' ta ra' ri'sil cho ma' Israhel i c'uhbal nbanic chi nsakomjic pam quicapew-bal je' ricab riban jenaj sakombal chi quisakomjic take c'acharel, nqui ma' Lu'.

24Nok rico'lem chic cok rib ma' Lu' chi je' re', re' ma' Pelesto xiqu'er cho chi' chi je' wili:

«Hat saban hat ma' Lu'! Re' yohbal wach tijinic abanam cho c'ahchi' rijot'bic pām ana! nqui reh.

²⁵Ar aj ru' re' ma' Lu' je' wili xic'u'lej wī':

«Ajabes ma' Pelesto, re' hin coric laj k'oric c'ahchi' nik'orom aweh. Ma' re' ta nchel hin saban ²⁶maj re' k'oric nik'or chawach tak til eht'alamaj ru'um ajabes ma' Acripa. Je' re' ajic re' c'ahchi' nik'orom chiwach ajabes ma' Acripa til ch'iclic nic'ux chi reht'alim chi'nchel re're' ru'um nok ma' re' ta pan c'olic xbanaric cho take re're', nqui ma' Lu' reh ma' Pelesto.

²⁷Chirij chic ru' re' ma' Lu' je' wili xik'or reh ma' Acripa:

«Ajabes k'atal k'oric ma' Acripa, re' hat nacoj wach quic'uhbal take raj k'orol C'uhbal i Dios, ma' je'? Nibiraj chi je' re' maj weht'alim chi til nacoj wach, nqui reh.

²⁸Re' ma' Acripa je' wili xik'or reh:

«Ma' Lu', maçapaj i hat chi ma' c'axic ta ti chi ench'uk nic'ux chi equinoquic chi aj niminal reh Jesus, nqui xik'or reh chi balak'il.

²⁹Chalic ma' Lu' je' wo' chic wili xik'or reh:

«Tob ta la' c'axic on ma' c'axic chi etoquic chi niminic, je' ta la' nak re' hat ch'il take nic' nimal c'ahchi' quibirinic win eta nak je na'n tak je' nicab i hin yu'na chi hin chic aj niminal reh Jesus, re' cok ru' ma' nwaj ta chi nac'ulum tak je' ricab nic'ul i hin chi wilquin pan che', nqui ma' Lu' reh ma' Acripa.

³⁰Nok rik'orom chic i ma' Lu' re're', re' k'atal k'oric ma' Acripa ch'il ma' Pelesto ch'il wo' Werenise xi'uctic lok pan quitz'ukab ch'il take xitz'u'hkic cok cuc' ³¹eh nok xa cutquel chic lok, je' wili p'uht quik'orom chi quibil quib:

«Re' winak re're' ma'xta nech' ok rimahc chi eta nak ncahnic pan che' chi junpech, ma' wo' chi eta nak ncansjic, nqui p'uht quik'orom.

³²Ar aj ru' re' ma' Acripa je' wili xik'or reh ma' Pelesto:

«Re' winak re're' til nak eriban chi enawesaj je ma' ta nak xipahkaj chi narojic chiwach kajabes k'atal k'oric aj Roma, nqui xik'or reh.

Re' ma' Lu' xtak'abjic je pan tinamit Roma ru'um ma' Pelesto

27 ¹Nok wilic chic k'ij rik'oric cho ma' Lu' chi rico'ljic rib, xtik'injic wach chi re' ma' Lu' re' nanwihch'ilem je hin Cax, naritak'abjic je ar Roma re' wilic pa riyuk'ul Itālya. Chi je' re' xk'ahsjic pan k'ab jenaj winak Julyo ribihnal, re' c'amol quibeh juntuhm chi sol Awusto ribihnal chi naricha'jaljic cu rehtal rojic ar Roma.

Naxponic i k'ij chi nakojic ar Roma, ²chi kich'il je Aristarco aj Tesalonica re' wilic pa riyuk'ul Maseronya, xoj-oquic je chipam jenaj ma' laj canowa re' xchalic pan tinamit Atramito ribihnal eh iq'uc nak ponok reh pan tak tinamit wilqueb chi ch'il ha' pa riyuk'ul i Asya eh chipam i canowa re're' xoj-elic je chipam i tinamit re're', re' Sesareya ribihnal. ³Cu je' chic ikal xojponic chipam jenaj tinamit Siron ribihnal. Ar chipam i tinamit re're' k'e' wo' chic richak'lamil xic'uhhaj i ma' Julyo reh i ma' Lu' maj xiyew k'ab queh take rich aj niminal wilqueb chipam tinamit re're' chi xc'amaric je pa' bih reh cu'um take xi'oj k'o'ronok reh.

⁴Naxoj-elic je chipam tinamit re're', re' ma' laj canowa re' xoj-oj wī' ma' xiban ta chic canar ritikiric ju' rojic ru'um ransil take tew quic'ulic lok chi kawach. Ru'um aj re' ar chic chirij riyuk'ul i Chipire re' wilic pan yejal ha', xicot je ribeh chi co'lb'al keh. ⁵Chi je' re' ajic xojric'saj ponok chiwach riyuk'ul i Silisya ch'il i Panpilya cu rehtal xojponic pan jenaj tinamit wilic pa riyuk'ul i Lisyā, Mira ribihnal. ⁶Ar ajic re' c'amol quibeh take sol naxina'bej chi jenaj ma' laj canowa nchalic ar Alejantriya ojic wo' reh pa riyuk'ul Italya, xojrik'ahsaj je chipam ⁷eh chi je' re' xkatik ju' kojic nah ha' chiwach q'u'ih k'ij, xa re' la' ru' k'un ti nka'n je ru'um ransil take tew quisolc'onic cho keh chikij. Chi je' aj re', re' hoj xoj-iq'uiic je chiwach i tinamit Cunilo ribihnal chi xa c'axic chic nka'n eh chi co'lb'al kib chiwach ransil i tew xkacorā' je chiwach i tinamit Salmon ribihnal re' wilic chipam i yuk'ul wilic pan yejal ha' Creta ribihnal. ⁸Xa c'axic aj chic nka'n naxkacot rij kabeh chirij i tinamit re're' eh chi je' re' xojponic chipam i ye'ab "Holohic laj Ye'ab Kahsbal Quihk Canowa" ribihnal re' wilic ma' naht ta je ruc' tinamit Laseya ribihnal. ⁹Naxojponic chipam ye'ab re're', re' hoj xa re' wo' kelic cho cu ar Sesareya q'u'ih chic k'ij ka'nam lok chi ojic nah ha' eh chi je' re', re' ma' Lu' xicoj rehtal chi k'e' rinimal ti'c'axic enkac'ul je wi re' hoj cu wilcoj nah ha' na'ic'ok lok i nink'ij nquicuy wī' quiwa' take rich rā' ri'sil cho ma' Israhel chi ripahkaljic cuybal quimahc. Ru'um aj re' je' wili xik'or reh aj behsenel reh ma' laj canowa re're' ch'il i winak re' nahsil c'amol beh chipam i canowa re're':

¹⁰«Hat-tak wasbes, yu'na nik'or aweh tak chi ma' nkatik pe chic ju' kojic nah ha' maj ruc' riyohbalil wach i tew c'ahchi' ribanam ch'il wo' i rinimal jab narip'utum cok rik'ijil, nirak chirij chi wi xkatik ju' kojic k'e' ti'quiall enkilow wach. Je' aj re' ru' yohbal chi reh ma' laj canowa ch'il i rihk chi ensahchic wach eh yohbal wo' chi keh hoj chi ekojquimic pan ha', nqui ma' Lu' queh.

¹¹Re' k'oric re're', tob ta nchel xibiraj wo' nak i c'amol quibeh take sol, ma' xinimej ta maj re're' xa re' chic quik'orbal take aj behsenel reh canowa riyew rajawric, ma' re' ta la' chic i xik'or ma' Lu'.

Re' rinimal ti'c'axic xc'uluric je nah ha'

¹²Je' re' ajic chiwach take k'ij xojwih'ic wī' chipam ye'ab re' kahsbal quihk take canowa, re' take aj behsenel reh canowa xquitik'a' wach chi nakelic je chipam i ye'ab wilcoj wī' re're' ru'um chi queh ru' re' ye'ab re' ma' holohic ta laj ye'ab co'lb'al kib chiwach i tew. Chi je' aj re' xca'n, xkatik ju' kojic nah ha' chi pan quic'ux take kich'il xa ela' wo' nchel kojponic pan jenaj chic ye'ab kahsbal quihk i canowa, Penise ribihnal re' wilic wo' pa riyuk'ul i Creta. Ar aj nak ru' c'ahchi' quicapam take kich'il chi nako'jic kaco'lem kib chiwach take tew quichalic chi kawach maj xa pan tak richel i Penise qui'iq'uiic je take tew qui'elic cho pa nise'aj nkajic wī' k'ij ch'il i qui'elic cho pa ritz'et nkajic wī' k'ij. ¹³Je' re' k'uru' nok re' take kich'il xquicapaj chi xca'n nak chic canar ojic chi coric je' ricab ncāj ru' ru'um xquilow chi xip'ut cho jenaj tew xa suk ti wach re' xchalic pa rise'aj nkajic wī' i k'ij, xkatik ju' kojic nah ha' ma' naht ta chi chi' riyuk'ul i Creta ¹⁴xa re' la' ru', nok

junc'am chic kabehic je chi suk, xchalic pe' jenaj ma' laj tew Ewrocliron ribihnal re' yohbal wach naxucsa_j take ribohl ha' cu rehtal xa rik'ojlom chic rīb chiwach ma' laj canowa wilco_j wi'. ¹⁵Ru'um aj ransil i tew re're', re' ma' laj canowa wilco_j wi' xc'amaric cok cu pa richamil ha'. Je' aj re' k'uru' nok ma' xkacuy ta chic ransil i tew, ma' xkaniq'uej ta chic kak'ij chi xojso_jljic wo' chic lok chi chi' ha', xkacana' la' kīb chi re' tew xojric'am je ¹⁶cu rehtal xojponic chiwach jenaj chic t'uch ye'ab wilic pan yejal ha' Calawra ribihnal re' xkaco'lej wi' kīb chiwach take tew. Ar aj chic ponok, re' take quicamanic chipam ma' laj canowa re're' xa c'axic chic naxquikerej je t'uch canowa kirimaj ru'um ma' laj canowa ¹⁷chi rijohsjic johtok chipam ma' laj canowa re're' eh xa c'axic wo' chic naxquitumej pam chi lasa i ma' laj canowa re're'. Chirij i wili ru'um reh quiyo'jic chi enkacora' chipam i ye'ab ma'xta wi' richamil i ha' Sirte ribihnal, re' tz'ih rik'oj wi' rīb i tew xquikahsaj cho reh chi re' ma' laj kacanowa naric'amaric je ru'um take ribohl i ha' ¹⁸re' xa cuc' tak nak chic ma' nquisolq'uij i canowa nanponic quik'oj quīb chiwach ruc' ansil.

Chirij re're' nok ka'nam chic lok jenaj k'ij chi je' re' ojic nka'n, re' take quicamanic chipam ma' laj canowa p'uht quicutum take jok ju'jun ihk pan ha' maj pan yohbal nak chic wilco_j chi ekojbut'lujic jok pan ha' ru'um rahllil rihk i ma' laj canowa re're'. ¹⁹Pa rox chic k'ij, re' aj chic take camanbal ma' ajwal ta quiwach chipam ma' laj canowa p'uht kacutum jok pan ha'. ²⁰Ar ajic ru', chipam i yohbal wilco_j wi' re're' ru'um take ribohl i ha', re' hoj re' wilco_j pan ma' laj canowa ma' keht'alim ta chic haj c'ahchi' kojic lok ru'um chi ma' xkilow ta wach i k'ij, ma' wo' re' take ch'imil chiwach q'uih k'ij. Chi je' aj re' i c'axquilal wilco_j wi', xkacapaj chi ma'xta nak chic bih narico'lonic keh chiwach i quimic. ²¹Ar ajic nok wilco_j chipam i yohbal re're', re' ma' Lu' xipahba' johtok rīb chi kaxilac i hoj re' ma' hoj ta chic wa'anak eh je' wili xik'or keh:

«Hat-tak wasbes nichak', xanimej ta nak tak nik'orbal chi ma' xkacana' ta nak cho i pet ye'ab xkarak chi chi' riyuk'ul i Creta, suk nak wilco_j cho ar yu'na chi ma' c'ahchi' ta nak kac'ulum i ti' wili eh ma' c'ahchi' ta wo' nak rojic chi k'eb take rihk ma' laj canowa wili. ²²Raj yu'na tob ta nchel awu'um aweh tak c'ahchi' kac'ulum wili, chacowej ac'ux tak ru'um nok tob ta sahchok wach i ma' laj canowa wili ma' hab ta wach keh nariquimic. ²³Je' re' nik'or maj chiwach ak'ab wili re' Dios re' nilok'ej wach, jenaj raj tz'e' wach xic'uhtaj rīb win i hin re' raj k'orol riC'uhbal i Dios re're' ²⁴eh je' wili xik'or win:

«Ma' Lu', re' hat curman chi nawojic palajok chiwach k'atal k'oric aj Roma. Ru'um aj re' ma' tiyo'jic chiwach i ti'c'axic wili maj ma' eta tiquimic. Yu'na k'uru', chacoj rehtal i wili: Re' Dios xic'u'lej cho na apahkanic chi re' take qui'ihch'ilinic aweh chi ojic ar Roma naquico'lem wo' quīb awich'il chiwach i ti'c'axic c'ahchi' ac'ulum tak wili, nqui win.

²⁵«Je' re' k'uru' chacowej ac'ux hat-tak ru'um nok re' Dios re' nich'ica' wi' nic'ux chi naribanam je' ricab xk'ormojic win, re're' nacoj rico'lem chiwach ti'c'axic wili. ²⁶Re' cok ru' curman chi nakarakam jeno' ye'ab wilic pan yejal ha' eh chi je' re' ekoj-elic lok cu chi chi' chi muhx reh chi enkaco'lej kīb, nqui ma' Lu'.

²⁷Ruc' take k'oric xik'or ma' Lu', chi'nchel i hoj xcowjic wo' chic kac'ux.

Chirij chic re' naxponic i tic'lic ak'ab reh ricajlaj k'ij kelic cho cu pa riyuk'tul Creta, re' take quicamanic chipam i ma' laj canowa re' c'ahchi' rik'ahxic je chipam i ha' Atriyatico ribihnal xquicapaj chi je' wilcoj chic lok ma' naht ta chi chi' jeno' ye'ab. ²⁸Chi je' re' ru', p'uht quipajam nic' chamil pam i ha' ilbal reh nic' chic nahtil wilic lok chi' ac'al. Nok quilom chic chi cu juninak ja chic richamil pam i ha' wilcoj wi', cu xojbehic wo' chic je so' naxkapaj wo' chi richamil pam i ha' re're'. Ar aj ru' naxquilow chi xa chic ho'lajuj ja richamil pam, ²⁹re' take quicamanic chipam ma' laj canowa k'e' naxoquic cho quiyoj'ic chi enoj katuhyaj kib chiwach jeno' ma' laj abaj maj re' take ribohl ha' xa ma' ximay ta wo' kac'amaric lok chi chi' ha', tob ta xicuturic nak chic jok pan ha' take quejeb chi nimak tak ahl laj ch'ihch' wilqueb chirij ma' laj canowa re' quicamanic chi pah'ab-bal reh canowa.

Ar ajic re' take quicamanic chipam ma' laj canowa xquicapaj chi ma'xta nak chic ripah'ic i ma' laj canowa. Je' re' ajic chi xa yo'jic chic wilqueb wi', xiban chi xa jik' chic pan quic'ux chi nsak'ic ta nak ti lok ilbal nak reh haj enquic'am lok i ma' laj canowa reh chi ma' eta rituhyaj rib chiwach take abaj. ³⁰Ru'um aj reh xquicapaj, re' take aj camanom re're' xquitik'a' wach chi xa pan c'olic nak naquelic je chipam jenaj t'uch canowa wilic chirij i ma' laj canowa. Chi je' aj re', re' riwi' nak i elic naca'nam je xa je' wo' nak ti chic re' take ahl laj ch'ihch' pixilqueb chirij ma' laj canowa nacojic quilom chi queh. Ar ajic nok je' chic re' tiklic wach cu'um take aj camanom re're' ³¹re' ma' Lu' je' wili xik'or reh c'amol quibeh take sol ch'il take risol:

«Wi re' take quicamanic chipam i canowa wili equi'elic je, til nakaquimic chi kunchelal i hoj re' ekojcahnic ayu', nqui xik'or queh.

³²Xa re' wo' xibiraj chi je' re' i c'amol quibeh take sol, xik'or queh risol chi xquiyoc' je c'aham bac'lic wi' t'uch canowa eh chi je' re' xc'amaric je ru'um ribohl ha'. ³³Chirij chic ru' na xilow i ma' Lu' chi xoquic wo' chic cho quiyoj'ic chi'nchel take c'acharel wilqueb pan canowa chi til narisahchic quiwach eh ru'um re're' ma' c'ahchi' ta chic ca'nam quiwa' quiha' chi suk, je' wili xik'or queh nok c'ahchi' chic roquic cho sak'ic:

«Re' hat-tak cajlaj chic cho k'ij ap'utum tak cuyuj wiric eh ma' abanam ta wo' awa' aha' tak chi suk. ³⁴Ru'um aj re' til nipahkaj aweh tak yu'na chi cha'n awa' aha' tak chi suk ru'um nok curman chi nariwih'ic awansil tak chi muhx chi elic lok cu chi chi' jeno' ye'ab. Nipahkaj wo' aweh tak chi ma' tiyo'jic tak maj ma' hab ta wach keh nariquimic chipam i c'axic wilcoj wi' wili, nqui queh.

³⁵Nok rik'orom chic re're', re' ma' Lu' xichop johtok riwa' riha' eh xitioxej johtok reh i Dios. Nok rich'akam chic yejal, p'uht ric'uxum chi quiwach chi'nchel take wilqueb ar. ³⁶Xichalic take re', xquicowsaj wo' chic quic'ux ru'um k'oric xik'or ma' Lu' eh xi'oquic chi wi'c chi cunchelal. Re' take winak re're' ³⁷nponic waklaj ricajlaj c'ahl (276) q'uihal take chi wilcoj wo' cok pa riman i hoj.

Re' ma' laj canowa x-xerebic ru'um i ribohl ha'

³⁸Nok chi kunchelal i hoj ka'nam chic kawa' kaha' chi suk, xoj-oquic chi ricuturic jok pan ha' take birin wilic wi' ixim reh chi narich'akic so' wach rahlil rihk i ma' laj canowa re're'. ³⁹Chirij ru' naxsak'ic lok, xkilow je wach jenaj ye'ab ma' keht'alim ta ribihnal xa re' la' ru' xkilow je chi chi' i ye'ab re're' wilic lok nech' rocbal cok i ha'. Naxkilow chi je' re', xkatik'a' wach chi nakesam lok ar i ma' laj canowa wi la' xka'n lok canar resmejic cu ar. ⁴⁰Je' re' ajic nok quiyoc'om chic jok ric'ahamil take i ahl laj ch'ihch' wilqueb jok pan ha', re' take quicamanic chipam ma' laj canowa xquichej i lasa pixlic wi' behsbal reh ma' laj canowa. Chirij chic ru' nok quijohsam chic i t'uch tz'ih ncojoric chiwach canowa re' rik'oj wi' rib i tew, xi'oquic je chi ribehsjic i ma' laj canowa cu chi chi' lok i ye'ab re're' ⁴¹xa re' la' ma' xojponic ta lok cu chi chi' maj re' ma' laj canowa naxponic rik'oj pan ju' chiwach i juntuhy chi abaj wilic pan ha', ma' cu ta chic xc'uyu'jic so' p'uht la' ritokic cho pa riyejal ru'um ransil take ribohl ha' nc'ulic quik'oj quib chiwach. ⁴²Nok je' re' xc'uluric, re' take sol xquitik'a' wach chi quiwach chi naquicansam nic' nimal take tz'ahpel reh chi ma' eta qui'elic je chi muhx ⁴³xa re' la' re' c'amol quibeh, ru'um chi raj rico'lem rij ric'acharic i ma' Lu', ma' xiyew ta k'ab queh chi naca'nam chi je' re'. Je' re' ajic re' c'amol quibeh take sol xitak'a' rik'ormojic chi nic' pa' nimal take tz'ahpel quichol muhx quicut je quib chi pet pan ha' reh chi naquelic lok chi chi' ye'ab re're' chi co'lbil quib. ⁴⁴Je' aj re' ru' ma' xa ta re' take nic' q'uihal quichol muhx xquico'lej rij quic'acharic naxi'elic lok chi chi' ye'ab re're', je' la' wo' take xi'elic lok xa nah tak ritz'ilomil ma' laj canowa, on china xa pa' chic jaric ncamanic chipam.

Nok re' ma' Lu' xti'iric ru'um jenaj ak' ar Malta

28 ¹Nok kaco'lem chic lok kib chipam ye'ab re're', cu re' aj chic ru' keht'alij chi re' ye'ab wilic pan yejal ha' re're' Malta po' ribihnal. Re' take patanel xkarak take ar re're' xik'oric keh chi je' re' bihnal. ²Re' take c'acharel re're' xojquic'ul wo' chi suk quic'ux je' wo' k'e' xojquic'ax maj xquic'ula' i k'ak' reh chi naka'nam kak'ixinic ru'um nok yohbal wach jab ch'il c'uxic c'ahchi' ribanam. ³Ar ajic nok re' ma' Lu' xoj rimol junk'ahl chi xiq'uey eh nok c'ahchi' riyeb cok pan k'ak', xelic cho jenaj ak' xilac tak si' ru'um ritz'a'quial i k'ak' eh chi je' re' xichohpaj cho rib chi k'ab ma' Lu'. ⁴Naxquilow take aj Malta chi re' ak' t'uyllic chic chi k'ab ma' Lu', je' wili p'uht quik'orom chi quiwach:

«Re' winak wili til je' ruc' aj cansanel ras richak', maj tob ta nak xico'lej cho rib chi ma'xta nquimic pan ha', re' pe' chic i ak' naricansanic reh yu'na. Je' re' k'uru' re' rimahc i winak wili ma' iq'u'el ta wach na, nqui take chi quiwach.

⁵Chi je' aj re' ru', re' take re' c'ahchi' cuy'em chi nariquimic nak i ma' Lu', chaj nawaj reh ru' ma' je' ta re' xc'uluric ruc', re' la' chic i xiban ru' xikerej lok i ak' chi k'ab eh xicut jok pan k'ak'! ⁶Naxquilow chi ma'xta bih xic'ul i ma' Lu' chiwach i junc'am re're', re' take aj Malta xa cu c'ahchi' wo' cuy'em nic' ora ensipjic cho rik'ab

ma' Lu', on nic' ora enoquic cho riquimic, xa re' la' naxquillow chi q'uih chic ora xiq'uic lok eh ma'xta bih c'ahchi' ric'ulum i ma' Lu' je' chic wili pu'ht quik'orom:
 «Re' c'acharel wili jenaj po' dios winak riwi', nqui pu'ht quik'orom.

Re' ma' Lu' xesaj lok riya'bilal rajaw i ma' Puwliyo

⁷Nok xib chic k'ij hoj wih'inak ar Malta, re' c'amol beh chipam i ye'ab re're', re' Puwliyo ribihnal re' q'uih take rac'al wilic ar, re're' xa suk chic xojric'ul chi xa xiyew chic kawarbal ch'il kawa' kaha' chiwach take k'ij re're'. ⁸Chiwach take k'ij nok wilcoj ar, tz'eht re' rajaw xriplijic wach yocab ru'um jenaj tz'a' xchalic chirij ch'il wo' jenaj quic' pamis xchalic chi pam. Naxibiraj i ma' Lu', xoj rik'o'rej eh nok wilic chic ponok ruc', xicoj rik'ab china eh xoc chi tij chirij. Chiwach i junc'am re're', re' rajaw ma' Puwliyo xiq'uic je riya'bilal. ⁹Naxelic lok i ribiral re're', q'uihal take yowa'ib chipam i ye'ab re're' xic'amaric cho ruc' ma' Lu' eh xicahnic chi suk naxesaj lok quiya'bilal. ¹⁰Ru'um xiban i ma' Lu', re' take aj Malta k'e' xojquic'ax chi xquisij pa' bih keh chiwach take k'ij xojwih'ic ar. Je' wo', xquiyew je pa' bih ajwal wach keh reh nah kabeh nah ha' naxojcojoric je chipam jenaj chic ma' laj canowa ¹¹cahnanak chipam i ye'ab re're' chi ric'sjic i k'e'lej naxc'ulic lok reh tinamit Alejantria ribihnal.

Re' ma' Lu' xcowsjic ric'ux ru'um xca'n juntuhm chi aj niminel aj Roma

Nok xib chic poh hoj wih'inak ar Malta, re' hoj xkatik ju' kojic nah ha' chipam ma' laj canowa re' xkachop chi chi' i ye'ab re're'. Re' canowa re're' wilic wo' chi rehtalil i quijalwachil quib chi tiyox Castor ch'il Polux quibihnal. ¹²Nok hoj chic oconak je chipam i canowa re're' xojponic chipam jenaj ye'ab quih'ilic wi' take canowa Siracusa ribihnal re' xojcahnic wo' wi' xib k'ij. ¹³Chirij chic ru', nok iq'uinak chic i xib k'ij re're', re' ma' laj canowa xbehsjic je ma' naht ta chi chi' lok ac'al eh chi je' re' xojponic chipam jenaj tocom chic ye'ab kahsbal quihk take canowa, Rejyo ribihnal. Ar chipam i ye'ab re're' xka'n jenaj ak'ab eh chirij chic ru' xoj-elic wo' chic je naxchalic jenaj tew xchalic pa risec'aj nkajic wi' k'ij. Chirij chic ru' nok ricab chic k'ij kelic cho ar Siracusa xojponic pan tinamit Potyoli ribihnal. ¹⁴Ar xojcahnic wukub k'ij ru'um nok re' take aj niminel xkarak take ar xiban xa nch'uk chic quic'ux chi ripahkaljic keh chi xojcahnic ar. Ka'nam chic wukub k'ij ar, chirij ru' xkachop aj je behic chi kok reh kojic pan tinamit Roma.

¹⁵«Chipam je kabehic re're', re' take aj niminel quic'acharic ar Roma xojc'ulic quic'ul pan beh eh ruc' re're' xcowsjic ric'ux i ma' Lu' ru'um i Dios. Ruc' xca'n take aj niminel re're', re' ma' Lu' xitioxej johtok i Dios. Je' re' riban maj chi quixilac take aj niminel re' xibirinic reh chi nakaponic i hoj, wilic take xojc'ulic quic'ul cu chipam take tinamit je' wili quibihnal: “Re' C'aybal wilic pa ribeh Apyo” ch'il i “Xib C'aybal”.

Re' ma' Lu' xitak'a' quic'amaric take quinahsil aj niminel wilqueb ar Rōma

¹⁶Nok ar chic wilcoj ponok pan tinamit Rōma, re' c'amol quibeh take sol xc'ambic cho queh take tz'ahpel xik'ahsaj take pan k'ab i nahsil aj cha'jem tz'ahpel wilic pan tinamit re're'. Chi k'ahsamaj chic ma' Lu' pan k'ab, re' nahsil re're' xiyew k'ab reh chi xwih'ic pan jenaj tocom pat, xa re' la' ru' cu xicoj jenaj sol aj cha'jem reh. ¹⁷Chi je' aj re', re' ma' Lu' nok xib chic k'ij riponic ar Rōma xitak'a' je quic'amaric take nahsil ra' ri'sil cho ma' Israhel eh je' wili xik'or queh:

«Was tak nichak', re' hin tob ta nak ma'xta bih jeno' mahc xniban chi quiwach take kich ra' ri'sil cho ma' Israhel on chiwach take c'uhbal hoj tijimaj wi' cu'um take cho kamam kati't, wilic take kich ra' ri'sil cho ma' Israhel xinquik'ahsaj ar Jerusalem pan quik'ab take sol aj Rōma re' xicojbc win pan che'. ¹⁸Re' cok ru' re' take nimak cajawric aj Rōma wilqueb ar Jerusalem nok ca'nam chic i pech'oj win chi coric, xcaj nak quincok'tam je ru'um chi ma' xquirak ta jeno' mahc chiwij je' ruc' quimic ta nak rij ¹⁹xa re' la' naxquik'ihtaj quib take kich ra' ri'sil cho ma' Israhel re're' chi ma'xta wok'tjic je, ma' xincok'taj ta chic je xink'ahsjic la' wo' nak chic pan quik'ab chi naquich'ukum i k'oric chi nina. Ru'um aj reh re' til tok'lic xnipahkaj rich'ukuric k'oric chi nina chiwach i k'atal k'oric ayu', ma' ru'um ta nchel chi nwaj ta nak nitz'akam jeno' mahc chiquij take kich katinamit re're'. ²⁰Je' re' nok re' hin xa je' na nchel hin jeno' tz'ahpel naxinc'amaric cho chiwach i k'atal k'oric ayu' xa ru'um ti ru' chi nicoj wach chi coric i ch'iclic wi' kac'ux i hoj ra' ri'sil cho ma' Israhel chi re' take camnak naquic'acharic wo' chic cho. Je' aj re' ru', chi ma' tehlic ta wij yu'na re' hin xnitak'a' je ayuk'unjic tak reh chi nanik'orom aweh tak i ch'iclic wi' kac'ux re're'. Xa re' cok ru' nanik'orom wo' aweh tak nic' wach rich'iquinjic quic'ux nca'n take quiniminic reh Jesus, nqui ma' Lu'.

²¹Naxquibiraj re're' take quimolom quib ruc' ma' Lu' je' wili xquik'or reh: «Re' hoj ma' kac'ulum ta jeno' huj nk'oric chawij je' ruc' quitak'ab ta nak cho keh kas kachak' wilqueb ar Jureya. Je' wo', xa ta nak c'ulunak jeno' queh chi rik'ormojic keh chi re' hat c'ahbilal ta nak c'ahchi'cat chi quixilac. ²²Chi je' aj re' ma' ru'um ta re're' xojc'ulic awuc' ru'um la' nkaj kabiram ruc' achij' re' nacapaj chirij i tocom chic niminic xak'or re're' maj re' take kich ra' ri'sil cho ma' Israhel wilqueb xa haj ye'ab xa re' wo' c'ahbil laj k'oric nkabiraj chi nca'n chiquij take wilqueb pan niminic re're', nqui take reh.

Re' ma' Lu' xik'or i c'uhbal chirij Jesus queh take niminel ar Rōma

²³Junpech naxquipahba' jenaj k'ij chi naquimolom quib take ra' ri'sil cho ma' Israhel ruc' ma' Lu', yohbal wach q'uihal xquimol quib chipam i pat wilic wi' ma' Lu'. Ar ajic re' ma' Lu' xa re' wo' xip'ut wahk'ek cu rehtal xoquic i k'ij, xik'or queh tijbal chirij rajawric i Dios chi K'atal K'oric. Ma' xa ta re' risakomsjic wach

i tijbal re're' xiban, xik'or la' wo' i k'oroj cho chipam take huj wilic wi' i C'uhbal Ye'oj reh Moyses, je' wo' chipam take huj wilic wi' i c'uhbal xquik'or take raj k'orol C'uhbal i Dios. Je' aj re' ru', re' ma' Lu' til xiyew ric'ux chi c'uhbalanic reh chi re' take c'ahchi' quibirinic reh ench'uk quic'ux eh enquicoj wach chi coric chi re' i Jesus re' i K'atal K'oric k'oroj cho ribiral najtir k'ij.

²⁴Ruc' aj c'uhbalanic xiban ma' Lu' re're', wilic take xquinimej i c'uhbal xik'or eh wilic wo' take ma'xta ncaj niminic. ²⁵Nok re' take ma' xcaj ta niminic naquich'akam nak chic je quib cuc' take quich'il re' jalic chic wach quino'jbal, re' ma' Lu' je' wili xik'or queh:

«Naxk'oric i Lok' laj Uxlalal cuc' take kamam kati't ruc' chi' i raj k'orol C'uhbal i Dios Isayiyas ribihnal, riwi' po' nchel chi reh naxik'or chi je' wili:

²⁶“Re' Dios rik'or chi je' wili:

‘Hiy cuc' nitinamit eh chak'or queh chi re' take niC'uhbal xa naquibiram wo'

xa re' la' ma'xta chic quirakam chirij;

xa naric'uh'tjic wo' take lok' laj nawal chi quiwach,

xa re' la' ma'xta chic quilom ricorquil

²⁷ ru'um nok re' take re' xquicowsaj chic i camna.

Je' wo' xquicupsaj quib eh xquisot'saj wo' quib chipam quino'jbal.

Ru'um chi je' re' xca'n, re' hin ma'xta chic nito'bem take

maj re' take re' ru'um chi ma' quinquisic' ta chic,

naquicahnic chi cup nah chic take

je' wo' chi sot' wach chic take chipam quino'jbal.

Chi je' aj re' ma'xta chic quirakam chirij nic'uhbal ruc' chi'nchel i camna, nqui Dios, nqui Lok' laj Uxlalal.

²⁸«Chi c'ahchi' aj rojic elok wach awuc' tak i xik'or cho Lok' laj Uxlalal, re' hat-tak k'uru' chaweht'alij tak chi cuc' chic take ma' re' ta ra' ri'sil cho ma' Israhel c'ahchi'quin ritak'ab je Dios chi rik'ormojic i c'uhbal nk'oric chirij i co'lbil ib riyew ru'. Cuc' nanibanam chi je' re' maj re' take re' til naquibiram i c'uhbal nanik'orom queh, nqui ma' Lu' queh.

²⁹Chi xquibiraj chic i xik'or i ma' Lu' queh re're', re' take rich ra' ri'sil cho ma' Israhel xi'oj chi xa quiwolem chic quib chirij take k'oric xik'or ma' Lu'.

³⁰Je' aj re' ru', re' ma' Lu' cu xcahnic chic quib hab ar Roma chipam jenaj quimel pat re' ncha'jaljic wi' eh chi je' re' nic' pa' q'uihal take c'acharel qui'oj c'olok ruc' chi rik'o'rjic, xic'ul take pan sukquil c'uxlis. ³¹Je' wo', ru'um chi xye'eric k'ab reh chi c'uhbalanic ar, re' ma' Lu' chi ma' nyo'jic ta nech' ok, xisakomej wo' wach queh i tijbal nk'oric chirij rajawric i Dios chi K'atal K'oric eh je' wo' xik'or queh chi re' Jesus til re're' Ajabes Pahbamaj chi K'atal K'oric.